



儒

藏





精華編四二冊  
經部禮類

儒

藏



北京大學《儒藏》編纂與研究中心

## 圖書在版編目(CIP)數據

儒藏.精華編.四二/北京大學《儒藏》編纂與研究中心編.—北京:北京大學出版社, 2016.10

ISBN 978-7-301-11760-6

I. ①儒… II. ①北… III. ①儒家 IV. ①B222

中國版本圖書館CIP數據核字(2016)第230723號

書名	儒藏(精華編四二) RUZANG
著作責任者	北京大學《儒藏》編纂與研究中心 編
責任編輯	吳遠琴
標準書號	ISBN 978-7-301-11760-6
出版發行	北京大學出版社
地址	北京市海淀區成府路205號 100871
網址	<a href="http://www.pup.cn">http://www.pup.cn</a> 新浪微博: @北京大學出版社
電子信箱	dianjiwenhua@163.com
電話	郵購部62752015 發行部62750672 編輯部62756449
印刷者	北京中科印刷有限公司
經銷者	新華書店
	787毫米×1092毫米 16開本 34印張 511千字
	2016年10月第1版 2016年10月第1次印刷
定價	1200.00元

---

未經許可,不得以任何方式複製或抄襲本書之部分或全部內容。

版權所有,侵權必究

舉報電話: 010-62752024 電子信箱: [fd@pup.pku.edu.cn](mailto:fd@pup.pku.edu.cn)

圖書如有印裝質量問題,請與出版部聯繫,電話: 010-62756370



国家出版基金项目  
NATIONAL PUBLICATION FUND

國家出版基金項目

教育部哲學社會科學研究重大課題攻關項目

「十一五」國家重點圖書出版規劃項目·重大工程出版規劃  
國家社會科學基金重大項目  
北京大學「九八五工程」重點項目

《儒藏》精華編第四二冊

首席總編纂 季羨林

項目首席專家 湯一介

總編纂 湯一介 龐樸 孫欽善 安平秋  
(按年齡排序)

本冊主編 彭林

## 《儒藏》精華編凡例

一、中國傳統文化以儒家思想爲中心。《儒藏》爲儒家經典和反映儒家思想、體現儒家經世做人原則的典籍的叢編。收書時限自先秦至清代結束。

二、《儒藏》精華編爲《儒藏》的一部分，選收《儒藏》中的精要書籍。

三、《儒藏》精華編所收書籍，包括傳世文獻和出土文獻。傳世文獻按《四庫全書總目》經史子集四部分類法分類，大類、小類基本參照《中國叢書綜錄》和《中國古籍善本書目》，於個別處略作調整。凡單書已收入入選的個人叢書或全集者，僅存目錄，並注明互見。出土文獻單列爲一個部類，原件以古文字書寫者一律收其釋文文本。韓國、日本、越南儒學者用漢文寫作的儒學著作，編爲海外文獻部類。

四、所收書籍的篇目卷次，一仍底本原貌，不選編，不改編，保持原書的完整性和獨立性。

五、對入選書籍進行簡要校勘。以對校爲主，確定內容完足、精確率高的版本爲底本，精選有校勘價值的版本爲校本。出校堅持少而精，以校正誤爲主，酌校異同。校記力求規範、精煉。

六、根據現行標點符號用法，結合古籍標點通例，進行規範化標點。專名號除書名號用角號（《》）外，其他一律省略。

七、對較長的篇章，根據文字內容，適當劃分段落。正文原已分段者，不作改動。千字以內的短文一般不分段。

八、各書卷端由整理者撰寫《校點說明》，簡要介紹作者生平、該書成書背景、主要內容及影響，以及整理時所確定的底本、校本（舉全稱後括注簡稱）及其他有關情況。重複出現的作者，其生平事蹟按出現順序前詳後略。

九、本書用繁體漢字豎排，小注一律排爲單行。

《儒藏》精華編第四二冊

經部禮類

儀禮之屬

儀禮注疏(卷第一——卷第二十六)〔東漢〕鄭玄〔唐〕賈公彥……………



# 目錄

校點說明	一
重刻儀禮注疏序	一
儀禮疏卷第一 儀禮卷第一	一
士冠禮第一	一
儀禮疏卷第二	一九
儀禮疏卷第三	四〇
儀禮疏卷第四 儀禮卷第二	五八
士昏禮第二	五八
儀禮疏卷第五	七四
儀禮疏卷第六	九二
儀禮疏卷第七 儀禮卷第三	一一〇
士相見禮第三	一一〇
儀禮疏卷第八 儀禮卷第四	一二七
鄉飲酒禮第四	一二七
儀禮疏卷第九	一四〇

儀禮疏卷第十	一六〇
儀禮疏卷第十一 儀禮卷第五	一七七
鄉射禮第五	一七七
儀禮疏卷第十二	二〇一
儀禮疏卷第十三	二三一
儀禮疏卷第十四 儀禮卷第六	二五六
燕禮第六	二五六
儀禮疏卷第十五	二七七
儀禮疏卷第十六 儀禮卷第七	三〇六
大射第七	三〇六
儀禮疏卷第十七	三二二
儀禮疏卷第十八	三四六
儀禮疏卷第十九 儀禮卷第八	三七一
聘禮第八	三七一
儀禮疏卷第二十	三九二
儀禮疏卷第二十一	四一一
儀禮疏卷第二十二	四三一
儀禮疏卷第二十三	四四八
儀禮疏卷第二十四	四六七

儀禮疏卷第二十五	儀禮卷第九	四九二
公食大夫禮第九		四九二
儀禮疏卷第二十六		五一四
儀禮疏卷第二十六下	儀禮卷第十	五二三
覲禮第十		五二三
儀禮疏卷第二十七		五三五
儀禮疏卷第二十八	儀禮卷第十一	五五四
喪服第十一		五五四
儀禮疏卷第二十九		五七〇
儀禮疏卷第三十		五八一
儀禮疏卷第三十一		六〇一
儀禮疏卷第三十二		六二一
儀禮疏卷第三十三		六三五
儀禮疏卷第三十四		六五二
儀禮疏卷第三十五	儀禮卷第十二	六七〇
士喪禮第十二		六七〇
儀禮疏卷第三十六		六九〇
儀禮疏卷第三十七		七一一
儀禮疏卷第三十八	儀禮卷第十三	七三五

既夕禮第十三	七三五
儀禮疏卷第三十九	七五六
儀禮疏卷第四十	七七二
儀禮疏卷第四十一	七八六
儀禮疏卷第四十二	八〇六
士虞禮第十四	八〇六
儀禮疏卷第四十三	八二九
儀禮疏卷第四十四	八四六
儀禮卷第十五	八四六
特牲饋食禮第十五	八四六
儀禮疏卷第四十五	八六一
儀禮疏卷第四十六	八八一
儀禮疏卷第四十七	九〇二
儀禮卷第十六	九〇二
少牢饋食禮第十六	九〇二
儀禮疏卷第四十八	九一八
儀禮疏卷第四十九	九三五
儀禮卷第十七	九三五
有司徹第十七	九三五
儀禮疏卷第五十	九五八

# 儀禮注疏

〔東漢〕

鄭

玄

注

〔唐〕

賈

公彥

疏

彭

林

校

點



# 目錄

校點說明	一
重刻儀禮注疏序	一
儀禮疏卷第一 儀禮卷第一	一
士冠禮第一	一
儀禮疏卷第二	一九
儀禮疏卷第三	四〇
儀禮疏卷第四 儀禮卷第二	五八
士昏禮第二	五八
儀禮疏卷第五	七四
儀禮疏卷第六	九二
儀禮疏卷第七 儀禮卷第三	一一〇
士相見禮第三	一一〇
儀禮疏卷第八 儀禮卷第四	一二七
鄉飲酒禮第四	一二七
儀禮疏卷第九	一四〇

儀禮疏卷第十	一六〇
儀禮疏卷第十一 儀禮卷第五	一七七
鄉射禮第五	一七七
儀禮疏卷第十二	二〇一
儀禮疏卷第十三	二三一
儀禮疏卷第十四 儀禮卷第六	二五六
燕禮第六	二五六
儀禮疏卷第十五	二七七
儀禮疏卷第十六 儀禮卷第七	三〇六
大射第七	三〇六
儀禮疏卷第十七	三二二
儀禮疏卷第十八	三四六
儀禮疏卷第十九 儀禮卷第八	三七一
聘禮第八	三七一
儀禮疏卷第二十	三九二
儀禮疏卷第二十一	四一一
儀禮疏卷第二十二	四三一
儀禮疏卷第二十三	四四八
儀禮疏卷第二十四	四六七

儀禮疏卷第二十五	儀禮卷第九	四九二
公食大夫禮第九		四九二
儀禮疏卷第二十六		五一四
儀禮疏卷第二十六下	儀禮卷第十	五二三
覲禮第十		五二三
儀禮疏卷第二十七		五三五
儀禮疏卷第二十八	儀禮卷第十一	五五四
喪服第十一		五五四
儀禮疏卷第二十九		五七〇
儀禮疏卷第三十		五八一
儀禮疏卷第三十一		六〇一
儀禮疏卷第三十二		六二一
儀禮疏卷第三十三		六三五
儀禮疏卷第三十四		六五二
儀禮疏卷第三十五	儀禮卷第十二	六七〇
士喪禮第十二		六七〇
儀禮疏卷第三十六		六九〇
儀禮疏卷第三十七		七一一
儀禮疏卷第三十八	儀禮卷第十三	七三五

既夕禮第十三	七三五
儀禮疏卷第三十九	七五六
儀禮疏卷第四十	七七二
儀禮疏卷第四十一	七八六
儀禮疏卷第四十二	八〇六
士虞禮第十四	八〇六
儀禮疏卷第四十三	八二九
儀禮疏卷第四十四	八四六
特性饋食禮第十五	八四六
儀禮疏卷第四十五	八六一
儀禮疏卷第四十六	八八一
儀禮疏卷第四十七	九〇二
少牢饋食禮第十六	九〇二
儀禮疏卷第四十八	九一八
儀禮疏卷第四十九	九三五
有司徹第十七	九三五
儀禮疏卷第五十	九五八

## 校點說明

《儀禮》係儒家六經之一，是記載中國先秦時代各種禮儀制度的專書。其成書年代已無法確知。古文經學家據《禮記·明堂位》所云：「周公踐天子之位，以治天下。六年，朝諸侯於明堂，制禮作樂。」認定《儀禮》等書即周公所制之禮。今文經學家則認為《儀禮》為孔子追溯三代之禮而作。這兩種說法並未得到現代學者的認可。《禮記·雜記》記載孺悲向孔子問士喪禮之事，「《士喪禮》於是乎書」，故今人沈文倬先生認為《士喪禮》四篇，即《喪服》、《士喪禮》、《士虞禮》、《既夕禮》，內容貫通，成書年代當在魯哀公末年至魯悼公初年；而《儀禮》全書，則是由孔門弟子後學陸續撰作，此說較為公允。

秦焚毀典籍，《儀禮》一書亦未能倖免。漢初，魯高堂生傳《士禮》十七篇，即今本《儀禮》。而同時之徐生善為容，為禮官大夫。宣帝時，后倉最明，而傳戴德、戴聖及慶普三人，三家皆立於學官。又有《禮古經》五十六卷，出自魯淹中，即古文經。其中有十七篇與今本《儀禮》文相似，另多出三十九篇。即劉歆《移太常博士書》所云「《逸禮》有三十九篇」，今已不傳。一九五七年，甘肅武威磨嘴子六號漢墓出土西漢晚期《儀禮》竹木簡，共四九六枚，二七三三二字，分甲、乙、丙三種，甲本包括《士相見》、《特牲》、《少牢》、《有司》、《燕禮》、《泰射》七篇，乙本有《服傳》一篇，丙本僅《喪服》一篇。漢簡本篇次與今本《儀禮》及大、小戴本均不同，文字與今本亦有出入。

終東漢之世，治《儀禮》者雖有傳授，而習者實寡。漢靈帝熹平年間，蔡邕奏定六經文字，而有熹平石經之作，《儀禮》亦與焉。大儒鄭玄遍注群經，尤以《三禮注》成就最高。《儀禮注》中，鄭氏兼用

今古文，博采衆家，文字精審，至今仍是《儀禮》最重要的注本。三國時，王肅亦曾注解是經，唐時已不傳。南北朝治禮名家衆多，咸以鄭氏學爲宗。而齊之黃慶、隋之李孟昶最爲著名。唐高宗永徽年間，太學博士、弘文館學士賈公彥即以黃、李二家義疏之作爲基礎，對經注疏通證明，增廣補益，間下己意，而成《儀禮疏》，遂駕諸家而上之，成爲《儀禮》注釋史上繼鄭注之後，又一重要的著作。故後世流傳頗廣。

北宋，三《禮》之學講習亦盛。《儀禮》一經，先後有李如圭《儀禮集釋》、《儀禮釋官》、《儀禮綱目》，張淳《儀禮識誤》之作。而朱子之《儀禮經傳通解》一書，以十七篇爲主，取大、小戴及它書涉禮者附之。朱子本人僅成家、鄉、學、邦國、王朝五禮，而喪、祭未成，後由黃榦、楊復續成。魏了翁之《儀禮要義》來源於宋景德官本，雖以抄掇爲主，但正如前人所云，「有刪節而絕無改竄」，對於保存注疏有相當之價值。清代重新合刻《儀禮》經、注、

疏，即以之補宋景德官本《儀禮疏》之缺卷。

有宋一代，十三經注疏合刻本陸續問世。而《儀禮》一經，南宋末，經注與疏猶自別行。直至明嘉靖五年陳鳳梧始合《儀禮疏》於經注而並其卷第。陳本始刻於山東，後版歸南京國子監。故南雍本由陳本而來。之後汪文盛、李元陽相繼刊刻此書。其中李元陽本，因其刻于福建，世稱閩本，爲九行二十一字，小字雙行，白口，四周單邊。汪文盛刻本亦於嘉靖間刊于福州，每半葉十行，行二十字，注文雙行，疏字外加一圈。萬曆時，北京國子監據閩本重雕，始萬曆十四年（一五八六），成於萬曆二十一年，稱北監本，分卷皆依閩本，唯注文改用小字單行，空左偏右，與閩本同，中字不同，版心皆記刊刻年日，每標籤題次行，分別列校刊及重修者祭酒司業銜名。明崇禎元年（一六二八），毛晉汲古閣刊群經注疏，至崇禎十三年告竣，以北監本翻刻，行款訛脫，多依其舊。爲九行二十一字，小字雙行同，白口，左右雙邊，單魚，亦係仿刻閩



本。明嘉靖時，又有聞人詮校、應櫬刻《儀禮注疏》十七卷，每半頁九行十八字，小字雙行同，白口，四周雙邊。亦是據陳本而來。清乾隆四年（一七三九），武英殿翻刻《十三經注疏》，十行二十一字，小字雙行同，白口，左右雙邊，單魚尾，亦據明崇禎北監本而刻。而乾隆三十八年于敏中《摘藻堂四庫全書薈要》所錄之《儀禮注疏》及《四庫全書》抄錄者，亦從武英殿本而來。

以上諸刻《儀禮注疏》，均為十七卷本。「一切惟《通解》之從，遂盡失賈氏之舊」。「散疏入注，而注之分卷，遂為疏之分卷」，割裂五十卷之《儀禮疏》分系於經注之下為十七卷。且經注後即附陸德明《釋文》。

清代禮學興盛，名家輩出。由張爾岐發其端，吳廷華、蔡德晉、盛世佐、江永、凌廷堪、段玉裁、胡承珙、沈彤、程瑤田、褚寅亮、丁晏、胡匡衷、張惠言、胡培翬等繼之，曹元弼殿其後，在《儀禮》研究方面都做出了重要的貢獻。在《儀禮》文本的校勘

方面也取得了豐碩的成果。盧文弨《儀禮注疏詳校》、金曰追《儀禮經注疏正訛》、阮元《儀禮石經校勘記》、徐養原《儀禮注疏校勘記》、曹元弼《禮經校釋》等一系列高水準校勘之著作問世。由於學界對《儀禮》一書的持續關注，人們日益不滿於十七卷系統之《儀禮注疏》，於是有《儀禮注疏》新的合刻本問世。先是，藏書家黃丕烈家藏宋景德官本《儀禮疏》，不過缺卷三十二至三十七，除此尚缺十三翻。此本後歸汪士鍾藝芸書舍收藏，後由汪氏影寫重雕于道光十年，由顧千里董其事。但在此之前，張敦仁、阮元《儀禮注疏》刻本，都曾以唐石經經文、宋嚴州單注本與宋景德官本《儀禮疏》之校本合刊《儀禮注疏》。張本刻於嘉慶十一年，但疏所缺卷用魏了翁《儀禮要義》補足。所缺卷葉，則用其他明本補足。校對係清代校勘名家顧廣圻所為。張本經、注、疏選擇精當，而又精校熟讎，故世稱善本。張本經注以疏為主，故從宋代《儀禮疏》五十卷之卷第，插經注於其中，故為五十卷本，

單葉十行十七字，小字雙行二十三字，白口，左右雙邊。而阮本刻於嘉慶二十年，作法一仍張氏，亦為五十卷本。阮刻於江西南昌府學，故稱南昌府學本。阮元所刻《十三經注疏》又有同治十年（一八七一）廣東書局刊本，同治十一年江西書局刊本，光緒十三年（一八七七）上海脈望仙館石印本，光緒十八年湖南寶慶務本書局刊本，光緒十三年上海點石齋石印本，民國十三年（一九二四）上海掃葉山房石印本，民國十一年上海錦章圖書局石印本，民國十四年上海世界書局石印本，一九五七年北京中華書局本。以上諸本，因多次翻刻，略有異同。阮刻《儀禮注疏》以中華書局《十三經注疏》本最為通行，但中華書局本阮刻《儀禮注疏》，實非嘉慶二十年南昌府學本之舊，其中文字多有改動，不乏妄改之處，使得其版本價值遜色不少。

本次校點，以北京大學圖書館藏張敦仁本為底本，酌取阮元《十三經注疏校勘記》（簡稱「阮校」）與孫詒讓《十三經注疏校記》（簡稱「孫校」）及

曹元弼《禮經校釋》（簡稱「曹校」）的校勘成果。在校點過程中，主要過錄了北大社《十三經注疏》本的點校成果，是由我的研究生羅婷婷完成的。並參考了黃侃、王輝及方向東等人相關著作與論文。由於時間及筆者學力限制，於校勘、標點等方面均有許多不足之處，敬請讀者諒解與指正。

校點者 彭林

## 重刻儀禮注疏序

江寧府知府陽城張敦仁撰

《儀禮》經、鄭注、賈疏，前輩每言其文字多誤者，予因徧搜各本而參稽之，知經文尚存唐開成石刻可以取正，注文則明嘉靖時所刻頗完善，其疏文之誤，自陳鳳梧本以下約略相同。比從元和顧千里行篋中見所用宋景德官本手校疏，凡正譌補脫、去衍乙錯，無慮數千百處，神明煥然，爲之改觀。千里又用宋嚴州本校經及注，視嘉靖本尤勝。皆據吳門某氏家之所藏也。夫二本之在天壤間，爲功於此經非淺，而獲見者罕，不亦惜哉。遂與千里商榷，合而編之，重刻

以行世。其列卷依景德爲五十者，以尚是賈氏所分也。自卅二至卅七損失六卷，校以魏鶴山《要義》而循其次第者，魏所用即景德本也。餘卷有缺葉，不得不取明以來本足之，而必記其數者，傳信也。經、注之文間有與疏違互者，以其元非一本，不可強同也。嚴州本之經較諸唐石刻或有一二不合，今猶仍之者，著異本之所自出也。注與疏兩宋本非必全無小小轉寫之譌，不欲用意見更易者，所以留其真，慎之至也。至於經也、注也、疏也，於各本孰爲同、孰爲異，祛數百年來承譌襲舛，以還唐、宋相傳之舊，則釐然具在，不難覆案也。若夫近日從事校讎者不止一家，覈其論說，或取諸《經傳通解》等，或直憑胸臆而已，莫不猶治絲而棼之，手雖繁而絲益亂。唯執此訂彼，其是非得失庶可決定也。自今卓絕之士如張

蒿庵、顧亭林其人，以爲依據，乃無當時殘缺之慨。而由是脩明通儒之業，則聖之經、賢之傳，其精微且於斯，焉在文字云乎哉。嘉慶丙寅七月。

江寧府知府陽城張敦仁編校，元和縣學

生員顧廣圻覆校，嘉慶十一年六月刊。

## 儀禮疏卷第一 儀禮卷第一

唐朝散大夫行大學博士弘

文館學士臣賈公彥等撰

《儀禮疏》序。○竊聞道本沖虛，非言無以表其疏，言有微妙，非釋無能悟其理。是知聖人言曲，事資注釋而成。至於《周禮》、《儀禮》，發源是一，理有終始，分爲二部，並是周公攝政太平之書。《周禮》爲末，《儀禮》爲本，本則難明，末便易曉。是以《周禮》注者則有多門，《儀禮》所注後鄭而已。其爲章疏，則有二家：信都黃慶者，齊之盛德；李孟哲者，隋曰碩儒。<sup>①</sup>慶則舉大略小，經注疎漏，猶登山遠望而近不知。哲則舉小略大，經注稍周，似入室近觀而遠不察。二家之疏，互有脩短，<sup>②</sup>時之所尚，李則爲先。案《士冠》三加，有緇布冠、皮弁、爵弁，既冠又著玄冠見於君，有此四種之冠，故記人下陳緇布冠、委貌、周弁以釋經之四種。經之與記都無天子冠法，而李云委貌與

弁皆天子始冠之冠，李之謬也。《喪服》一篇，凶禮之要，是以南北二家章疏甚多，時之所以皆資黃氏。案鄭注《喪服》引《禮記·檀弓》云：「經之言實也，明孝子有忠實之心，故爲制此服焉。」則經之所作，表心明矣。而黃氏妄云：「衰以表心，經以表首。」以黃氏公違鄭注，黃之謬也。黃、李之訓，略言其一，餘足見矣。今以先儒失路，後宜易塗，故悉鄙情，聊裁此疏。未敢專欲，以諸家爲本，擇善而從，兼增己義。仍取四門助教李玄植詳論可否，僉謀已定，庶可施以函丈之儒，<sup>③</sup>青衿之俊，幸以去瑕取玖，得無譏焉。

### 士冠禮第一

疏「士冠禮第一」○鄭《目錄》云：「童

子任職居士位，年二十而冠。主人玄冠、朝服，則是於諸侯。<sup>④</sup>天子之士朝服、皮弁、素積。古者四民世事，士之

①「曰」，原本作「日」，據阮校改。

②「脩」，阮校云：《要義》作「長」。

③「施以」，阮校云：《要義》作「以施」。

④「則是於諸侯」，阮校云：毛本「是」下有「仕」字，敕作「則是諸侯之仕」。

子恒爲士。冠禮於五禮屬嘉禮，大、小戴及《別錄》此皆第一。」○釋曰：鄭云「童子任職居士位，年二十而冠」，爲士身加冠。知者，鄭見下《昏禮》及《士相見》皆據士身自昏、自相見，又《大戴禮·公冠》篇及下「諸侯有冠禮，夏之末造」，亦據諸侯身自加冠，故鄭據士身自加冠爲目也。鄭云「四人事，士之子恒爲士者」，是《齊語》文。彼云：「桓公謂管仲曰：『成人之事若何？』管子對曰：『四人勿雜處也。』公曰：『處士農工商若何？』管子對曰：『昔聖王之處士，就閑燕也；處工，就官府也；處商，就市井也；處農，就田野也。少而習焉，其心安焉。是四人事，士之子恒爲士也。』」引之者，證此士身年二十加冠法。若士之子，則四十彊而仕，何得有二十爲士自加冠也？「二十而冠」者，鄭據《曲禮》文「二十曰弱冠」，故云「年二十而冠」。其大夫始仕者，二十已冠訖，五十乃爵命爲大夫，故大夫無冠禮。又案《喪服》小功章云：「大夫爲昆弟之長殤。」鄭云：「大夫爲昆弟之長殤小功，謂爲士者若不仕者也。以此知爲大夫無殤服也。」《小記》云：「丈夫冠而不爲殤。」<sup>①</sup>大夫身已加冠，降兄殤在小功，是身有德行，得爲大夫冠，不以二十始冠也。若諸侯則十二而冠，故《左傳》襄九年：「晉侯與諸侯伐鄭還，」公送晉侯，以公宴于河上，問公年，

季武子對曰：「會于沙隨之歲，寡君以生。」注云：「沙隨在成十六年。」晉侯曰：「十二年矣，是謂一終，一星終也。國君十五而生子。冠而生子，禮也。君可以冠矣。」是諸侯十二而冠也。若天子亦與諸侯同十二而冠，故《尚書·金縢》云：「王與大夫盡弁。」時成王年十五，云「王與大夫盡弁」，則知天子，亦十二而冠矣。又《大戴禮》云：「文王十三生伯邑考。」《左傳》云：「冠而生子，禮也。」是殷之諸侯亦十二而冠。若夏之天子，諸侯與殷天子，亦十二而冠可知。若天子之子，則亦二十而冠，故《禮記·祭法》云：「王下祭殤五。」又《禮記·檀弓》云：「君之適長殤，車三乘。」是年十九已下乃爲殤，<sup>②</sup>故二十乃冠矣。若天子諸侯冠，自有天子諸侯冠禮，故《大戴禮》有《公冠》篇，天子自然有冠禮，但《儀禮》之內亡耳。士既三加，爲大夫早冠者亦依士禮三加。若天子諸侯禮則多矣。故《大戴禮·公冠》篇云「公冠四加」者，緇布、皮弁、爵弁後加玄冕，天子亦四加，後當加袞冕矣。案下文云：「天子之元子猶士，

① 「丈」原作「大」，阮校云：「閩本、毛本作「丈」並依《喪服小記》改正。今據改。」

② 「乃」，曹校謂疑當爲「仍」。

天下無生而貴者。」<sup>①</sup>則天子之子雖早冠，亦用士禮而冠。案《家語·冠頌》云：「王太子之冠擬冠。」則天子元子亦擬諸侯四加。若然，諸侯之子不得四加，與士同三加可知。鄭又云「冠於五禮屬嘉禮」者，鄭據《周禮》大宗伯所掌五禮：吉、凶、賓、軍、嘉而言。《宗伯》云：「以嘉禮親萬民。」下云：「以昏冠之禮親成男女。」是冠禮屬嘉禮者也。鄭又云「大、小戴及《別錄》此皆第一」者，大戴、戴聖與劉向爲《別錄》，十七篇次第皆《冠禮》爲第一，《昏禮》爲第二，《士相見》爲第三，自茲以下，篇次則異。故鄭云「大、小戴、《別錄》即皆第一」也。<sup>②</sup>其劉向《別錄》，即此十七篇之次是也，皆尊卑吉凶次第倫敘，故鄭用之。至於大戴，即以《士喪》爲第四，《既夕》爲第五，《士虞》爲第六，《特性》爲第七，《少牢》爲第八，《有司徹》爲第九，《鄉飲酒》第十，《鄉射》第十一，《燕禮》第十二，《大射》第十三，《聘禮》第十四，《公食》第十五，《覲禮》第十六，《喪服》第十七。小戴於《鄉飲》、《鄉射》、《燕禮》、《大射》四篇亦依此《別錄》次第，而以《士虞》爲第八，《喪服》爲第九，《特性》爲第十，《少牢》爲第十一，《有司徹》爲第十二，《喪》爲第十三，<sup>③</sup>《既夕》爲第十四，《聘禮》爲第十五，《公食》爲第十六，《覲禮》爲第十七。皆尊卑吉凶雜亂，故鄭玄皆不從之矣。

## 儀禮疏

「儀禮」○釋曰：儀禮者，一部之大名，士冠者，當

篇之小號。退大名在下者，取配注之意故也。然《周禮》言周不言儀，《儀禮》言儀不言周，既同是周公攝政六年所制，題號不同者，《周禮》取別夏、殷，故言周，《儀禮》不言周者，欲見兼有異代之法。故此篇有「醺用酒」，《燕禮》云「諸公」，《士喪禮》云「商祝」、「夏祝」，是兼夏殷，故不言周。又《周禮》是統心，《儀禮》是履踐，外內相因，首尾是一，故《周禮》已言周，《儀禮》不須言周，周可知矣。且《儀禮》亦名《曲禮》，故《禮器》云：「經禮三百，曲禮三千。」鄭注云：「曲猶事也，事禮謂今禮也，其中事儀三千。」言儀者，見行事有威儀；言曲者，見行事有屈曲：故有二名也。鄭氏注疏「鄭氏注」○釋曰：《後漢書》云：「鄭玄，字康成，青州北海郡高密縣人，鄭崇之後也。」言「注」者，注義於經下，若水之注物。亦名爲「著」，故鄭敘云：「凡著三禮七十二篇。」云「著」者，取著明經義者也。孔子之徒言

① 「下」原作「子」，據阮本改。

② 「即」，阮校云：毛本作「此」。

③ 「喪」上，阮校云：《要義》有「士」字。

「傳」者，取傳述之意。爲意不同，<sup>①</sup>故題目有異也。但《周禮》六官六十，敘官之法，事急者爲先，不問官之大小。《儀禮》見其行事之法，賤者爲先，故以士冠爲先，無大夫冠禮，諸侯冠次之，天子冠又次之，其昏禮亦士爲先，大夫次之，諸侯次之，天子爲後；諸侯鄉飲酒爲先，天子鄉飲酒次之；鄉射、燕禮已下皆然。又以《冠》、《昏》、《士相見》爲先後者，以二十而冠，三十而娶，四十彊而仕，即有摯見鄉大夫、見己君及見來朝諸侯之等。又爲鄉大夫、州長行鄉飲酒、鄉射之事，已下先吉後凶，盡則行祭祀吉禮。<sup>②</sup>次敘之法，其義可知，略陳《儀禮》元本。至於禮之大義，備於《禮記疏》。

### 士冠禮。筮于廟門。筮者，以著問日吉凶於

《易》也。冠必筮日於廟門者，重以成人之禮成子孫也。

席謂禰廟，不於堂者，嫌著之靈由席神。

**疏**「士冠」至「廟

門」○釋曰：自此至「宗人告事畢」一節，論將行冠禮，先筮取日之事。案下文云「布席于門中，闕西，闕外」者，闕爲門限，<sup>③</sup>即是門外。故《特牲禮》筮日，主人「即位於門外，西面」。此不言門外者，闕外之文可參，故省文也。○注

「筮者」至「廟神」○釋曰：鄭知筮以著者，《曲禮》云「龜曰卜，蓍曰筮」，故知筮以著也。云「問日吉凶於《易》也」者，下云：「若不吉，則筮遠日，如初儀。」又案《周禮》大卜掌三易：一曰《連山》，二曰《歸藏》，三曰《周易》。筮得卦，以《易》辭占吉凶，故云「問日吉凶於《易》也」。不筮月者，《夏小正》云：「二月綏多士女，冠子取妻時也。」既有常月，故不筮也。云「冠必筮日於廟門者，重以成人之禮成子孫也」者，案《冠義》云：「筮日筮賓，所以敬冠事。敬冠事，所以重禮。」是筮日爲重禮之事也。《冠義》又云：「古者重冠。重冠，故行之於廟。行之於廟者，所以尊重事。尊重事，而不敢擅重事。不敢擅重事，所以自卑而尊先祖也。」是「成人之禮成子孫也」。此經唯論父子、兄弟，不言祖孫，鄭兼言孫者，家事統於尊，若祖在則爲冠主，故兼孫也。云「廟謂禰廟」者，案《昏禮》行事皆直云「廟」，記云「凡行事受諸禰廟」，此經亦直云「廟」，故知亦於禰廟也。然《儀禮》之內單言「廟」者皆是禰廟，若非禰廟，則以廟名

①「意」，阮校云：毛本作「義」。

②「盡」上，阮校云：毛本有「凶」字。

③「闕」，阮校云：盧文弨改作「闕」。當是。



別之。故《聘禮》云：「賓朝服問卿，卿受于祖廟。」又受聘在始祖廟，即云「不腆先君之祧」。是不言於廟，舉祖、祧以別之也。士於廟，若天子、諸侯冠，在始祖之廟，是以《襄九年》季武子云：「以先君之祧處之。」祧則與《聘禮》先君之祧，謂遷主所藏始祖廟也。<sup>①</sup>若然，服氏注以祧為曾祖者，<sup>②</sup>以其公還及衛，冠於衛成公之廟。服注：「成公，衛曾祖。」故以祧為曾祖廟，時不冠於衛之始祖，以非己廟故也。無大夫冠禮，若幼而冠者，與士同在禰廟也。云「不於堂者，嫌著龜之靈由廟神」者，此據經冠在廟堂，此著筮在門外，不同處，故以廟決堂。<sup>③</sup>以著自有靈，知吉凶，不假廟神，故云「嫌著龜之靈由廟神」也。案《天府職》云：「季冬，陳玉，以貞來歲之美惡。」注云：「問歲之美惡，謂問於龜。凡卜筮者，實問於鬼神，龜筮能出其卦兆之占耳。」若然，卜筮實問七八九六之鬼神，故以六玉禮耳。而龜筮直能出其卦兆之占，似無靈者，各有所對。若以著龜對生數、成數之鬼神，則著龜直能出卦兆，不得有神。若以卦對生成之鬼神，則著龜亦自有神。是以《易·繫辭》云：「著之德圓而神。」又云：「定天下之吉凶，成天下之亹亹者，莫善於蓍龜。」又郭璞云：「上有蔭叢蓍，下有千齡蔡。」凡蟲之智莫善於龜，凡草之靈莫善於蓍，蓍龜自有靈

也。若蓍自有神，<sup>④</sup>不假廟神也。不於寢門筮者，一取成人之禮成子孫，二兼取鬼神之謀。故《易·繫辭》云「人謀鬼謀」，鄭注云「鬼謀，謂謀卜筮於廟門」是也。主人玄冠，朝服，緇帶，素鞞，即位于門東，西面。主人，將冠者之父兄也。玄冠，委貌也。朝服者，十五升布衣而素裳也。衣不言色者，衣與冠同也。筮必朝服者，尊蓍龜之道。緇帶，黑緇帶。素鞞，白鞞，長三尺，上廣一尺，下廣二尺，其頸五寸，肩、革帶博二寸。天子與其臣玄冕以視朔，皮弁以日視朝。諸侯與其臣皮弁以視朔，朝服以日視朝。凡染黑，五人為緇，七人為緇，玄則六人與？**疏**「主人」至「西面」○釋曰：此主人將欲謀日之時，先服，即位於禰廟門外東，西面立，以待筮事也。○注「主人」至「入與」○釋曰：經直云「主人」，當是父子加冠之禮。知兼有兄者，《論語》云：「出則事公卿，入則事父兄。」父兄者，一家之統，父不

①「廟」，原作「同」，今據本書卷二十六下改。

②「氏」，阮校云：毛本作「虔」。

③「廟」，曹校云疑當為「門」。

④「若」，阮校云：毛本作「是知」。

在則兄爲主可知，故兼其兄也。又案下文：「若孤子，則父兄戒宿。冠之日，主人紓而迎賓。」則無親父親兄，故彼注云：「父兄，諸父諸兄。」則知此主人迎賓是親父親兄也。云「玄冠，委貌」者，此云「玄冠」，下記云「委貌」，彼云「委貌」，見其安正容體，此云「玄冠」，見其色，實一物也。云「朝服者，十五升布衣」者，《雜記》云：「朝服十五升布也。」云「素裳」者，雖經不言裳，裳與鞞同色。云「素鞞」者，<sup>①</sup>故知裳亦積白素絹爲之也。云「衣不言色者，衣與冠同也」者，禮之通例，衣與冠同色，故《郊特牲》云「黃衣、黃冠」是也。裳與鞞同色，故下爵弁服纁裳、韎鞞，韎鞞即纁之類是也。<sup>②</sup>經直云「朝服」，不言色，與冠同可知也。若然，鄭不言裳與鞞同色者，舉衣與冠同，裳與鞞同亦可知，故不言也。其衣冠色異，經即別言之，是以下云爵弁服純衣是也。云「筮必朝服者，尊蓍龜之道」者，此決正冠時，主人服玄端、爵鞞，不服，<sup>③</sup>此服朝服，是尊蓍龜之道也。若然，下又云「有司如主人服」，又「宿賓，賓如主人服」，又宿贊冠者及夕爲期皆朝服。云「尊蓍龜」者，案《鄉飲酒》主人朝服，則此有司、賓主朝服，自是尋常相見所服，非特相尊敬之禮，此筮而朝服，決正冠時與士之祭禮入廟常服玄端，今此筮亦在廟，不服玄端，故云「尊蓍龜之道」。此

筮唯有蓍草，言龜者，按《周禮》小事徒筮而已，若大事，先筮而後卜。龜筮是相將之物，同著朝服，故兼言龜，是以《雜記》卜筮皆朝服也。案《特牲禮》筮日與祭同服玄端，《少牢》筮日與祭同服朝服，不特尊蓍龜者，彼爲祭事，龜不可尊於先祖，故同服，此爲冠事，冠事龜可尊於子孫，故服異也。云「緇帶，黑繒帶」者，案《玉藻》云：「君素帶，終裊；大夫素帶，裊垂；士練帶，率下裊。」注云：「大夫裊其紐及末，士裊其末而已。」又云：「雜帶，君朱綠，大夫玄華，士緇裊。」鄭云：「君裊帶，上以朱，下以綠，終之；大夫裊垂，外以玄，內以華；士裊垂之下，外內皆以緇，是謂緇帶。」鄭彼云「是謂」者，指此文也。若然，天子、諸侯帶繞腰及垂者皆裊之；大夫則不裊其繞腰者，直裊垂之三尺屈而重者；士則裊其末，繞三尺所垂者，不裊在者。若然，大帶所用物，大夫已上用素，士練繒爲帶體，所裊者用緇。

①「云素鞞者」，阮校云：《通解》作「既云素鞞」。《要義》無此下十六字，別有「素裳積白素絹爲之」八字在「其衣冠色異」上。

②「韎鞞即纁之類」，曹校云「韎」字當刪。

③「不服」下，曹校云脫「朝服」二字。

則此言「緇」，據裨者而言也。云「士帶博二寸，再繚四寸，屈垂三尺」者，此亦《玉藻》文。大夫已上，大帶博四寸，此士卑，降於大夫已上，博二寸，再繚共為四寸，屈垂三尺，則大夫已上亦屈垂三尺同矣。云「素鞞，白韋鞞」者，案《玉藻》云：「鞞，君朱，大夫素，士爵韋。」彼以「鞞」為摠目，而云「君朱，大夫素，士爵韋」，是鞞色不同。下云「韋」者，是君、大夫同用韋也。但彼是玄端服之鞞，此士用素韋為之，故鄭云「白韋鞞」也。又云鞞「長三尺」至「博二寸」，亦皆《玉藻》文。鄭彼注云：「頸五寸，亦謂廣也。頸中央、肩兩角，皆上接革帶。肩與革帶廣同。」此鞞即鞞也，祭服謂之鞞，朝服謂之鞞也。云「天子與其臣玄冕以視朔，皮弁以日視朝」者，此約《玉藻》而知。案彼云「天子玄端，聽朔於南門之外，皮弁以日視朝」，又云「諸侯皮弁以聽朔於大廟，朝服以日視朝於內朝」，彼注云「端當為冕」，謂天子以玄冕聽朔於南門之外明堂之中。彼皆不言臣，此鄭兼言臣者，欲見在朝君臣同服。引之者，證此玄冕朝服而簪者是諸侯之士。則諸侯與其臣與子加冠同服皮弁以簪日，天子與其臣與子加冠同服玄冕以簪日矣。知天子服玄冕，諸侯服皮弁以簪日者，鄭既取君臣同服，明簪時還君臣同服。若云天子用玄冕，諸侯用皮弁，<sup>①</sup>其臣不得上同

于君，君下就臣，同朝服也。云「凡染黑，五入為緇，七入為緇，玄則六入與」者，案《爾雅》「一染謂之緇，再染謂之緇，三染謂之緇」，此三者皆是染赤法。《周禮·鍾氏》染鳥羽云：「三人為緇，五人為緇，七人為緇。」此是染黑法，故云凡染黑也。但《爾雅》及《周禮》無四人與六人之文，《禮》有色朱玄之色，故注此玄則六入，下經注云「朱則四人」，無正文，故皆云「與」以疑之。但《論語》有紺緇連文，紺又在緇上，則以緇入赤為朱，若以緇入黑則為紺。故《淮南子》云：「以涅染緇則黑于涅。」<sup>②</sup>又以紺入黑汁則為緇，故紺緇連言也。若然，玄為六入，緇為七入，深淺不同。而鄭以衣與冠同，以緇與玄同色者，大同小異，皆是黑色，故云同也。有司如主人服，即位于西方，東面，北上。有司，群吏有事者，謂主人之吏，所自辟除府史以下，今時卒吏及假吏是也。

**疏**「有司」至「北上」

○釋曰：此論主人有司從主人有事，故立位于廟門外西

<sup>①</sup> 兩「用」字，阮校云：閩本俱作「同」，陳本上句作「同」，下句作「用」。

<sup>②</sup> 「緇」，阮校云：似當作「紺」。後「爵弁服」節疏引作「紺」。

方，東面以待事也。○注「有司」至「是也」○釋曰：士雖無臣，皆有屬吏、胥徒及僕隸，故云「有司，群吏有事者」也。云「謂主人之吏，所自辟除府史以下」者，<sup>①</sup>案《周禮》三百六十官之下，皆有府史、胥徒，不得君命，主人自辟除，去役賦，補置之是也。又案《周禮》皆云「府史」，此云「群吏」，吏、史亦一也，故舉漢法為證。又《周禮》鄭注云：「官長所自辟除」，此云「主人」者，以此經云「主人」，故依經而直云「主人」，中亦為長者也。<sup>②</sup>又此注以有司為群吏，案《特牲》以有司為士屬吏，不同者，言「群吏」則為府吏、胥徒也，言「屬吏」則謂君命之士。是以下文「宿贊冠者」注云：「謂賓若他官之屬，中士若下士也。」又「主人贊者」，亦云「其屬中士若下士」。是言「屬」者，尊之義。《特牲》之有司，士之屬吏，亦親類也。《特牲》「有司」之上有「子姓」，此文無者，彼祭祀事重，故子姓皆來，此冠事稍輕，故容有不至，故不言。筮與席、所卦者具饌于西塾。筮所以問吉凶，謂蓍也。所卦者，所以畫地記爻。《易》曰：「六畫而成卦。」饌，陳也。具，俱也。西塾，門外西堂也。疏「筮與」至「西塾」○釋曰：下云「布席于門中，闌西，闕外」，彼據筮。此云「西塾」，據陳處。<sup>③</sup>○注「筮

所」至「堂也」○釋曰：「筮所以問吉凶，謂蓍也」者，案《曲禮》云：「龜為卜，策為筮。」<sup>④</sup>故知問吉凶謂蓍。案《易》筮法用四十九蓍，「分之為二以象兩，卦一以象三，揲之以四，以象四時，歸奇于扚以象閏。十有八變而成卦」是也。云「所卦者，所以畫地記爻」者，筮法依七八九六之爻而記之。但古用木畫地，今則用錢：以三少為重錢，重錢則九也；三多為交錢，交錢則六也；兩多一少為單錢，單錢則七也；兩少一多為拆錢，拆錢則八也。案《少牢》云：「卦者在左坐，卦以木。」故知古者畫卦以木也。云「《易》曰：『六畫而成卦』」者，《說卦》文。彼云：「昔者聖人之作《易》也，將以順性命之理，是以立天之道曰陰與陽，立地之道曰柔與剛，立人之道曰仁與義，兼三才而兩之，故《易》六畫成卦。」注云：「三才，天地人之道。六畫，畫六爻。」引之者，證畫地識爻之法。云「西塾，門外西堂也」者，案《爾

①「者」上，阮校云：《要義》有「今時卒吏及假吏是也」九字，與徐本注合。

②「中」，阮本作「主」，曹校云各本作「主」似是。

③「處」下，阮校云：毛本有「言」字。

④「策」，阮校云：毛本作「筮」，陳作「策」。

雅》云：「門側之堂謂之塾。」即《士虞禮》云：「羞燔俎在內西塾上，南順」是也。筮在門外，故知此經西塾，門外西堂也。布席于門中，闔西，闔外，西面。闔，門槪。

闔，闔也。古文「闔」爲「𨵿」，「闔」爲「𨵿」。疏「布席」至

「西面」○釋曰：此所布之席，擬卜筮之事。言在「門中」者，以大分言之。云「闔西，闔外」者，指陳席處也。○注

「闔門」至「爲𨵿」○釋曰：云「闔，門槪」者，闔一名槪也。

云「闔，闔也」者，《曲禮》云：「外言不入于闔。」闔，門限，與

闔爲一也。云「古文闔爲𨵿，闔爲𨵿」者，遭于暴秦燔滅典

籍，漢興求錄遺文之後，有古書、今文。①《漢書》云：魯人

高堂生，爲漢博士，傳《儀禮》十七篇，是今文也；至武帝之

末，魯恭王壞孔子宅，得古《儀禮》五十六篇，②其字皆以

篆書，是爲古文也。古文十七篇與高堂生所傳者同，而字

多不同，其餘三十九篇絕無師說，秘在於館。鄭注《禮》之

時，以今、古二字並之。若從今文不從古文，即今文在經，

闔、闔之等是也，於注內疊出古文，𨵿、𨵿之屬是也。若從

古文不從今文，則古文在經，注內疊出今文，即下文「孝友

時格」，鄭注云「今文格爲嘏」，又《喪服》注「今文無冠布

纓」之等是也。此注不從古文𨵿、𨵿者，以𨵿、𨵿非門限之

義，③故從今不從古也。《儀禮》之內，或從今，或從古，皆

逐義彊者從之。若二字俱合義者，則互挽見之，即下文云

「壹揖壹讓升」，注云「古文壹皆作一」。《公食大夫》「三牲

之肺不離，贊者辯取之，一以授賓。」④注云：「古文一爲

壹。」是大小注皆疊今古文，二者俱合義，故兩從之。又鄭

疊古今之文者，皆釋經義盡乃言之。若疊今古之文說，⑤

須別釋餘義者，則在後乃言之，即下文「孝友時格」注云：

「今文格爲嘏」，又云「凡醯不祝」之類是也。若然，下記

云：「章甫，殷道。」鄭云：「章，明也。殷質，言以表明丈夫

也。甫或爲父，今文爲斧。」事相違，⑥故因疊出今文也。

筮人執筴，抽上韝，兼執之，進受命於主人。

筮人，有司主三《易》者。韝，藏筮之器，今時藏弓矢者謂

①「書」，曹校云當爲「文」。

②「古」，阮校云：毛本作「亡」。

③「門限」上，曹校云似脫「門槪」二字。

④「辯」，阮校云：諸本俱作「辨」。

⑤「今古」，阮校云：毛本作「古今」。「說」，阮校云：一

本改作「訖」。

⑥「違」，阮校云：毛本作「爲」。曹校云毛本作「爲」似

之贛丸也。兼，并也。進，前也，自西方而前。受命者，當知所筮也。

**疏**「筮人」至「主人」○釋曰：此經所陳據筮時

之事。案《少牢》云：「史左執筮，右抽上贛，兼與筮執之，東面，受命于主人。」得主人命訖，「史曰：『諾。』西面于門西，抽下贛，左執筮，右兼執贛以擊筮，乃立筮」。此云「筮」，彼云「筮」，一也。但筮法不殊，此亦應不異。《少牢》具陳，此不言者，文不具，當與彼同。案《三正記》大夫著五尺，故立筮，士之著三尺，當坐筮，與彼異也。○注「筮人」至「筮也」○釋曰：案《周禮·春官》：「筮人掌三《易》，一曰《連山》，二曰《歸藏》，三曰《周易》。」注云：「問著曰筮，其占《易》。」是筮人主三《易》者也。云「贛，藏筮之器」者，贛有二，其一從下向上承之，其一從上向下韜之也。云「今時藏弓矢者謂之贛丸也」者，此舉漢法為況，亦欲見韜弓矢者以皮為之。故《詩》云：「象弭魚服。」是以魚皮為矢服，則此贛亦用皮也。知「自西方而前」者，上云「即位于西方」，故知前向東方受命也。云「受命者，當知所筮也」者，謂執之不知以請筮何事，<sup>①</sup>宰遂命之也。凡卜筮之法，案《洪範》云「七稽疑，擇建立卜筮人」，「三人占，從二人之言」。又案《尚書·金縢》云：「乃卜三龜，一習吉。」則天子、諸侯卜時三龜並用，于玉、瓦、原三人各占

一兆也。筮時《連山》、《歸藏》、《周易》亦三《易》並用。夏殷以不變為占，《周易》以變者為占，亦三人各占一《易》。筮皆三占從二，三者三吉為大吉，一凶為小吉，三凶為大凶，一吉為小凶。案《士喪禮》筮宅，「卒筮，執卦以示命筮者，命筮者受視，反之，東面，旅占」。注云：「旅，衆也。反與其屬共占之，謂掌《連山》、《歸藏》、《周易》者。」又卜葬日云：「占者三人在其南。」注云：「占者三人，掌玉兆、瓦兆、原兆者也。」《少牢》大夫禮，亦云「三人占」。鄭既云「反與其屬占之」，則鄭意大夫卜筮，<sup>②</sup>同用一龜一《易》，三人共占之矣。其用一龜一《易》，則三代顛用，<sup>③</sup>不專一代。故《春秋緯·演孔圖》云：「孔子脩《春秋》，九月而成，卜之得陽豫之卦。」宋均注云：「陽豫，夏殷之卦名。」故今《周易》無文。是孔子用異代之筮，<sup>④</sup>則大夫卜筮，皆不常據一代者也。宰自右少退，贊命。宰，有司主政教

①「執之不知」，曹校云：「之」字衍，「執不知」三字出《公羊解詁》。

②「卜」，原作「十」，據阮本改。

③「類」，阮校云：毛本作「類」，「類」即「科」字。

④「異」，阮校云：毛本作「二」。

者。自，由也。<sup>①</sup>贊，佐也。命，告也。佐主人告所以筮也。《少儀》曰：「贊幣自左，詔辭自右。」**疏**「宰自」至「贊命」○注「宰有」至「自右」○釋曰：知宰是「有司主政教者」，士雖無臣，以屬吏爲宰，若諸侯使司徒兼冢宰以出政教之類，故云「主政教者」。引《少儀》者，取證贊命在右之義。以其地道尊右，故贊命皆在右。是以《士喪禮》亦云：「命筮者在主人之右。」注云：「命尊者宜由右出。」《特性》云：「宰自主人之左贊命。」不由右者，爲神求吉變故也。《士喪》在右不在左者，以其始死，未忍異于生，故在右也。《少牢》宰不贊命，大夫尊屈，士卑不嫌，故使人贊命也。筮人許諾，右還，即席坐，西面，卦者在左。即，就也。東面受命，右還北行就席。卦者，有司主畫地識爻者。**疏**「筮人」至「在左」○釋曰：此言筮人於主人受命訖，<sup>②</sup>行筮事也。但「即席坐，西面」者，主人爲筮人而言，<sup>③</sup>作「坐」文宜在「西面」下。<sup>④</sup>今退「西面」于下者，欲「西面」之文下就畫卦者，亦西向故也。○注「即就」至「爻者」○釋曰：鄭知「東面受命」者，以其上文有司在西方東面，主人在門東西面，今從門西東而主人之宰命之，故「東面受命」可知也。知「右還北行就席」者，以其主人在門外

之東南，席在門中，故知右還北行乃得西面就席坐也。云「卦者，有司主畫地識爻者」，上云「所卦者」謂於此云卦者據人以杖畫地，<sup>⑤</sup>記識爻之七八九六者也。卒筮，書卦，執以示主人。卒，已也。書卦者筮人，以方寫所得之卦。**疏**「卒筮」至「主人」○釋曰：此言所筮六爻俱了，卦體得成，更以方版畫體，示主人之事也。○注「卒已」至「之卦」○釋曰：云「書卦者筮人」者，下文云「筮人還，東面旅占」，明此書卦是筮人也。不使他人書卦者，筮人尊卦亦是尊蓍龜之道也。<sup>⑥</sup>案《特性》云：「卒筮，寫卦，筮者執以示主人。」注云：「卦者主畫地識爻，六爻備，乃以方版寫之。」則彼寫卦亦是卦者，故鄭云卦者畫爻者。彼爲祭禮，吉事尚提提，故卦者寫卦，筮人執卦以示主人。

- ①「由」原作「猶」，嚴州本、徐本、阮本俱作「由」，據改。
- ②「於」，阮校云：陳、閩俱作「以」。
- ③「主人」，盧文弨以「人」爲衍字。
- ④「作」，阮校云：毛本作「則」。
- ⑤「謂」下，阮校云：毛本有「木」字。
- ⑥「筮人尊卦亦是尊蓍龜之道也」，曹校云：上「尊」字略逗，「卦」上脫「書」字，「卦」字句。

《士喪禮》注云：「卦者寫卦示主人。」經無寫卦之文，是卦者自畫示主人。以其喪禮遽于事，故卦者自畫自示主人也。此冠禮，筮者自寫自示主人，<sup>①</sup>冠禮異于祭禮、喪禮故也。主人受眊，反之。反，還也。

**疏**「主人受眊」

反之」○釋曰：此筮訖，寫所得卦示主人。主人受得省視，雖未辨吉凶，主人尊，先受視以知卦體而已。主人既知卦體，反還與筮人，使人知其占吉凶也。<sup>②</sup>筮人還，東

面旅占，卒，進告吉。旅，衆也。還與其屬共占之。

古文「旅」作「臚」也。

**疏**「筮人」至「告吉」○釋曰：此言筮

人既於主人受得卦體，還于門西，東面旅共占之。是吉

卦，乃進向門東，東面告主人云吉也。若不吉，則筮

遠日，如初儀。遠日，旬之外。**疏**「若不」至「初儀」

○釋曰：《曲禮》：「吉事先近日。」此冠禮是吉事，故先筮

近日，不吉乃更筮遠日。是上旬不吉，乃更筮中旬，又不

吉，乃更筮下旬。云「如初儀」者，自「筮于廟門」已下至

「告吉」是也。○注「遠日，旬之外」○釋曰：《曲禮》云：

「旬之內曰近某日，旬之外曰遠某日。」彼據吉禮而言。

「旬之內曰近某日」，據士禮旬內筮，故云「近某日」，是以

《特性》旬內筮日是也。「旬之外曰遠某日」者，據大夫以

上禮旬外筮，故言「遠某日」，是以《少牢》「筮旬有一日」是也。案《少牢》云：「若不吉，則及遠日，又筮日如初。」鄭注

云：「及，至也。遠日，後丁若後己。」言至遠日，又筮日如

初，明不并筮。則前月卜來月之上旬，上旬不吉，至上旬

又筮中旬，中旬不吉，至中旬又筮下旬，下旬不吉則止，不

祭祀也。若然，《特性》不言「及」，則可上旬之內筮不吉，

則預筮中旬，中旬不吉又預筮下旬，又不吉則止。若此冠

禮亦先近日，《士冠禮》亦于上旬之內預筮三旬，不吉則更

筮後月之上旬。以其祭祀用孟月，不容人他月，若冠子則

年已二十，不可止，然須冠，<sup>③</sup>故容人後月也。若然，大夫

已上筮旬外，士筮旬內。此士禮而注云「遠日，旬之外」

者，此遠日旬之外，自是當月上旬之內。筮不吉，更筮中旬

之「遠日」，<sup>④</sup>非謂《曲禮》云，<sup>⑤</sup>大夫以上前月預筮來月上旬

①「寫」原作「爲」，據重刊單疏本改。

②「使人知其占吉凶也」，曹校云當爲「使筮人占其吉凶也」。

③「然」，曹校云當爲「終」。

④「之」，原作「云」，今據盧氏《詳校》改。

⑤「云」，原作「文」，今據曹校云改。



爲「遠某日」者，彼自有遠日，與此別也。徹筵席。徹，去也，斂也。

**疏**「徹筵席」○注「徹，去也，斂也」○釋曰：據席則徹去之，筵則斂藏之，故兩訓之也。宗人告事

畢。宗人，有司主禮者。

**疏**「宗人告事畢」○注「宗人」

至「禮者」○釋曰：士雖無臣，亦有宗人掌禮，比于宗伯，故云「有司主禮者」。主人戒賓，賓禮辭，許。戒，警

也，告也。賓，主人之僚友。古者有吉事則樂與賢者歡成

之，有凶事則欲與賢者哀戚之。今將冠子，故就告僚友，

使來。禮辭，一辭而許。再辭而許曰固辭。三辭曰終辭，

不許也。**疏**「主人」至「辭許」○釋曰：自此以下至「賓拜

送」一節，論主人筵日訖，三日之前廣戒僚友，使來觀禮之

事也。云「主人戒賓」者，謂主人親至賓大門外之西，東

面，賓出大門外之東，西面，戒之。云「賓禮辭許」者，即下

云：「戒賓曰：『某有子某，將加布于其首，願吾子之教之

也。』賓對曰：『某不敏，恐不能共事，以病吾子，敢辭。』主

人曰：「某猶願吾子之終教之也。」賓對曰：「吾子重有命，

某敢不從。」是一度辭後乃許之，是「賓禮辭，許」者也。

○注「戒警」至「許也」○釋曰：同官爲僚，同志爲友。此賓

與主人同是官，與爲同志，故以「僚友」解之。此謂上、中、

下士嘗執摯相見者也，若未嘗相見，則不必戒，故鄭以「僚友」言之是也。云「古者有吉事則樂與賢者歡成之」者，則此經戒賓使來者是也。云「有凶事則欲與賢者哀戚之」

者，則《士喪禮》始死命赴者，使告君及同僚之等是也。云

「禮辭，一辭而許」者，即此文是也。云「再辭而許曰固辭」

者，則《士相見》云：「某也願見，無由達，某子以命命某

見。」主人對曰：「某子命某見，吾子有辱，請吾子之就家

也，某將走見。」賓對曰：「某不足以辱命，請終賜見。」主人

對曰：「某不敢爲儀，固請吾子之就家也，某將走見。」賓對

曰：「某不敢爲儀，固以請。」主人對曰：「某也固辭，不得

命，將走見。」是其再辭而許，名爲固辭之義也。云「三辭

曰終辭，不許也」者，又《士相見》云：「士見于大夫，終辭其

摯。」是三辭不許爲終辭之義也。若一辭不許，後辭上

許，<sup>①</sup>則爲禮辭許。若再辭不許，後三辭上許，則爲再辭

而許之，曰固辭。若不許，至于三辭又不許，則爲三辭，曰

終辭不許也。又三辭而許則曰三辭，若三辭不許乃曰終

辭。是以《公食大夫》戒賓，「上介出請，入告，三辭」。又

《司儀》云：「諸公相爲賓，主君郊勞，交擯，三辭，車逆，拜

①「上」，阮校云：毛本作「而」，下「三辭上許」同。

辱，三揖，三辭。」注云：「先辭，辭其以禮來于外。後辭，辭升堂。」皆是三辭而許稱三辭。若然，此戒賓，賓禮辭，許，不固辭。案《鄉飲酒》「主人請賓，賓禮辭，許」，注云：「不固辭者，素所有志。」是賓習道藝，本望賓舉，是素所有志，故不固辭。此亦素有志，樂與主人歡成冠禮，故不固辭。諸經云「禮辭許」者，是素有志之類也。主人再拜，賓

荅拜，主人退，賓拜送。退，去也，歸也。**疏案**《鄉

飲酒》：①「主人戒賓，賓拜辱，主人荅拜。乃請賓，賓禮

辭，許。主人再拜，賓荅拜。主人退，賓拜辱。」《鄉射》亦然，皆與此文不同，此經文不具，當依彼文爲正。但此不言「拜辱」者，亦是不爲賓已故也。前期三日，筮賓，

如求日之儀。前期三日，空二日也。筮賓，筮其可使

冠子者，賢者恒吉。《冠義》曰：「古者冠禮，筮日筮賓，所以敬冠事。敬冠事，所以重禮。重禮，所以爲國本。」**疏**

「前期」至「之儀」○釋曰：此文下盡「宿贊冠者亦如之」，論筮賓若贊冠者之節。②云「前期三日」者，加日爲期，③期前三日也。「筮賓」者，謂於僚友衆士之中，筮取吉者爲加冠之賓也。云「如求日之儀」者，亦于廟門外下至「告事畢」，唯命筮別，其餘威儀並同，故云「如求日之儀」也。命

筮雖無文，宰贊蓋云：「主人某爲適子某加冠，筮某爲賓，庶幾從之。」若庶子，則改「適」爲「庶」字異，餘亦同。④此經不云命筮，并上筮日亦不云命筮者，皆文不具也。○

注「前期」至「國本」○釋曰：云「前期三日，空二日也」者，謂正加冠日是期日，冠日之前空二日外爲前期三日，故云「空二日也」。二日之中，雖有宿賓、宿贊冠者，及夕爲期，

但非加冠之事，故云「空」也。云「筮賓，筮其可使冠子者」，即下文三加，皆賓親加冠于首者是也。云「賢者恒吉」者，解經先戒後筮之意。凡取人之法，先筮後戒。今以此賓是賢者，必知吉，故先戒賓，賓已許，方始筮之，以其賢恒自吉，故先戒後筮之也。若賢恒吉，必筮之者，取其審慎重冠禮之事，故鄭引《冠義》爲證也。云「重禮，所以爲國本」者，《詩》云：「人而無禮，胡不遄死。」《禮運》云：「治國不以禮，猶無耜而耕也。」故云「重禮，所以爲國

①「酒」下，阮校云：毛本有「禮」字。

②「若」上，曹校云脫「宿賓」二字。

③「日」上，阮校云：毛本有「冠」字。

④「則改適爲一庶字異餘亦同」，阮校云：毛本作「則改適字爲庶字其餘亦同」。

本」也。然冠既簪賓，《特牲》、《少牢》不簪賓者，彼以祭祀之事，主人自爲獻主，群臣助祭而已。天子、諸侯之祭，祭前已射于射宮，擇取可預祭者，故不簪之也。乃宿賓。賓如主人服，出門左，西面，再拜。主人東面，荅拜。宿，進也。宿者必先戒，戒不必宿。其不宿者爲衆賓，或悉來，或否。主人朝服。

**疏**

「乃宿」至「荅拜」

○釋曰：此經爲宿賓，<sup>①</sup>擯者傳主人辭，入內告賓，賓如主人服，出門與主人相見之儀也。○注「宿進」至「朝服」

○釋曰：鄭訓宿爲進者，謂進之使知冠日當來，故下文

「宿曰：『某將加布于某之首，吾子將蒞之，敢宿。』」賓對曰：『某敢不夙興。』是宿之使進之義也。云「宿者必先

戒」者，謂若賓及贊冠同在上戒賓之內，已戒之矣，今又宿，是「宿者必先戒」也。云「戒不必宿」者，即上文戒賓之

中，除正賓及贊冠者，但是僚友欲觀禮者，皆戒之，使知而已，後更不宿，是「戒不必宿」者也。云「不宿者爲衆賓，或

悉來，或否」者，此決賓與贊冠者戒而又宿，不得不來，衆賓主來觀禮，非要須來，容有不來者，故直戒不宿也。云

「主人朝服」者，見上文簪日時朝服，至此無改服之文，則知皆朝服。凡有戒無宿者，非止於此。案《鄉飲酒》、《鄉

射》主人戒賓，及《公食大夫》各以其爵，<sup>②</sup>皆是當日之戒，理無宿也。又《大射》：「宰戒百官有事于射者，射人戒諸公卿大夫射，司士戒士射與贊者。前射三日，宰夫戒宰及司馬。」皆有戒而無宿是也。「射人宿視滌」，此言「宿」者，謂將射之前，於宿預視滌濯，非戒宿之意也。若然，《特牲禮》云前期二日宿尸，前無戒而直有宿者，《特牲》文不具，其實亦有戒也。又《禮記·祭統》云：「先期旬有一日，宮宰宿夫人，夫人亦散齊七日，致齊三日。」注云「宿讀爲肅，肅猶戒也，戒輕肅重也」者，彼以夫人尊，故不得言「戒」而變言「宿」。「讀爲肅」者，肅亦戒之意。彼以宿當戒處，非謂祭前三日之宿也。《大宰》云「祀五帝則掌百官之誓戒」者，謂戒百官使之散齊，至祭前三日當致齊也。凡宿賓之法，案《特牲》云「前期三日簪尸，乃宿尸，厥明夕，陳鼎」，則前期二日宿之也。《少牢》筮吉下云「宿」，鄭注云：「大夫尊，儀益多。筮月既戒諸官以齊戒矣，<sup>③</sup>至前祭一日，又戒以進之，使知祭日當來。」又云：「前宿一日，宿戒尸。」

① 「爲」，阮校云：毛本作「謂」。

② 「各」上，曹校云似脫「使大夫戒」四字。

③ 「月」，曹校云各本作「日」是。

注云：「先宿尸者，重所用爲尸者，又爲將筮。」吉則乃遂宿尸。<sup>①</sup>是前祭二日筮尸訖宿尸，至前祭一日又宿尸。<sup>②</sup>天子、諸侯祭前三日宿之，使致齊也。乃宿賓。賓許，主人再拜，賓荅拜。主人退，賓拜送。乃宿賓者，親相見，致其辭。

**疏**「乃宿」至「拜送」○釋曰：上據擯者傳辭，賓出與主人相見，此經據主人自致時，<sup>③</sup>故再舉宿賓之文也。宿贊冠者一人，亦如之。贊冠者，佐賓爲冠事者，謂賓若他官之屬，中士若下士也。宿之以筮賓之明日。

**疏**「宿贊」至「如之」○注「贊冠」至「明日」○釋曰：案下文冠子之時，贊者坐櫛，設纒，卒紼之類，是「贊冠者，佐賓爲冠事者」。以其佐賓爲輕，故不筮也。云「謂賓若他官之屬」者，此所取本由主人之意，或取賓之屬，或取他官之屬，故鄭兩言之。案《周禮》三百六十官，每官之下皆有屬官。假令上士爲官首，其下有中士、下士爲之屬。若中士爲官首，其下即有下士爲之屬也。云「中士若下士也」者，此據主人是上士而言之。贊冠者皆降一等。假令主人是上士，賓亦是上士，則取中士爲之贊。假令主人是下士，賓亦是下士，則亦取下士爲之贊，禮窮則同故也。云「宿之以筮賓之明日」者，以下有「厥明夕，爲

期」，是冠前一日，宿賓、宿贊在厥明之上，則去冠前二日矣。筮賓是前期三日，則知宿賓、贊冠者是筮賓之明日可知。不在「宿賓」下而在「宿贊冠」之下言之者，欲取爲「厥明」相近故也。厥明夕，爲期于廟門之外。主人立于門東，兄弟在其南，少退，西面，北上。有司皆如宿服，立于西方，東面，北上。厥，其也。宿服，朝服。**疏**「厥明」至「北上」○釋曰：自此至「賓之家」，論冠前一日之夕，爲明日加冠之期告賓之事也。云「厥明夕，爲期」者，謂宿賓與贊冠明日向暮爲加冠之期。必於廟門者，以冠在廟，知亦在廟爲期也。主人之類在門東，賓之類在門西者，各依賓主之位夾處東西也。○注「厥其」至「朝服」○釋曰：知「宿服，朝服」者，以其宿服如筮日之服，筮日朝服，轉相如，故知是朝服也。擯者請期，宰告曰：「質明行事。」擯者，有司佐禮者。

①「吉」上，曹校云脫「又云」二字。

②「是前祭二日」至「又宿尸」，曹校云當爲「是前祭二日宿尸，至前祭一日筮尸訖又宿尸」。

③「時」，阮本作「辭」。

在主人曰擯，在客曰介。質，正也。宰告曰：旦日正明行冠事。

**疏**「擯者」至「行事」○釋曰：上經布位已訖，故此經見爲期之事。言「請期」者，謂請主人加冠之期。言「告

曰」者，即是宰贊命告之也。○注「擯者」至「冠事」○釋

曰：上云「有司」，此言「擯者」，故知擯者是有司佐主人行

冠禮者也。云「在主人曰擯，在客曰介」者，案《聘禮》及

《大行人》皆以在主人曰擯，在客稱介，亦曰相，《司儀》云

「每門止一相」是也。云「旦日正明行冠事」者，案《特牲》：

「請期，曰羹飪」。鄭注云：「肉謂之羹。飪，熟也。謂明日

質明時，而曰肉熟，重豫勞賓。」此無羹飪，故云「質明」。

《少牢》云：「旦明行事。」故此注取彼而言「旦日正明行冠

事」也。告兄弟及有司。擯者告也。

**疏**「告兄弟及有司」○注「擯者告也」○釋曰：上文陳兄弟及有司位次，

此告訖，下乃云「告事畢」，則兄弟及有司亦廟門之外矣。

必告之者，禮取審慎之義故也。必知「擯者告」者，上擯者

請期，此即云告，明還是擯者告可知。告事畢。宗人告

也。

**疏**「告事畢」○注「宗人告也」○釋曰：知「宗人告」

者，亦約上文筮日時宗人告事得知也。擯者告期于

賓之家。

**疏**「擯者」至「之家」○釋曰：有司是家之屬

吏者，<sup>①</sup>則告期皆得在位。賓是同僚之等，爲期時不在，故就家告之。於夕爲期，當暮即得告之者，以其共仕於

君，其家必在城郭之內，相近，故得告也。夙興，設洗，

直于東榮，南北以堂深。水在洗東。夙，早

也。興，起也。洗，承盥洗者棄水器也，土用鐵。榮，屋翼

也。周制，自卿大夫以下，其室爲夏屋。水器，尊卑皆用

金盞，及大小異。<sup>②</sup>**疏**「夙興」至「洗東」○釋曰：自此至

「賓升則東面」，論將冠子，豫陳設冠與服器物之事也。<sup>③</sup>

○注「夙早」至「小異」○釋曰：云「洗，承盥洗者棄水器也」

者，謂盥手洗爵之時，恐水穢地，以洗承盥洗水而棄之，故

云「棄水器」也。云「土用鐵」者，案《漢禮器制度》，洗之所

用，土用鐵，大夫用銅，諸侯用白銀，天子用黃金也。云

「榮，屋翼也」者，即今之博風，<sup>④</sup>云「榮」者，與屋爲榮飾。

<sup>①</sup>「屬吏者」，曹校云「者」上當脫「有事」二字，或曰「者」衍字。

<sup>②</sup>「及大小異」，阮校云：「小」下聶氏有「皆」字，朱子曰「及」字恐誤。

<sup>③</sup>「與」，曹校云似衍，或者當爲「衣」，「冠」讀去聲。

<sup>④</sup>「博」，阮校云：一本作「搏」。

言「翼」者，與屋爲翹翼也。云「周制，自卿大夫以下，其室爲夏屋」者，言「周制」者，夏殷卿大夫以下屋無文，故此經是周法，即以周制而言也。案此經是士禮而云「榮」，《鄉飲酒》卿大夫禮，《鄉射》、《喪大記》大夫、士禮，皆云「榮」。又案《匠人》云：「夏后氏世室，堂脩二七，廣四脩一，五室。」此謂宗廟。路寢同制，則路寢亦然。雖不云兩下爲之，彼下文云「殷人重屋四阿」，鄭云：「四阿，四注屋。」重屋謂路寢。殷之路寢四阿，則夏之路寢不四阿矣，當兩下爲之。是以《檀弓》孔子云：「見若覆夏屋者矣。」鄭注云：「夏屋，今之門廡。」漢時門廡也，①兩下爲之，故舉漢法以況。夏屋兩下爲之，或名兩下屋爲夏屋，夏后氏之屋亦爲夏屋。鄭云卿大夫以下，其室爲夏屋，兩下，而周之天子、諸侯皆四注。故《喪大記》云「升自屋東榮」，鄭以爲卿大夫、士，其天子、諸侯當言東雷也。周天子路寢，制似明堂，五室十二堂，上圓下方，明四注也。諸侯亦然，故《燕禮》云「洗當東雷」，鄭云：「人君爲殿屋也。」云「水器，尊卑皆用金疊，及大小異」者，此亦案《漢禮器制度》，尊卑皆用金疊，及其大小異。此篇與《昏禮》、《鄉飲酒》、《鄉射》、《特性》皆直言「水」，不言「疊」，《大射》雖云「疊水」，不言「料」。《少牢》云：「司宮設疊水於洗東，有料。」鄭注云：

「設水用疊，沃盥用料，禮在此也。」欲見疊、料俱有。餘文無者，不具之意也。《儀禮》之內，設洗與設尊，或先或後，不同者，若先設洗，則兼餘事。此《士冠》賓與贊共洗，《昏禮》有夫婦與御媵之等，《少牢》、《特性》兼舉鼎，不專爲酒，以是皆先設洗。《鄉飲酒》、《鄉射》先設尊者，以其專爲酒。《燕禮》、《大射》自相對，《大射》辨尊卑，故先設尊，《燕禮》不辨尊卑，故先設洗。又《儀禮》之內，或有尊無洗，或尊洗皆有，文不言設之者，是不具也。

### 儀禮疏卷第一

江寧府知府陽城張敦仁編校 元和縣  
學生員顧廣圻覆校

①「時」，阮校云：《要義》作「之」。

## 儀禮疏卷第二

唐朝散大夫行大學博士弘

文館學士臣賈公彥等撰

陳服于房中西墉下，東領，北上。墉，牆。

**疏**

「陳服」至「北上」○釋曰：自此至「東面」，論陳設衣服器物之等，以待冠者。《喪大記》與《士喪禮》服或西領，或南領，此東領者，此嘉禮，異於凶禮故。士之冠特先用卑服，<sup>①</sup>北上，便也。爵弁服：纁裳，純衣，緇帶，韎韐。此與君祭之服。《雜記》曰：「士弁而祭於公。」爵弁者，冕之次，其色赤而微黑，如爵頭然，或謂之緇。其布三十升。纁裳，淺絳裳。凡染絳，一人謂之緇，再人謂之纁，三人謂之纁，朱則四人與？純衣，絲衣也。餘衣皆用布，唯冕與爵弁服用絲耳。先裳後衣者，欲令下近緇，明衣與帶同色。韎韐，緇韐也。士緇韐而幽衡，合韋爲之。士染以茅蒐，因以名焉。今齊人名蒨爲韎韐，韐之制似

韐。冠弁者不與衣陳而言於上，以冠名服耳。今文「纁」皆作「熏」。

**疏**

「爵弁」至「韎韐」○釋曰：此所陳從北而

南，故先陳爵弁服。○注「此與」至「作熏」○釋曰：士禮玄

冠自祭，<sup>②</sup>以爵弁服助君祭，故云「與君祭之服」也。云

「爵弁者，冕之次」者，凡冕以木爲體，長尺六寸，廣八寸，

績麻三十升布，上以玄，下以纁，前後有旒。其爵弁制大

同，唯無旒，又爲爵色爲異。又名冕者，俛也，低前一寸二

分，故得冕稱。其爵弁則前後平，故不得冕名。以其尊卑

次於冕，故云爵弁冕之次也。云「其色赤而微黑，如爵頭

然，或謂之緇」者，七人爲緇，<sup>③</sup>若以纁入黑則爲紺，以紺

入黑則爲緇，是三人赤，再入黑，故云「其色赤而微黑」也。

云「如爵頭然」者，以目驗爵頭，亦多黑少，故以爵頭爲喻

也。以緇再入黑汁，與爵同，故取《鍾氏》緇色解之。故鄭

注《鍾氏》云：「今《禮》俗文作爵，言如爵頭色也。」玄此言

①「士之」，阮校云：《要義》作「也士」。「特」，阮校云：毛本、《通解》作「時」。

②「冠」，阮校云：毛本作「端」。

③「七入爲緇」，曹校云似當作「三入爲纁」。

「赤」者，對文爲赤。<sup>①</sup>若將緇比纁，則又黑多矣。故《淮南子》云：「以涅染紺則黑於涅。」況更一人黑爲緇乎？故《巾車》云「雀飾」，鄭注云「雀，黑多赤少之色」是也。云「其布三十升」者，取冠倍之義，<sup>②</sup>是以《喪服》衰三升，冠六升，朝服十五升，故冕三十升也。云「纁裳，淺絳裳」者，絳則一染至三染同云淺絳。《詩》云：「我朱孔陽。」毛傳云：「朱，深纁也。」故從一染至三染皆謂之淺絳也。云「朱則四人與」者，《爾雅》及《鍾氏》皆無四人此文，經有朱色，故鄭約之，若以纁入黑則爲紺，若以纁入赤則爲朱，無正文，故云「與」以疑之也。然上注以解玄緇，故引《鍾氏》染黑法；此注解纁，故引《爾雅》染赤法也。云「純衣，絲衣也」者，案鄭解純字或爲絲，或爲色，兩解不同者，皆望經爲注。若色理明者，以絲解之；若絲理明者，以色解之。此經「玄衣」與「纁裳」相對，上玄下纁，色理自明，絲理不明，則以絲解之。《昏禮》「女次純衣」，注云「絲衣」，以下文有「女從者畢袵玄」，色理自明，則亦絲理不明，故亦以絲理解之。《周禮·媒氏》云：「純帛無過五兩。」注云：「純，實緇字也。古緇以才爲聲，納幣用緇，婦人陰也。」以經云「純帛」，絲理自明，故爲色解之。《祭統》云：「蠶於北郊，以共純服。」絲理自明，故鄭亦以色解也。《論語》云：

「麻冕，禮也。今也純，儉。」以「純」對「麻」，絲理自明，故鄭亦以色解之。是況有不同之事。<sup>③</sup>但古「緇」、「紂」二字並行，若據布爲色者，則爲「緇」字；若據帛爲色者，則爲「紂」字。但緇布之「緇」多在本字不誤，紂帛之「紂」則多誤爲「純」。云「餘衣皆用布」者，此據朝服、皮弁服、玄端服及深衣、長衣之等，皆以布爲之。是以《雜記》云「朝服十五升布」，玄端亦服之類，<sup>④</sup>則皮弁亦是天子朝服，深衣或名麻衣，故知用布也。云「唯冕與爵弁服用絲耳」者，《祭統》云：「王后蠶於北郊，以供純服。」爵弁服是冕服之次，故知亦用絲也。云「先裳後衣者，欲令下近緇，明衣與帶同色」者，衣在上，宜與冠相近，應先言衣。今退衣在裳下者，若衣與冠同色者，先言衣後言裳，今爵弁與衣異，故退純衣於下，使與帶同色也。云「韎韐，緼韞也」者，此經

- ① 「文」上，曹校云似脫「緇」字。  
 ② 「倍」下，曹校云似脫「衣」字。  
 ③ 「況」，阮校云：《要義》作「注」。  
 ④ 「亦」下，阮校引浦鏜云：當脫「朝」字。



云「韎韐」，<sup>①</sup>二者一物，故鄭合爲一物解之也。云「士緼韍而幽衡」者，《玉藻》文。言「幽衡」者，同繫於革帶，故連引之也。云「合韋爲之」者，鄭即因解名「緼韍」之字，<sup>②</sup>言韐者韋旁著合，謂合韋爲之，故名韐也。云「士染以茅蒐，因以名焉」者，案《爾雅》云：「茹蘆，茅蒐。」孫氏注：「一名蒨，可以染絳。」若然，則一草有此三名矣。但周公時名蒨草爲韎草，以此韎染韋，合之爲韐，因名韍爲韎韐也。云「韍之制似韐」者，案上注已釋韐制，其韍之制亦如之，但有飾無飾爲異耳。祭服謂之韍，其他服謂之韐。《易·困卦》九二：「困於酒食，朱韍方來，利用享祀。」是祭服之韍也。又案《明堂位》云：「有虞氏服韍，夏后氏山，殷火，周龍章。」鄭云：「後王彌飾。天子備焉，諸侯火而下，卿大夫山，士韎韋而已。」是士無飾，則不得單名韍，一名韎韐，一名緼韍而已。是韍有與緼異，<sup>③</sup>以制同飾異，故鄭云「韍之制似韐」也。但染韋爲韍之體，天子與其臣及諸侯與其臣有異。《詩》云：「朱芾斯黃。」鄭云：「天子純朱，諸侯黃朱。」《詩》又云：「赤芾在股。」是諸侯用黃朱。《玉藻》再命、三命皆云赤韍，是諸侯之臣亦用赤韍。《易·困卦》九二云：「困於酒食，朱韍方來，利用享祀。」鄭注云：「二據初辰在未，未爲土，此二爲大夫有地之象。未上值天厨酒

食，象困於酒食者，采地薄，不足已用也。二與日爲體離，<sup>④</sup>爲鎮霍。爻四爲諸侯有明德，受命當王者。離爲火，火色赤。四爻辰在午時，離氣赤又朱。」是也。文王將王，天子制用朱韍，故《易乾鑿度》云：「孔子曰，天子、三公、諸侯同色。」《困卦》：「困于酒食，朱韍方來。」又云「天子、三公、大夫不朱韍，諸侯亦同色」者，其染之法同以淺絳爲名，是天子與其臣純朱，諸侯與其臣黃朱爲異也。云「冠弁不與衣陳而言於上，以冠名服耳」者，案此文上下，陳服則於房，緇布冠及皮弁在堂下，<sup>⑤</sup>是冠弁不與服同陳。今以弁在服上，并言之者，以冠弁表明其服耳，不謂同陳之也。云「今文纁皆作熏」者，纁是色，當從絲旁爲

① 「韐」下，阮校引浦鏜云：當脫「禮記云緼絨緼絨韎韐」九字。

② 「名」，阮校云：毛本作「明」。

③ 「緼」，阮校引浦鏜云：當「韐」字之誤。「是韍有與緼異」，阮校云：疑當云「是韍又與緼絨異」。

④ 「二與日爲體離」，阮校引《要義》云：當云「二與四爲離體」。

⑤ 「及皮」，阮校云：毛本無「及」字，「皮」下有「爵」字。

之，<sup>①</sup>故疊今文不從熏，從經文古繡也。皮弁服：素

積，緇帶，素鞶。此與君視朔之服也。皮弁者，以白

鹿皮爲冠，象上古也。積猶辟也，以素爲裳，辟蹙其要中。

皮弁之衣用布亦十五升，其色象焉。

**疏**「皮弁」至「素鞶」

○釋曰：此皮弁服卑於爵弁，故陳之次在爵弁之南。上爵

弁服，下玄端服皆言衣，此獨不言衣者，以其上爵弁服與

爵弁異，故言衣，下玄端服但冠時用緇布冠，不用玄冠，既

不言冠，故言衣也。今此皮弁之服用白布，衣與冠同色，

故不言衣也。○注「此與」至「象焉」○釋曰：案《玉藻》

云：「諸侯皮弁，聽朔於大廟。」又案《鄉黨》說孔子之服云

「素衣麕裘」，鄭云「視朔之服」，視朔之時君臣同服也。云

「皮弁者，以白鹿皮爲冠，象上古也」者，謂三皇時冒覆

頭，<sup>②</sup>句領繞項。<sup>③</sup>至黃帝則有冕，故《世本》云：「黃帝作

旒冕。」《禮運》云：「先王未有宮室。」又云：「食草木之實，

鳥獸之肉。未有麻絲，衣其羽皮。」鄭云：「此上古之時。」

則此「象上古」，謂象三皇時。以五帝爲大古，以三皇爲上

古也。若然，黃帝雖有絲麻、布帛、皮弁，至三王不變，是

以下記云「三王共皮弁」，鄭注云「質不變」。鄭注《郊特

牲》云：「所不易於先代。」故《孝經緯》云：「百王同之，不

改易也。」案《禮圖》仍以白鹿皮爲冠，故云「以白鹿皮爲

冠，象上古也」。云「積猶辟也，以素爲裳，辟蹙其要中」

者，經典云素者有三義：若以衣裳言素者，謂白繒也，即此

人之等是也；<sup>④</sup>畫繒言素者，謂白色，即《論語》云「縹事後

素」之等是也；器物無飾亦曰素，則《檀弓》云「奠以素器」

之等是也。是以鄭云「以素爲裳，辟蹙其要中」也。知皮

弁之衣亦用十五升布者，《雜記》云：「朝服十五升。」此皮

弁亦天子之朝服，故亦十五升布也。然《喪服》注云「祭服

朝服，辟積無數」，則祭服、皮弁皆辟積無數。餘不云者，

舉皮弁可知，不並言也。唯喪服裳幅三衽，有數耳。云

「其色象焉」者，謂象皮弁之色用白布也。以此言之，《論

語》注云「素用繒」者，彼上服褐衣用素也。玄端：玄

裳、黃裳、雜裳可也，緇帶，爵鞶。此莫夕於朝

之服。玄端即朝服之衣，易其裳耳。上士玄裳，中士黃

裳，下士雜裳。雜裳者，前玄後黃。《易》曰：「夫玄黃者，

①「絲」，阮校云：段玉裁校本作「系」。

②「冒」上，阮校云：毛本有「以白鹿皮」四字。

③「句」，阮校云：毛本作「鉤」，《通解》與毛本同。

④「人」，曹校云各本作「文」是。

天地之雜色，天玄而地黃。」士皆爵韋爲韠，其爵同。不以玄冠名服者，是爲緇布冠陳之。《玉藻》曰：「韠，君朱，大夫素，士爵韋。」**疏**「玄端」至「爵韠」○釋曰：此玄端服，服之下，故後陳於皮弁之南。陳三等裳者，凡諸侯之下，皆有二十七士，公侯伯之士一命，子男之士不命。不同一命，不命皆分爲三等，**①**故服分爲三等之裳以當之。上下經三等之服同用緇帶者，以其士唯有一幅裨之帶，**②**故三服共用之。大帶所以束衣，革帶所以珮韠及佩玉之等。不言革者，舉韠有革帶可知，故略不言耳。三裳之下云「可也」者，欲見三等之士各有所當，當者即服之，故言「可」以許之也。○注「此莫」至「爵韠」○釋曰：云「此莫夕於朝之服」者，當是莫夕於君之朝服也。案《玉藻》云君「朝服以日視朝于內朝，夕深衣，祭牢肉」，是君朝服朝服，夕服深衣矣。下又云：「朝玄端，夕深衣。」朝時不服，**③**與君不同，故鄭注云：「謂大夫士也。」則彼朝玄端、夕深衣是大夫、士家私朝也。若然，大夫、士既服玄端、深衣以聽私朝矣。**④**此服注云「莫夕於朝之服」，是士向莫之時夕君之服。必以莫爲夕者，**⑤**朝禮備，夕禮簡，故以夕言之也。若卿大夫莫夕於君，當亦朝服矣。案《春秋左氏傳》成十二年晉郤至謂子反曰：「百官承事，朝而不夕。」此云「莫

夕」者，無事則無夕法。若夕有事須見君則夕。故昭十二年子革云「夕」，哀十四年子我亦云「夕」者，**⑥**皆是有事見君，非常朝夕之事也。云「玄端即朝服之衣，易其裳耳」者，上云「玄冠朝服，緇帶素韠」，此玄端亦緇帶。彼云「朝服」，即此玄端也。**⑦**但朝服亦得名端，故《論語》云「端章甫」，鄭云「端，諸侯視朝之服耳」。皆以十五升布，爲緇色，正幅爲之，同名也。云「易其裳耳」者，彼朝服素韠，韠同裳色，則裳亦素。此既易其裳，以三等裳同爵韠，則亦易之矣。**⑧**不言者，朝服言「素韠」，不言裳，故須言「易」。彼言「素韠」，此云「爵韠」，於文自明，故不須言「易」也。云「上士玄裳，中士黃裳，下士雜裳」者，此無正文，直以諸

**①**「同」，阮校引浦鏜云當「問」字之誤，盧文弨云「不同」二字屬上亦可。

**②**「幅」，曹校云殿本改作「緇」。

**③**「不」，阮校云：《要義》作「所」，是也。

**④**「矣」，阮校云：《要義》作「衣」，屬下句。

**⑤**「莫爲」，阮校云：疑當作「爲莫」。

**⑥**「哀」，阮校云：毛本作「襄」。

**⑦**「端」，阮校云：毛本作「冠」。

**⑧**「亦」上，曹校云脫「韠」字。

侯之士皆有三等之裳，故還以三等之士記之。<sup>①</sup>但玄是天色，黃是地色，天尊而地卑，故上士服玄，中士服黃，下士當雜裳。雜裳者，還用此玄黃，但前陽後陰，故知前玄後黃也。云「《易》曰」者，是《文言》文。引之者，證此裳等是天地二色爲之。云「士皆爵韋爲鞞，其爵同」者，三裳同云「爵鞞」，故知三等之士同用爵韋爲鞞也。其爵韋者，所引《玉藻》文是也。云「不以玄冠名服者，是爲緇布冠陳之」者，今不以玄冠表此服者，此爲冠時緇布冠陳之，冠既不用玄冠，故不言也。云「《玉藻》」者，案彼注云：「此玄端服之鞞也。」云「鞞」者，與下君、大夫、士爲摠目。「韋」者，又摠三者用韋爲之。言「君朱，大夫素，士爵」者，鞞之韋色也。云「君朱」者，見五等諸侯，則天子亦朱矣。鞞同裳色，則天子、諸侯朱裳。士言爵，則此經「爵鞞」亦一也。以其裳有三等，爵亦雜色，故同爵鞞。若然，大夫素裳，則與朝服不異者，禮窮則同也。緇布冠缺項，青組纓屬於缺；緇纁，廣終幅，長六尺；皮弁筭；爵弁筭；緇組紃，纁邊：同篋。缺讀如「有頰者弁」之類。緇布冠無筭者，著頰圍髮際，結項中，隅爲四綴，以固冠也。項中有緇，亦由固頰爲之耳。今未冠筭者

著卷幘，頰象之所生也。滕、薛名國爲頰。屬猶著。纁，今之幘梁也。終，充也。纁一幅長六尺，足以韜髮而結之矣。筭，今之簪。有筭者，屈組爲紃，垂爲飾。無筭者，纓而結其條。纁邊，組側赤也。同篋，謂此上凡六物。隋方曰篋。疏「緇布」至「同篋」○注「缺讀」至「曰篋」○釋曰：

云「缺讀如「有頰者弁」之類」者，讀從《頰弁》詩，義取在首頰者弁貌之意也。云「緇布冠無筭」者，案經皮弁、爵弁言筭，緇布冠不言筭，故云「無筭」也。云「著頰圍髮際」者，無正文，約漢時卷幘亦圍髮際，故知也。云「結項」者，此亦無正文，以經云頰，<sup>②</sup>明于項上結之也。云「隅爲四綴，以固冠也」者，此亦無正文，以義言之。既武以下別有頰項，明于首四隅爲綴，<sup>③</sup>上綴于武，然後頰項得安穩也。<sup>④</sup>云「項中有緇，亦由固頰爲之耳」者，此亦無正文，以義言之。頰之兩頭皆爲緇，別以繩穿緇中結之，然後頰得牢

①「記」，曹校云當爲「配」。

②「頰」下，曹校云脫「項」字。

③「首」，曹校云似當爲「頰」。

④「頰項」，曹校云疑當爲「冠」。

固，故云「亦由固頰爲之」也。云「今之未冠笄者著卷幘，<sup>①</sup>頰象之所生」者，此舉漢法以況義耳。漢時男女未冠笄者著卷幘之狀，<sup>②</sup>雖不智知，<sup>③</sup>既言「頰圍髮際」，故以冠之，<sup>④</sup>明漢時卷幘亦以布帛之等圍繞髮際爲之矣。云「頰象之所生」者，漢時卷幘是頰之遺象所生，至漢時，故云「頰象之所生」也。云「滕，薛名國爲頰」者，此亦舉漢時事以況之。漢時滕、薛二國云國。國，卷幘之類，亦遺象，故爲況也。云「纚，今之幘梁」者，亦舉漢法爲況耳。幘梁之狀，鄭目驗而知，至今久遠，亦未審也。云「纚一幅長六尺，足以韜髮而結之矣」者，人之長者不過六尺，<sup>⑤</sup>纚六尺，故云「足以韜髮」。既云「韜髮」，乃云「結之」，則韜訖乃爲紒矣。云「有笄」者，即經云「皮弁」及「爵弁」皆云「笄」者，是有笄也。云「屈組爲紃」者，經「緇組紃，纁邊」，是爲有笄者而設。言「屈組」，謂以一條組於左笄上繫定，遶頤下，右相向上，仰屬於笄，屈繫之有餘，因垂爲飾也。云「無笄者，纁而結其條」者，無笄，即經「緇布冠」是也。則以二條組，兩相屬於頰，故經云「組纁屬於頰」也。既屬訖，則所垂條于頤下結之，故云「纁而結其條」也。云「纁邊，組側赤也」者，纁是三人之赤色，又云「邊」，<sup>⑥</sup>則于邊側赤也。若然，以緇爲中，以纁爲邊側而織之也。云「同

篋，謂此上凡六物」者，「緇布」至「屬於頰」共爲一物；纚長六尺，二物；皮弁笄，三物；爵弁笄，四物；其「緇組紃，纁邊」，皮弁、爵弁各有一，則爲二物，通前四爲六物。云「隋方曰篋」者，《爾雅》無文，此對笥方而不隋也。隋謂狹而長也。案《周禮·弁師》云「掌五冕」，而云「玉笄朱紃」，則天子以玉爲笄，以朱爲紃。又案《祭義》云天子「冕而朱紃」，諸侯「冕而青紃」，諸侯之笄亦當用玉矣。又案《弁師》韋弁與皮弁同科，皮弁有笄，則二者亦有笄矣。<sup>⑦</sup>又爲笄者屬纁，<sup>⑧</sup>不見有綏，則六冕無綏矣。然士緇布冠無綏，故下記云孔子曰：「其綏也，吾未之聞也。」若諸侯亦以

①「之」，曹校云注無此字。

②「之」，阮校云：《要義》作「其」。

③「智」，阮校云：《通解》《要義》俱作「審」，毛本作「可知」。

④「冠」，阮校云：《要義》作「況」，曹校云作「況」是也。

⑤「人」下，阮校云：毛本有「髮」字。

⑥「又」，曹校云疑衍。

⑦「亦」，曹校云當爲「皆」。

⑧「又爲笄者屬纁」，曹校云當爲「又爲笄屬紃」，或當爲「有笄者屬紃」。

緇布冠爲始冠之冠，則有綏。故《玉藻》云：「緇布冠纁綏，諸侯之冠也。」鄭注云：「尊者飾，其大夫紃。」案《禮器》云：「管仲鏤簋朱紃。」鄭注云：「大夫、士當緇組紃，<sup>①</sup>纁邊」是也。其筭亦當用象耳。櫛實于簞。簞，筭也。

**疏**

「櫛實于簞」○注「簞，筭也」○釋曰：鄭注《曲禮》：「圓曰簞，方曰筭。」筭與簞方圓有異，<sup>②</sup>而云簞筭共爲一物者，鄭舉其類，注《論語》亦然。蒲筵二，在南。筵，席也。

**疏**「蒲筵二，在南」○注「筵，席也」○釋曰：「筵二」者，一

爲冠子，即下云「筵于東序，少北」是也；一爲醴子，即下云「筵于戶西，南面」是也。云「在南」者，最在南頭，對下文「側尊一甒醴，在服北」也。鄭注云「筵，席也」者，鄭注《周禮·司几筵》云：「敷陳曰筵，藉之曰席。」然其散言之，筵、席通矣。前敷在地者皆言藉，<sup>③</sup>取相承之義，是以諸席在地者多言筵也。側尊一甒醴，在服北。有篚，

實勺、觶、角、枳、脯醢，南上。側猶特也，無偶曰

側。置酒曰尊。側者，無玄酒。服北者，纁裳北也。篚，竹器如簋者。勺，尊升，所以斟酒也。爵三升曰觶。枳狀如匕，以角爲之者，欲滑也。南上者，篚次尊，籩豆次篚。

古文「甒」作「廡」。

**疏**「側尊」至「南上」○注「側猶」至「作

廡」○釋曰：云「側猶特也，無偶曰側，置酒曰尊。側者，無玄酒」者，凡禮之通例，稱側有二：一者無偶特一爲側，則此文側是也。又《昏禮》云：「側尊甒醴于房中。」亦是無玄酒曰側。至於《昏禮》合升側載，《聘禮》云側襲，《士虞禮》云側尊，此皆是無偶爲側之類也。一者《聘禮》云「側受几」者，側是旁側之義也。云「服北者，纁裳北也」者，此上先陳爵弁服之時，纁裳最在北，向南陳之。此云「服北」，明在纁裳北可知也。云「篚，竹器如簋者」，其字皆竹下爲之，故以竹器言之。「如簋」者，亦舉漢法爲況也。云「勺，尊升，所以斟酒也」者，案《少牢》云：「疊水有料。」與此勺爲一物，故云「尊升」，對彼是疊料，所以斟水，則此爲尊料，斟酒者也。云「爵三升曰觶」者，案《韓詩外傳》云：「二升曰爵，二升曰觶，三升曰觶，四升曰角，五升曰散。」相對爵、觶有異，散文則通，皆曰爵，故鄭以爵名觶也。云「枳狀如匕，以角爲之者，欲滑也」者，對《士喪禮》用木枳

<sup>①</sup>「紃」字原本無。阮校云：毛本「組」下有「紃」字。據補。

<sup>②</sup>「筭」，阮校云：毛本無。

<sup>③</sup>「藉」上，阮校云：毛本有「筵」字，閩本「筵」字擠入。

者，喪禮反吉也。云「南上者，簠次尊，簋次尊」，知然者，以經云尊「在服北」，「南上」，則是從南北向陳之，以尊爲貴，次云簠，後云簋豆，故知次第然也。云「古文甗作廡者，此甗爲酒器，廡是夏屋兩下，故不從古文也。爵

弁、皮弁、緇布冠各一匱，執以待于西坫南，南面，東上。賓升則東面。爵弁者，制如冕，黑色，但無纁耳。《周禮》：「王之皮弁，會五采玉璫，象邸，玉

笄。諸侯及孤卿大夫之冕、皮弁，各以其等爲之。」則士之皮弁，又無玉、象邸飾。緇布冠，今小吏冠其遺象也。匱，竹器名，今之冠箱也。執之者，有司也。坫在堂角。古文「匱」作「簠」，①「坫」作「檐」。疏「爵弁」至「東面」○釋

曰：此一節論使有司三人各執其一，豫在階，以待冠事。

賓未入，南面以向賓，在堂，亦以向賓，言「升則東面」，據終言之也。○注「爵弁」至「作檐」○釋曰：云「爵弁者，制如冕而黑色，但無纁耳」者，已於上解訖，今復言之者，上文直舉冠以表服，其冠實不陳，故略言其冠，至此專爲冠言之，是以注并引皮弁以下之事。案《弁師》言冕有五采纁玉，皮弁有五采玉璫，象邸、玉笄。下云：「諸侯及孤卿大夫之冕、韋弁、皮弁、弁經，各以其等爲之。」鄭注云：「各

以其等，纁旒玉璫，如其命數也。」但上文已言上公之法，故此諸侯唯據侯、伯、子、男，是以鄭云：「冕則侯伯纁七就，用玉九十八；子男纁五就，用玉五十。纁，玉皆三采。孤纁四就，用玉三十二；三命之卿纁三就，用玉十八；再命之大夫纁再就，用玉八，藻、玉皆朱綠。韋弁、皮弁，則侯伯璫飾七，子男璫飾五，玉亦三采。孤則璫飾四，三命之卿璫飾三，再命之大夫璫飾二，玉亦二采。弁經之弁，其辟積如冕纁之就然。庶人弔者素委貌，一命之大夫冕而無旒，士變冕爲爵弁。其韋弁、皮弁之會無結飾，弁經之弁不辟積。」彼經文具言之，今此注略引以證士皮弁無玉以象爲飾之意，不取於韋弁、弁經及依命數之事，故不具引之。云「緇布冠，今小吏冠其遺象也」者，但緇布冠，士爲初加之冠，冠訖則弊之不用，庶人則常著之。故《詩》云：「臺笠緇撮。」是庶人以布冠常服者。以漢之小吏亦常服之，故舉爲況。云「匱，竹器名，今之冠箱也」者，此亦舉漢法爲況。云「執之者有司也」者，則上云「有司如主人服」，有司不主一事，故知此亦有司也。云「坫在堂角」者，

①「簠」，阮校云：毛本作「簠」。「作」，阮校云：毛本作「爲」。

但玷有二文：一者謂若《明堂位》云「崇玷亢圭」，及《論語》云「兩君之好，有反玷」之等，在廟中有之，以亢反爵之屬，此篇之內言玷者，皆據堂上角爲名，故云「堂角」。云「古文匱爲纂，玷作檐」者，皆從經今文，故疊古文也。主人

玄端，爵韠，立于阼階下，直東序，西面。玄端，士人廟之服也。阼猶酢也，東階所以荅酢賓客也。堂東西牆謂之序。

**疏**「主人」至「西面」○釋曰：上文已陳衣

冠器物，自此以下至「外門外」，論賓主兄弟等著服及位處也。云「玄端，爵韠」者，主人之服與上所陳子加冠玄端服亦一也。云「立於阼階下」者，時欲與賓行禮之事也。云

「直東序」者，直，當也，謂當堂上東序牆也。○注「玄端」至「之序」○釋曰：案《特牲》士禮，祭服用玄端，此亦士之加冠，在廟，故與祭同服，故云「士人廟之服也」。云「東西牆謂之序」者，《爾雅·釋宮》文。兄弟畢袵玄，立于

洗東，西面，北上。兄弟，主人親戚也。畢猶盡也。

袵，同也。玄者，玄衣，玄裳也，緇帶，韠。位在洗東，退於主人。不爵韠者，降於主人也。古文「袵」爲「均」也。

**疏**

「兄弟」至「北上」○釋曰：此論兄弟來觀禮之服也。○注

「兄弟」至「均也」○釋曰：云「兄弟，主人親戚也」者，既云

兄弟，故是親戚。云「袵，同也。玄者，玄衣，玄裳也，緇帶，韠」者，以其同玄，故知上下皆玄。云「緇帶，韠」者，緇亦玄之類，因士有緇帶，故韠亦言緇，實亦玄也。云「位在洗東，退於主人」者，主人當序南西面，洗當榮，兄弟又在洗東，故云「退於主人」也。云「不爵韠者，降於主人也」者，爵弁同色，<sup>①</sup>主人尊故也。兄弟用緇韠，不用爵韠，兄弟卑，故云「降於主人」也。擯者玄端，負東塾。東塾，門內東堂，負之北面。

**疏**「擯者」至「東塾」○釋曰：擯

者不言如主人服，別言玄端，則與主人不同可知。主人與兄弟不同，<sup>②</sup>故特言玄端，與下「贊者玄端從之」同言玄，則此擯者是主人之屬，中士若下士也，故直舉玄端，不言裳也。○注「東塾」至「北面」○釋曰：知者，<sup>③</sup>擯者是主人擯相，事在門內，故知在門內東堂，負之北面，向主人也。將冠者采衣，紒，在房中，南面。采衣，未冠者所服。《玉藻》曰：「童子之節也，緇布衣，錦緣，錦紳，并組，

①「爵」，阮校云：毛本作「韠」。

②「兄弟」，曹校云似當爲「擯者」。

③「者」原作「是」，據重刊單疏本改。



錦束髮，皆朱錦也。」紒，結髮。古文「紒」爲「結」。

**疏**「將

冠」至「南面」○注「采衣」至「爲結」○釋曰：「將冠者」，即

童子二十之人也。以其冠事未至，故言「將冠者」也。云

「緇布衣，錦緣」者，以其童子不帛襦袴，不衣裘裳，故云

「緇布衣」，以錦爲緇布衣之緣也。云「錦紳」者，以錦爲大

帶也。云「并紐」者，亦以錦爲紐，紳之垂也。云「錦束髮」

者，以錦爲總。云「皆朱錦也」者，童子之錦皆朱錦也。云

「紒結髮」者，則《詩》云「總角丱兮」是也。以童子尚華飾，

故衣此也。賓如主人服，贊者玄端從之，立于

外門之外。外門，大門外。

**疏**「賓如」至「之外」○注

「外門，大門外」○釋曰：云「賓如主人服」者，以其賓與主

人尊卑同，故得如之。贊者皆降主人一等，其衣冠雖同，

其裳則異，故不得如主人服，故別玄端也。若然，此冠兄

弟及賓贊皆得玄端。《特牲》主人與尸、祝、佐食玄端，自

餘皆朝服者，彼助祭在廟，緣孝子之心，欲得尊嘉賓，<sup>①</sup>以

事其祖禰，故朝服，與主異也。擯者告。告者，出請入

告。**疏**「擯者告」○注「告者，出請入告」○釋曰：「出請入

告」者，告主人也。主人迎，出門左，西面，再拜。

賓荅拜。左，東也。出以東爲左，人以東爲右。**疏**「主

人」至「荅拜」○注「左東」至「爲右」○釋曰：「出以東爲左，

人以東爲右」，據主人在西，出則以西爲右，人以西爲左

也。主人揖贊者，與賓揖，先入。贊者賤，揖之

而已。又與賓揖，先人道之，贊者隨賓。**疏**「主人」至「先

人」○注「贊者」至「隨賓」○釋曰：云「贊者賤，揖之而已」

者，正謂贊者降于主人與賓一等，爲賤也。云「又與賓揖」

者，對前爲賓拜訖，今又揖者，爲主人將先入，故又與賓揖

乃入也。云「贊者隨賓」者，後不見更與贊者爲禮，故知隨

賓入也。每曲揖。周左宗廟。入外門，將東曲，揖。直

廟，將北曲，又揖。**疏**「每曲揖」○注「周左」至「又揖」○

釋曰：「周左宗廟」者，《祭義》與《小宗伯》俱有此文，對殷

右宗廟也，言此皆欲見人大門東向入廟。云「入外門，將

東曲，揖」者，主人在南，賓在北，俱東向，是一曲，故一揖

也。至廟南，主人在東，北面，賓在西，北面，是曲爲二揖，

故云「直廟，將北曲，又揖」也。通下將入廟又揖，三也。

<sup>①</sup>「欲得尊嘉賓」，曹校云：當爲「欲得尊賓嘉客」，見《特牲》注。

至于席門，揖入。三揖，至于階，三讓。入門將右曲，揖；將北曲，揖；當碑，揖。

**疏**

「至于」至「三讓」

○注「入門」至「碑揖」○釋曰：經直云入門揖，鄭知此為三

揖者，以上云「每曲揖」，據入門東行時。此人廟門三揖，

是據主人將右，欲背客，宜揖；將北曲，與客相見，又揖。

云「當碑，揖」者，碑是庭中之大節，又宜揖。是知三揖據

此而言也。案《昏禮》注：「入三揖者：至內霤，將曲，揖；

既曲，北面，揖；當碑，揖。」及《聘禮》、《鄉飲酒》「入三揖」，

注雖不同，皆據此三節為三揖，義不異也。主人升，立

于序端，西面。賓西序，東面。主人、賓俱升，立

相鄉。**疏**「主人」至「東面」○注「主人」至「相鄉」○釋曰：

此文主人與賓立相鄉，位定，將行冠禮者也。主人升堂，

不拜至者，冠子為賓客，<sup>①</sup>故異於鄉飲酒之等也。贊者

盥于洗西，<sup>②</sup>升，立于房中，西面，南上。盥於

洗西，由賓階升也。立于房中，近其事也。南上，尊於主

人之贊者。古文「盥」皆作「浣」。**疏**「贊者」至「南上」○

注「盥於」至「作浣」○釋曰：此賓者之贊冠者，<sup>③</sup>不在堂。

升，即位于房中，與主人贊者並立者，以其與主人贊者俱

是執勞役之事，故先入房並立待事，故鄭云近事也。云

「盥於洗西，由賓階升也」者，贊者盥於洗西，無正文。案

《鄉飲酒》主人在洗北南面，賓在洗南北面，如此相鄉，又

主人從內，<sup>④</sup>賓從外來之便，贊者亦從之又卑，<sup>⑤</sup>不可與賓

並，明在洗西，東面，及向賓階便，知在洗西也。云「由賓

階升」者，以與主人贊者在房並立，恐由阼階，故明之同於

賓客也。云「南上，尊於主人之贊者」，以其賓主贊者俱降

一等，兩贊尊卑同，而云尊者，直以主人尊敬賓之贊，故云

「尊於主人之贊」。又知與主人贊並立者，以贊冠一人而

已，而云南上，明與主人為序也。<sup>⑥</sup>主人之贊者筵

于東序，少北，西面。主人之贊者，其屬中士若下

士。筵，布席也。東序，主人位也。適子冠於阼。少北，

①「為」上，阮校云：毛本有「非」字。

②「于洗西」，阮校引浦鏜云當衍文。

③「者」字，曹校以為衍字。

④「又」，曹校云當為「由」。

⑤「贊者亦從之又卑」，曹校云「之」當為「外」，「又」當為「由」。

⑥「人」下，曹校云脫「贊者」二字。

辟主人。**疏**「主人」至「西面」○注「主人」至「主人」○釋

曰：云「主人之贊者，其屬中士若下士」者，以主人上士爲正，故云其屬中士。若主人是中士，贊是其屬下士爲之。賓與贊冠者同。云「筵，布席也」者，謂布冠者席也。云

「東序，主人位也」者，引《冠義》云「適子冠於阼」爲證是也。將冠者出房，南面。南面立于房外之西，待賓

命。**疏**「將冠」至「南面」○注「南面」至「賓命」○釋曰：知

在「房外之西」，不在東者，以房外之東南當阼階，是知「房外」者皆在房外之西。故《昏禮》「女出于母左」，母在房外之西，故得出時在母左也。云「待賓命」者，以其下文有

「賓揖將冠」，則賓有命也。贊者莫纚、笄、櫛于筵

南端。贊者，賓之贊冠者也。莫，停也。古文「櫛」爲

「節」。**疏**「贊者」至「南端」○注「贊者」至「爲節」○釋曰：

前頰項已下六物同一篋，陳於房，今將用之，故贊冠者取置于將冠之席南，擬用。若然，六者俱用，不言纚、紕等四物，大略其實皆有可知，不言櫛盛于簞，<sup>①</sup>今亦并簞將來置於席南端也。服不將來置於席南者，皆加冠訖，宜房中隱處加服訖，乃見容體也。知贊者是其「賓之贊冠者也」者，<sup>②</sup>以其贊冠者主爲冠事而來，故知取笄、纚是賓之贊

冠者。若非賓之贊者，則云「主人」以別之，故上云「主人之贊者」是也。賓揖將冠者，將冠者即筵坐。

贊者坐，櫛，設纚。即，就。設，施。**疏**「賓揖」至

「設纚」○釋曰：此二者勞役之事，故贊者爲之也。賓

降，主人降。賓辭，主人對。主人降，爲賓將盥，

不敢安位也。辭對之辭未聞。**疏**「賓降」至「人對」○釋

曰：云「辭對之辭未聞」者，上筵賓、宿賓之時，雖不言其

辭，下皆陳其辭，此賓主之辭下皆不言，故云「未聞」也。

賓盥，卒，壹揖，壹讓，升。主人升，復初位。

揖，讓皆壹者，降於初。古文「壹」皆作「一」。**疏**「賓盥」

至「初位」○釋曰：云「主人升，復初位」者，謂初升序端也。

○注「古文壹皆作一」○釋曰：一，壹得通用，雖疊古文，不

破之也。賓筵前坐，正纚。興，降西階一等。

執冠者升一等，東面授賓。正纚者，將加冠，宜親

之。興，起也。降，下也。下一等，升一等，則中等相授。

① 「不」，曹校云當爲「上」。

② 「其」，曹校以爲衍字。

冠，緇布冠也。」**疏**「賓筵」至「授賓」○注「正纁」至「冠也」

○釋曰：云「正纁者，將加冠，宜親之」者，以其贊者前已設纁訖，今賓復出正之者，雖舊設已正，以親加冠，故纁亦宜親之也。云「下一等，升一等，則中等相授」者，案《匠人》天子之堂九尺，賈、馬以爲傍九等爲階。則諸侯堂宜七尺，則七等階。大夫堂宜五尺，則五等階。士宜三尺，則三等階。故鄭以「中等」解之也。知冠是緇布冠者，以下文有皮弁、爵弁，故知此是緇布冠也。賓右手執項，左手執前，進容，乃祝。坐如初，乃冠。興，復位。贊者卒。進容者，行翔而前鴈焉，至則立祝。坐如初，坐筵前。興，起也。復位，西序東面。卒，謂設缺項、結纁也。**疏**「賓右」至「者卒」○注「進容」至「纁也」○釋曰：知「進容者，行翔而前鴈焉」者，《曲禮》云「堂上不趨，<sup>①</sup>室中不翔」，則堂下固得翔矣。又云：「大夫濟濟，士蹻蹻。」注云：「皆行容止之貌。」此「進容」是士，故知「進容」謂「行翔而前鴈焉」。云「至則立祝」者，以經祝下乃云「坐如初」，故祝時立可知。云「坐如初，坐筵前」者，上正纁時筵前坐，是初坐也。云「卒，謂設缺項、結纁也」者，下文皮弁「贊者卒紼」，此謂緇布冠，無笄紼，直頰項，青組纁

屬於頰，故卒者終頰項與結纁也。若然，經云「右手執項」，謂冠後爲項，非頰項。其下皮弁、爵弁無頰項，皆云「執項」，故知非頰項也。冠者興，賓揖之。適房，服玄端、爵韞。出房，南面。復出房南面者，一加禮成，觀衆以容體。**疏**「冠者」至「南面」○注「復出」至

「容體」○釋曰：言「復」者，對前出房，故云復。前出爲待賓命，此出爲觀衆以容體也。案《郊特牲》論加冠之事，云「加有成也」，故此鄭云「一加禮成」也。云「觀衆以容體」者，以其既去緇布衣、錦緣童子服，著此玄端成人之服，使衆觀知，故云「觀衆以容體」也。賓揖之，即筵坐，櫛，設笄。賓盥，正纁如初。降二等，受皮弁。右執項，左執前，進祝，加之如初。復位。贊者卒紼。如初，爲不見者言也。卒紼，謂繫屬之。**疏**「賓揖」至「卒紼」○注「如初」至「屬之」○釋曰：此當第二加皮弁之節。云「即筵坐，櫛」者，坐訖當脫緇布冠，乃更櫛也。云「設笄」者，凡諸設笄有二種：一是紒內

①「上」原作「下」，阮校云：《要義》、毛本作「上」。據改。

安髮之筭，一是皮弁、爵弁及六冕固冠之筭。今此櫛訖，未加冠即言設筭者，宜是紒內安髮之筭也。若安髮之筭，則緇布冠亦宜有之，前櫛訖不言設筭者，以其固冠之筭，緇布冠無筭而皮弁爵弁有筭，上文已陳訖。今若緇布冠亦言設筭，即與皮弁、爵弁相亂，故緇布冠不言設筭，其實亦有也。若然，緇布冠不言「設筭」而言「設纁」，皮弁冠言「設筭」不言「設纁」，<sup>①</sup>互見爲義，明皆有也。其於固冠之筭，<sup>②</sup>則於賓加弁之時自設之可知。云「如初，爲不見者言也」者，上加緇布冠時，有「賓降，主人降。賓辭，主人對。賓盥，卒，一揖，一讓，升。主人升，復初位。賓筵前坐」之等相次，此皆不見，故設經省文如之而已，故云「爲不見者言也」。云「卒紒，謂繫屬之」者，即上注云「有筭者，屈組以爲紒」，仰屬之，<sup>③</sup>左相繫定，右相緇繫，<sup>④</sup>擬解時易，爲繫屬之也。興，賓揖之。適房，服素積、素鞞。容，出房，南面。容者，再加彌成，其儀益繁。**疏**「興賓」至「南面」○釋曰：興，謂冠者加皮弁訖，起待賓揖之也。云「適房，服素積、素鞞」者，上陳服皮弁云「緇帶、素鞞」，此不言「緇帶」者，上唯有一帶，不言可知，故不言也。○注「容者」至「益繁」○釋曰：此對上加緇布

冠時，直言「出房，南面」，不言「容」，此則言「容」，以「再加彌成，其儀益繁」，故言「容」，其實彼出亦是容，故鄭注云「觀衆以容體」也。賓降三等，受爵弁，加之。服纁裳、韎韐。其他如加皮弁之儀。降三等，下至地。他，謂卒紒容出。**疏**「賓降」至「之儀」○注「降三」至「容出」○釋曰：云「降三等，下至地」者，據士而言。云「他，謂卒紒容出」者，以其自餘皆緇布冠見訖，皮弁如之，而以至卒紒容出，唯皮弁有之，故知「他」謂此二者也。徹皮弁、冠、櫛、筵，入于房。徹者，贊冠者、主人之贊者爲之。**疏**「徹皮」至「于房」○注「徹者」至「爲之」○釋曰：冠即緇布冠也，不言緇布冠者，可知故也。皮弁具言者，以有爵弁之嫌。然不言爵弁者，著之以受禮，至見母、兄弟、姑姊訖，乃易服故也。云「徹者，贊冠者、主人之贊者爲之」者，以其贊冠者奠櫛，主人之贊者設筵，故知

①「冠」，曹校以爲衍字。

②「於」，曹校以爲衍字。

③「仰」原作「伸」，據重刊單疏本改。

④「緇」，阮校云：毛本作「屈」。

還遣之也。筵于戶西，南面。筵，主人之贊者。戶西，室戶西。

**疏**「筵于戶西南面」○注「筵主」至「戶西」○釋曰：知主人之贊者設筵者，以上文「筵于東序」已遣主人之贊，故知此亦主人之贊者也。云「戶西，室戶西」者，以下記醺于客位在戶西，醺醺同處，故知戶西也。贊者洗于房中，側酌醴，加枲，覆之，面葉。洗，盥而洗爵者。《昏禮》曰房中之洗「在北堂，直室東隅。篚在洗東，北面盥」。側酌者，言無爲之薦者。面，前也。葉，枲大端。贊酌者，賓尊不入房。古文「葉」爲「擣」。

**疏**

「贊者」至「面葉」○注「洗盥」至「爲擣」○釋曰：云「洗，盥而洗爵」者，凡洗爵者必先盥，盥有不洗爵者。此經直云「洗」，明盥手乃洗爵，故鄭云「盥而洗爵」。引《昏禮》「房中之洗」至「北面盥」者，證房中有洗之事。若然，前設洗于庭者不爲醴，以房中有洗，醴尊也。云「側酌者，言無爲之薦者」，謂無人爲之薦脯醢，還是此贊者，故下直言「薦脯醢」，不言別有他人，明還是贊者也。《昏禮》贊醴婦，是贊者自酌自薦，經雖不言側酌，側自明也。云「葉，枲大端」者，謂扱醴之面柄細，故以爲枲大端。此與《昏禮》賓皆云「面葉」者，此以賓尊不入戶，贊者面葉授賓，賓

得面枋授冠者，冠者得之面葉以扱醴而祭。《昏禮》賓亦主人尊，不入房，贊者面葉以授主人，主人面枋以授賓，賓得面葉以扱祭。至於《聘禮》禮賓，宰夫實觶以醴，加枲于觶，面枋授公者，凡醴皆設枲，《聘禮》宰夫不訝授，公側受醴，則還面枋以授賓，故面枋也。賓揖冠者就筵，筵西，南面。賓受醴于戶東，加枲，面枋，筵前，北面。戶東，室戶東。今文「枋」爲「柄」。

**疏**

「賓

揖」至「北面」○注「戶東」至「爲柄」○釋曰：知「室戶東」者，以其冠者筵室戶西，賓自至房戶取醴，酌醴者出，向西以授也。冠者筵西拜，受觶。賓東面荅拜。筵西拜，南面拜也。賓還荅拜於西序之位。東面者，明成人與爲禮，異於荅主人。

**疏**

「冠者」至「荅拜」○注「筵西」

至「主人」○釋曰：云「筵西拜，南面拜也」者，上云冠者「筵

①「擣」，阮校云：當作「攬」。

②「面」，曹校云當爲「枲」。

③「以」下，曹校云當脫「葉」字。

④「此與昏禮賓」，阮校引盧文弨云：「禮」下脫一「禮」字。浦鏞、金曰追皆云當補。下同。」

⑤「筵」，阮校云：《通解》、《要義》俱作「在」。

西，南面」，知受觶拜，<sup>①</sup>還南面也。知賓東面在西序者，以上文與主人相對，本位於西序也。云「東面者，明成人與爲禮，異於荅主人」者，案《鄉飲酒》、《鄉射》賓於西階北面荅主人拜，今此於西序東面拜，故云異於荅主人。又《昏禮》禮賓、《聘禮》禮賓皆云「拜送」，此云「荅拜」，不云「拜送」者，彼禮是主人之物，故云「拜送」，此禮非賓物，故云「荅拜」也。薦脯醢。贊冠者也。**疏**「薦脯醢」○注「贊冠者也」○釋曰：上文云贊「側酌醴」，是贊冠者，明此薦亦是贊冠者也。冠者即筵坐，左執觶，右祭脯醢，以枳祭醴三，興。筵末坐，啐醴，建枳，興。降筵，坐奠觶，拜，執觶興。賓荅拜。建枳，扱枳於醴中。其拜皆如初。古文「啐」爲「呼」。**疏**「冠者」至「荅拜」○釋曰：云「祭醴三，興」者，三祭者一如《昏禮》始扱一祭，又扱再祭也。云「筵末坐，啐醴，建枳，興。降筵」，此啐醴不拜既爵者，以其不卒爵，故不拜也。冠者奠觶于薦東，降筵，北面坐取脯，降自西階，適東壁，北面見于母。薦東，薦左。凡奠爵，將舉者於右，不舉者於左。適東壁者，出闔門也，時母

在闔門之外。婦人入席由闔門。**疏**「冠者」至「於母」○

注「薦東」至「闔門」○釋曰：云「薦東，薦左」者，據南面爲正，故云「薦左」也。云「凡奠爵，將舉者於右」者，謂若《鄉飲酒》、《鄉射》是也。此文及《昏禮》贊醴婦，是不舉者皆奠之於左也。云「適東壁者，出闔門也」者，宮中之門曰闔門。母既冠子無事，故不在門外。<sup>②</sup>今子須見母，故知出闔門也。云「婦人入廟由闔門」者，《雜記》云「夫人奔喪，入自闔門，升自側階」，鄭注云「宮中之門曰闔門，爲相通者也」是也。母拜受，子拜送，母又拜。婦人於丈夫，雖其子猶俠拜。**疏**「母拜」至「又拜」○注「婦人」至「俠拜」○釋曰：鄭云「婦人於丈夫，雖其子猶俠拜」者，欲見禮子之體例，<sup>③</sup>但是婦人於丈夫皆使俠拜，故舉子以見義也。賓降，直西序，東面。主人降，復初位。初位，初至階讓升之位。**疏**「賓降」至「初位」○釋

- ① 「受」原作「以」。阮校云：《要義》作「受」。據改。
- ② 「不」，曹校以爲衍字。
- ③ 「子」，曹校以爲衍字。

曰：此將欲與冠者造字而迎之位也。<sup>①</sup>○注「初位」至「之位」○釋曰：云「初位，初至階讓升之位」者，謂初迎賓至階讓升之位。其賓直西序，則非初讓升之位。主人直東序西者，欲迎其事，聞字之言故也。冠者立于西階東，

南面。賓字之，冠者對。對，應也。其辭未聞。

**疏**「冠者」至「者對」○注「對應」至「未聞」○釋曰：云「賓字之」者，即下文有字辭，又有「某甫」之字，若孔子云尼父之字是也。云「其辭未聞」者，下有賓祝辭，不見冠者應辭，故云「未聞」也。案《禮記·冠義》云：「既冠而字之，成人之道也。見於母，母拜之。」據彼則字訖乃見母，此文先見乃字者，此文見母是正見。彼見母在下者，記人以下有兄弟之等皆拜之，故退見母於下，使與兄弟拜文相近也。若然，未字先見母，字訖乃見兄弟之等者，急於母，緩於兄弟也。賓出，主人送于廟門外。不出外門，將禮之。**疏**「賓出」至「門外」○注「不出」至「禮之」○釋曰：以下云「請醴賓」，故云「將禮之」也。請醴賓，賓禮辭，許。賓就次。此「醴」當作「禮」。禮賓者，謝其自勤勞也。次，門外更衣處也，以帷幕簾席爲之。<sup>②</sup>

**疏**「請醴」

至「就次」○注「此醴」至「爲之」○釋曰：云「此醴當作禮」者，對上文有「酌醴」、「受醴」之等，不破之，此當爲上於下之禮，不得用醴。禮即從醴字，何者？《周禮》云「諸侯用鬯」，<sup>③</sup>不云鬯賓，明不得以醴禮賓，即爲醴，故破從禮也。

云「次，門外更衣處也」者，次者，舍之名，以其行禮衣服或與常服不同，更衣之時須入於次，故云「更衣處也」。云「必帷幕簾席爲之」者，<sup>④</sup>案《聘禮·記》云：「宗人授次，次以帷，少退于君之次。」注云：「主國之門外，諸侯及卿大夫之所使者，次位皆有常處。」又案《周禮·幕人》：「掌帷、幕、幄、帟、綬之事。」注云：「帷幕皆以布爲之，四合象宮室，曰幄。」云「簾席」者，士卑，或用簾席，是以《雜記》諸侯大夫喪皆用布，<sup>⑤</sup>士用簾席爲之，次亦當然。冠者見於兄弟，兄弟再拜，冠者荅拜。見贊者，西

<sup>①</sup>「迎」，阮校云：此與下「欲迎其事」，兩「迎」字疑皆當作「近」。

<sup>②</sup>「以」，阮校云：毛本作「必」。

<sup>③</sup>「諸」上，阮校云：《通解》、毛本有「天子禮」三字。

<sup>④</sup>「必」原作「心」，據阮本改。

<sup>⑤</sup>「皆」上，曹校云脫「藉」字。



面拜，亦如之。見贊者西面拜，則見兄弟東面拜。贊者後賓出。

**疏**「冠者」至「如之」○注「見贊」至「賓出」○釋曰：兄弟位在東方，此贊冠者則賓之類，故贊者東面也。

言贊者先拜，冠者荅者也。<sup>①</sup>知「贊者後賓出」者，文於見兄弟下始見之，明「贊者後賓出」也。出亦當就次，待禮之也。

人見姑、姊，如見母。入，入寢門也。席在寢門外。如見母者，亦北面，姑與姊亦俠拜也。不見妹，妹卑。

**疏**「人見」至「見母」○注「人入」至「妹卑」○釋曰：男子居外，女子居內。廟在寢門外，人見，入寢門可知。不見父與賓者，蓋冠畢則已見也，不言者，從可知也。云「不見妹，妹卑」者，以其妹卑於姑、姊，故不見也。

乃易服，服玄冠、玄端、爵韞。奠摯，見于君。遂以摯見於鄉大夫、鄉先生。易服不朝服者，非朝事也。摯，雉也。鄉先生，鄉中老人為卿大夫致仕者。

**疏**「乃易」至「先生」○注「易服」至「仕者」○釋曰：云「易服」者，爵弁既助祭之服，不可服見君與先生等，故易服服玄端也。云「易服不朝服者，非朝事也」者，此乃因加冠以成人之禮見君，非正服之節，故不朝服。經直云「玄端」，則

兼玄冠矣。今更云「玄冠」者，以初冠時服玄端為緇布冠

服，緇布冠非常著之冠而弊之，易服宜服玄冠配玄端，故兼云「玄冠」也。朝服與玄端同，玄端則玄裳、黃裳、雜裳、

黑屨，若朝服玄冠、玄端雖同，但裳以素而屨色白也。以

其但正幅，<sup>②</sup>故朝服亦得端名。然六冕皆正幅，故亦名端。是以《樂記》云魏文侯「端冕而聽古樂」。又《論語》云

「端章甫」，鄭云「端，玄端，諸侯視朝之服」，則玄端不朝，<sup>③</sup>得名為玄端也。云「摯，雉也」者，士執雉是其常，故

知摯是雉也。云「鄉先生，鄉中老人為卿大夫致仕者」者，此即《鄉飲酒》與《鄉射·記》「先生」及《書傳》「父師」，皆

一也。先生亦有士之少師，鄭不言者，經云「鄉大夫」，不言士，故先生亦略不言，其實亦當有士也。

乃醴賓，以壹獻之禮。壹獻者，主人獻賓而已，即燕，無亞獻者。

獻、酢、酬、賓、主人各兩爵而禮成。《特性》、《少牢饋食》之禮獻尸，此其類也。士禮一獻，卿大夫三獻。禮賓不用

柶者，沛其醴。《內則》曰：「飲：重醴清糟，稻醴清糟，黍

① 下「者」字，曹校云各本作「之」是。

② 「但」，曹校云當為「俱」。

③ 「不」，阮校云：監本作「以」。

醴清糟，梁醴清糟。」凡醴事，質者用糟，文者用清。

**疏**

「乃醴」至「之禮」○注「壹獻」至「用清」○釋曰：此「醴」亦當爲「禮」，不言可知也。云「壹獻者，主人獻賓而已，即燕，無亞獻者」者，案《特牲》、《少牢》主人獻尸，主婦亞獻，爲二獻，此則主人獻賓而已，無亞獻。知即燕者，《鄉飲酒》末有燕，故知獻後有燕。云「獻、酢、酬、賓，主人各兩爵而禮成」者，主人獻賓，賓酢主人，主人將酬賓，先自飲訖乃酬賓，莫而不舉，是「賓、主人各兩爵而禮成」也。必知一獻之禮，禮備有酬酢者，《昏禮》舅姑饗婦以一獻之禮，莫酬得正禮，不旅。又曰「婦酢舅，更爵自薦」，是備酬酢也。《鄉飲酒》亦備獻、酢、酬，是其義也。云「《特牲》、《少牢饋食》之禮獻尸，此其類也」者，此賓、主人各兩爵，無亞獻，彼主人、主婦各一爵，有亞獻。雖不同，得主人一獻義類同，故云「此其類也」。云「士禮一獻」者，即《士冠》及《昏禮》、《鄉飲酒禮》、《鄉射》皆是一獻也。云「卿大夫三獻」者，案《左氏傳》云：「季孫宿如晉，拜莒田也。晉侯享之，有加籩。武子退，使行人告曰：小國之事大國也，苟免於討，不敢求貺，得貺不過三獻。」又《禮記·郊特牲》云「三獻之介」，亦謂卿大夫三獻之介。案《大行人》云「上公饗禮九獻，侯伯七獻，子男五獻」。是以大夫三獻，士一獻，

亦是其差也。云「禮賓不用枵者，沛其醴」者，此有獻、酢、酬，飲之沛者，故不用枵。《冠禮》禮子用醴，不沛，故用枵也。云「《內則》曰飲」者，鄭注云：「目諸飲也。」云「重醴清糟」者，鄭云：「重，陪也。糟，醇也。清，沛也。致飲有醇者，有沛者，陪設之。」稻醴以下是也。云「凡禮事，質者用糟，文者用清」者，質者謂若《冠禮》禮子之類是也，故於房戶之間顯處設尊也。<sup>①</sup>主人酬賓，束帛、儷皮。飲賓客而從之以財貨曰酬，所以申暢厚意也。束帛，十端也。儷皮，兩鹿皮也。古文「儷」爲「離」。

**疏**

「主人」至

「儷皮」○注「飲賓」至「爲離」○釋曰：「主人酬賓」，當莫酬之節，行之以財貨也。此禮賓與饗禮同，但爲饗禮有酬幣則多。故《聘禮》云「若不親饗，致饗以酬幣」，注云：「禮幣束帛，乘馬，亦不是過也。」又案《大戴禮》云「禮幣采飾而四馬，是大夫禮多，與士異也」。案《禮器》云「琥璜爵」，鄭云「天子酬諸侯，諸侯相酬，以此玉將幣也」，則又異於大夫也下。<sup>②</sup>凡酬幣之法，尊卑獻數多少不同，及其酬幣，唯於

① 「於」原作「以」，今據重刊單疏本改。案，此句之上，曹校以爲有脫文數句。

② 「也」，曹校云當爲「以」。

奠酬之節一行而已。《春秋》秦后子出奔晉，后子享晉侯，「歸取酬幣，終事八反」。杜注云：「備九獻之儀，始禮自齋其一，故續送其八酬酒幣。」彼九獻之間皆云「幣」，春秋之代奢侈之法，非正禮也。云「束帛，十端也」者，禮之通例，凡言束者，無問脯與錦，皆以十爲數也。云「儷皮，兩鹿皮也」者，當與《射禮》庭實之皮同。<sup>①</sup>《禮記·郊特牲》云：「虎豹之皮，示服猛也。」又《覲禮》用馬，則國君用馬或虎豹皮。若臣聘則用鹿皮，故鄭注《聘禮》云：「凡君於臣，臣於君，麋鹿皮可也。」言「可」者，以無正文。若然，兩國諸侯自相見，<sup>②</sup>亦用虎豹皮也。贊者皆與，贊冠者爲介。贊者，衆賓也。皆與，亦飲酒爲衆賓。介，賓之輔，以贊爲之，尊之。飲酒之禮，賢者爲賓，其次爲介。

**疏**

「贊者」至「爲介」○注「贊者」至「爲介」○釋曰：鄭知「贊者，衆賓」者，以其下別言「贊冠者」，明上云「贊者」是衆賓也。云「介，賓之輔」者，以其《鄉飲酒》之禮，賢者爲賓，其次爲介，又其次爲衆賓。彼據將貢以爲優劣之次也，此雖不貢，以飲酒之禮立賓主，亦以優劣立介以輔也。云「以贊爲之，尊之」者，謂賓此贊冠者，<sup>③</sup>故遣爲介也。云「飲酒之禮，賢者爲賓，其次爲介」者，取尊爲義也。賓出，

主人送于外門外，再拜，歸賓俎。一獻之禮，有薦有俎，其牲未聞。使人歸諸賓家也。**疏**「賓出」至「賓俎」○注「一獻」至「家也」○釋曰：賓不言薦脯醢者，案舅姑共饗婦以一獻，有姑薦，則此一獻亦有薦脯醢可知。經有俎必有特性，但《鄉飲酒》、《鄉射》取擇人而用狗，此冠禮無擇人之義，則不用狗，但無正文，故云「其牲未聞」也。知「使人歸諸賓家」者，以賓出，主人送於門外，乃始言歸賓俎，明歸於賓家也。

## 儀禮注疏卷第二

江寧府知府陽城張敦仁編校 元和縣  
學生員顧廣圻覆校

- ① 「射」，曹校云當爲「聘」。  
② 「國」原作「說」，阮校云：毛本作「國」。據改。  
③ 「賓」，阮校云：宜作「尊」。

# 儀禮疏卷第三

唐朝散大夫行大學博士弘

文館學士臣賈公彥等撰

若不醴，則醢用酒。若不醴，謂國有舊俗可行，聖人用焉不改者也。《曲禮》曰「君子行禮，不求變俗。祭祀之禮，居喪之服，哭泣之位，皆如其國之故。謹脩其法而審行之」是。酌而無酬酢曰醢。醢，亦當爲「禮」。疏「若不」至「用酒」○注「若不」至「爲禮」○釋曰：自此已上，說周禮冠子之法，自此已下至「取籩脯以降如初」說夏殷冠子之法。云「若不醴，則醢用酒」者，案上文適子冠於阼，三加訖一體於客位，是周法，今云「若不醴，則醢用酒」，非周法，故知先王法矣。故鄭云「若不醴，謂國有舊俗可行，聖人用焉不改者也」。云聖人者，即周公。制此《儀禮》用舊俗，則夏殷之禮是也。云《曲禮》曰「已下者，是《下曲禮》文也。云「君子行禮不求變俗」者，與下文爲目，謂君

子所往之國，不求變彼國之俗，若衛居殷墟者也。云「祭祀之禮」者，若《郊特牲》云「殷人先求諸陽，周人先求諸陰」，求諸陽者，先合樂乃灌地降神也；求諸陰者，謂先灌地乃合樂。若衛居殷地，用殷禮，則先合樂乃灌也。云「居喪之服」者，謂若《檀弓》「周之諸侯絕旁期，降上下，殷之諸侯服旁期，不降上下」，衛居殷墟，亦不降上下也。云「哭泣之位」者，殷禮無文，亦應有異也。云「皆如其國之故」者，謂上所云，皆如其故國之俗而行之。云「是」者，依先王舊俗而行不改之事。向來所解引《曲禮》，據人君施化之法，不改彼國舊俗，證此「醢用酒」舊俗之法也。故《康誥》周公戒康叔居殷墟當用殷法，是以云「茲殷罰有倫」，使用殷法。故所引《曲禮》皆據不變彼國之俗。但君子行禮，不求變俗有二途：若據《曲禮》之文云「君子行禮不求變俗」，鄭注云：「求猶務也。不務變其故俗，重本也。謂去先祖之國居他國。」又云：「祭祀之禮，居喪之服，哭泣之位，皆如其國之故，謹脩其法而審行之。」注：「其法謂其先祖之制度，若夏、殷者。」謂若杞、宋之人居鄭、衛、鄭、衛之人居杞、宋。若據彼注，謂臣去己國居他國，不變己國之俗。是以《定四年》祝佗云殷人六族在魯，啓以商政。亦不變本國之俗，故開商政示之。皆據當身居他國，不變

己國之俗。與此注引不同者，不求變俗，義得兩合，故各據一邊而言也。云「酌而無酬酢曰醺」者，鄭解無酬酢曰醺，唯據此文而言。所以然者，以周法用醺，<sup>①</sup>無酬酢曰醺。案《曲禮》云：「長者舉未醺。」鄭注云：「盡爵曰醺。」是醺不專於無酬酢者。若然，醺亦無酬酢，不為醺名者，但醺太古之物，自然質無酬酢，此醺用酒，酒本有酬酢，故無酬酢得名醺也。云「醺亦當為禮」者，亦上「請禮賓」之醺，故破之也。尊于房戶之間，兩鬴，有禁。玄酒在西，加勺，南枋。房戶間者，房西、室戶東也。禁，承尊之器也。名之為禁者，因為酒戒也。玄酒，新水也，雖今不用，猶設之，不忘古也。**疏**「尊于」至「南枋」○注「房戶」至「古也」○釋曰：云「禁，承尊之器也。名之為禁者，因為酒戒也」者，以醺不言禁，醺非飲醉之物，故不設戒也。此用酒，酒是所飲之物，恐醉，因而禁之，故云「因為酒戒」。若然，玄酒非飲，亦為禁者，以玄酒對正酒，不可一有一無，故亦同有禁也。云「不忘古也」者，上古無酒，今雖有酒，猶設之，是不忘古也。洗，有篚在西，南順。洗，庭洗，當東榮，南北以堂深。篚亦以盛勺、鬴，陳於洗西。南順，北為上也。**疏**「洗有」至「南順」○注

「洗庭」至「上也」○釋曰：知「洗，庭洗」者，上周法用醺之時，醺之尊在房。今醺用酒，與常飲酒同，故洗亦當在庭。是以下云「賓降，取爵于篚，卒洗，升酌」，故知洗在庭也。設洗法在設尊前，此洗亦當在設尊前設之，故此直云「洗，有篚在西」，不言設也。若然，上不言設洗者，以其上云「醺用酒」，即連云尊，文勢如此，故不言設洗。云「當東榮，南北以堂深」者，上已有文也。云「篚亦以盛勺、鬴」者，周法用醺在房，庭洗無篚，此用酒，庭洗有篚，故周公設經，辨其異者。但醺篚在房，以盛勺、鬴，此庭洗篚亦盛勺、鬴，故云「亦」也。云「南順，北為上也」者，席之制有首尾者，據識之先後為首尾。此篚亦云「上」者，應亦有記識為上下。以其南順之言，故北為上也。始加，醺用脯醢。賓降，取爵于篚，辭降如初。卒洗，升酌。始加者，言一加一醺也。加冠於東序，醺之於戶西，同耳。始醺亦薦脯醢。賓降者，爵在庭，酒在堂，將自酌也。辭降如初，如將冠時降盥，辭主人降也。凡薦出自東房。**疏**「始加」至「升酌」○注「始加」至「東房」○釋曰：云

①「以周法用醺」，曹校云「周」當為「殷」，「醺」當為「酒」。

「始加，醺用脯醢」者，此言與周別之事。周家三加訖，乃一體於客位，用脯醢；此加訖即醺於客位，用脯醢；是其不同也。但言「始加，醺用脯醢」者，因言與周異之意，其實未行事，是以下乃始云「賓降，取爵于篚」也。云「加冠於東序，醺之於戶西，同耳」者，經不見者，嫌與周異，故辨之。其經不言冠者醺之處，即與周同，故經不見也。云「始醺，亦薦脯醢」者，以其經云「醺用脯醢」，汎言若醺用酒，未著其節，故亦如上周家三加始薦脯醢。云「賓降者，爵在庭，酒在堂，將自酌也」者，決周家體在房，贊者酌授賓，賓不親酌，此則賓親酌酒洗爵，故有升降也。云「辭降如初，如將冠時降盥，辭主人降也」者，欲見用醴時直有將冠時賓降，無賓降取爵，以其酌在房故也。今云「如初」者，唯謂如將冠降盥之事也。云「凡薦出自東房」者，用醴時尊在房，脯醢出自東房，醺用酒，酒尊在堂，脯醢亦出自東房，《鄉飲酒》、《鄉射》、《特性》、《少牢》薦者皆出東房，故云「凡」以該之也。

**冠者拜受，賓荅拜，如初。**

贊者筵于戶西，賓升，揖冠者就筵，乃酌，冠者南面拜受，賓授爵，東面荅拜，如醴禮也。於賓荅拜，贊者則亦薦之。

**疏**「冠者」至「如初」○注「贊者」至「薦之」○釋曰：此經略

言拜受、荅拜，不言處所、面位。言「如初」者，以其雖用酒與周異，自外與周同，故直言「如初」也。是以鄭取上醴子法以言之，故言「如初」以結之也。云「於賓荅拜，贊者則亦薦之者」，經直云「拜受，荅拜，如初」，亦不言出薦之時節，故鄭別言之，亦當如周家醴子時薦也。凡醴子、醴婦，并《昏禮》禮賓，面位不同者，皆隨時之便，故不同也。

**冠者升筵，坐。左執爵，右祭脯醢，祭酒。興，筵末坐，啐酒。降筵，拜，賓荅拜。冠者奠爵于薦東，立于筵西。**冠者立俟賓命，賓揖之，則就東序之筵。

**疏**「冠者」至「筵西」○注「冠者」至「之筵」

○釋曰：此經雖用醴酒不同，其於行事與周禮醴子同，但位有異：彼一加訖，入房易服訖，出房立，待賓容命；<sup>①</sup>此則醺訖，立於席西，待賓命為異，皆為更加皮弁也。云「興，筵末坐，啐酒」者，為醺於客位，敬之故也。《昏禮》禮賓與《聘禮》禮賓，在西階上啐醴者，《昏禮》注云「此筵不主為飲食起」，《聘禮》注云「糟醴不卒」故也。冠子用醴拜，此醴子用酒亦拜者，以與醴子同是成人法，拜啐，故雖

①「容」，阮校云：毛本作「客」。

用醢亦拜啐也。徹薦、爵、筵、尊不徹。徹薦與爵者，辟後加也。不徹筵、尊，三加可相因，由便也。

**疏**「徹

薦」至「不徹」○注「徹薦」至「便也」○釋曰：云「徹薦與爵者，辟後加也」者，案下文云：「加皮弁，如初儀。再醢，攝酒，其他皆如初。」酒則云「攝」，明因前也。除酒之外云「其他如初」，明薦、爵更設，是後加卒設於席前也。故知前云「徹薦、爵」爲「辟後加」也。加皮弁，如初儀。

再醢，攝酒，其他皆如初。攝猶整也，整酒謂撓

之。今文「攝」爲「聶」。

**疏**「加皮」至「如初」○注「攝猶

至」爲「聶」○釋曰：云「攝猶整也，整酒謂撓之」者，案《有司徹》云：「司宮攝酒。」注云：「更洗益整頓之。」不可云洗亦當爲撓，謂更撓攪、添益、整頓，示新也。加爵弁，如

初儀。三醢，有乾肉折俎，啐之，其他如初。

北面取脯，見于母。乾肉，牲體之脯也。折其體以

爲俎。啐，嘗之。

**疏**「加爵」至「于母」○注「乾肉」至「嘗

之」○釋曰：前二醢有脯醢，更加此乾肉折俎。言「啐之」者，啐謂至齒嘗之。案下若殺再醢不言「攝」，此經再醢言「攝」，三醢不言「攝」，則再醢之後皆有攝，互文以見義也。

云「取脯見于母」者，亦適東壁，俛拜，與周同。案下文「若殺」已下云「卒醢，取籩脯以降」，此亦取籩脯，乾肉曰脯。

云「乾肉，牲體之脯也」者，案《周禮·腊人》云：「掌乾肉，

凡田獸之脯腊。」鄭注云：「大物解肆乾之，謂之乾肉。若

今梁州鳥翅矣。薄析曰脯，捶之而施薑桂曰脔脔。」若然，

乾肉與脯脔別。言「若今梁州鳥翅」者，或爲豚解而七體

以乾之，謂之乾肉，及用之，將升于俎，則節折爲二十一

體，與《燕禮》同，故總名「乾肉折俎」也。若殺，則特

豚，載合升，離肺實于鼎，設局鼎。特豚，一豚

也。凡牲皆用左胖。煮於鑊曰亨，在鼎曰升，在俎曰載。

載合升者，明亨與載皆合左右胖。離，割也。割肺者，使

可祭也，可啐也。今文「局」爲「鉉」，古文「鼎」爲「密」。

**疏**若殺「至」局鼎○注「特豚」至「爲密」○釋曰：上醢子

用乾肉，不殺。自此至「取籩脯以降」，論夏殷醢子殺牲之

事。殺言「若」者，是不定之辭，殺與不殺俱得，云若也。

云「載合升」者，在鼎曰升，在俎曰載，載在後，今先言

「載」，後言「升」，又「合」字在「載」、「升」之間，通事之者，

欲見在俎、在鑊俱曰「合」也。云「設局鼎」者，以茅覆鼎，

長則束其本，短則編其中。案《冬官·匠人》：「廟門容大



局七个。」注云：「大局，牛鼎之局，長三尺。」又曰：「闔門容小局參个。」注云：「小局，腳鼎之局，長二尺。」皆依漢禮而知。今此豚鼎之局當用小局也。云「特豚，一豚也」者，此特若郊特牲之特，皆以特爲一也。云「凡牲皆用左胖」者，案《特牲》、《少牢》皆用右胖。《少儀》云：「大牢則以牛左肩折九个。」爲歸胙用左，則用右而祭之。《鄉飲酒》、《鄉射》主人用右體，生人亦與祭同用右者，皆據周而言也。此云用左，鄭據夏、殷之法，與周異也。但《士虞》喪祭用左，反吉故也。云「煮於鑊曰亨」者，案《特牲》云：「亨于門外東方，西面，北上。」注云：「亨，煮也。亨豕、魚、腊，以鑊，各一爨。《詩》云：『誰能亨魚，漑之釜鬻。』」是鑊爲亨也。云「在鼎曰升，在俎曰載」者，案《昏禮》云「特豚合升」，又云「側載」，《特牲》亦云「卒載，加匕于鼎」，《少牢》云「司馬升羊，實于一鼎」，皆是「在鼎曰升，在俎曰載」之文。但在鼎直有升名，在俎則升、載兩稱也。故《少牢》云：「升羊，載右胖。升豕，其載如羊。」《有司徹》亦云「乃升」，注云「升牲體於俎也」，是在俎升、載二名也。云「載合升者，明亨與載皆合左右胖」者，以升載並陳，又合在二者之間，故知從鑊至俎皆合左右胖也。云「離，割也。割肺者，使可祭也，可啖也」者，凡肺有二種，一者舉肺，一者

祭肺。就舉肺之中復有三稱：一名舉肺，爲食而舉；二名離肺，《少儀》云三牲之肺離而不提心也；三名啖肺，以齒啖之。此三者皆據生人爲食而有也。就祭肺之中亦復有三稱：一者謂之祭肺，爲祭先而有之；二者謂之付肺，付切之使斷；三者謂之切肺，名雖與付肺異，切肺則付肺也。三者皆爲祭而有。若然，切肺、離肺指其形，餘皆舉其義稱也。云「今文局爲鉉，古文鼎爲密」者，一部之內皆然，不從今文，故疊之也。始醯，如初。亦薦脯醢，徹薦爵，筵尊不徹矣。疏「始醯如初」○注「亦薦」至「徹矣」○釋曰：云「始醯，如初」者，此一醯與不殺同，未有所加，故云「如初」也。再醯，兩豆：葵菹、羸醢；兩籩：栗、脯。羸醢，蜺蜺醢。今文「羸」爲「蜺」。疏「再醯」至「栗脯」○注「羸醢」至「爲蜺」○釋曰：此二豆二籩增數者，爲有殺牲，故盛其饌也。案鄭注《周禮·醢人》云：「細切爲醢，全物若腍爲菹。作醢及醢者，先膊乾其肉，乃後菹之，雜以粱糲及鹽，漬以美酒，塗置甕中，百日則成矣。」是作醢及菹之法也。云「羸醢，蜺蜺醢」者，《爾雅》文。三醯，攝酒如再醯，加俎啖之，皆如初，啖肺。攝酒如再醯，則再醯亦攝之矣。加俎啖之，「啖」當



爲「祭」，字之誤也。祭俎如初，如祭脯醢。

**疏**「三醢」至

「膾肺」○注「攝酒」至「脯醢」○釋曰：云「攝酒如再醢，則再醢亦攝之矣」者，周公作經取省文，再醢不言攝酒，以三醢如之，則再醢攝之可知，故鄭云「再醢亦攝之矣」。云「加俎膾之，膾當爲祭，字之誤也」者，經有二膾，不破「如初膾」之「膾」，唯破「加俎膾」之字者，以祭先之法，祭乃膾之，又不宜有二「膾」，故破加俎之「膾」爲「祭」也。云「祭俎如初，如祭脯醢」者，以三醢唯祭俎之肺，不復祭脯醢也。若然，前「不殺」之時，一醢徹脯醢，爲辭再醢之脯醢。至再醢不言「徹脯醢」者，以三醢上唯加乾肉，不薦脯醢，故不徹也。今殷亦然，一醢徹薦辭，<sup>①</sup>至再醢亦不徹薦，直徹爵而已。亦爲三醢以不加籩豆，<sup>②</sup>加牲俎，是以祝辭一醢亦云嘉薦，<sup>③</sup>至三醢者直云「籩豆有楚」。楚，陳列貌。是三醢不加籩豆明文也。卒醢，取籩脯以降，如初。

**疏**「卒醢」至「如初」○釋曰：此取籩脯見母，與前不異。上周法與「不殺」皆不云「籩」者，上皆直薦脯醢，不云籩豆，此「若殺」云「兩籩」，故云「籩脯」。若然，既殺有俎肉而取脯者，見其得禮而已，<sup>④</sup>故不取俎肉。如若得束帛者，不須取脯，是以冠禮禮賓得束帛，皆不取脯也。

若孤子，則父兄戒、宿。父兄，諸父諸兄。**疏**「若

孤」至「戒宿」○注「父兄，諸父諸兄」○釋曰：上陳士有父加冠禮訖，自此至「束塾，北面」，論士之無父自有加冠之法也。周公作文，於此乃見之者，欲見周與夏殷孤子同冠於阼階，禮之於客位，唯一醢三醢不同耳，<sup>⑤</sup>是以作經言其與上異者而已。言「父兄，諸父諸兄」者，以其上文父兄非直戒、宿而已，故知此是諸父諸兄，非己之親父親兄也。冠之日，主人紛而迎賓。拜，揖讓，立于序端，皆如冠主。禮於阼。冠主，冠者親父若宗兄也。古文「紛」爲「結」，今文「禮」作「體」。

**疏**「冠之」至

「於阼」○注「冠主」至「作體」○釋曰：云「主人紛而迎賓」者，即上「采衣紛」是也。云「拜，揖讓，立于序端」者，謂主人出先拜，賓荅拜訖，揖讓而入于廟門。既入門，又三揖至階，又三讓而升堂，乃立于東序端，賓升，立西序端。一

①「辭」，曹校云當爲「爵」。

②「以」，曹校以爲衍字。

③「一」，曹校云當爲「二」。

④「而」原作「面」，今據重刊單疏本改。

⑤「一醢三醢」，曹校云當爲「一體三醢」。

皆如上父兄爲主人，故作文省略，總云「揖讓，立于序端，皆如冠主」也。云「禮於阼」者，別言其異者也。云「今文禮作醴」者，鄭不從今文者，以其言醴則不兼於醢，言禮則兼醴醢二法故也。凡拜，北面于阼階上。賓亦北面于西階上荅拜。

**疏**「凡拜」至「荅拜」○釋曰：

此亦異於父在者。云「凡拜」者，謂初拜至及啐拜之等。<sup>①</sup>賓主皆北面，與父在時拜于筵西南面，賓拜于序東面爲異也。若殺，則舉鼎陳于門外，直東塾，北面。孤子得申，禮盛之。父在，有鼎不陳於門外。

**疏**

「若殺」至「北面」○釋曰：云「若殺」者，有則殺，無則已，故云「若」，不定之辭也。言「舉鼎」者，謂於廟門外之東壁簠所，舉至廟門外之東，直東塾，二鼎豚、魚腊，<sup>②</sup>鼎皆北向，相重而列之也。○注「孤子」至「門外」○釋曰：案上文父在亦有殺法，今鄭云「孤子得申，禮盛之」者，不爲殺起，止爲陳鼎于外而言。鄭知「父在，有鼎不陳於外」者，以上文「若殺」直云「特豚載合升」，不辨外內。孤子乃云「舉鼎陳于門外」，類于上「父在，陳鼎不於門外」也。<sup>③</sup>凡陳鼎在外者，賓客之禮也；在內者，家私之禮也。<sup>④</sup>是在外者爲盛也。今孤子則陳鼎在外，故云「孤子得申，禮盛之」也。

若庶子，則冠于房外，南面，遂醢焉。房外，謂尊東也。不於阼階，非代也。不醢於客位，成而不尊。

**疏**「若庶」至「醢焉」○釋曰：上已言三代適子冠禮訖，此

經論庶子加冠法也。周公作經，於三代之下言之，則三代庶子冠禮皆於房外，同用醢矣，但不知三代庶子各用幾醢耳。今於周之適子三加一體，夏、殷適子三加三醢，是以下文祝辭三體一而醢三，<sup>⑤</sup>皆爲三代而爲言。<sup>⑥</sup>至於三代庶子，皆不見別辭，則周之庶子宜依適子用一醢，夏殷庶子亦依三醢。三代適子有祝辭，言庶子則無，故下文注云「凡醢者不祝」。○注「房外」至「不尊」○釋曰：知「房外，謂尊東也」者，上陳尊在房、戶之間。案《鄉飲酒》賓東則

①「至」，曹校云當爲「受」。

②「二鼎豚魚腊」，曹校云「二」當爲「三」，「三鼎」上有脫文。

③「類于上父在」，曹校云「類」上脫「不」字，「父」上當脫「故知」二字。

④「家私」，阮校云：毛本作「私家」。

⑤上「三」字，阮校云：毛本無。

⑥「三代」下，曹校云脫「適子」二字。

東則尊東，<sup>①</sup>明此亦於尊東也。云「不於阼階，非代也」者，案下記云：「適子冠於阼，以著代也。」明庶子不於阼，非代故也。云「不醮於客位，成而不尊」者，下記云：「醮於客位，加有成也。」是適子於客位，成而尊之。此則成而不尊，故因冠之處遂醮焉。冠者母不在，則使人受脯于西階下。

**疏**「冠者」至「階下」○釋曰：案《內則》

云：「舅沒則姑老。」若死，當云「沒」，不得云「不在」，且母死則不得使人受脯。今言「不在」者，或歸寧，或疾病也。

「使人受脯」，為母生在，於後見之也。戒賓曰：「某

有子某，將加布於其首，願吾子之教之也。」

吾子，相親之辭。吾，我也。子，男子之美稱。古文「某」

為「謀」。

**疏**「戒賓」至「之也」○注「吾子」至「為謀」○釋

曰：自此至「唯其所當」者，周公設經，直見行事，恐失次第，不言其辭。今行事既終，總見戒賓、醮及為字之辭也。

云「某有子某」者，上「某」，主人名；下「某」，子之名。「加布」，初加緇布冠也。云「願吾子之教之也」者，即此以加

冠行禮為教之也。云「吾子，相親之辭。吾，我也」者，謂

自己身之子，故云「吾子，相親之辭」也。云「子，男子之美

稱」者，古者稱師曰子。又《公羊傳》云：「名不若字，字不

若子。」是子者，男子之美稱也。今請賓與子加冠，故以美稱呼之也。賓對曰：「某不敏，恐不能共事，以病吾子，敢辭。」病猶辱也。古文「病」為「秉」。主人曰：「某猶願吾子之終教之也。」賓對曰：

「吾子重有命，某敢不從。」敢不從，許之辭。宿

曰：「某將加布於某之首，吾子將莅之，敢

宿。」賓對曰：「某敢不夙興。」莅，臨也。今文無

「對」。始加，祝曰：「令月吉日，始加元服。

令、吉，皆善也。元，首也。」

**疏**注「令吉」至「首也」○釋

曰：「元，首」，《左傳》曰：「先軫人狄師而死之，狄人歸先

軫之元。」是元為首。又《尚書》云：「君為元首。」亦是元為

首也。棄爾幼志，順爾成德。壽考惟祺，介

爾景福。」爾，女也。既冠為成德。祺，祥也。介，景，皆

大也。因冠而戒且勸之，女如是則有壽考之祥，大女之大

福也。

**疏**注「爾女」至「福也」○釋曰：云「既冠為成德」

<sup>①</sup>「賓東則」，毛本作「賓在」，《要義》作「賓東賓」。案，

曹校云上「則」字當為「賓」。

者，案《冠義》，既冠責以父子、君臣、長幼之禮，皆成人之德。云「祺，祥也」者，祺訓爲祥，祥又訓爲善也。云「因冠而戒」者，則經「棄爾幼志，順爾成德」是也。云「且勸之」者，即經云「壽考惟祺，介爾景福」是也。再加，曰：

「吉月令辰，乃申爾服。辰，子丑也。申，重也。」

**疏**「再加」至「爾服」○注「辰子」至「重也」○釋曰：上云

「令月吉日」，此云「吉月令辰」，互見其言，是作文之體，無義例也。云「辰，子丑也」者，以十幹配十二辰，直云「辰，子丑」，明有幹可知，即甲子、乙丑之類，略言之也。敬爾

威儀，淑慎爾德。眉壽萬年，永受胡福。」胡猶遐也，遠也。遠，無窮。古文「眉」作「麋」。三加，

曰：「以歲之正，以月之令，咸加爾服。正猶

善也。咸，皆也。皆加女之三服，謂緇布冠、皮弁、爵弁也。兄弟具在，以成厥德。厥，其。黃者無疆，

受天之慶。」黃，黃髮也。耆，凍梨也。①皆壽徵也。

疆，竟。**疏**注「黃黃」至「疆竟」○釋曰：《爾雅》云：「黃髮

覩齒。」②故以黃爲黃髮也。云「耆，凍梨」者，③《爾雅》云：「耆，老，壽也。」此云「耆，凍梨」者，以其面似凍梨之色

故也。醴辭曰：「甘醴惟厚，嘉薦令芳。」嘉，善也。善薦，謂脯醢。芳，香也。**疏**「醴辭」至「令芳」○注

「嘉善」至「香也」○釋曰：謂脯醢爲善薦芳香者，謂作之依時，又造之依法，故使芳香而善也。拜受祭之，以定

爾祥。承天之休，壽考不忘。」休，美也。不忘，

長有令名。醢辭曰：「旨酒既清，嘉薦亶時。

亶，誠也。古文「亶」爲「瘡」。始加元服，兄弟具

來。孝友時格，永乃保之。」善父母爲孝，善兄弟

爲友。時，是也。格，至也。永，長也。保，安也。行此乃

能保之。今文「格」爲「嘏」。凡醢者不祝。**疏**注「善父」

至「不祝」○釋曰：「善父母爲孝，善兄弟爲友」者，《爾雅》文。不言善事父母、善事兄弟者，欲見非且善事兄弟，④

①「梨」，阮校云：監本作「黎」。

②「覩」，阮校云：毛本作「兒」。

③「梨」，阮校云：《通解》作「黎」。陳、閩作「黎」，下句作「黎」。

④「且」，阮校云：毛本作「但」。「兄弟」上，曹校云脫「父母」二字，下句同。

而亦爲兄弟之所善者，諸行周備之意也。云「凡醺者不祝」者，案上文前後例，<sup>①</sup>周與夏，殷冠子法，其加冠祝辭三節不辨三代之異，則三代祝辭同可知也。至於周醺之辭三等別陳之者，<sup>②</sup>以其數異，辭宜不同故也。若然，醺辭唯據適子而言，以其將著代重之，故備見祝辭也。此注云「凡醺者不祝」者，言「凡」謂庶子也。既不加冠於阼，又不禮於客位，無著代之理，故略而輕之也。亦不設祝辭者，《曾子問》注云「凡殤不祭」之類也。其天子冠禮祝辭，案《大戴禮·公冠篇》成王冠，周公爲祝詞：「使王近於人，遠於天，<sup>③</sup>嗇於時，惠於財。」其辭既多，不可具載。其諸侯無文，蓋亦有祝辭，異於士也。再醺，曰：「旨酒既湑，嘉薦伊脯。」湑，清也。伊，惟也。**疏**注「湑，清也。伊，惟也」○釋曰：湑，沛酒之稱。故《伐木》詩云：「有酒湑我。」注云：「湑，舊之。」又《鳧鷖》詩云：「爾酒既湑。」注云：「湑，酒之沛者。」是湑爲清也。云「伊，惟也」者，助句辭，非爲義也。乃申爾服，禮儀有序。祭此嘉爵，承天之祜。」祜，福也。三醺，曰：「旨酒令芳，籩豆有楚。」旨，美也。楚，陳列之貌。**疏**注「旨美」至「之貌」○釋曰：《楚茨》詩亦云：「籩豆有楚。」

注云：「楚，陳列之貌。」是用其再醺之籩豆，不增改之，故云有楚也。咸加爾服，肴升折俎。肴升折俎，亦謂豚。**疏**注「肴升」至「謂豚」○釋曰：云「折俎」者，即謂折上「若殺」之豚也。承天之慶，受福無疆。」字辭曰：「禮儀既備，令月吉日，昭告爾字。昭，明也。」**疏**「字辭」至「爾字」○釋曰：此字文在三代之下而言，則亦遂三代字辭同。此辭賓直西序東面，與子爲字時言之也。爰字孔嘉，髦士攸宜。爰，於也。孔，甚也。髦，俊也。攸，所也。宜之于假，永受保之。曰伯某甫。」仲、叔、季，<sup>⑤</sup>唯其所當。于猶爲也。假，大也。宜之是爲大矣。伯、仲、叔、季，長幼之稱。甫是丈夫之美稱，孔子爲尼甫，周大夫有嘉甫，宋大夫有孔甫，是其類。「甫」字或作「父」。**疏**「宜之」至「所當」○

- ①「例」，曹校云疑當爲「列」，連下讀。
- ②「周」，曹校云當爲「用」。
- ③「天」，阮校云：毛本作「年」。
- ④「又」原作「文」，據曹校改。
- ⑤「仲」上，阮校云：《通典》有「伯」字。

釋曰：云「伯某甫」者，某若云嘉也。<sup>①</sup>但設經不得定言人字，故言「甫」爲且字。<sup>②</sup>是以《禮記》諸侯薨，復曰「臯某甫復。」鄭云：「某甫且字。」以臣不名君，且爲某之字呼之。既此某甫立爲且字。<sup>③</sup>言「伯、仲、叔、季」者，是長幼次第之稱。若兄弟四人，則依次稱之。夏，殷質則積仲，周文則積叔，<sup>④</sup>若管叔、霍叔之類是也。云「唯其所當」者，二十冠時與之作字，猶孔子生三月名之曰丘，至二十冠而字之曰仲尼。有兄曰伯，居第二，則曰仲。但殷質，二十爲字之時，兼伯、仲、叔、季呼之；周文，二十爲字之時未呼伯、仲，至五十乃加而呼之。故《檀弓》云：「五十以伯仲，周道也。」是呼伯、仲之時，則兼二十字而言。若孔子生於周代，從周禮呼「尼甫」，至五十去「甫」，以「尼」配「仲」，而呼之曰「仲尼」，是也。若然，二十冠而字之，未呼伯、仲、叔、季。今於二十加冠而言者，一則是殷家冠時遂以二十字呼之，二則見周家若不死，至五十乃加而呼之。若二十已後死，雖未滿五十，即得呼伯、仲。知義然者，見慶父乃是莊公之弟，桓六年莊公生，至閔公二年慶父死，<sup>⑤</sup>時莊公未滿五十，慶父乃是莊公之弟，時未五十，慶父死，號曰共仲。是其死後雖未五十，得呼仲、叔、季。故二十冠時，則以伯、仲、叔、季當擬之，故云「唯其所當」也。○注「于

猶「至」作父」○釋曰：知「甫是丈夫之美稱」者，以其人之賢愚，皆以爲字。故《隱元年》公及邾儀父盟于蔑，《穀梁傳》云「儀，字也。父猶傳也，男子之美稱也」是也。云「孔子爲尼甫」者，哀十六年孔丘卒，哀公諱之曰：「哀哉，尼甫。」因字號諡曰尼甫也。云「周大夫有嘉甫」者，《桓公十五年》「天王使嘉甫來求車」是也。云「宋大夫有孔甫，是其類」者，案《左氏傳》桓二年「孔父嘉爲司馬」是也。鄭引此者，證有冠而爲此字之意，故云「是其類」也。又「甫字或作父」者，<sup>⑥</sup>字亦通，或尼甫、嘉甫、孔甫等，見爲父字者也。屨，夏用葛。玄端黑屨，青絢、縹、純，純博寸。屨者順裳色，玄端黑屨，以玄裳爲正也。絢之言拘也，以爲行戒，狀如刀衣鼻，在屨頭。縹，縫中紉也。純，緣也。三者皆青。博，廣也。疏「屨夏」至「博寸」○

- ①「若云嘉也」，阮校云：《通解》、毛本作「若云尼甫嘉也」。
- ②「甫」上，曹校云脫「某」字。
- ③「既」，阮校云：《要義》作「即」。
- ④「積」，阮校云：毛本作「稱」。
- ⑤「至」，阮校云：陳、閩無此字。
- ⑥「又」，阮校云：《要義》作「云」。

注「屨者」至「廣也」○釋曰：自此至「總屨」，論三服之屨。不於上與服同陳者，一則屨用皮葛冬夏不同，二則屨在下不宜與服同列，故退在於此。此言「夏用葛」，下云「冬皮」，則春宜從夏，秋宜從冬，故舉冬夏寒暑極時而言。《詩》魏地以葛屨履霜，<sup>①</sup>刺褊也。云「屨者順裳色」者，禮之通例，衣與冠同，屨與裳同，故云「順裳色」也。云「玄端黑屨，以玄裳爲正也」者，以其玄端有玄裳，黃裳、雜裳，經唯云「玄端黑屨」，與玄裳同色，而却不取黃裳、雜裳，<sup>②</sup>故云「以玄裳爲正也」。云「絢之言拘也，以爲行戒」者，以拘者自拘持之言，<sup>③</sup>故云「以爲行戒」也。云「狀如刀衣鼻，在屨頭」者，此以漢法言之。今之屨頭見有下鼻，似刀衣鼻，故以爲況也。云「縹，縫中紉也」者，謂牙底相接之縫中有條紉也。云「純，緣也」者，謂繞口緣邊也。云「皆青」者，以經三者同云青也。云「博，廣也」者，謂純所施廣一寸也。素積白屨，以魁柎之，緇絢、縹、純、純博寸。魁，蜃蛤。柎，<sup>④</sup>注者。<sup>⑤</sup>疏「素積」至「博寸」○注「魁，蜃蛤。柎，注者」○釋曰：以魁蛤灰柎之者，取其白耳。云「魁，蜃蛤」者，魁即蜃蛤，一物，是以《周禮·地官·掌蜃》掌「共白盛之蜃」，鄭司農云謂蜃炭，引此《士

冠》「白屨，以魁柎之」。玄謂「今東萊用蛤，謂之義灰云」是也。云「柎，注者」，以蛤灰塗注於上，使色白也。爵弁纁屨，黑絢、縹、純、純博寸。爵弁屨以黑爲飾，爵弁尊，其屨飾以續次。

疏「爵弁」至「博寸」○注「爵弁」至「續次」○釋曰：案此三服見屨不同，何者？玄端以衣見屨，以玄端有黃裳之等裳，不得舉裳見屨，故舉玄端見屨也。皮弁以素積見屨，屨裳同色，是其正也。爵弁既不舉裳，又不舉衣，而以爵弁見屨者，上陳服已言纁裳，裳色自顯，以與六冕同玄衣纁裳，與冕服之嫌，<sup>⑥</sup>故不以衣裳而以首服見屨也。云「爵弁屨以黑爲飾，爵弁尊，其屨飾以續次」者，案《冬官》畫續之事云：「青與白相次，赤與黑相次，玄與黃相次。」鄭云：「此言畫續六色所象，及布采之第次，續以爲衣。」又云：「青與赤謂之文，赤與白謂之章，白

①「地」，阮校云：毛本作「風」。

②「而却」原無，阮校引《要義》有此二字，據補。

③「言」，阮校云：毛本作「意」。

④「柎」，阮校云：宋本《釋文》作「拊」。

⑤「者」，阮校云：敖氏作「之」，《集釋》、毛本作「也」。

⑥「與」，曹校云當爲「有」。

與黑謂之黼，黑與青謂之黻。鄭云：「此言刺繡采所用，繡以爲裳。」此是對方爲績次，比方爲繡次。案鄭注《屨人》云：「複下曰烏，禪下曰屨。」又注云「凡烏之飾如績之次，凡屨之飾如繡之次也」者，即上黑屨以青爲絢、縹、純，白屨以黑爲絢、縹、純，則白與黑，黑與青爲繡次之事也。<sup>①</sup>今次「爵弁纁屨」，<sup>②</sup>纁，南方之色赤。不以西方白爲絢、縹、純，而以北方黑爲絢、縹、純者，取對方績次爲飾。舉烏者，<sup>③</sup>尊爵弁是祭服，故飾與烏同也。冬，皮屨可也。

**疏**「冬皮屨可也」○釋曰：冬時寒，許用皮，故云可也。

不屨總屨。總屨，喪屨也。縹不灰治曰總。**疏**

「不屨總屨」○注「總屨」至「曰總」○釋曰：案《喪服·記》

云：「總衰四升有半。」總衰既是喪服，明總屨亦是喪屨，故

鄭云「喪屨」也。云「縹不灰治曰總」者，斬衰冠六升，傳云

「鍛而勿灰」，則四升半不灰治可知。言此者，欲見大功未

可以冠子，恐人以冠子，故於屨末因禁之也。

**記：冠義：****疏**「記冠義」○釋曰：凡言「記」者，

皆是記經不備，兼記經外遠古之言。鄭注《燕禮》云：「後世衰微，幽、厲尤甚，禮樂之書，稍稍廢棄。」蓋自爾之後有記乎？又案《喪服·記》子夏爲之作傳，不應自造，還自

解之。記當在子夏之前，孔子之時，<sup>①</sup>未知定誰所錄。云

「冠義」者，記《士冠》中之義者。記時不同，故有二記。此

則在子夏前。其《周禮·考工記》，六國時所錄，故遭秦燔

滅典籍，有《韋氏》、《雕氏》闕，其記則在秦漢之際儒者加

之。<sup>⑤</sup>故《王制》有正「聽之棘木之下」，異時所記，故其言

亦殊也。始冠，緇布之冠也。大古冠布，齊則

緇之。其綏也，孔子曰：「吾未之聞也。」冠

而敝之可也。大古，唐虞以上。綏，纓飾。未之聞，大

古質，蓋亦無飾。重古，始冠冠其齊冠。白布冠，今之喪

冠是也。**疏**「始冠」至「可也」○注「大古」至「是也」○釋

曰：此經直言加緇布冠，不言有綏無綏，又不言加冠之後

此緇布冠更著以不，故言不綏，不更著之事也。云「大古

冠布」者，謂著白布冠也。云「齊則緇之」者，將祭而齊則

①「事」，阮校云：陳、閩作「序」。

②「次」，曹校云當爲「此」。

③「舉烏者」，孫校云：三字疑誤，似當作「與烏同」。曹校同。

④「之」，阮校云：毛本無。

⑤「記」上，曹校云脫「禮」字。「加」，阮校云：《要義》作「記」。



爲緇者，以鬼神尚幽暗也。云「其綏也，孔子曰：『吾未之聞也』」者，孔子時有綏者，故非時人綏之。諸侯則得著綏，故《玉藻》云：「緇布冠纁綏，諸侯之冠也。」鄭云：「尊者飾也。」元缺一字。士冠不得綏也。云「冠而敝之可也」者，據士以上冠時用之，冠訖則敝去之不復著也。<sup>①</sup>若庶人猶著之，故《詩》云：「彼都人士，臺笠緇撮。」是用緇布冠籠其髮，是庶人常服之矣。云「大古，唐虞以上」者，此記與《郊特牲》皆陳三代之冠，云牟追、章甫、委貌之等。鄭注《郊特牲》云：「三代改制，齊冠不復用也。以白布冠質，以爲喪冠也。」三代既有此，明「大古」是唐虞已上可知。云「未之聞，大古質，蓋亦無飾」者，此經據孔子時非其著綏，未知大古有綏以不，故鄭云「大古質，無飾」也。云「重古，始冠冠其齊冠」者，以經云「始冠，緇布之冠」，即云「大古冠布」，則齊冠一也，故鄭云「冠其齊冠」也。云「白布冠者，今之喪冠是也」者，以其大古時吉凶同服白布冠，未有喪冠，三代有牟追之等，則以白布冠爲喪冠。若然，喪服起自夏禹以下也。適子冠於阼，以著代也。醯於客位，加有成也。醢，夏，殷之禮，每加於阼，則醢之於客位，<sup>②</sup>所以尊敬之，成其爲人也。三加彌尊，

諭其志也。彌猶益也。冠服後加益尊。諭其志者，欲其德之進也。疏「適子」至「成也」○注「醢夏」至「人也」

○釋曰：此記人說夏、殷法，可兼于周。以其「於阼」及「三加」皆同，唯醢醢有異，故知舉二以見一也。冠而字之，敬其名也。名者質，所受於父母。冠成人，益文，故敬之也。今文無「之」。疏「冠而」至「名也」○注「名者」至「無之」○釋曰：案《內則》云：「子生三月，父名之。」不言母，今云「受於父母」者，夫婦一體，受父即是受於母，故兼言也。云「冠成人，益文」者，對名是受於父母，爲質，字者受於賓，爲文。故君父之前稱名，至於他人稱字也。是敬定名也。<sup>③</sup>委貌，周道也。章甫，殷道也。毋追，夏后氏之道也。委猶安也，言所以安正容貌。章，明也。殷質，言以表明丈夫也。甫或爲「父」，今

疏「冠而」至「名也」○注「名者」至「無之」○釋曰：案《內則》云：「子生三月，父名之。」不言母，今云「受於父母」者，夫婦一體，受父即是受於母，故兼言也。云「冠成人，益文」者，對名是受於父母，爲質，字者受於賓，爲文。故君父之前稱名，至於他人稱字也。是敬定名也。<sup>③</sup>委貌，周道也。章甫，殷道也。毋追，夏后氏之道也。委猶安也，言所以安正容貌。章，明也。殷質，言以表明丈夫也。甫或爲「父」，今

疏「冠而」至「名也」○注「名者」至「無之」○釋曰：案《內則》云：「子生三月，父名之。」不言母，今云「受於父母」者，夫婦一體，受父即是受於母，故兼言也。云「冠成人，益文」者，對名是受於父母，爲質，字者受於賓，爲文。故君父之前稱名，至於他人稱字也。是敬定名也。<sup>③</sup>委貌，周道也。章甫，殷道也。毋追，夏后氏之道也。委猶安也，言所以安正容貌。章，明也。殷質，言以表明丈夫也。甫或爲「父」，今

①「去」原作「經」，阮校云：《要義》「敝」下有「去」字無「經」字。據改。

②「則」原作「階」，據重刊單疏本改。

③「是敬定名也」，阮校云：毛本作「是字敬名也」，《要義》作「是敬其名也」。

文爲「弁」。毋，發聲也。追猶堆也。夏后氏質，以其形名之。三冠皆所服以行道也，其制之異同未之聞。

**疏**「委

貌」至「道也」○釋曰：記人歷陳此三代冠者，上緇布冠也，

諸元缺起此。侯已下始加之冠，此委貌之等，記人以經有緇

布冠、皮弁、爵弁、玄冠，故還記緇布冠以下四種之冠，以

解經之四者。此委貌即解經「易服，服玄冠」是也。○注

「委猶」至「之聞」○釋曰：云「今文爲斧」者，義無取，故疊

之不從也。云「毋，發聲也」者，若在上謂之發聲，在下謂

之助句，義無取，則是發聲也。云「三冠皆所常服以行道」

者，以釋經三代皆言道，是諸侯朝服之冠，在朝以行道德

者也。云「其制之異同未之聞」者，委貌、玄冠於禮圖有

制，但章甫、毋追相與異同未聞也。周弁，殷尋，夏

收。弁名出於槃。槃，大也，言所以自光大也。尋名出

於幬，幬，覆也，言所以自覆飾也。收，言所以收斂髮也。

其制之異亦未聞。

**疏**注「弁名」至「未聞」○釋曰：又歷陳

此三者，欲見三代加冠皆有弁。云「周弁」者，弁是古冠之

大號，非直含六冕，亦兼爵弁於其中。見士之三加之冠者

爵弁者，<sup>①</sup>故云弁。弁者，冠名也。云「弁名出於槃。槃，

大也」者，無正文，鄭以意解之。《論語》云：「服周之冕。」

以五色纁服有文飾，則知有德，故云「言所以自光大也」。

云「尋名出於幬，幬，覆也，言所以自覆飾也。收，言所以

收斂髮也」者，皆以意解之也。云「制之異亦未聞」者，案

《漢禮器制度》弁冕，《周禮·弁師》相參，周之冕以木爲

體，廣八寸，長尺六寸，績麻三十升布爲之，上以玄，下以

纁，前後有旒，尊卑各有差等。天子玉笋朱紘，其制可聞。

云「未聞」者，但夏、殷之禮亡，其制與周異，<sup>②</sup>亦如上「未

聞」也。<sup>③</sup>三王共皮弁、素積。質不變。**疏**注「質

不變」○釋曰：此亦三代自天子下至士皆是再加，當在周

弁三加之上，退之在下者，欲見此是三代之冠，百王同之，

無別代之稱也。故《郊特牲》云：「三王共皮弁。」注云：

「所不易於先代。」故《孝經》亦云：<sup>④</sup>「百王同之，不改易

也。」若然，百王同之，言「三王共」者，以損益之極，極於三

王。又上三冠亦據三代，故云「三王共皮弁」。其實先代

後代皆不易，是以鄭云「質不變」也。無大夫冠禮而

<sup>①</sup> 上「者」，阮校引浦鏗云疑「有」字誤。

<sup>②</sup> 「異」上，阮校云：《要義》有「同」字。

<sup>③</sup> 「如」原誤「加」，今據《要義》改。

<sup>④</sup> 「亦」上，曹校云脫「注」字。

有其昏禮。古者五十而后爵，何大夫冠禮之有？據時有未冠而命爲大夫者。周之初，禮，年未

五十而有賢才者試以大夫之事，猶服士服，行士禮。二十而冠，急成人也。五十乃爵，重官人也。大夫或時改取，有昏禮是也。

**疏**「無大」至「之有」○釋曰：此經所陳，欲

見無大夫冠禮之事。有大夫冠禮，記者非之。○注「據時」至「是也」○釋曰：鄭云「據時有未冠而命爲大夫者」，言周末作記之時，有二十已前未加冠而命爲大夫者，記非之也。云「周之初，禮，年未五十而有賢才者試以大夫之事，猶服士服，行士禮」者，鄭解「古者五十而後爵，何大夫冠禮之有」，是古者未有，周大夫有冠禮，<sup>①</sup>故非之。此鄭云「未五十」，則二十已上，<sup>②</sup>或有未二十有賢才，亦得試爲大夫者。故《喪服》殤小功章云：「大夫爲昆弟之長殤。」鄭云：「大夫爲昆弟之長殤小功，謂士若不仕，以此知爲大夫無殤服。」言爲大夫無殤服，謂兄殤在小功，則兄十九已下死，大夫則十九已下，既爲兄殤服，已爲大夫，則早冠矣。大夫冠而不爲元缺止此。殤故也。<sup>③</sup>雖早冠，亦行士禮而冠，是大夫無冠禮也。云「二十而冠，急成人也。五十乃爵，重官人也」者，解試爲大夫二十，則其爵命要待五十

意也。云「大夫或時改娶，有昏禮」者，釋經「而有其昏禮」，以其三十而取，五十乃命爲大夫，則昏時猶爲士，何得有大夫昏禮乎？五十已後容改娶，故有大夫昏禮也。若然，案下文「古者生無爵」，鄭云「古謂殷」，此經以古爲周初者，下云「古者生無爵」，對周時士生有爵，故知「古者生無爵」據殷也。今此云古者，以周末時大夫冠，對周初時無，若以古者爲殷時，則周家有大夫冠禮，何得言周末始有乎？明古者據初而言也。公侯之有冠禮也，

夏之末造也。造，作也。自夏初以上，諸侯雖父死子

繼，年未滿五十者亦服士服，行士禮，五十乃命也。至其衰末，上下相亂，篡殺所由生，故作公侯冠禮以正君臣也。

《坊記》曰：「君不與同姓同車，與異姓同車不同服，示民不嫌也。以此坊民，民猶得同姓以殺其君也。」<sup>④</sup>**疏**「公侯」

至「造也」○注「造作」至「君者」○釋曰：記人言此者，欲見夏初已上，雖諸侯之貴，未有諸侯冠禮，猶依士禮，故記之

①「大」上，曹校云脫「末」字。

②「上」原作「土」，今據阮本改。

③「大」，阮校云：毛本作「丈」。

④「也」，阮校云：疏標目作「者」。

於《士冠》篇末也。云「自夏初以上」者，以經云「公侯之有冠禮，夏之末造」，明夏初未有。言「以上」者，夏以前唐、虞之等，亦未有諸侯冠禮也。「未滿五十者亦服士服，行士禮，五十乃命也」者，既云「服士服，行士禮」，亦如上文「五十而後爵，何公侯冠禮之有」？以其與大夫同，未五十服行士禮也。①云「至其衰末，上下相亂」至「以正君臣也」者，解經「夏之末造」公侯冠禮也。引《坊記》者，欲見夏末以後制諸侯冠禮，以防諸侯相篡弑之事也。云「同車」者，謂參乘爲車右及御者也。云「不同服」者，案《玉藻》云「君之右虎裘，厥左狼裘」，又云「僕右恒朝服，君則各以時事服」，是不同服。此謂非在軍時，若在軍時，君臣同服章弁服也。天子之元子猶士也，天下無生而貴者也。元子，世子也。無生而貴，皆由下升。

**疏**

「天子」至「者也」○注「元子」至「下升」○釋曰：此記者見天子元子冠時亦依士冠禮，故於此兼記之也。天子之元子雖四加與十二而冠，其行事猶依士禮，故云「猶士也」。元子尚不得生而貴，則天下之人亦無生而貴者也。云「無生而貴，皆由下升」者，天子元子冠時行士禮，後繼世爲天子，是由下升。自餘天下之人從微至著，皆由下升也。

繼世以立諸侯，象賢也。象，法也。爲子孫能法先祖之賢，故使之繼世也。

**疏**

「繼世」至「賢也」○釋曰：記

此者，欲見上言天子之子冠行士禮，此諸侯之子冠亦行士禮。以其士之子恒爲士，有繼世之義。諸侯之子亦繼世，象父祖之賢，雖繼世象賢，亦無生而貴者，行士冠禮，故記之於此也。云「能法先祖之賢」者，凡諸侯出封，皆由有德。若《周禮·典命》云：「三公八命，其卿六命，大夫四命。及其出封，皆加一等。」出爲五等諸侯，即爲始封之君，是其賢也。於後子孫繼立者，皆不毀始祖之廟，是象先祖之賢也。以官爵人，德之殺也。殺猶衰也。德大者爵以大官，德小者爵以小官。

**疏**

「以官」至「殺也」

○注「殺猶」至「小官」○釋曰：記人記此者，欲見仕者從士至大夫，而冠無大夫冠禮者也。云「以官爵人」者，以，用也，謂用官爵命於人也。云「德之殺也」者，殺，衰也，以德大小爲衰殺，故鄭云「德大者爵以大官，德小者爵以小官」。官者，管領爲名。爵者，位次高下之稱也。死而謚，今也。古者生無爵，死無謚。今謂周衰，記

①「服」下，阮校云：毛本有「士服」二字。

之時也。古謂殷，殷士生不爲爵，死不爲謚。周制以士爲爵，死猶不爲謚耳，<sup>①</sup>下大夫也。今記之時，士死則謚之，非也。謚之，由魯莊公始也。

**疏**「死而」至「無謚」○注

「今謂」至「始也」○釋曰：記人記此者，欲見自上所陳冠禮以士爲本者，由「無生而貴」，皆從士賤者而升也。云「死而謚，今也」者，據士生時雖有爵，死不合有謚，若死而謚之，正謂今周衰之時也。云「古者生無爵，死無謚」者，古謂殷以前，夏之時，士生無爵，死無謚，是士賤，今古皆不合有謚也。鄭云「今謂周衰，記之時也」者，以記者自云今也，明還據周衰，記之時。案《禮運》云孔子曰：「我觀周道，幽厲傷之。」是周衰也，自此已後，始有作記，故云「周衰，記之時也」。云「古謂殷」者，周時士有爵，故知古謂殷。云「殷士生不爲爵，死不爲謚」者，對周士生有爵，死猶不謚也。云「周制以士爲爵，死猶不謚耳，下大夫也」者，案《周禮·掌客職》云：「群介、行人、宰史，以其爵等爲之牢禮之陳數。」鄭注云：「以命數則參差難等，略於臣，用爵而已。」群介、行人皆士，故知周士有爵，雖有爵，死猶不謚。卿大夫已上則有謚也。云「今記之時，士死則謚之，非也」者，解經「死而謚，今也」。云「謚之，由魯莊公始也」者，案《禮記·檀弓》云：「魯莊公及宋人戰于乘丘，縣賁父

御，卜國爲右。馬驚，敗績，公墜，佐車授綬。公曰：「未之卜也。」縣賁父曰：「他日不敗績，而今敗績，是無勇也。」遂死之。圍人浴馬，有流矢在白肉。公曰：「非其罪也。」遂誅之。士之有誄，自魯莊公始也。」若然，作記前莊公誄士，至記時亦行之，故此禮云「死而謚，今也」，故鄭云「今謂周衰」之時也。案《郊特牲》云：「死而謚之，今也。古者生無爵，死無謚。」鄭注云：「古謂殷以前也。大夫以上乃謂之爵，死有謚也。」以此而言，則殷大夫以上死有謚。而《檀弓》云「幼名，冠字，五十伯仲，死謚，周道也」者，殷已前皆因生號爲謚，若堯、舜、禹、湯之屬是也。因生號以謚，故不得謚名。周禮死則別爲謚，故云「死謚，周道也」。

儀禮卷第一 經一千八百九十一 注三千六百二十一  
儀禮疏卷第三 元缺第十葉，今補。

江寧府知府陽城張敦仁編校 元和縣  
學生員顧廣圻覆校

① 「爲」，阮校引浦鏗云疏無「爲」字。

# 儀禮疏卷第四 儀禮卷第二

唐朝散大夫行大學博士弘  
文館學士臣賈公彥等撰

## 士昏禮第二疏

「士昏禮第二」○鄭《目錄》云：「士娶妻之禮，以昏爲期，因而名焉。必以昏者，陽往而陰來。」

① 日入三商爲昏。昏禮於五禮屬嘉禮，大小戴及《別錄》此皆第二。○釋曰：鄭知是「士娶妻之禮」者，以記云「記士昏禮」，故知是士娶妻。鄭云「日入三商」者，商謂商量，是漏刻之名，故《三光靈曜》亦日入三刻爲昏，不盡爲明。案馬氏云：「日未出、日沒後皆云二刻半，前後共五刻。」今云「三商」者，據整數而言，其實二刻半也。 儀禮 鄭氏注

昏禮。下達，納采，用鴈。達，通也。將欲

與彼合昏姻，必先使媒氏下通其言，女氏許之，乃後使人

納其采擇之禮。用鴈爲摯者，取其順陰陽往來。《詩》云：「取妻如之何？匪媒不得。」昏必由媒，交接設紹介，皆所以養廉恥。疏「昏禮」至「用鴈」○釋曰：從此下至「主人許，賓入授，如初禮」，陳納采、問名之禮。云「下達」者，謂未行納采已前，男父先遣媒氏女氏之家，②通辭往來，女氏許之，乃遣使者行納采之禮也。言「下達」者，男爲上，女爲下，取陽倡陰和之義，故云「下達」，謂以言辭下通於女氏也。是以下記昏辭云：「吾子有惠，貺室某也。」注云：「稱有惠，明下達。」謂此下達也。云「納采用鴈」者，昏禮有六，五禮用鴈：納采、問名、納吉、請期、親迎是也。唯納徵不用鴈，以其自有幣帛可執故也。且三禮不云納，言納者，恐女氏不受，若《春秋》納納之義。③若然，納采言納者，以其始相采擇，恐女家不許，故言納。問名不言納者，女氏已許，故不言納也。納吉言納者，男家卜吉，往與女氏，復恐女家翻悔不受，故更言納也。納徵言納者，納

- ① 「陽」上，阮校云：《釋文》引鄭《目錄》有「取其」二字。
- ② 「女氏之家」，阮校云：「女」字上一本增一「至」字。按，「女氏之家」疑當作「之女氏家」。
- ③ 上「納」字，阮本作「內」。

幣帛則昏禮成，復恐女家不受，故更云納也。請期，親迎不言納者，納幣則昏禮已成，女家不得移改，故皆不言納也。其昏禮有六，尊卑皆同。故《左氏》莊公二十二年經書：「冬，公如齊納幣。」《穀梁傳》曰：「納幣，大夫之事也。禮有納采，有問名，有納徵，有告期，四者備而後娶，禮也。公之親納幣，非禮也，故譏之。」彼無納吉者，以莊公在母喪內，親行納幣，非禮之事，故闕其納吉以非之也。<sup>①</sup> ○注「達通」至「廉恥」○釋曰：鄭云「必先使媒氏下通其言，女氏許之，乃後使人納其采擇之禮」者，欲見納采之前有此下達之言也。案《周禮·地官》有媒氏職，是天子之官。則諸侯之國亦有媒氏，傳通男女，使成婚姻，故云「媒氏」也。云「用鴈爲摯者，取其順陰陽往來」者，案《周禮·大宗伯》云：「以禽作六摯，卿執羔，大夫執鴈，士執雉。」此昏禮無問尊卑，皆用鴈，故鄭注其意云「取順陰陽往來」也。「順陰陽往來」者，鴈木落南翔，冰泮北徂，夫爲陽，婦爲陰，今用鴈者亦取婦人從夫之義，是以昏禮用焉。引《詩》者，證須媒下達之義也。云「昏必由媒，交接設紹介」者，《詩》云「匪媒不得」，是「由媒」也。其行五禮，自納采已下皆使使往，是「交接設紹介」也。云「皆所以養廉恥」者，解所以須媒及設紹介者，皆所以養成男女，使有廉恥也。使

媒通之，媵，御沃盥交之等，皆是行事之漸，養廉恥之義也。主人筵于户西，西上，右几。主人，女父也。筵，爲神布席也。户西者，尊處，將以先祖之遺體許人，故受其禮於禰廟也。席西上，右設几，神不統於人。席有首尾。**疏**「主人」至「右几」○釋曰：此女將受男納采之禮，故先設神坐，乃受之。○注「主人」至「首尾」○釋曰：云「筵，爲神布席也」者，下文禮賓云「徹几，改筵」，是爲人設席，故以此爲神席也。云「户西」者，<sup>②</sup>以户西是賓客之位，故爲尊處也。必以西爲客位者，以地道尊右故也。知「受禮於禰廟」者，<sup>③</sup>以記云「凡行事受諸禰廟」也。云「席西上，右設几，神不統於人」者，案《鄉射》、《燕禮》等設席皆東上，是統於人，今以神尊，不統於人，取地道尊右之義，故席西上，几在右也。云「席有首尾」者，以《公食·記》蒲筵、萑席皆卷自末，是席有首尾也。使者玄端

① 「關」，阮校云：《要義》、毛本作「關」。

② 「云户西者」，曹校云當爲「云户西者尊處者」。

③ 「知」下，阮校云：《要義》有「將以先祖之遺體許人故」十字。

至。使者，夫家之屬，若群吏使往來者。玄端，士莫夕之服，又服以事其廬。有司緇裳。

**疏**「使者玄端至」○注

「使者」至「緇裳」○釋曰：云「使者，夫家之屬」者，案《士冠》贊者於中士下差次爲之，<sup>①</sup>此云「夫家之屬」亦當然。

假令主人是上士，屬是中士；主人是中士，屬是下士；主人是下士，屬亦當是下士，禮窮即同也。云「玄端，士莫夕之服，又服以事其廟」者，此亦如《士冠禮》玄端，士莫夕於朝之服也。但士以玄端祭廟，今使者服玄端至，亦於主人廟中行事，故云「又服以事其廟」也。云「有司緇裳」者，案士唯有三等之裳，玄裳、黃裳、雜裳。此云「緇裳」者，即玄裳者矣，以其緇、玄大同小異也。然士有三等裳，今直言玄裳者，據主人是上士而言。案《士冠》云：「有司如主人服。」則三等士之有司，亦如主人服也。擯者出請事，入告。擯者，有司佐禮者。請猶問也。禮不必事，雖知猶問之，重慎也。

**疏**「擯者」至「入告」○注「擯者」至「慎

也」○釋曰：云「擯者，有司佐禮者」，案《士冠禮》有司並是主人之屬及群吏佐主人行禮之人，故知此擯者亦是主人有司佐禮者也。在主人曰擯。云「請猶問也。禮不必事，雖知猶問之，重慎也」者，案《論語》云「無必」，故云「不必

事」也。以前已有下達之事，今使者來在門外，<sup>②</sup>是知有昏事也，而猶問之，重慎也。主人如賓服，迎于門外，再拜，賓不荅拜。揖入。門外，大門外。不荅拜者，奉使不敢當其盛禮。

**疏**「主人」至「揖入」○釋

曰：案《士冠禮》主人迎賓於大門外，云主人西面，賓東面。此及《鄉飲酒》、《鄉射》皆不言面位者，文不具耳，當亦如《士冠》也。○注「門外」至「盛禮」○釋曰：知門外是大門外者，以其大夫唯有兩門：寢門、大門而矣。<sup>③</sup>廟在寢門外之東，此下有「至于廟門」，明此門外是大門外可知也。云「不荅拜者，奉使不敢當其盛禮」者，此士卑，無君臣之禮，故賓雖屬吏，直言不荅拜，不言辟。若諸侯於使臣則言辟，是以《聘禮》擯迎入門，<sup>④</sup>公拜，賓辟，不荅拜。《公食大夫》主爲賓已，故賓荅拜，稽首，亦辟，乃拜之。以其君尊故也。至于廟門，揖入。三揖，至于階，

①「差」上，阮校云：毛本有「士」字。

②「門」原作「問」，據重刊單疏本改。

③「矣」，阮校云：《要義》、毛本作「已」。案，阮本作「已」。

④「聘」原作「射」，據阮校改。



三讓。人三揖者：至內霤，將曲，揖；既曲，北面，揖；當碑，揖。

**疏**「至于」至「三讓」○注「入三」至「碑揖」○釋曰：凡人門三揖者：以其人門賓主將欲相背，故須揖；賓主各至堂塗，北面相見，故亦須揖；至碑，碑在堂下，三分庭之一在北，是庭中之節，故亦須揖。但《士冠》注云：「入門將右曲，揖；將北曲，揖；當碑，揖。」此注：「至內霤，將曲，揖；既曲，北面，揖；當碑，揖。」文不同者，鄭舉二文，相兼乃足也。三者禮之大節，尊卑同，故《鄉飲酒》、《鄉射》、《聘禮》、《公食大夫》皆有此三揖之法，但注有詳略耳。主人以賓升，西面。賓升西階，當阿，東面致命。主人阼階上北面再拜。阿，棟也。入堂深，示親親。今文「阿」爲「廢」。

**疏**「主人」至「再拜」○

釋曰：賓則使者也。禮之通例，賓主敵者，賓主俱升，若《士冠》與此文是也。若《鄉飲酒》、《鄉射》皆主尊賓卑，故初至之時，主人升一等，賓乃升，至卒洗之後亦俱升。唯《聘禮》公升二等，賓始升者，彼注云「亦欲君行一，臣行二」也。《覲禮》王使人勞侯氏，使者不讓，先升者，奉王命尊故也。「主人阼階上北面再拜」者，主人不言當阿，則如《鄉飲酒》主人當楣再拜。○注「阿棟」至「爲廢」○釋曰：

案《鄉飲酒》、《聘禮》皆云「賓當楣」，無云「當阿」者，獨此云賓當阿，故云「示親親」也。凡士之廟，五架爲之，棟北一楣下有室戶，中脊爲棟，棟南一架爲前楣，楣前接簷爲廢。《鄉射·記》云：「序則物當棟，堂則物當楣。」故云是制五架之屋也。①鄉大夫射於庠，庠則有室，故物當前楣。士射於序，序則無室，故物當棟。此士之廟雖有室，其棟在室外，故賓得深入當之也。

授于楹間，南面。

授於楹間，明爲合好，其節同也。南面，並授也。

**疏**「授

于楹間南面」○注「授於」至「授也」○釋曰：楹間謂兩楹之間，賓以薦授主人，於楹間者，明和合親好，令其賓主遠近節同也。凡賓主敵者授於楹間，不敵者不於楹間。是以《聘禮》賓覲大夫云「受幣于楹間，南面」，鄭注云「受幣楹間，敵也」。《聘禮》又云：「公側襲受玉于中堂與東楹之間。」鄭注云：「東楹之間，亦以君行一，臣行二。」至禮賓及賓私覲，皆云「當東楹」，是尊卑不敵，故不於楹間也。今使者不敵而於楹間，故云「明爲合好」也。云「南面，並授也」者，以經云「南面」，不辨賓主，故知俱南面並授也。

①「故」，阮校云：《要義》作「鄭」。

賓降，出。主人降，授老鴈。老，群吏之尊者。

**疏**「賓降」至「老鴈」○釋曰：授鴈訖，賓降，自西階出門。

主人降自阼階，授老鴈於階，立待後事也。○注「老群吏

之尊者」○釋曰：大夫家臣稱老，是以《喪服》公士、大夫以

貴臣爲室老，《春秋左氏傳》云「執臧氏老」，《論語》云「趙

魏老」，《禮記》「大夫室老行事」，皆是老爲家臣之貴者。

士雖無君臣之名，云老亦是群吏中尊者也。賓者出

請。不必賓之事有無。**疏**「賓者出請」○注「不必」至

「有無」○釋曰：此主人不知賓有事，使賓出請者，亦是不

必賓之事有無也。賓執鴈，請問名，主人許。賓

人，授如初禮。問名者，將歸卜其吉凶。古文「禮」

爲「禮」。**疏**「賓執」至「初禮」○釋曰：此之一使，兼行納

采、問名，二事相因，又使還須卜，故因即問名，乃還卜之，

故共一使也。云「主人許」者，賓請入告，乃報賓，賓得主

人許，乃入門，升堂，授鴈，與納采禮同，故云「如初禮」也。

○注「問名」至「爲禮」○釋曰：言「問名」者，問女之姓氏，

不問三月之名。故下記問名辭云：「某既受命，將加諸卜，

敢請女爲誰氏。」鄭云：「誰氏者，謙也。不必其主人之

女。」是問姓氏也。然以姓氏爲名者，名有二種：一者是名

字之名，三月之名是也；一者是名號之名。故孔安國注

《尚書》以舜爲名，鄭君《目錄》以曾子爲姓名，亦據子爲

名，皆是名號爲名者也。今以姓氏爲名，亦名號之類也。

鄭云「將歸卜其吉凶」者，亦據下記文也。賓者出請，

賓告事畢。入告，出，請禮賓。此「禮」亦當爲

「禮」。禮賓者，欲厚之。**疏**「賓者」至「禮賓」○注「此禮」

至「厚之」○釋曰：此下至「送于門再拜」，**①**主人禮賓之

事。云「此禮亦當爲禮」者，亦《士冠》禮賓爲「禮」字，彼已

破從「禮」，故云「亦」。此以醴酒禮賓，不從醴者，以《大行

人》云上公「再裸而酢」，侯伯「一裸而酢」，子男「一裸不

酢」，及「以酒禮之」，用齊禮之，皆不依酒醴爲名，皆取相

禮，故知此醴亦爲禮敬之禮，不取用醴爲醴之義也。《秋

官·司儀》云「諸公相爲賓」，及將幣，「賓亦如之」，**②**注云

「上於下曰禮，敵者曰賓」。《聘禮》卿亦云「無賓」，注云

「無賓，辟君」。是大夫已上尊，得有禮、賓兩名，士以下

**①** 「門」下，曹校云脫「外」字。

**②** 「賓」，曹校引《周禮·司儀》注云：「賓當爲賓。」

卑，唯稱禮也。賓禮辭，許。禮辭，一辭。**疏**賓禮辭

許。○注「禮辭一辭」○釋曰：禮賓一辭許者，主人禮賓之常法。鄉已行納采、問名，賓主之情已通矣，<sup>①</sup>故略行一辭而已。主人徹几，改筵，東上。側尊甌醴于房中。徹几改筵者，鄉爲神，今爲人。側尊，亦言無玄酒。側尊於房中，亦有筐、有籩豆，如冠禮之設。**疏**「主

人」至「房中」○釋曰：「徹几改筵」者，於戶西禮神坐，徹去其几，於後授賓，改設其筵。設側尊甌醴在東房之中，以禮賓也。○注「徹几」至「之設」○釋曰：經云「東上」者，統於主人。注云「鄉爲神，今爲人」者，爲神則西上，爲人則東上，不同，故辨之。云「側尊，亦言無玄酒」者，醴糟例無玄酒配之，<sup>②</sup>以其醴象大古質，故士冠與此昏禮之等皆無玄酒也。鄭知此「亦有筐、有籩豆，如冠禮」者，此下云「贊者酌醴，加角柶」，明有筐盛之。又云「贊者薦脯醢」，則有籩豆可知。但冠禮尊在服北，南上，則此尊與筐等亦南上，故云「如冠禮之設」也。主人迎賓于廟門外，揖讓如初，升。主人北面再拜，賓西階上北面荅拜。主人拂几，授校，拜送。賓以几辟，

北面設于坐，左之，西階上荅拜。拂，拭也。拭

几者，尊賓，新之也。校，几足。辟，逡巡。古文「校」爲「技」。**疏**「主人」至「荅拜」○釋曰：云「主人迎賓于廟門

外，揖讓如初，升」者，如納采時三揖三讓也。云「主人北面再拜」者，拜賓至此堂飲之。是以《公食大夫》、《燕禮》、《鄉飲酒》、《鄉射》、《大射》皆云「拜至」，並是拜賓至此堂也。但《燕禮》、《大射》、《公食大夫》皆云「至，再拜」，先言至者，欲見賓至乃拜之，是有尊卑不敵之義。餘皆言拜至，至在拜下者，體敵之義也。若然，此爲禮賓，有拜至者，前雖有納采、問名之事，以昏禮有相親之義，故雖後亦拜至也。《聘禮》享禮及禮賓不拜至者，<sup>③</sup>聘禮不取相親之義，故不拜至。是以彼鄭注云：「以賓不於此始至也。」云「主人拂几」者，此拂几雖不言外拂、內拂，又不言三案《有司徹》：「主人西面，左手執几，縮之，以右袂推拂几三，二手橫執几，進授尸于筵前。」注云：「衣袖謂之袂。推拂，去塵示新。」云「拂」者，外拂之也，則此亦外拂之三也。

① 「情」原作「清」，據重刊單疏本改。

② 「糟例」，阮校云：毛本作「禮側」。

③ 「享禮及」，曹校云此三字衍。

凡行敵禮者，拂几皆若此。卑於尊者，則內拂之。故《聘禮》云：「宰內拂几三，<sup>①</sup>奉兩端以進。」鄭云：「內拂几，不欲塵坻尊者。」是也。若然，《冠禮》禮賓無几者，冠禮比昏爲輕，故無几。《鄉飲酒》、《鄉射》及《燕》賓賓輕，故無几。《聘》賓及《公食大夫》賓重，故有几也。云「授校」者，凡授几之法，卑者以兩手執几兩端，尊者則以兩手於几間執之，授皆然。是以《聘禮》宰夫奉兩端以進。《有司徹》云：「尸進，一手受于手間。」注云：「受從手間，謙也。」雖不言兩手，兩手授之可知。又案《聘禮》云：「公東南鄉，外拂几三，卒，振袂，中攝之，進，西鄉。賓進，訝受几于筵前。」以此言之，公尊，中執几以一手，則賓以兩手於几兩端執之也。而此亦賓主不敵，授校者，昏禮異於餘禮。云「拜送」者，此當再拜送。君於聘賓則一拜，故《聘禮》云「公一拜送」，鄭注云「公尊也」是也。此几以安體，非己所得，故賓受訖，然後荅拜。下經受醴之時，先拜乃受者，彼是入口之物，己所當得，故先拜乃受之。云「賓以几辟」者，以賓卑，故以几辟。《聘禮》賓卑，亦云「以几辟」。《有司徹》不云「以几辟」者，尊尸故也。《覲禮》不云「以几辟」者，尊王使也。凡設几之法，受時或受其足，或受于手間，皆橫受之。及其設之，皆旋几縱執，乃設之於坐南，北面陳之，位

爲神則右之，爲人則左之，爲異。不坐設之者，几輕故也。○注「拂拭」至「爲枝」○釋曰：鄭知「校，几足」者，《既夕》記云「綴足用燕几，校在南，御者坐持之」，故知校是几足也。贊者酌醴，加角枬，面葉，出于房。贊，佐也。佐主人酌事也。贊者亦洗酌，加角枬，覆之，如冠禮矣。出房南面，待主人迎受。<sup>②</sup>古文「葉」作「搗」。

**疏**

「贊者」至「于房」○注「贊佐」至「作搗」○釋曰：云「贊者亦洗酌，加角枬，覆之，如冠禮矣」者，案《冠禮》云「贊者洗於房中，側酌醴，加枬覆之」，此與冠禮同，故知如冠禮矣。主人受醴，面枋，筵前西北面。賓拜受醴，復位。主人阼階上拜送。主人西北面疑立，待賓即筵也。賓復位於西階上，北面，明相尊敬。此筵不主爲飲食起。**疏**「主人」至「拜送」○注「主人」至「食起」○釋曰：經唯云主人西北面，知「疑立」者，《鄉飲酒》云「主人阼階東疑立」，明此亦然也。凡主人將授酒醴，於筵前待賓，即筵前乃授之。此鄭云「即筵」，謂就筵前，與下賓即筵別

<sup>①</sup> 「宰」下，阮校云：毛本有「夫」字。

<sup>②</sup> 「迎受」，阮校云：《釋文》作「梧授」。

也。是以冠禮禮子及下禮婦皆於筵西受禮，<sup>①</sup>然禮賓進筵前受醴，是不躡席之事也。云「賓復位於西階上，北面，明相尊敬。此筵不主爲飲食起」者，但此筵爲行禮，故拜及啐皆於西階也。贊者薦脯醢。薦，進。賓即筵

坐，左執觶，祭脯醢，以枳祭醴三，西階上北面坐，啐醴，建枳，興，坐奠觶，遂拜。主人荅拜。即，就也。左執觶，則祭以右手也。凡祭於脯醢

之豆間，必所爲祭者，謙敬，示有所先也。啐，嘗也。嘗之者，成主人意。建猶扱也。興，起也。奠，停也。

**疏**「贊

者」至「荅拜」<sup>②</sup>○釋曰：此經云「坐奠觶，遂拜」，言「遂」者，因事曰遂，因「建枳，興，坐奠觶」，不復興，遂因坐而拜。《冠禮》禮子并醢子及此下禮婦，不言坐奠觶遂者，皆文不具。《聘禮》賓不言拜者，理中有拜可知也。○注「即就」至「停也」○釋曰：鄭云「祭以右手」，出于《鄉射》也。云「凡祭於脯醢之豆間」者，謂祭脯醢俎豆皆於豆間，此及《冠禮》、《鄉飲酒》、《鄉射》、《燕禮》、《大射》皆有脯醢，則在籩豆之間。此注不言籩，直言豆者，省文。《公食大夫》及《有司徹》豆多者，則言祭於上豆之間也。云「必所爲祭者，謙敬，示有所先也」者，案《曲禮》云「主人延客祭」，注

云「祭，祭先也。君子有事，不忘本也」。此云「謙敬，示有所先」，先即本，謂先世造此食者也。云「啐，嘗也。嘗之者，成主人意」者，主人設饌，望賓爲美之，今客嘗之告旨，是成主人意也。賓即筵，奠于薦左，降筵，北面

坐取脯，主人辭。薦左，籩豆之東。降，下也。自取脯者，尊主人之賜，將歸執以反命。辭者，辭其親徹。**疏**

「賓即」至「人辭」○釋曰：此奠於薦左，不言面位，下贊禮婦「奠于薦東」，注云「奠于薦東，升席奠之」。此云「奠于薦東，升席奠之」，<sup>③</sup>明皆升席，南面奠也。必南面奠者，取席之正。又祭酒亦皆南面，並因祭酒之面奠之，則《冠禮》禮子亦南面奠之。《聘禮》禮賓，賓北面奠者，以公親執束帛待賜已，不敢稽留，故由便疾北面奠之也。《鄉飲

①「禮」，阮校引浦鏜云「醴」誤作「禮」。

②「贊者」，阮校云：「贊者」二字在上節，此當作「賓即」，是。

③「此云薦東升席奠之」，阮校引浦鏜云：「薦左」誤爲「薦東」，又「升席奠之」四字當衍。曹校云：「云」當爲「亦」，下四字浦云衍是也。

酒、《鄉射》酬酒不祭不舉，不得因祭而奠于薦東也。<sup>①</sup>《燕禮》、《大射》重君物，君祭酬酒，<sup>②</sup>故亦南面奠。云「降，下也」。自取脯者，尊主人之賜，將歸執以反命者，案下記云「賓右取脯，左奉之，乃歸，執以反命」是也。賓降，授人脯，出。主人送于門外，再拜。人，謂使者從者，授於階下西面，然後出去。

**疏**「賓降」至「再

拜」○注「人謂」至「出去」○釋曰：鄭知「人，謂使者從者」者，以其此脯使者將歸，<sup>③</sup>故授從者也。又知「授於階下西面，然後出去」者，以其賓位在西，授脯文在出上，故知西階下西面授之，然後出去也。納吉，用鴈，如納采禮。歸卜於廟，得吉兆，復使使者往告，昏姻之事於是定。

**疏**「納吉」至「采禮」○釋曰：案上文納采在前，問名

在後，今此不云如問名而云如納采者，問名賓不出大門，故此納吉如其納采也。○注「歸卜」至「是定」○釋曰：鄭知義然者，案下記云：「納吉曰：吾子有貺命，某加諸卜，占吉，<sup>④</sup>使某也敢告。」凡卜並皆於禰廟，<sup>⑤</sup>故然也。<sup>⑥</sup>未卜時恐有不吉，婚姻不定，故納吉乃定也。納徵，玄纁束帛，儷皮，如納吉禮。徵，成也。使使者納幣以

成昏禮。用玄纁者，象陰陽備也。束帛，十端也。《周禮》曰：「凡嫁子取妻，入幣純帛，無過五兩。」儷，兩也。執束帛以致命。兩皮爲庭實。皮，鹿皮。今文「纁」皆作「熏」。**疏**「納徵」至「吉禮」○釋曰：此納徵無鴈者，以有束帛爲贊故也。是以《孝經鉤命決》云「五禮用鴈」是也。案《春秋左氏》莊公二十二年：「冬，公如齊納幣。」不言納徵者，孔子制《春秋》，變周之文從殷之質，故指幣體而言，<sup>⑦</sup>周文，故以義言之。徵，成也，納此則昏禮成，故云「徵」也。○注「徵成」至「作熏」○釋曰：云「用玄纁者，象陰陽備也。束帛，十端也」者，《周禮》：「凡嫁子娶妻，入幣緇帛，無過五兩。」鄭彼注云：「納幣帛緇，<sup>⑧</sup>婦人陰也。凡於娶禮，必

①「而」下，曹校云似脫「南面」二字。

②「君」，曹校云此字衍。

③「歸」下，曹校云似脫「執以反命」四字。

④「占」下，阮校云：毛本有「曰」字。

⑤「並」，阮校云：毛本作「筮」。

⑥「然」上，曹校云脫「知」字。

⑦「體」，阮校云：毛本作「禮」。

⑧「帛」，阮校云：毛本作「用」。「緇」，阮校引《要義》云：原本作「純」。

用其類。五兩，十端也。必言兩者，欲得其配合之名。十象五行十日相成也。士大夫乃以玄纁束帛，天子加以穀圭，諸侯加以大璋。《雜記》云：「納幣一束，束五兩，兩五尋。」然則每端二丈。若彼據庶人空用緇色，<sup>①</sup>無纁，故鄭云「用緇，婦人陰」。此玄纁俱有，故云「象陰陽備也」。案《玉人》：「穀圭，天子以聘女；大璋，諸侯以聘女。」故鄭據而言焉。「玄纁束帛」者，合言之，陽奇陰耦，三玄二纁也。其大夫無冠禮而有昏禮，若試爲大夫及幼爲大夫者，依士禮。若五十而爵，改娶者，大夫昏禮，玄纁及鹿皮則同於士。餘有異者，無文以言也。請期，用鴈。主人

辭，賓許，告期，如納徵禮。主人辭者，陽倡陰和，

期日宜由夫家來也。夫家必先卜之，得吉日，乃使使者往，辭即告之。

**疏**「請期」至「徵禮」○釋曰：請期如納徵

禮，納吉禮如納采禮。案上納采之禮下至「主人拜送於門外」，其中揖讓升降及禮賓迎送之事，此皆如之。○注「主人」至「告之」○釋曰：婿之父使使納徵訖，乃下卜婚月，<sup>②</sup>得吉日，又使使往女家告日，是期由男家來。今以男家執謙，故遣使者請女家，若云期由女氏，故云「請期」。女氏知陽倡陰和，當由男家出，故主人辭之。使者既見主人

辭，遂告主人期日也。是以下記云：「使者曰：某使某受

命，吾子不許，某敢不告期。曰某日。」注云：「某，吉日之甲乙。」是告期之辭，故鄭云「辭即告」也。期，初昏，陳

三鼎于寢門外東方，北面，北上。其實特

豚，合升，去蹄，舉肺脊二，祭肺二，魚十有

四，腊一肫，髀不升。皆飪。設扃鼎。期，取

妻之日。鼎三者，升豚、魚、腊也。寢，婿之室也。北面，

鄉內也。特猶一也。合升，合左右胙升於鼎也。去蹄，蹄

甲不用也。舉肺、脊者，食時所先舉也。肺者，氣之主也，

周人尚焉。脊者，體之正也，食時則祭之，飯必舉之，貴之

也。每皆二者，夫婦各一耳。凡魚之正，十五而鼎，減一

爲十四者，欲其敵偶也。腊，兔腊也。肫，或作純。純，全

也，凡腊用全。髀不升者，近竅，賤也。飪，孰也。扃，所

以扛鼎。鼎，覆之。古文「純」爲「鈞」，「髀」爲「脾」。今文

「扃」作「鉉」，「鼎」皆作「密」。<sup>③</sup>**疏**「期初」至「扃鼎」○釋

①「若」下，曹校云似脫「然」字。

②「下」，阮校云：毛本無。「月」，阮校云：毛本作「日」。

③「鼎」上，阮校云：依注例當有「古文」二字。

曰：此文下盡「合登」一節，論夫家欲迎婦之時，豫陳同牢之饌也。云「陳三鼎於寢門外東方，北面，北上」者，謂在夫寢門外也。言「東方」、「北面」，是禮之正。但數鼎，故云「北面，北上」，則此及《少牢》皆是也。《特牲》「陳鼎於門外，北面，北上」，當門而不在東方者，辟大夫故也。今此亦東方，不辟大夫者，重昏禮，攝盛也。鼎不言「北上」，直言「北面」，《士冠》所云是也。凡鼎陳於外者北面爲正，阼階下西面爲正。《士喪禮》小斂，陳一鼎於門外西面者，喪禮少變，在東方者，未忍異於生。於大斂大奠，及朔月奠，《既夕》陳鼎皆如大斂奠，<sup>①</sup>門外皆西面者，亦是喪禮，既夕變也。<sup>②</sup>《士虞》陳三鼎于門外之右，北面，北上，入設于西階前，東面，北上。不在東者，既葬鬼事之，反吉故也。《公食》陳鼎七，當門南面西上者，以賓是外人，向外統之。○注「期取」至「作密」○釋曰：云「期，娶妻之日」者，此陳同牢之饌，下云親迎之禮，其中無厥明之文，明是娶婦之日也。云「鼎三者，升豚、魚、腊也」者，即經文自顯也。云「寢，婿之室也」者，命士以上之父子異宮，自然別有寢。若不命之士，父子同宮，雖大院同居，其中亦隔別，各有門戶，故經總云「寢門外」也。云「合升，合左右胖升於鼎也」者，以夫婦各一，故左右胖俱升，若祭則升右也。

云「去蹄，蹄甲不用也」者，以其踐地，穢惡也。云「舉肺，脊者，食時所先舉」者，案下文「贊者告具，揖婦，即對筵，皆坐祭，祭薦、黍、稷、肺」，即此祭肺也。下又云「贊爾黍稷」，<sup>③</sup>授肺脊，皆食以涪醬，皆祭舉，食舉也」，即此舉肺、脊也。祭時二肺俱有，生人唯有舉肺，皆祭。今此得有祭肺者，《禮記·郊特牲》論娶婦「玄冕齊戒，鬼神陰陽也」，故與祭祀同二肺也。據下文先用祭肺，後用舉肺，此經先言舉肺，後言祭肺者，以舉肺脊長大，故先言。是以《特牲》、《少牢》入鼎時舉肺脊在前。<sup>④</sup>云「肺者，氣之主也，周人尚焉」者，案《禮記·明堂位》云：「有虞氏祭首，夏后氏祭心，殷祭肝，周祭肺。」鄭注云：「氣主盛也。」但所尚不同，故云「周人尚焉」。云「脊者，體之正也，食時則祭之」者，對祭肺未食時祭也。云「飯必舉之，貴之也」者，但一身之上體總有二十一節，前有肩、臂、臑，後有肫、臑、脊。

①「大斂」，曹校云胡氏《正義》殘稿引改作「小斂」，似是。「喪禮既夕變也」，曹校云：「既」字衍，「夕」當爲「少」。

少變，猶小變也。

③「稷」，阮校引浦鏜云：「稷」爲衍文。

④「入」，曹校云當爲「實」。



在中央有三脊：正、脰、橫脊，而取中央正脊，故云體之正。凡云先以對後，案《特性》舉肺脊後食幹骼，注云：「肺，氣之主也。脊，正體之貴者。先食啗之，所以導食通氣。」此不言先食啗之，從彼可知也。云「每皆二者，夫婦各一耳」者，釋經多之義。云「凡魚之正，十五而鼎，減一爲十四」者，據《特性·記》云「魚十有五」，注云：「魚，水物，以頭枚數，陰中之物，重數於月十有五而盈。」①《少牢饋食禮》亦云十有五而俎。尊卑同。則是尊卑同用十五而同鼎也。云「欲其敵偶也」者，夫婦各有七也。此夫婦鬼神陰陽，故同祭禮十五而去一，若乎生人則與此異，故《公食大夫》一命者七魚，再命者九魚，三命者十有一魚，天子諸侯無文，或諸侯十三魚，天子十五魚也。云「腊，兔腊也」者，《少牢》用麋腊，士兔腊可知，故《曲禮》云「兔曰明視」也。云「肫，或作純。純，全也，凡腊用全」者，此或《少牢》文。案《少牢》腊一純，注云「純猶全也」。凡牲體則用一胖，不得云全，其腊則左右體脅相配，②共爲一體，故得全名也。《特性》、《少牢》亦用全，《士喪》大斂與《士虞》皆用左胖，不全者，喪禮略。云「今文羶皆作密」者，鄭以省文，故兼下「給冪」總疊之，故云「皆」也。設洗于阼階東

南。洗，所以承盥洗之器棄水者。饌于房中，③醯醬二豆，菹醢四豆，兼巾之。黍稷四敦，皆蓋。醢醬者，以醢和醬，生人尚褻味。兼巾之者，六豆共巾也。巾爲禦塵，蓋爲尚溫。《周禮》曰：「食齊視春時。」疏「饌于」至「皆蓋」○注「醢醬」至「春時」○釋曰：鄭知「以醢和醬」者，得醢者無醬，得醬者無醢，若和之，則夫妻皆有，是以知以醢和醬也。云「生人尚褻味」者，此文與《公食》皆以醢和醬，《少牢》、《特性》不言之，故云然也。引《周禮》釋敦皆有蓋者，飯宜溫，比春時故也。大羹涪在饗。大羹涪，煮肉汁也。大古之羹無鹽菜。饗，火上。《周禮》曰：「羹齊視夏時。」今文「涪」皆作「汁」。疏「大羹涪在饗」○注「大羹」至「作汁」○釋曰：涪與汁一也。知「大古之羹無鹽菜」者，《左傳》桓二年臧哀伯云「大羹不致」，《禮記·郊特牲》云「大羹不和」，謂不致五味，故知不和鹽菜。唐虞以上曰大古，有此羹。三王以來更有銅羹，

①「重」，阮校云：毛本作「取」，《特性·記》同。

②「脅」上，曹校云似脫「脊」字。

③「中」原作「于」，據重刊嚴州本改。

則致以五味。雖有鉶羹，猶存大羹，不忘古也。引《周禮》者，證大羹須熱，故在饗，臨食乃取也。尊于室中北墉下，有禁。玄酒在西，綌冪，加勺，皆南枋。墉，牆也。禁，所以廢甌者。玄酒，不忘古也。綌，羸葛。今文「枋」作「柄」。

**疏**「尊于」至「南枋」○注「墉牆」至「作柄」○釋曰：云「禁，所以廢甌者」，《士冠》云甌，此亦士禮，雖不言甌，然此尊亦甌也。廢承於甌，云「禁」者，因為酒戒，故以禁言之也。云「玄酒，不忘古也」者，古

謂黃帝已前，以《禮運》云「汙尊而抔飲」，謂神農時雖有黍稷，未有酒醴，則神農以上以水為玄酒也。《禮運》又云：「後聖有作，以為醴酪。」據黃帝以後，雖有酒醴，猶是不忘古也。尊于房戶之東，無玄酒。筐在南，實四爵合盞。無玄酒者，略之也。夫婦酌於內尊，其餘酌於外尊。合盞，破匏也。四爵兩盞凡六，為夫婦各三酌。一升曰爵。

**疏**「尊于」至「合盞」○注「無玄」至「曰爵」○釋曰：云「無玄酒者，略之」者，此對上文夫婦之尊有玄酒，此尊非為夫婦，故略之也。云「夫婦酌於內尊，其餘酌於外尊」者，據上文玄酒知之。云「一升曰爵」者，《韓詩

外傳》云「一升曰爵，二升曰觚，三升曰觶，四升曰角，五升曰散」是也。主人爵弁，纁裳，緇施。從者畢玄端。乘墨車，從車二乘，執燭前馬。主人，壻也，壻為婦主。<sup>①</sup>爵弁而纁裳，玄冕之次。大夫以上親迎冕服，冕服迎者，鬼神之，鬼神之者，所以重之親之。纁裳者衣緇衣，不言衣與帶而言施者，空其文，明其與施俱用緇。施謂緣，施之言施，以緇緣裳，象陽氣下施。從者，有司也，乘貳車從行者也。畢猶皆也。墨車，漆車，士而乘墨車，攝盛也。執燭前馬，使徒役持炬火居前照道。

**疏**

「主人」至「前馬」○釋曰：此至「俟于門外」，論壻親迎之節。<sup>②</sup>○注「主人」至「照道」○釋曰：云「主人，壻也」者，以其親迎向女家，女父稱主人，男稱壻，已下皆然。今此未至女家，仍據男家而言，故云主人是壻，為婦主，故下親迎至男家，壻還稱主人也。云「爵弁而纁裳」者，下爵弁亦冕之類，<sup>③</sup>故亦纁裳也。云「玄冕之次」者，鄭注《周禮》

①「壻」原作「婿」，今據重刊嚴州本改。

②「壻」原作「婿」，今據重刊單疏本改。下文四「壻」字同。

③「下」，曹校云似當為「以」。

弁師云「一命之大夫冕而無旒，士變冕爲爵弁」，故云冕之次也。云「大夫以上親迎冕服」者，士家自祭服玄端，助祭用爵弁。今爵弁，用助祭之服親迎，一爲攝盛，則卿大夫朝服以自祭，助祭用玄冕，親迎亦當玄冕，攝盛也。若上公有孤之國，孤絺冕，卿大夫同玄冕。侯伯子男無孤之國，卿絺冕，大夫玄冕也。孤卿大夫士爲臣卑，復攝盛取助祭之服以親迎，<sup>①</sup>則天子諸侯爲尊，則袞矣，<sup>②</sup>不須攝盛，宜用家祭之服。則五等諸侯玄冕以家祭，則親迎不過玄冕。天子親迎當服袞冕矣。是以《禮記·郊特牲》云：

「玄冕齋戒，鬼神陰陽也。將以爲社稷主。」以社稷言之，據諸侯而說，故知諸侯玄冕也。其於孤卿，雖絺冕以助祭，至於親迎，亦用玄冕，臣乃不得過君故也。云「冕服迎者，鬼神之」。鬼神之者，所以重之親之者，《郊特牲》文。云「纁裳者衣緇衣，不言衣與帶而言施者，空其文，明其與施俱用緇」者，鄭言纁裳者衣緇衣，言緇衣即玄衣，大同故也。上《士冠》陳爵弁服云「緇衣、緇帶」，此文有「緇施」，無「衣、帶」二字，故云「空其文」。以施著緇者，欲見施與衣帶色同，故云「俱用緇」也。云「施謂緣」者，謂純緣於裳，故字從衣。云「施之言施」者，義取施及於物，故作施也。云「以緇緣裳，象陽氣下施」者，男陽女陰，男女相交

接，示行事有漸，故云「象陽氣下施」，故以衣帶上體同色之物下緣於裳也。云「從者，有司也，乘貳車從行者也」者，以士雖無臣，其僕隸皆曰有司，使乘貳車從罔。大夫已下有貳車，<sup>③</sup>士無貳車，此有者亦是攝也。云「墨車，漆車」者，案《巾車》注云「棧車不革鞅而漆之」，則士之棧車漆之，但無革爲異耳。案《考工記》云：「棧車欲其弁。」鄭云：「無革鞅。」又云：「飾車欲其侈。」鄭云：「革鞅。」則大夫已上皆以革鞅，則得飾車之名。飾者，革上又有漆飾。士卑無飾，雖有漆，不得名墨車，故唯以棧車爲名。若然，自卿已上更有異飾，則又名玉、金、象、夏篆、夏縵之等也。云「士乘墨車，攝盛也」者，案《周禮·巾車》云：「一曰玉路，以祭祀。」又云：「金路同姓以封，象路異姓以封，革路以封四衛，木路以封蕃國，孤乘夏篆，卿乘夏縵，大夫乘墨車，士乘棧車，庶人乘役車。」士乘大夫墨車爲攝盛，則大夫當乘卿之夏縵，卿當乘孤之夏篆。已上有木路，質而無飾，不可使孤乘之，禮窮則同也。孤還乘夏篆，又於臣之

① 「復」，曹校云當爲「故」。

② 「袞」，曹校云疑當爲「異」。

③ 「下」，曹校云當爲「上」。

外特置，亦是尊，尊則尊矣，不欲攝盛。若然，庶人當乘士之棧車，則諸侯天子尊則尊矣，亦不假攝盛，<sup>①</sup>依《巾車》自乘本車矣。玉路祭祀，不可以親迎，當乘金路矣。以攝言之，士之子冠與父同，則昏亦同。但尊適子，皆與父同，庶子宜降一等也。婦車亦如之，有祫。亦如之者，

車同等。士妻之車，夫家共之。大夫以上嫁女，則自以車送之。祫，車裳幃，《周禮》謂之容。車有容，則固有蓋。

**疏**「婦車」至「有祫」○注「亦如」至「有蓋」○釋曰：婦車亦

墨車，但有祫為異耳。曰「士妻之車，夫家共之」者，即此

是也。云「大夫以上嫁女，則自以車送之」者，案宣公五年

冬《左傳》云：「齊高固及子叔姬來，反馬也。」休以為禮無

反馬，<sup>②</sup>而左氏以為得禮。禮，婦人謂嫁曰歸，明無大故

不反於家。經書「高固及子叔姬來」，故譏乘行匹至也。

士昏皆異，據士禮無反馬，蓋失之矣。《士昏禮》曰：「主

人爵弁，纁裳，緇袍。從者畢玄端。乘墨車，從車二乘，

執燭前馬。婦車亦如之，有祫。」此婦乘夫家之車。《鵲

巢》詩曰：「之子于歸，百兩御之。」又曰：「之子于歸，百

兩將之。」國君之禮，夫人始嫁，自乘其車也。《何彼禴

矣》篇曰：「曷不肅雍，王姬之車。」言齊侯嫁女，以其母

王姬始嫁之車遠送之。則天子、諸侯女嫁，留其車可知。

今高固大夫反馬，大夫亦留其車。禮雖散亡，以《詩》論

之，大夫以上至天子，有反馬之禮。留車，妻之道；反

馬，壻之義。高固秋月逆叔姬，冬來反馬，則婦人三月祭

行，<sup>③</sup>故行反馬禮也。以此鄭《箴膏肓》言之，則知大夫

已上嫁女，自以其車送之。若然，《詩》注以為王姬嫁時

自乘其車，《箴膏肓》以為齊侯嫁女，乘其母王姬始嫁時

車送之，不同者，彼取三家《詩》，故與《毛詩》異也。凡婦

車之法，自士已上至孤卿皆與夫同，有祫為異，至於王后

及三夫人并諸侯夫人皆乘翟車。案《周禮·巾車》王后

之五路：重翟、厭翟、安車「皆有容蓋」，又云「翟車、輦

車」。鄭注云：「《詩·國風·碩人》曰「翟蔽以朝」，<sup>④</sup>謂

諸侯夫人始來乘翟蔽之車，以朝見於君，成之也。此翟蔽

蓋厭翟也，然則王后始來乘重翟受。」<sup>⑤</sup>又《詩序》云：「王

①「假」，阮校云：毛本作「欲」。

②「休」上，曹校云似脫「何」字。

③「人」，曹校云當為「入」。

④「蔽」，阮校云：毛本作「茀」。

⑤「受」，阮校云：毛本作「車」，《要義》作「矣」。

姬下嫁於諸侯，車服不繫其夫，下王后一等。」以此差之，

王后始來乘重翟，則上公夫人用厭翟，侯伯子男夫人用翟車。若然，《巾車》安車次厭翟，在翟車之上者，以其安車在宮中所乘，有容蓋，與重翟、厭翟有屈，<sup>①</sup>退之在下，<sup>②</sup>其實安車無翟飾，不用為嫁時所乘也。三夫人與三公夫人當用翟車，九嬪與孤妻同用夏篆，世婦與卿大夫妻同用夏縵，女御與士妻同用墨車也。其諸侯夫人姪娣及二媵并姪娣，依次下夫人以下一等為差也。云「褰，車裳幃，《周禮》謂之容」者，案《巾車職》重翟、厭翟、安車皆有容蓋，鄭司農云：「容謂幃車，山東謂之裳幃，或謂之潼容。」後鄭從之。《衛詩》云：「漸車帷裳。」是山東名幃裳也。云「車有容，則固有蓋」者，《巾車》云「有容蓋」，容，蓋相配之物，此既有褰之容，明有蓋可知，故云「固有蓋」矣。至于門外。婦家大門之外。**疏**「至于門外」○

注「婦家大門之外」○釋曰：知是大門外者，以下有「揖人，乃至廟」，廟在大門內，<sup>③</sup>故知此大門外也。主人

筵于户西，西上，右几。主人，女父也。筵，為神布

席。**疏**「主人」至「右几」○注「主人」至「布席」○釋曰：以

先祖之遺體許人，將告神，故女父先於廟設神席，乃迎

婿也。

## 儀禮疏卷第四

江寧府知府陽城張敦仁編校 元和縣

學生員顧廣圻覆校

①「屈」，阮校云：毛本作「差」。

②「退之在下」，曹校云當作「進之在上」。

③「在」原作「乃」，今據重刊單疏本改。

## 儀禮疏卷第五

唐朝散大夫行大學博士弘

文館學士臣賈公彥等撰

女次，純衣纁袖，立于房中，南面。次，首飾也，

今時髮也。《周禮·追師》「掌爲副、編、次」。純衣，絲衣。

女從者畢袵玄，則此亦玄矣。袖亦緣也。袖之言任也，以

纁緣其衣，象陰氣上任也。凡婦人不常施袖之衣，盛昏

禮，爲此服。《喪大記》曰「復衣不以袖」，明非常。**疏**「女

次」至「南面」○注「次首」至「非常」○釋曰：不言裳者，以

婦人之服不殊裳，是以《內司服》皆不殊裳。彼注云：「婦

人尚專一德，無所兼，連衣裳不異其色。」是也。注云「次，

首飾也，今時髮也。《周禮·追師》「掌爲副、編、次」者，

案彼注云：「副之言覆，所以覆首爲之飾，其遺象若今步繇

矣。編，編列髮爲之，其遺象若今假紒矣。次，次第髮長

短爲之，所謂髮髻。」言「所謂」，謂如《少牢》「主婦髮髻」

也。又云「外內命婦衣鞠衣、褱衣者服編，衣褱衣者服

次」。其副唯於三翟祭祀服之。士服爵弁助祭之服以迎，

則士之妻亦服褱衣助祭之服也。若然，案《內司服》：「王

后之六服：褱衣、揄翟、闕翟、鞠衣、展衣、褱衣，素沙。」素

沙與上六服爲裏。五等諸侯，上公夫人與王后同，侯伯夫

人自揄翟而下，子男夫人自闕而下。<sup>①</sup>案《玉藻》有鞠衣、

褱衣、褱衣，注云：「諸侯之臣皆分爲三等，其妻以次受此

服。公之臣，孤爲上，卿大夫次之，士次之；侯伯子男之

臣，卿爲上，大夫次之，士次之。」其三夫人已下內命婦，則

三夫人自闕翟而下，九嬪自鞠衣而下，世婦自褱衣而下，

女御自褱衣而下，嫁時以服之。諸侯夫人無助天子祭，亦

各得申上服，與祭服同也。云「純衣，絲衣」者，此經純亦

是絲理不明，故見絲體也。云「女從者畢袵玄，則此衣亦

玄矣」者，此鄭欲見既以純爲絲，恐色不明，故云女從袵

玄，則此絲衣亦同玄色矣。云「袖亦緣也」者，上纁裳緇

袖，袖爲緣，故云「袖亦緣也」。云「袖之言任也。以纁緣

其衣，象陰氣上任也」者，婦人陰，象陰氣上交於陽，亦取

交接之義也。云「凡婦人不常施袖之衣，盛昏禮，爲此服」

① 「闕」下，阮校云：「毛本有「翟」字。」

者，此純衣即祿衣，是士妻助祭之服，尋常不用纁爲衾，今用之，故云「盛昏禮，爲此服」。云《喪大記》曰「復衣不以衾」，明非常者，以其始死，招魂復魄用生時之衣。生時無衾，知亦不用衾，明爲非常所服，爲盛昏禮故服之。引之者，證衾爲非常服也。然鄭言凡婦人服不常施衾者，鄭欲見王后已下，初嫁皆有衾之意也。

### 姆纁、<sup>①</sup>笄、宵

衣，在其右。姆，婦人年五十無子，出而不復嫁，能以婦道教人者，若今時乳母矣。纁，緇髮。笄，今時簪也。

纁亦廣充幅，長六尺。宵，讀爲《詩》「素衣朱綃」之綃，《魯詩》以綃爲綺屬也。姆亦玄衣，以綃爲領，因以爲名，且相別耳。姆在女右，當詔以婦禮。

### 疏「姆纁」至「其右」

○釋曰：此經欲見女既在房，須有傳命者之義也。○注「姆婦」至「婦禮」○釋曰：云「姆，婦人年五十無子，出而不復嫁，能以婦道教人」者，婦人年五十陰道絕，無子乃出之。案《家語》云：「婦人有七出：不順父母，出；淫辟，出；無子，出；不事舅姑，出；惡疾，出；多舌，出；盜竊，出。」又莊二十七年何休注《公羊》云：「無子棄，絕世也；淫佚棄，亂類也；不事舅姑棄，悖德也；口舌棄，離親也；盜竊棄，反義也；嫉妒棄，亂家也；惡疾棄，不可奉宗廟也。」又《家語》

有「三不去」：「曾經三年喪，不去。」休云：「不忘恩也。」

「賤取貴，不去。」休云：「不肯德也。」「有所受無所歸，不去。」休云：「不窮窮也。」休又云：「喪婦長女不娶，無教戒也；世有惡疾不娶，棄於天也；世有刑人不娶，棄於人也；亂家不娶，<sup>②</sup>類不正也；逆家女不娶，廢人倫也。」是

五不娶。又案《易·同人》「六二」鄭注云：「天子諸侯后，夫人，無子不出。」則猶有六出。其天子之后雖失禮，鄭云：「嫁於天子，雖失禮，無出道，遠之而已。若其無子不廢，遠之，后尊如故，其犯六出則廢之。」然就七出之中，餘

六出是無德行不堪教人，故無子出能以婦道教人者，<sup>③</sup>以爲姆。既教女，因從女向夫家也。云「若今時乳母」者，漢

時乳母與古時乳母別。案《喪服》乳母者，據大夫子有

母：子師、慈母、保母。其慈母闕，乃令有乳者養子，謂之爲乳母，死爲之服緦麻。師教之，乳母直養之而已。漢時

①「纁」原作「纁」，據重刊嚴州本改。

②「不」上，阮校云：毛本有「女」字。

③「無」上，阮校云：毛本有「取」字。「出」上，阮校云：

毛本有「而」字。「出」下，阮校云：毛本有「不復嫁」三

字。「者」下，阮校云：毛本有「留」字。

乳母則選德行有乳者爲之，并使教子，故引之以證姆也。云「纁，緇髮」者，此纁亦如《士冠》纁，以緇爲之，廣充幅，長六尺，以緇髮而紒之。姆所異於女者，女有纁，兼有次，此姆則有纁而無次也。云「笄，今時簪」者，舉漢爲況義也。云「宵，讀爲《詩》素衣朱綃之綃」者，引《詩》以爲證也。云「姆亦玄衣，以綃爲領，因以爲名」者，此衣雖言綃衣，亦與純衣同是祿衣，用綃爲領，故因得名綃衣也。必知綃爲領者，《詩》云「素衣朱綃」，《詩》又云「素衣朱褹」，《爾雅·釋器》云「黼領謂之褹」。褹既爲領，明朱綃亦領可知。案上文云女祿衣，下文云女從者畢袵玄，皆是祿衣，則此綃衣亦祿衣矣。女與女從禪黼領，此姆以玄綃爲領也。若然，《特性》云綃衣者，謂以綃繒爲衣。知此綃爲領者，以下女從者云「被黼黻」據領，明此亦據領也。云「姆在女右，當詔以婦禮」者，案《禮記·少儀》云「贊幣自左，詔辭自右」，地道尊右之義，故姆在女右也。女從者畢袵玄，纁笄，被黼黻，在其後。女從者，謂姪娣也。《詩》云：「諸娣從之，祁祁如雲。」袵，同也。同玄者，上下皆玄。纁，禪也。《詩》云：「素衣朱褹。」《爾雅》云：「黼領謂之褹。」《周禮》曰：「白與黑謂之黼。」天子諸侯后，

夫人狄衣，卿大夫之妻刺黼以爲領，如今偃領矣。士妻始嫁，施禪黼於領上，假盛飾耳。言被，明非常服。疏「女從」至「其後」○釋曰：此是從女之人，在女後爲尊卑威儀之事也。○注「女從」至「常服」○釋曰：知女從是姪娣者，案下文云「雖無娣媵先」，鄭云「古者嫁女，必姪娣從，謂之媵」，即此女從，故云「女從者，謂姪娣也」。云《詩》者，《韓奕》篇，引之證姪之義也。①云「袵，同也。同玄者，上下皆玄」者，此袵讀從《左氏》「均服振振」一也，故云同玄，上下皆玄也。同者，即婦人之服不殊裳也。云「纁，禪也」者，此讀如《詩》云「素衣朱褹」，故爲禪也。引《詩》《爾雅》《周禮》者，證黼得爲領之義也。黼謂刺之在領爲黼文，名爲褹，故云「黼領謂之褹」。云「天子諸侯后，夫人狄衣」者，案《周禮·內司服》云：「掌王后之六服：褹衣、揄狄、闕狄。」又注云：「侯伯之夫人揄狄，子男之夫人亦闕狄，唯二王後褹衣。」故云后，夫人狄衣也。云「卿大夫之妻刺黼以爲領」者，以士妻言被，明非常，故知大夫之妻刺之常也。不於后，夫人下言領，於卿大夫妻下乃云刺黼爲領，

①「姪」上，阮校云：毛本有「娣」字。



則后、夫人亦同刺黼爲領也。但黼乃白黑色爲之，若於衣上則畫之，若於領上則刺之以爲。<sup>①</sup>其男子冕服，衣畫而裳繡，繡皆刺之。其婦人領雖在衣，亦刺之矣。然此士妻言被禪黼，謂於衣領上別刺黼文，謂之被，則大夫以下刺之，<sup>②</sup>不別被之矣。案《禮記·郊特牲》云：「綃黼丹朱中衣，大夫之僭禮也。」彼天子、諸侯中衣有黼領，服則無之。<sup>③</sup>此今婦人事華飾，故於上服有之，中衣則無也。云「如今偃領矣」者，舉漢法，鄭君目驗而知，至今已遠，偃領之制亦無可知也。云「士妻始嫁，施禪黼於領上，假盛飾耳。言被，明非常服」者，對大夫已上妻則常服有之，非假也。<sup>④</sup>主人玄端，迎于門外，西面再拜。賓東面荅拜。賓，壻。**疏**「主人」至「荅拜」○釋曰：此言男至女氏之大門外，女父出迎之事也。主人揖入，賓執鴈從。至于廟門，揖入。三揖，至于階，三讓。主人升，西面。賓升，北面，奠鴈，再拜稽首，降，出。婦從，降自西階。主人不降送。賓升奠鴈拜，主人不荅，明主爲授女耳。主人不降送，禮不參。**疏**「主人」至「降送」○釋曰：此言女父迎

賓壻入廟門，升堂，父迎出大門之事也。<sup>⑤</sup>云「賓升，北面，奠鴈，再拜稽首」者，此時當在房外當楣北面。知在房戶者，見隱二年「紀履緌來逆女」，《公羊傳》曰：「譏始不親迎也。」何休云「夏后氏逆於庭，殷人逆於堂，周人逆於戶」。後代漸文，迎於房者，親親之義也。○注「賓升」至「不參」○釋曰：云「賓升奠鴈拜，主人不荅，明主爲授女耳」者，案納采阼階上拜，至問名、納吉、納徵，請期轉相如皆拜，獨於此主人不荅，明主爲授女耳。云「主人不降送，禮不參」者，禮賓主宜各一人，今婦既送，<sup>⑥</sup>主人不送者，以其禮不參也。壻御婦車，授綏。姆辭不受。<sup>⑦</sup>壻御者，親而下之。綏，所以引升車者。僕人之禮，必授

- ①「以爲」，曹校云當作「爲異」。
- ②「下」，阮校引浦鏜云：爲「上」字之誤。
- ③「服」上，阮校云：毛本有「上」字，閩本「上服」二字擠入。
- ④「假」，阮校云：毛本作「被」。
- ⑤「父迎」，阮校引浦鏜云：當爲「婦從」之誤。
- ⑥「送」，阮校云：毛本作「從」。
- ⑦「御婦車授綏姆辭」原作「以几姆加景乃驅」，據重刊嚴州本改。

人綏。**疏**「壻御」至「不受」○注「壻御」至「人綏」○釋曰：

云「僕人之禮，必授人綏」者，《曲禮》文。今壻御車即僕人禮，僕人合授綏，姆辭不受，謙也。婦乘以几，姆加

景，乃驅。御者代。乘以几者，尚安舒也。景之制

蓋如明衣，<sup>①</sup>加之以爲行道禦塵，令衣鮮明也。景亦明也。驅，行也。行車輪三周，御者乃代壻。今文「景」作

「憬」。**疏**婦乘「至」者代「○注」乘以「至」作「憬」○釋曰：

云「乘以几」者，謂登車時也。几所以安體，謂若尸乘以几

之類，以重其初昏，與尸同也。云「景之制蓋如明衣」者，

案《既夕禮》「明衣裳用布，袂屬幅，長下膝」，鄭注云「長下

膝，又有裳，於蔽下體深也」。此景之制無正文，故云蓋如

明衣，直云制如明衣，此嫁時尚飾，不用布。案《詩》云：

「衣錦褻衣，裳錦褻裳。」鄭云：「褻，禪也。蓋以禪縠爲之。

中衣裳用錦，而上加禪縠焉，爲其文之大著也，庶人之妻

嫁服也。士妻紵衣纁袖。」彼以庶人用禪縠，連引士妻紵

衣，則此士妻衣上亦用禪縠，《碩人》是國君夫人，亦衣錦

褻衣，則尊卑同用禪縠。庶人卑，得與國君夫人同用錦，

爲衣大著。此士妻不用錦，不爲文大著，故云行道禦風塵

也。壻乘其車先，俟于門外。壻車在大門外。乘

之先者，道之也。男率女，女從男，夫婦剛柔之義自此始也。俟，待也。門外，壻家大門外。**疏**「壻乘」至「門外」

○注「壻車」至「門外」○釋曰：云「壻車在大門外」者，謂在

婦家大門外。知者，以其壻於此始言乘其車，故知也。云

「男率女，女從男，夫婦剛柔之義自此始也」者，並《郊特

牲》文。云「門外，壻家大門外」者，命士已上，父子異宮，

故解爲壻家大門外。若不命之士，父子同宮，則大門，父

之大門外也。婦至，主人揖婦以入。及寢門，

揖入，升自西階。媵布席于奧。夫人于室，

即席。婦尊西，南面。媵、御沃盥交。升自西

階，道婦入也。媵，送也，謂女從者也。御當爲訝。訝，迎

也，謂壻從者也。媵沃壻盥於南洗，御沃婦盥於北洗。夫

婦始接，情有廉恥，媵、御交道其志。**疏**「婦至」至「盥交」

○釋曰：此明夫導於婦入門、升階，及對席，媵、御沃盥之

儀。云「主人揖婦以入」者，此則《詩》云「好人提提，宛然

左辟」是也。云「夫人于室，即席」者，謂壻也。婦在尊西，

未設席。壻既爲主，東面，須設饌訖，乃設對席，揖即對

①「衣」原作「矣」，據重刊嚴州本改。

席，爲前後至之便故也。○注「升自」至「其志」○釋曰：云「升自西階，道婦人也」者，以尋常賓客，主人在東，賓在西，今主人與妻俱升西階，故云「道婦人也」。云「媵，送也，謂女從者也」，<sup>①</sup>即姪娣也。云「御當爲訝。訝，迎也，謂壻從者也」者，以其與婦人爲壻，非男子之事，謂夫家之賤者也。知「媵沃壻盥於南洗，御沃婦盥於北洗」者，以其有南北二洗，又云「媵，御沃盥交」，明知夫婦與媵御南北交相沃盥也。贊者徹尊冪。舉者盥，出，除冪，舉鼎入，陳于阼階南，西面，北上。匕、俎從設。執匕者，執俎者從鼎而入設之。匕，所以別出牲體也。俎，所以載也。

**疏**「贊者」至「從設」○注「執匕」至「載也」○釋曰：案《特牲》、《少牢》、《公食》與《有司徹》及此《昏禮》等，執匕俎舉鼎各別人者，此吉禮尚威儀故也。《士喪禮》舉鼎，右人以右手執匕，左人以左手執俎，舉鼎人兼執匕俎者，喪禮略也。云「從設」者，以從男之事，<sup>②</sup>故從吉祭法也。《公食》執匕俎之人，人加匕於鼎，陳俎於鼎南，其匕與載皆舉鼎者爲之。《特牲》注云：「右人也，尊者於事指使可也。」則右人於鼎北南面匕肉出之，左人於鼎西俎南北面承取肉載於俎。《士虞》右人載者，喪祭少

變，故在西方，長者在左也。今昏禮鬼神陰陽，當與《特牲禮》同，亦右人匕，左人載，遂執俎而立，以待設也。云「匕，所以別出牲體也」者，凡牲有體別，謂肩、臂、臠、肫、胙、脊、脅之等。於鼎以次別匕出之，載者依其體別以次載之於俎，故云「別出牲體也」。北面載，執而俟。

執俎而立，俟豆先設。**疏**「北面載執而俟」○注「執俎」至「先設」○釋曰：知「俟豆先設」者，下文「菹醢」後乃云「俎入，設于豆東」，故知也。匕者逆退，復位于門東，北面，西上。執匕者事畢，逆退，由便。至此乃著其位，略賤也。

**疏**「匕者」至「西上」○注「執匕」至「賤也」○釋曰：云「至此乃著其位，略賤也」者，案《士冠》未行事，陳主人位訖，即言兄弟及擯者之位，於此初陳鼎門外時，<sup>③</sup>不見執匕者位，至此乃著其位，故言「略賤也」。贊者設醬于席前，菹醢在其北。俎入，設于豆東，魚次，腊特于俎北。豆東，菹醢之東。**疏**注「豆東

①「也」下，阮校云：毛本有「者」字。

②「從男」，曹校云當爲「男女」。

③「於此」，曹校云當作「此於」。

菹醢之東」○釋曰：醬與菹醢俱在豆，知不在醬東者，下文醬東有黍稷，故知在菹醢東也。贊設黍于醬東，稷

在其東，設涪于醬南。饌要方也。

**疏**「贊設」至

「醬南」○注「饌要方也」○釋曰：豆東兩俎，醬東黍稷，是其要方也。設對醬于東，對醬，婦醬也。設之當特

俎。**疏**「設對醬于東」○注「對醬」至「特俎」○釋曰：壻東

面，設醬在南為右，婦西面，則醬在北為右，皆以右手取之為便。故知設之當特俎東也。菹醢在其南，北上。

設黍于腊北，其西稷。設涪于醬北。御布

對席。贊啓會，卻于敦南，對敦于北。啓，發

也。今文「啓」作「開」，古文「卻」為「給」。**疏**「菹醢」至

「于北」○釋曰：「菹醢在其南，北上」者，謂菹在醬南，其南

有菹有醢。若壻醢在菹北，從南向北陳為南上，此從北向

南陳，亦醢在菹南，為北上也。云「涪」，即上文「大羹涪在

饌」者，羹宜熱，醢食乃將入。<sup>①</sup>是以《公食大夫》云「大羹

涪不和，實于鐙，由門入，公設之于醬西」是也。又生人

食，《公食大夫》是也。《特性》、《士虞》等為神設，皆為敬

尸，尸亦不食也。<sup>②</sup>《鄉飲酒》、《鄉射》、《燕禮》、《大射》不

設者，涪非飲食之具，<sup>③</sup>故無也。《少牢》無涪者，又不備。<sup>④</sup>《有司徹》有涪者，賓尸禮褻，故有之，與《少牢》禮

異也。云「設涪于醬北」者，案上設壻涪於醬南，在醬黍之

南，特俎出於饌北。此設婦涪於醬北，在特俎東，饌內則

不得要方，上注云「要方」者，據大判而言耳。云「啓會，卻

于敦南，對敦于北」者，取壻東面以南為右，婦西面以北為

右，各取便也。卻，仰也，謂仰於地也。贊告具。揖

婦，即對筵，皆坐，皆祭。祭薦、黍、稷、肺。

贊者西面告饌具也。壻揖婦，使即席。薦，菹醢。**疏**「贊

告」至「稷肺」<sup>⑤</sup>○注「贊者」至「菹醢」○釋曰：知「贊者西

面告饌具」者，以其所告者宜告主人，主人東面，知西面告

也。云「薦，菹醢」者，以其《儀禮》之內單言薦者，皆據籩

豆而言也。贊爾黍，授肺脊。皆食以涪、醬。

<sup>①</sup>「醢」，阮校云：《要義》作「醢」。

<sup>②</sup>「皆為敬尸尸亦不食也」，曹校云似當為：「亦為敬尸，

尸皆不食也。」

<sup>③</sup>「具」上，曹校云似當有「正」字。

<sup>④</sup>「又」，阮本作「文」。

<sup>⑤</sup>「告」，原誤「者」，據重刊單疏本改。

皆祭舉、食舉也。爾，移也。移置席上，使其食也。

皆食，食黍也。以，用也。用者，謂啜滫𩚑醬。古文「黍」作「稷」。

**疏**「贊爾」至「舉也」○釋曰：云「祭舉、食舉也」

者，舉謂舉肺，以其舉以祭，以食，故名肺爲舉。則上文云祭者，祭肺也。○注「爾移」至「作稷」○釋曰：云「爾，移也」者，爾訓爲近，謂移之使近人，故云「移置席上，使其食也」。案《玉藻》云「食坐盡前」，謂臨席前畔，則不得移黍於席上。此云「移置席上」者，鬼神陰陽，故此昏禮從《特牲》祭祀法。云「皆食，食黍也」者，案《特牲》、《少牢》祭舉、食舉乃飯，此先食黍乃祭舉。相反者，彼九飯禮成，<sup>①</sup>故先食舉以爲導食氣，此三飯禮略，故不須導也。此先爾黍稷，後授肺，《特牲》亦然，以其士禮同也。《少牢》佐食先以舉肺脊授尸，乃爾黍者，大夫禮與士異故也。然《士虞》亦先授舉肺脊，後乃爾黍者，喪禮與吉反故也。云「用者，謂啜滫𩚑肺𩚑醬」者，<sup>②</sup>以其大羹汁不用箸，醬又不須以箸，故用口啜滫，用指𩚑醬也。三飯，卒食。卒，已也。同牢示親，不主爲食起，三飯而成禮也。

**疏**「三飯卒

食」○注「同牢」至「禮也」○釋曰：云「同牢示親，不主爲食起」者，《少牢》十一飯，《特牲》九飯而禮成，此獨三飯，故

云「同牢示親，不主爲食起，三飯而成禮也」。贊洗爵，

酌醕主人，主人拜受。贊戶內北面荅拜。

醕婦亦如之。皆祭。醕，漱也。醕之言演也，安也。

漱所以絜口，且演安其所食。醕酌內尊。**疏**「贊洗」至

「皆祭」○釋曰：自此至「尊否」，論夫婦食訖，醕及徹饌於房節。云「主人拜受」者，婿拜當東面。「醕婦亦如之」者，

婦拜當南面。是以《少牢》云「養皆荅拜」，鄭注云「在東面

席者東面拜，在西面席者皆南面拜」，故知婦拜南面。若

贊荅婦拜，亦於戶內北面也。云「皆祭」者，祭先也。○注

「醕漱」至「內尊」○釋曰：云「醕，漱也。醕之言演也，安

也。漱所以絜口，且演安其所食」者，案《特牲》云：「主人

洗角，升酌，醕尸。」注云：「醕猶衍也。是獻尸也，謂之醕

者，尸既卒食，又欲頤衍養樂之。」又《少牢》云：「主人酌

酒，乃醕尸。」注云：「醕猶羨也，既食之而又飲之，所以樂

之。」三注不同者，文有詳略，相兼乃具。《士虞》亦是醕

尸，注直云「醕，安食也」，不言養樂及羨者，喪故略之。此

<sup>①</sup> 「成」，阮校引浦鏜云：「盛」誤爲「成」。

<sup>②</sup> 「肺」，阮校云：毛本無。

三醕俱不言獻，皆云醕，直取其繫，故注云「漱所以繫口，演安其所食」，亦頤養樂之義。知「醕酌內尊」者，以下文云「贊酌于戶外尊」，故知此夫婦酌內尊也。贊以肝從。皆振祭，濟肝，皆實于菹豆。肝，肝炙也。

飲酒宜有肴以安之。

**疏**「贊以」至「菹豆」○釋曰：案《特

牲》、《少牢》獻尸，以肝從，尸濟之，加于菹豆，與此同，禮之正也。主人與祝亦以肝從，加於俎不加於豆者，下尸，故不敢同之也。《士虞》獻尸，尸以肝加於俎者，喪祭，故鄭云：「加於俎，從其牲體也。以喪不志於味。」但此云實，不云加，異於祭故也。卒爵，皆拜。贊荅拜，受

爵。再醕如初，無從。三醕用盃，亦如之。

亦無從也。**疏**「卒爵」至「如之」○注「亦無從也」○釋曰：

「卒爵，皆拜。贊荅拜」者，獻主處也。①云「再醕如初」者，如自「贊洗爵」已下至「荅拜受爵」也。云「亦無從也」者，「三醕用盃，亦如之」，亦自「贊洗爵」至「受爵」。鄭直云「亦無從」，「用盃」文承「再醕」之下，明知事事如再醕，以其初醕有從，再醕如初無從，三醕用盃亦無後，故鄭以「亦無從」言之，其實皆同再醕也。贊洗爵，酌于戶

外尊。②入戶，西北面奠爵，拜。皆荅拜。坐祭，卒爵，拜。皆荅拜。興。贊酌者，自酢也。

**疏**「贊洗」至「拜興」○釋曰：言「皆」者，皆夫婦也。三醕乃酌外尊自酢者，皆是略賤者也。既隔合盃，③乃用爵，不嫌相襲爵，明更洗餘爵也。主人出，婦復位。復

尊西南面之位。

**疏**「主人出婦復位」○注「復尊西南面之

位」○釋曰：直云「主人出」，不云處所，案下文云「主人說

服于房」矣，④則此時亦向東房矣。云「復尊西南面之位」

者，婦人不宜出復入，故因舊位而立也。乃徹于房

中，如設于室，尊否。徹室中之饌設于房中，為媵御

餞之。徹尊不設，有外尊也。

**疏**「乃徹」至「尊否」○釋

曰：經云「乃徹于房中，如設于室」，雖據豆俎而言，理兼於尊矣，故云「徹尊不設有外尊」，明徹中兼尊也。云「尊否」者，唯尊不設于房中而言也。知「為媵御餞之」者，下文云

①「獻」上，曹校云似脫「荅拜於」三字。

②「戶」，阮校引戴震云：「戶」字衍。

③「隔」，阮校云：毛本無。

④「矣」，曹校云此字衍。

「媵餼主人之餘」已下是也。主人說服于房，媵受。

婦說服于室，御受。姆授巾。巾，所以自繫清。

今文「說」皆作「稅」。

**疏**「主人」至「授巾」○釋曰：自此至

「呼則聞」，論夫婦寢息及媵、御餼之事也。云「主人說服

于房，媵受。婦說服于室，御受」者，與沃盥文同，亦是交

接有漸之義也。疊今文爲稅不從者，稅是追服之言，非脫

去之義，故不從也。御衽于奧，媵衽良席在東，

皆有枕，北止。衽，卧席也。婦人稱夫曰良。《孟子》

曰：「將見良人之所之。」止，足也。古文「止」作「趾」。

**疏**

「御衽」至「北止」○注「衽卧」至「作趾」○釋曰：衽于奧，主

于婦席。使御布婦席，使媵布夫席，此亦示交接有漸之義

也。云「衽，卧席也」者，案《曲禮》云「請席何鄉，請衽何

趾」，鄭云「坐問鄉，卧問趾，因於陰陽」。彼衽稱趾，明衽

卧席也。若然，前布同牢席，夫在西，婦在東，今乃夫在

東，婦在西，易處者，前者示有陰陽交會有漸，<sup>①</sup>故男西女

東，今取陽往就陰，故男女各於其方也。云「《孟子》」者，

案《孟子·離婁》篇云：「齊人有一妻一妾而處室者，其良

人出，則必厭酒肉而後反。其妻問所與飲食者，則盡富貴

者。其妻告其妾曰：良人出，則厭酒肉而後反，問所與飲

食者，則盡富貴者也。而未嘗有顯者來，吾將謂良人之所

之。」注云：「睥，視也。」彼睥爲視，亦得爲見，故鄭此注爲

見也。引之者，證婦人稱夫爲良人之義也。云「古文止作

趾」者，雖疊古文，趾爲足，亦一義也。主人入，親說

婦之纓。入者，從房還入室也。婦人十五許嫁，笄而禮

之，因著纓，明有繫也。蓋以五采爲之，其制未聞。

**疏**

「主人」至「之纓」○注「入者」至「未聞」○釋曰：知「從房還

入室」者，夫前出說服於房，今言人，明從房入室也。云

「婦人十五許嫁，笄而禮之，因著纓」者，案《曲禮》云「女子

許嫁纓」，又云「女子許嫁笄而字」，鄭據此諸侯文而言。<sup>②</sup>

但言十五許嫁，則以十五爲限，則自十五已上皆可許嫁

也。云「明有繫也」者，纓是繫物，爲之明有繫也。云「蓋

以五采爲之」者，以《周禮·巾車職》五路，皆有繁纓就數，

鄭注「纓皆用五采屬爲之」。此纓雖用絲爲之，當用五采，

但無文，故云「蓋」以疑之也。云「其制未聞」者，此纓與男

① 下「有」字，曹校云當爲「之」。

② 「諸侯」，阮校以毛本作「許嫁」爲是。曹校云「侯」字衍。

子冠纓異，彼纓垂之兩傍，結其條，此女子纓，不同於彼，故云「其制未聞」。但纓有二時不同。《內則》云：「男女未冠笄者，纓角衿纓，皆佩容臭。」鄭注云：「容臭，香物也。以纓佩之，爲迫尊者給小使也。」此是幼時纓也。《內則》又云：「婦事舅姑，子事父母，①衿纓綦屨。」注云：「衿猶結也。婦人有纓，示繫屬也。」是婦人、女子有二時之纓。《內則》示有繫屬之纓，即許嫁之纓，與此說纓一也。若然，笄亦有二等，案《問喪》：「親始死，笄纚，據男子去冠仍有笄，元缺一字。與婦人之笄，並有安髮之笄也。」②爵弁、皮弁及六冕之笄，皆是固冠冕之笄，是其二也。燭出。昏禮畢，將卧息。媵餽主人之餘，御餽婦餘，贊酌外尊醕之。外尊，房戶外之東尊。疏「媵餽」至「醕之」○

釋曰：亦陰陽交接之義。云「酌外尊」者，賤不敢與主人同酌內尊也。媵侍于戶外，呼則聞。爲尊者有所徵求。今文「侍」作「待」。<sup>③</sup>疏「媵侍」至「則聞」○釋曰：不

使御待于戶外供承夫婦者，以女爲主，故使媵待于戶外也。夙興，婦沐浴，纚笄，宵衣以俟見。夙，早也，昏明日之晨。興，起也。俟，待也。待見於舅姑寢門

之外。古者命士以上，年十五父子異宮。疏「夙興」至

「俟見」○釋曰：自此至「授人」，論婦見舅姑之事。云「纚笄宵衣」者，此則《特牲》主婦宵衣也。不著純衣纁衾者，彼嫁時之盛服，今已成昏之後，不可使服，故退從此服也。

○注「夙早」至「異宮」○釋曰：言「昏明日之晨」者，以昨日昏時成禮，此經言「夙興」，故知是昏之晨旦也。云「興，起也。俟，待也。待見於舅姑寢門之外」者，因訓即解之也。

云「古者命士以上，年十五父子異宮」者，案《內則》云：「由命士以上，父子異宮。」不云年限。今鄭知十五爲限者，以其十五成童，是以鄭注《喪服》亦云「子幼謂年十五以下」，則不隨母嫁，<sup>④</sup>故知十五以後乃異宮也。鄭言此限者，欲見不命之士父子同宮，雖俟見，不得言舅姑寢門外也。質明，贊見婦于舅姑。席于阼，舅即席。席于房外，南面，姑即席。質，平也。房外，房戶外之

①「子」，曹校云當爲「如」。

②「有」，曹校云當爲「是」。

③「今文侍作待」，阮校云：當爲「今文侍作待」。

④「則」上，曹校云脫「十五以上」四字。



西。古文「舅」皆作「咎」。

**疏**「質明」至「即席」○注「質

平」至「作咎」○釋曰：此經論設舅姑席位所在。鄭知房外是房戶外之西者，以其舅在阼，阼當房戶之東。若姑在房戶之東，即當舅之北，南面向之，不便。又見下記云「父醴女而俟迎者，母南面於戶外，女出於母左」，以母在房戶西，故得女出於母左。是以知此房外亦房戶外之西也。

婦執筭棗栗，自門入，升自西階，進拜，奠于席。筭，竹器而衣者，其形蓋如今之筭簋蘆矣。<sup>①</sup>進拜者，進東面乃拜。奠之者，舅尊，不敢授也。

**疏**「婦執」至

「于席」○釋曰：此經論婦從舅寢門外人見舅之事也。必

見舅用棗栗，見姑以股脩者，案《春秋》莊二十四年經書：

「秋，八月丁丑，夫人姜氏入。戊寅，大夫宗婦覲，用幣。」

《公羊傳》云：「宗婦者何？大夫之妻也。覲者何？見

也。用者何？用者不宜用也。見用幣，非禮也。然則曷

用？棗栗云乎？股脩云乎？」注云：「股脩者，脯也。

禮，婦人見舅以棗栗爲贄，見姑以股脩爲贄，見夫人至尊，

兼而用之。云乎，辭也。棗栗，取其早自謹敬。股脩，取

其斷斷自脩正。」是用棗栗、股脩之義也。案《雜記》云：

「婦見舅姑，兄弟姊妹皆立于堂下，西面，北上，是見

己。」注云：「婦來爲供養也，其見主於尊者，兄弟以下在

位，是爲己見，不復特見。」又云：「見諸父，各就其寢。」注

云：「旁尊也。亦爲見時不來。」今此不言者，文略也。○

注「筭竹」至「授也」○釋曰：知「筭，竹器者，以字從竹，故

知竹器。知有衣者，下記云「筭緇被纁裏加于橋」，注云

「被，表也。筭有衣者，婦見舅姑，以飾爲敬」，是有衣也。

云「如今之筭簋蘆矣」者，<sup>②</sup>此舉漢法以況義，但漢法去今

以遠，其狀無以可知也。<sup>③</sup>云「進拜者，進東面乃拜」者，

謂從西階進至舅前而拜。云「奠之者，舅尊，不敢授也」

者，案下姑奠于席不授，而云舅尊不敢授者，但舅直撫之

而已，至姑則親舉之。親舉者，若親授之然，故於舅得云

「尊，不敢授也」。舅坐撫之，興，荅拜。婦還，又

拜。還又拜者，還於先拜處拜。婦人與丈夫爲禮則俠

拜。**疏**「舅坐」至「又拜」○注「還又」至「俠拜」○釋曰：云

「先拜處」者，謂前東面拜處也。云「婦人與丈夫爲禮則俠

①「蘆蘆」，徐本作「筭蘆」，阮校云：毛本作「筭蘆」。

②「簋蘆」，重刊單疏本作「蘆蘆」。

③「無以可」，阮校云：毛本作「已無可」，陳、閻作「無已可」。

拜」者，謂若《士冠》冠者見母，「母拜受，子拜送，母又拜」。母於子尚俠拜，則不徒此婦於舅而已，故廣言「婦人與丈夫爲禮則俠拜」。降階，受筭，殿脩，升，進，北面拜，奠于席。姑坐，舉以興，拜，授人。人，有司。姑執筭以起，荅婦拜，授有司徹之，舅則宰徹之。

**疏**

「降階」至「授人」○釋曰：此經論婦見姑之事。○注「人有」至「徹之」○釋曰：云「人，有司」者，凡行事者皆主人有司也。知舅則使宰徹者，此見下記云「舅荅拜，宰徹」是也。贊醴婦。醴當爲禮。贊禮婦者，以其婦道新成，親厚之。

**疏**「贊醴婦」○注「醴當」至「厚之」○釋曰：自此至

「於門外」，論舅姑堂上禮婦之事。云「醴當爲禮」者，《士冠》、《內則》、《昏義》諸文，醴皆破從禮者，<sup>①</sup>案《司儀》注：

「上於下曰禮，敵者曰儔」。又案《大行人》云「王禮再裸而酢」之等用鬱鬯，不言「王鬯再裸而酢」而言「禮」，則此諸文雖用醴禮賓，不得即言主人醴賓，故皆從「上於下曰禮」解之。席于戶牖間，室戶西，牖東，南面位。

**疏**「席

于戶牖間」○注「室戶」至「面位」○釋曰：知義然者，以其賓客位於此，是以禮子、禮婦、禮賓客皆於此，尊之故也。

側尊甒醴于房中。婦疑立于席西。疑，正立自定之貌。

**疏**「側尊」至「席西」○注「疑正立自定之貌」○

釋曰：云「婦疑立于席西」者，以其禮未至而無事，故疑然自定而立，以待事也。若行之間而立，<sup>②</sup>則云立，不得云

疑立也。贊者酌醴，加枳，面枋，出房，席前北面。婦東面拜受。贊西階上北面拜送。婦

又拜。薦脯醢。婦東面拜，贊北面荅之，變于丈夫始

冠成人之禮。

**疏**「贊者」至「脯醢」○釋曰：云「面枋，出

房」者，以其贊授，故面枋。《冠禮》贊酌醴，將授賓，則面菓。賓受醴，將授子，乃面枋也。此婦又拜，并下經「婦又

拜」者，皆俠拜也。○注「婦東」至「之禮」○釋曰：云「婦東

面拜，贊北面荅之，變於丈夫始冠成人之禮」者，案《冠禮》禮子與此禮婦俱在賓位，彼禮子南面受醴，此則東面，不

同，故決之。彼南面者，以向賓拜；此東面者，以舅姑在

東，亦面拜之也。婦升席，左執觶，右祭脯醢，以

① 「醴」原本作「體」，據重刊單疏本改。

② 「行」下，阮校云：毛本有「禮」字。

柶祭醴三，降席，東面坐，啐醴，建柶，興，拜。贊荅拜。婦又拜，奠于薦東，北面坐取脯，降，出，授人于門外。奠于薦東，升席奠之。取脯降出授人，親徹，且榮得禮。人謂婦氏人。

**疏**「婦升」

至「門外」○注「奠于」至「氏人」○釋曰：鄭知奠者「升席奠之」者，見上《冠禮》禮子、禮賓皆云「即筵，奠于薦東，降筵，北面坐取脯」，明此奠時升席，南面奠，乃降，<sup>①</sup>北面取脯，降出授人。云「親徹，且榮得禮」者，言且兼二事，何者？下饗婦之俎不親徹，<sup>②</sup>又自出門授人，是且榮得禮。

下饗不親徹俎者，於禮時禮訖，故於後略之。知人是婦氏人者，以其在門外，婦往授之，明是婦氏之人也。舅姑入于室，婦盥饋。饋者，婦道既成，成以孝養。特

豚，合升，側載，無魚腊，無稷，並南上。其他如取女禮。側載者，右胖載之舅俎，左胖載之姑俎，

異尊卑。並南上者，舅姑共席于奧，其饌各以南爲上。其

他，謂醬涇菹醢。女謂婦也。如取婦禮同牢時。今文

「並」當作「併」。

**疏**「舅姑」至「女禮」○釋曰：自此至「之

錯」，論婦饋舅姑成孝養之事。云「其他如取女禮」者，則

自「側載」以下，「南上」以上，與取女異。異者，彼則有魚腊并稷，此則無魚腊與稷。彼男東面，女西面別席，其醬醢菹，夫則南上，婦則北上。今此舅姑共席東面，俎及豆

等皆南上。是其異也。○注「側載」至「作併」○釋曰：豚載皆合升，若成牲載一胖，是常得云側，<sup>③</sup>此乃載胖，故云

「側」。但周人尚右，故知右胖載之舅俎，左胖載之姑俎，是以鄭云「異尊卑」也。云「並南上者，舅姑共席于奧，其

饌各以南爲上」者，決同牢男女東西相對，各上其右也。云「其他，謂醬涇菹醢」者，以同牢時夫婦各有此四者，今

以饋舅姑，亦各有此四物，故云「如同牢時」也。雖不言酒，既有饋，明有酒在其他中。酒在內者亦在北牖下，<sup>④</sup>

外尊亦當在房戶外之東。鄭不云者，略耳。婦贊成祭，卒食，一醕，無從。贊成祭者，授處之。今文無

成也。**疏**「婦贊」至「無從」○注「贊成祭者授處之」○釋

①「降」下，曹校云脫「筵」字。

②「徹」下，阮校云：毛本有「此親徹」三字。

③「常」下，阮校引浦鏜云：疑脫「法不」二字。

④「牖」，曹校云當爲「墉」。

曰：「贊成祭」者，謂授之又處置，令知在於豆間也。席

于北墉下。墉，牆也。室中北牆下。

**疏**「席于北墉

下」○釋曰：此席將爲婦餼之位處也。

婦徹，設席

前，如初，西上。婦餼，舅辭，易醬。婦餼者，即

席將餼也。「辭，易醬」者，嫌淬汗。

**疏**「婦徹」至「易醬」

○釋曰：「婦徹，設于席前，如初，西上」者，此直餼餘。「舅

辭，易醬」者，舅尊故也。不餼舅餘者，以舅尊，嫌相襲。

言「西上」者，亦以右爲上也。○注「婦餼」至「淬汗」○釋

曰：言「將」者，事未至，以其此始言婦餼之意，至下文「婦

餼姑之饌」乃始餼耳。云「辭，易醬者，婦嫌淬汗」者，<sup>①</sup>以

其醬乃以指叩之，淬汗也。婦餼姑之饌。御贊祭

豆、黍、肺，舉肺、脊。乃食，卒。姑醕之，婦

拜受，姑拜送。坐祭，卒爵，姑受，奠之。奠

之，奠于筐。**疏**「婦餼」至「奠之」○注「奠之奠于筐」○釋

曰：云「御贊祭豆、黍、肺，舉肺、脊」者，御贊婦祭之也。鄭

知「奠之於筐」者，此云如取女禮，取女有筐，明此亦奠之

于筐可知也。婦徹于房中，媵御餼，姑醕之。

雖無娣，媵先。於是與始飯之錯。古者嫁女，

必姪娣從，謂之媵。姪，兄之子。娣，女弟也。娣尊姪卑。

若或無娣，猶先媵，容之也。<sup>②</sup>始飯謂舅姑。錯者，媵餼

舅餘，御餼姑餘也。古文「始」爲「姑」。**疏**「婦徹」至「之

錯」○注「古者」至「爲姑」○釋曰：云「古者嫁女，必姪娣

從，謂之媵」者，媵有二種，若諸侯有二媵，外別有姪娣。

是以莊公十九年經書：「秋，公子結媵陳人之婦于鄆。」《公

羊傳》曰：「媵者何？諸侯娶一國，則二國往媵之，以姪娣

從。姪者何？兄之子也。娣者何？弟也。」<sup>③</sup>諸侯夫人

自有姪娣，并二媵各有姪娣，則九女，是媵與姪娣別也。

若大夫、士無二媵，即以姪娣爲媵。鄭云「古者嫁女，必姪

娣從，謂之媵」，是據大夫、士言也。云「姪，兄之子。娣，

女弟也。娣尊姪卑」者，解經云「雖無娣，媵先」之義，以其

若有娣，乃先，媵即姪也。云「猶先媵，容之也」者，對御是

夫之從者爲後。若然，姪與娣俱名媵，今言雖無娣媵先，

似娣不名媵者，但姪娣俱是媵，今去娣，娣外唯有姪，姪言

<sup>①</sup>「婦」，阮校云：依注「婦」字衍。

<sup>②</sup>「容」，阮校云：毛本作「客」。疏中「容」字，毛本亦作「客」。

<sup>③</sup>「弟」上，阮校云：毛本有「女」字。

媵先，以對御爲先，非對娣也稱媵，<sup>①</sup>以其姪娣俱是媵也。云「始飯謂舅姑」者，舅姑始飯，而今媵餽舅餘，御餽姑餘，是交錯之義，若「媵御沃盥交」也。舅姑爲飯始，不爲餽始，俗本云「與始餽之錯」者，誤也。舅姑共饗婦以一獻之禮。舅洗于南洗，姑洗于北洗，奠酬。以酒食勞人曰饗。南洗在庭，北洗在北堂。設兩洗者，獻酬酢以絜清爲敬。奠酬者，明正禮成，不復舉。凡酬酒皆奠於薦左，不舉。其燕則更使人舉爵。**疏**「舅姑」

至「奠酬」○注「以酒」至「舉爵」○釋曰：自此至「歸俎于婦氏人」，論饗婦之事。此饗與上盥饋同日爲之，知者，見《昏義》曰：「舅姑入室，婦以特豚饋，明婦順也。厥明，舅姑共饗婦。」鄭彼注云：「昏禮不言厥明，此言之者，容大夫以上禮多，或異日。」故知此士同日可也。此與上事相因，亦於舅姑寢堂之上，與禮婦同在客位也。云「共饗婦以一獻之禮」者，案下記云「饗婦姑薦焉」，注云「舅姑共饗婦，舅獻，<sup>②</sup>姑薦脯醢」。但薦脯醢無盥洗之事，今設此洗，爲婦人不下堂也。云「姑洗於北洗」，洗者洗爵，則是舅獻姑酬，共成一獻，仍無妨姑薦脯醢也。云「凡酬酒皆奠於薦左，不舉」者，此經直云奠酬，不言處所，故云「凡」，通《鄉

飲酒》、《鄉射》、《燕禮》之等。云「燕則更使人舉爵」者，案《燕禮》獻酬訖，別有人舉旅行酬是也。饗亦用醴酒，<sup>③</sup>知者，下記云「庶婦使人醢之」，注云「使人醢之，不饗也。酒不酬酢曰醢，亦有脯醢。適婦酌之以醴，尊之，庶婦酌之以酒，卑之」是也。若然，知記非醴婦者，以記云「庶婦使人醢之」，明適婦親之。案上醴婦雖適，使贊不親，<sup>④</sup>明記醢庶婦使人當饗節也。舅姑先降自西階，婦降自阼階。授之室，使爲主，明代己。**疏**「舅姑」至「阼

階」○注「授之」至「代己」○釋曰：案《曲禮》云子事父母，「升降不由阼階」，是主人尊者之處。<sup>⑤</sup>今舅姑降自西階，婦降自阼階，是授婦以室之事也。云「授之室」，《昏義》文也。歸婦俎于婦氏人。言俎，則饗禮有牲矣。婦氏人，丈夫送婦者，使有司歸以婦俎，當以反命於女之父母，

- ①「也」，曹校云似衍。
- ②「獻」上，據下記注當有「爵」字。
- ③「酒」，曹校云此字衍。
- ④「不」原作「者」，今據重刊單疏本改。
- ⑤「是」上，阮校云：毛本有「阼階」二字。「之」上，阮校云：毛本有「升降」二字。

明其得禮。<sup>①</sup>**疏**「歸婦俎于婦氏人」○注「言俎」至「得

禮」○釋曰：案《雜記》云大饗，「卷三牲之俎歸于賓館」，是賓所當得也。饗時設几而不倚，爵盈而不飲，肴乾而不食，故歸俎。此饗婦，婦亦不食，故歸也。經雖不言牲，既言俎，俎所以盛肉，故知有牲。此婦氏人，即上婦所授脯者也，故上注引此婦氏人，證所授人爲一也。舅饗送者以一獻之禮，酬以束錦。送者，女家有司也。

爵至酬賓，又從之以束錦，所以相厚。古文「錦」皆爲「帛」。<sup>②</sup>**疏**「舅饗」至「束錦」○注「送者」至「作帛」○釋

曰：此一獻與饗婦一獻同，禮則異，彼兼有姑，此依常饗賓客法。知送者是女家有司者，故《左氏傳》云：「齊侯送姜氏，非禮也。凡公女，嫁于敵國，姊妹則上卿送之，以禮於先君，公子則下卿送之；於大國，雖公子亦上卿送之；於天子，則諸卿皆行，公不自送；於小國，則上大夫送之。」以此而言，則尊無送卑之法，則大夫亦遣臣送之，士無臣，故知有司送之也。云「古文錦皆爲帛」者，此及下文錦皆爲帛，不從古文者，禮有玉錦，非獨此文，則禮有贈錦之事，故不從古文也。姑饗婦人送者，酬以束錦。婦人送者，隸子弟之妻妾。凡饗，速之。**疏**「姑饗」至「束

錦」○注「婦人」至「速之」○釋曰：《左氏傳》云：「士有隸子弟。」士卑無臣，自以其子弟爲僕隸，并己之子弟之妻妾，但尊無送卑，故知婦人送者是隸子弟之妻妾也。云「凡饗，速之」者，案《聘禮》饗食速賓，則知此舅姑饗送者亦速之也。凡速者，皆就館召之。是以下云：「若異邦，則贈丈夫送者以束錦。」鄭云：「就賓館。」則賓自有館。若然，婦人送者亦當有館。男子則主人親速，其婦送者不親速，以其婦人迎客不出門，當別遣人速之。若異邦，則贈丈夫送者以束錦。贈，送也。就賓館。**疏**「若

異」至「束錦」○注「贈送也就賓館」○釋曰：案莊二十七年冬，「莒慶來迎叔姬。」<sup>①</sup>《公羊傳》曰：「大夫越竟逆女，非禮也。」鄭注《喪服》亦云：「古者大夫不外娶。」今言異邦得外娶者，以大夫尊，外娶則外交，故不許。士卑不嫌，容有

①「明其得禮」，阮校云：《通解》作「明得其禮」，《要義》作「明所得禮」。

②「爲」，阮校云：《通解》作「作」。按，疏中標目是「作」字，疊注是「爲」字，必有一誤。

③「故」，曹校云當爲「案」。

④「迎」，阮校云：《要義》作「逆」。

外娶法，故有異邦送客也。鄭知就館者，贈賄之等皆就館，故知此亦就館也。

### 儀禮疏卷第五

江寧府知府陽城張敦仁編校 元和縣  
學生員顧廣圻覆校

## 儀禮疏卷第六

唐朝散大夫行大學博士弘

文館學士臣賈公彥等撰

若舅姑既沒，則婦入三月，乃奠菜。沒，終也。

奠菜者，以筐祭菜也，蓋用菹。

**疏**「若舅」至「奠菜」○釋

曰：自此至「饗禮」，論舅姑沒三月廟見之事。必三月者，三月一時天氣變，婦道可以成之故也。此言「舅姑既沒」者，若舅沒姑存，則當時見姑，三月亦廟見舅。若舅存姑沒，婦人無廟可見，或更有繼姑，自然如常禮也。案《曾子問》云：「三月而廟見，稱來婦也。擇日而祭於禰，成婦之義也。」鄭云：「謂舅姑沒者也。必祭成婦義者，婦有供養之禮，猶舅姑存時，盥饋特豚於室。」此言奠菜，即彼祭於禰，一也。奠菜亦得稱祭者，若《學記》云「皮弁祭菜」之類也。○注「沒終」至「用菹」○釋曰：此注云「奠菜者，以筐」，案下云「婦執筭菜」，筐即筭，一也。鄭知菜「蓋用菹」

者，舅姑存時用棗栗、股脩，義取早起肅栗，治股自脩，則此亦取謹敬。因《內則》有菹、苴、粉、榆供養，是以疑用菹，故云「蓋」也。席于廟奧，東面，右几。席于北方，南面。○疏注「廟

考」至「墉下」○釋曰：案《周禮·司几筵》云「每敦一几」，

鄭注云：「周禮，雖合葬及時同在殯，<sup>①</sup>皆異几，體實不同。

祭於廟同几，精氣合。」又《祭統》云「設同几」，同几即同席。此即祭於廟中而別席者，此既廟見，若生時見舅姑，

舅姑別席異面，是以今亦異席別面，象生，不與常祭同也。

鄭知「廟，考妣廟」者，《曾子問》云「擇日而見於禰」，又象生時見舅姑，故知考妣廟也。祝盥，婦盥于門外。

婦執筭菜，祝帥婦以入。祝告，稱婦之姓，

曰：「某氏來婦，敢奠嘉菜于皇舅某子。」帥，

道也。入，入室也。某氏者，齊女則曰姜氏，魯女則曰姬

氏。來婦，言來為婦。嘉，美也。皇，君也。

**疏**釋曰：洗

在門外，祝與婦就而盥之者，此亦異於常祭。象生見舅

①「時同」，《周禮·司几筵》鄭注作「同時」。



姑，在外沐浴，乃入舅姑之寢，故洗在門外也。云「祝帥婦以人」者，象《特牲》陰厭，祝先主人入室也。云「某子」者，言若張子、李子也。婦拜，扱地，坐奠菜于几東席上，還，又拜如初。扱地，手至地也。婦人扱地，猶男子稽首。

**疏**注「扱地」至「稽首」○釋曰：云「扱地，手至地」者，以手之至地，<sup>①</sup>謂之扱地，則首不至手，又與男子空首不同。云「婦人扱地，猶男子稽首」者，婦人肅拜爲正，今云扱地，則婦人之重拜也。猶男子之稽首，亦拜中之重，故以相況也。案《周禮·大祝》：「辨九拜：一曰稽首，二曰頓首，三曰空首，四曰振動，五曰吉拜，六曰凶拜，七曰奇拜，八曰褒拜，九曰肅拜。」鄭云：「稽首，拜頭至地也。頓首，拜頭叩地也。空首，拜頭至手，所謂拜手也。吉拜，拜而後稽顙，謂齊衰不杖以下者。言吉者，此殷之凶拜，周以其與頓首相近，故謂之吉拜云。凶拜，稽顙而後拜，謂三年服者。振動，謂戰栗變動之拜。」鄭大夫云：「奇拜，謂一拜也。褒讀爲報，報拜，再拜是也。」鄭玄謂：「一拜，荅臣下拜。再拜，拜神與尸。」鄭司農云：「肅拜，但俯下手，今時擡是也。」但九拜之中四者是正拜，即稽首、頓首、空首、肅拜是也。稽首，拜中之重，是臣拜君之拜

也。頓首，平敵相與之拜。故《左氏傳》齊侯拜魯侯爲稽首，魯君荅以頓首，齊於魯責稽首，荅曰：「天子在，無所稽首。」是臣於君以稽首，故《燕禮》臣與君皆云稽首也。空首者，君荅臣下拜也。肅拜者，婦人以肅拜爲正，若以男子於軍中亦肅拜，故《左氏傳》晉卻至云「敢肅使者」是也。餘五者皆依於正拜。振拜，<sup>②</sup>鄭云《書》曰「王動色變」者，是武王觀兵，白魚入王舟，王動色變，武王於時拜天神，爲此拜當稽首也。奇拜既爲一拜，是君荅臣下之拜，當以附空首也。褒拜爲尸及神，亦當附稽首也。其吉拜，先吉拜爲頓首，後稽顙，則吉拜當附頓首也。凶拜爲先稽顙，後吉拜之，此周之三年之喪拜，後爲吉拜，當附稽首也。《左氏傳》穆嬴抱太子適趙氏，頓首於宣子者，私求法，故不爲肅拜。《喪小記》云「婦人爲夫與長子稽顙」者，爲重喪，故亦不肅拜也。婦降堂，取筭菜入。祝曰：「某氏來婦，敢告于皇姑某氏。」奠菜于席，如初禮。降堂，階上也。室事交乎戶，今降堂者，敬也。於姑

①「之」，阮校云：陳、閩俱無。

②「拜」，曹校云當爲「動」。

言敢告，舅尊於姑。**疏**「婦降」至「初禮」○釋曰：此爲來

婦奠於姑，設於北坐之前，以見姑也。○注「降堂」至「於

姑」○釋曰：不直云「降」而云「降堂」者，則在階上，故云

「降堂，階上」也。云「室事交乎戶，今降堂者，敬也」者，

「室事交乎戶」，《禮器》文。彼子路與季氏之祭，云：「室事

交乎戶，堂事交乎階。」今此既是室之事，當交於戶，今乃

交於階，故言敬也。云「於姑言敢告，舅尊於姑」者，上文

於舅言「敢奠嘉菜」，不言告，<sup>①</sup>是舅尊，於姑言告，是姑卑

也。**婦出，祝闔牖戶。**凡庶無事則閉之。**疏**注「凡

廟無事則閉之」○釋曰：先言牖後言戶者，先闔牖，後閉

戶，故爲文然也。以其祭訖則闔牖戶，明是無事則閉之，

以其鬼神尚幽闇故也。**老醴婦于房中，南面，如**

**舅姑醴婦之禮。**因於庶見禮之。**疏**釋曰：舅姑生

時，見訖，舅姑使贊醴婦於寢之戶牖之間。今舅姑没者，

使老醴婦於廟之房中，其禮則同，使老及處所則別也。○

注「因於廟見禮之」○釋曰：象舅姑生時，因見禮之，故此

亦因廟見禮之也。**壻饗婦送者丈夫、婦人，如舅**

**姑饗禮。****疏**釋曰：舅姑存，舅姑自饗送者，如上文。

今舅姑没，故壻兼饗丈夫、婦人，如舅姑饗禮，并有贈錦

之等。

記。士昏禮，凡行事，必用昏昕，受諸

禰廟。辭無不腆，無辱。用昕，使者。用昏，壻也。

腆，善也。賓不稱幣不善，主人不謝來辱。**疏**「記士昏

至「無辱」○釋曰：凡言「記」者，皆經不備者也。○注「用

昕」至「來辱」○釋曰：云「用昕，使者」，謂男氏使向女家納

采，問名、納吉、納徵、請期五者，皆用昕。昕即明之始，君

子舉事尚早，故用朝旦也。云「用昏，壻也」者，謂親迎時

也。知「辭無不腆」者，《郊特牲》云：「告之以直信。信，事

人也。信，婦德也。」注云：「此二者，所以教婦正直信也。」

是賓納徵之時，不得謙虛爲辭也。云「主人不謝來辱」者，

此亦是不爲謙虛，教女正直之義也。**摯不用死，皮帛**

**必可制。**摯，鴈也。皮帛，儷皮、束帛也。**疏**釋曰：云

「摯不用死」者，凡摯亦有用死者，是以《尚書》元缺起卷首止

此。云「三帛，二牲」，<sup>②</sup>一死摯，即士摯雉。今此亦是士

禮，恐用死鴈，故云「不用死」也。云「皮帛必可制」者，可

制，恐用死鴈，故云「不用死」也。云「皮帛必可制」者，可

<sup>①</sup>「告」原作「吉」，據阮本改。

<sup>②</sup>「牲」，阮校云：毛本作「生」。

制爲衣物，此亦是教婦以誠信之義也。腊必用鮮，魚用鮓，必殽全。<sup>①</sup>殽全者。不餒敗，<sup>②</sup>不剥傷。

**疏**

「腊必」至「殽全」○注「殽全」至「剥傷」○釋曰：腊用鮮者，義取夫婦日新之義。云「魚用鮓」者，義取夫婦相依附者也。云「殽必全」者，義取夫婦全節無虧之理。此並據同牢時也。女子許嫁，笄而禮之，稱字。許嫁，已受納徵禮也。笄女之禮猶冠男也，使主婦女賓執其禮。

**疏**「女子」至「稱字」○釋曰：女子許嫁，謂年十五已上至十九已下。案《曲禮》：「女子許嫁，纓。」有笄兼有纓，示有繫屬。此不言纓，文不具也。云「禮之，稱字」者，猶男子冠禮之稱字同。<sup>③</sup>是以《禮記·喪服小記》云：「丈夫冠而不爲殤，婦人笄而不爲殤。」是其義同也。○注「許嫁」至

「其禮」<sup>④</sup>○釋曰：知「許嫁，已受納徵禮也」者，以納采、問名、納吉三禮雖使者往來，未成交親，故《曲禮》云：「非受幣，不交不親。」鄭據納徵，唯未行請期、親迎也，二者要待女二十爲之。云「笄女之禮猶冠男也，使主婦女賓執其禮」者，案《雜記》云：「女雖未許嫁，年二十而笄，禮之，婦人執其禮。」鄭注云：「言婦人執其禮，明非許嫁之笄。」彼以非許嫁笄輕，故無主婦女賓，使婦人而已。明許嫁笄當

使主婦對女賓執其禮，其儀如冠男也。又許嫁者用醴禮之，不許嫁者當用酒醺之，敬其早得禮也。祖庙未毀，

教于公宮，三月。若祖廟已毀，則教于宗

室。祖庙，女高祖爲君者之庙也，以有總麻之親。就尊

者之宮，教以婦德、婦言、婦容、婦功。宗室，大宗之家。

**疏**「祖庙」至「宗室」○注「祖庙」至「之家」○釋曰：此謂諸

侯同族之女將嫁之前教成之法。經直云「祖廟」，鄭知「女

高祖爲君者之廟也，以有總麻之親」者，以其諸侯立五廟，

大祖之廟不毀，親廟四以次毀之。經云「未毀」與「已毀」，

是據高祖之廟而言，故云「祖廟，女高祖爲君者之廟也」。

共承高祖，是四世總麻之親。若三世共曾祖，曾祖，小功

之親。若共祖，大功之親。若共禰廟，是齊衰之親。則皆

教于公宮。今直言「總麻」者，舉最疏而言，親者自然教于

公宮可知也。云「教以婦德、婦言、婦容、婦功」者，《昏義》

①「必」字原誤重，據重刊嚴州本刪。

②「餒」，阮校云：毛本作「餒」。

③「子」原本作「于」，據重刊單疏本改。

④「禮」原作「禮」，據重刊單疏本改。

文，鄭彼注云：「婦德，貞順也。婦言，辭令也。婦容，婉婉也。婦功，絲麻也。」云「宗室，大宗之家」者，案《喪服小記》「繼別爲宗」，謂別子之世適長子，族人來宗事之者。謂之宗者，收族者也。高祖之廟既毀，與君絕服者則皆於大宗之家教之。又小宗有四，或繼祖，或繼禰，或繼曾祖，或繼高祖，此等至五代皆遷，不就之教者，小宗卑故也。

問名，主人受鴈，還，西面對。賓受命，乃降。受鴈于兩楹間，南面，還于阼階上，對賓以女名。

**疏**「問名」至「乃降」○注「受鴈」至「女名」○釋曰：此亦記經不具者。案經直云「問名，如納采之禮」，納采禮中無主人西面對事，故記之也。知「受鴈於兩楹間，南面」者，納采時「賓當阿東面致命，主人阼階上北面再拜」，又云「授于楹間南面」。問名如納采之禮，故亦楹間南面授鴈，於彼唯不云「西面」，<sup>①</sup>故記之也。云「還于阼階上」，<sup>②</sup>對賓以女名」者，此即西面對，與拜時北面異處也。祭醴，始扱壹祭，又扱再祭。賓右取脯，左奉之，乃歸，執以反命。反命，謂使者問名、納吉、納徵、請期，還報於壻父。

**疏**「祭醴」至「反命」○釋曰：云「祭醴」者，

謂贊醴婦之時，禮成於三，其爲三祭之時，始祭醴云初，故始扱壹祭，後祭醴又扱爲再祭也。<sup>③</sup>云「賓右取脯，左奉之，乃歸」者，經直云「降筵北面坐取脯」，不言用左右手，故記之也。云「右取脯，左奉之」者，謂先用右手取得脯，乃用左手兼奉之以降，授從者於西階下，乃歸，執以反命。

○注「反命」至「壻父」○釋曰：知反命是此問名、納吉、納徵、請期者，以下云「凡使者歸，反命曰『某既得將事矣，敢以禮告』」。言「凡」非一，則知四者皆有反命也。以納采與問名同使，親迎又無使者，故據此四者而言也。納

徵，執皮，攝之，內文，兼執足，左首。隨人，西上，參分庭一在南。攝猶辟也。兼執足者，左手執前兩足，右手執後兩足。左首，象生。《曲禮》曰：「執禽者左首。」隨人，爲門中阨狹。西上，中庭位併。

**疏**「納

①「面」下，曹校云疑脫「對」字。

②「于」原本作「子」，據重刊單疏本改。

③「始祭醴」至「再祭也」，阮校云：毛本作「始祭禮之初故云始扱一祭及又扱則分爲兩故云又扱再祭是爲三也」。曹校云：「醴」云「當從今本作「禮之」，「又扱」下當從今本增「分」字。

徵「至」在南」○釋曰：案經直云「納徵，玄纁束帛、儷皮，如納吉禮」，則授幣得如授鴈之禮，至於庭實之皮，無可相如，故記之。○注「攝猶」至「位併」○釋曰：執皮者相隨而入，至庭北面，皆以西爲左，一手執兩足，毛在內，故云「內文」。云「左首，象生」者，案《聘禮》執皮者皆左首，此亦執皮而左首，故云「象生」。與執禽者同，故引《曲禮》「執禽者左首」爲證。必象生者，取婦人生息之義。云「隨入，爲門中阨狹」者，皮皆橫執之。案《匠人》云：「廟門容大扃七个。」注云：「大扃，牛鼎之扃，長三尺，<sup>①</sup>每扃爲一個，七个二丈一尺。」彼天子廟門。此士之廟門，降殺，甚小，故云「門中阨狹」，故隨入得並也。<sup>②</sup>云「西上，中庭位併」者，俱北面西上也。賓致命。釋外足，見文。主人受幣。士受皮者自東出于後，自左受，遂坐攝皮，逆退，適東壁。賓致命，主人受幣，庭實所用爲節。士，謂若中士、下士不命者，以主人爲官長。自，由也。疏「賓致」至「東壁」○釋曰：此亦爲經不見主人之士受皮之事，故記之也。云「釋外足」者，據人北面以足向上執之，足遠身爲外，受之則文見，<sup>③</sup>故釋外足見文也。云「士受皮」者，取皮自東方。「出于後」者，謂自東方出於執

皮者之後，至於左，北面受之，故云「自左受」也。云「逆退」者，二人相隨，自東而西，今以後者先向東行，故云「逆退」也。○注「賓致」至「由也」○釋曰：云「賓致命，主人受幣，庭實所用爲節」者，以其上經納徵授幣如納吉之禮，其目已具。今言之者，爲執皮者釋外足見文，及士受皮時節不見，故云賓堂上致命時，庭中執皮者釋外足見文；主人堂上受幣時，主人之士於堂下受取皮，是其庭實所用爲節也。云「士，謂若中士、下士不命者」，但諸侯之士，國皆二十七人。依《周禮·典命》侯伯之士一命，子男之士不命。命與不命，國皆分爲三等：上九，中九，下九。案《周禮》三百六十官皆有官長，其下皆有屬官。但天子之士，上士三命，中士再命，下士一命，與諸侯之士異。若諸侯上、中、下士同命。今言士，謂若中士、下士不命者，據上士爲官長者。若主人是中士，則士是下士。若主人是下士，則士是不命之士、府史之等。此不命與子男之士不命者別，彼雖不得君簡策之命，仍得人君口命爲士。此則不得君命，

①「尺」原作「人」，據重刊單疏本改。

②「得」上，曹校云脫「不」字。

③「受」，阮校云：毛本作「釋」。

是官長自辟除者也。案《既夕》宰舉幣是士之府史，則庭實胥徒爲之。云「自，由也」者，謂由執皮者之左受之也。

父體女而俟迎者，母南面于房外。女既次，純

衣，父體之于房中，南面，蓋母薦焉，重昏禮也。女奠爵于

薦東，立于位而俟壻。①壻至，父出，使擯者請事。母出

南面房外，示親授壻，且當戒女也。**疏**「父體」至「房外」

○注「女既」至「女也」○釋曰：此亦前經不具，故記之。云

「女既次，純衣，父體之于房中，南面」者，見於上文。云

「蓋母薦焉」者，舅姑共饗婦，姑薦脯醢，故知父母體女亦

母薦脯醢，重昏禮，故母薦也。云「女奠爵于薦東，立于位

而俟壻」者，案《士冠》禮子與醢子及此篇禮賓，禮婦皆奠

爵于薦東，明此亦奠薦東也。云「壻至，父出，使擯者請

事」者，見於上文。云「母出南面房外，示親授壻，且當戒

女也」者，並參下文而言也。女出于母左，父西面

戒之，必有正焉，若衣若笄。母戒諸西階

上，不降。必有正焉者，以託戒使不忘。**疏**「女出」至

「不降」○釋曰：此記亦經不具。以母出房戶之西南面，女

出房西行，故云「出于母左」。父在阼階上，西面，故因而

戒之。云「母戒諸西階上」者，母初立房西，女出房，母行

至西階上，乃戒之也。○注「必有」至「不忘」○釋曰：云

「託戒使不忘」者，謂託衣笄恒在身而不忘，持戒亦然，故

戒使不忘也。②下文父母及庶母重行戒者，③並與此文相

續成也。此士禮，父母不降送。案桓公三年經書：「九月，

齊侯送姜氏于謹。《穀梁傳》曰：「禮，送女，父不下堂，母

不出祭門。」祭門則廟門，言不出廟門，則似得下堂者，彼

諸侯禮，與此異。以其大夫、諸侯、天子各有昏禮，故不同

也。婦乘以几。從者二人坐持几，相對。持

几者，重慎之。**疏**「婦乘以几」○注「持几者重慎之」○釋

曰：上經雖云「婦乘以几」，不見從者二人持之，故記之也。

此几謂將上車時而登，若王后則履石，大夫、諸侯亦應有

物履之，但無文以言。今人猶用臺，是石几之類也。④

婦入寢門，贊者徹尊罍，酌玄酒，三屬于尊，

棄餘水于堂下階間，加勺。屬，注也。玄酒，澆水

①「俟」原本作「俟」，據重刊嚴州本改。

②「戒」上，曹校云似脫「託」字。

③「行」，單疏、毛本俱作「云」。

④「石几」，阮校引段玉裁云：「石几」爲「几石」之誤。

貴新，昏禮又貴新，故事至乃取之，三注于尊中。

**疏**「婦

人」至「加勺」○釋曰：經中唯置酒尊，不見徹冪以下事，故記之。○注「屬注」至「尊中」○釋曰：經云「酌玄酒，三注於尊」，謂於外器中酌取此澆水，三度注於玄酒尊中，禮成於三，故三注之也。云「玄酒，澆水貴新」者，案《郊特牲》云「明水澆齊，貴新也」，又云「凡澆，新之也」，是禮有貴新也。今昏禮事至乃取之，故云貴新也。<sup>①</sup>若然，禮有玄酒、澆水、明水三者，各逐事物生名。玄酒據色而言，澆水據新取為號，其實一也。以上古無酒，用水為酒，後代雖有酒，用之配尊，不忘本故也。明水者，案《周禮·秋官·司烜氏》云：「以陰鑒取明水於月。」《郊特牲》云「其謂之明水也，由主人之絜著此水也」，注云：「著猶成也。言主人齊絜，此水乃成可得也。」配尊之酒，三酒加玄酒，鬱鬯與五齊皆用明水配之。《郊特牲》云「五齊加明水，三酒加玄酒」，不言鬱鬯者，記人文略也。相對，玄酒與明水別；通而言之，明水亦名玄酒。故《禮運》云「玄酒在室」，彼配鬱鬯五齊，是明水名為玄酒也。以其俱是水，故通言水也。若天子、諸侯祭祀，得鬱鬯與五齊、三酒並用。卿大夫、士祭直用三酒與玄酒，無五齊與鬱鬯。又明水若生人相禮

不忘本，亦得用，以其用醴，醴則五齊之中醴齊之類也。

筭，緇被纁裏，加于橋。舅荅拜，宰徹筭。

被，表也。筭有衣者，<sup>②</sup>婦見舅姑，以飾為敬。橋，所以庥筭，其制未聞。今文「橋」為「鎬」。

**疏**「筭緇」至「徹筭」○

釋曰：上經雖云筭，不言表裏加飾之事，故記之也。婦

席薦饌于房。醴婦、饗婦之席薦也。

**疏**「婦席薦饌于

房」○注「醴婦」至「薦也」○釋曰：此亦於經不見，故記之。

但醴婦時唯席與薦，無俎，其饗婦非直有席薦，并有俎。

俎則不饌于房，從鼎升于俎，人設于席前。今據醴婦時同

有席與薦饌于房中者而言也。饗婦，姑薦焉。舅姑

共饗婦，舅獻爵，姑薦脯醢。

**疏**「饗婦姑薦焉」○釋曰：經

直言「舅姑共饗婦以一獻之禮」，時同自明，不言姑薦，故

記之也。婦洗在北堂，直室東隅，筐在東，北

面盥。洗在北堂，所謂北洗。北堂，房中半以北。洗南

北直室東隅，東西直房戶與隅間。

**疏**「婦洗」至「面盥」○

<sup>①</sup>「云」下，曹校云似脫「又」字。

<sup>②</sup>「衣」，阮校云：「聶氏作「表」。」

釋曰：經唯言「北洗」，不言洗處及筐，故記之也。○注「洗在」至「隅閒」○釋曰：房與室相連爲之，房無北壁，故得北堂之名，故云「洗在北堂」也。云「所謂北洗」者，所謂經中北洗也。<sup>①</sup>云「北堂，房半以北」者，<sup>②</sup>以其南堂是戶外，半以南得堂名，則堂是戶外之稱，<sup>③</sup>則知此房半以北得堂名也。知房無北戶者，見上文云尊于房戶之東，房有南戶矣。《燕禮》、《大射》皆云羞膳者升自北階，立于房中。不言入房，是無北壁而無戶，是以得設洗直室東隅也。云「洗南北直室東隅」者，是南北節也。云「東西直房戶與隅閒」者，是東西節也。婦酢舅，更爵，自薦。更爵，男女不相因也。疏「婦酢舅更爵自薦」○釋曰：謂舅姑饗婦時舅獻姑薦。<sup>④</sup>今婦酢舅，婦自薦之，嫌別人薦，故記之也。不敢辭洗，舅降則辟于房，不敢拜洗。不敢與尊者爲禮。疏「不敢」至「拜洗」○釋曰：此事當在婦酢舅之上，退之在下者，欲見酬酒洗時亦不辭故也。此對《士冠》、《鄉飲酒》之等主與賓爲禮皆辭洗，此則不敢也。此事於經不見，故記之也。凡婦人相饗，無降。姑饗婦人送者于房，無降者，以北洗筐在上。疏「凡婦人相饗無降」○注「姑饗」至「在上」○釋曰：本設北洗，爲婦

人，有事不下堂。今以北洗及筐在上，故不降。經不言，故記之也。言「凡」者，欲見舅姑共饗婦及姑饗婦人送者皆然，故言凡也。婦人三月，然後祭行。人夫之室三月之後，於祭乃行，謂助祭也。疏「婦人」至「祭行」○注「人夫」至「祭也」○釋曰：此據舅在無姑，或舅沒姑老者。若舅在無姑，三月不須廟見，則助祭。案《內則》云「舅沒則姑老」者，謂姑六十亦傳家事，任長婦。婦人三月，廟見祭菜之後，亦得助夫祭，故鄭云「謂助祭也」。此亦謂適婦，其庶婦無此事。亦以經不見，故記之也。庶婦，則使人醯之，婦不饋。庶婦，庶子之婦也。使人醯之，不饗也。酒不酬酢曰醯，亦有脯醢。適婦酌之以醴，尊之；庶婦酌之以酒，卑之，其儀則同。不饋者，共養統於適也。疏「庶婦」至「不饋」○注「庶婦」至「適也」○釋曰：不

① 「所謂經中」，阮校云：毛本作「經中所謂」。  
② 「房」下，阮校云：《要義》有「中」字。  
③ 「之」上，曹校云：似脫「半以南」三字，即《士喪》注所謂「中以南謂之堂」也。  
④ 「時舅獻」，原作「獻時舅」，今據毛本改。



饗者，以適婦不醮而有饗，今使人醮之，以醮替饗，故「使人醮之，不饗也」。云「酒不酬酢曰醮者，亦如庶子醮然。知「亦有脯醢」者，以其饗婦及醮子皆有脯醢，故知亦有脯醢也。云「其儀則同」者，適婦用醴，於客位東面拜受醴，贊者北面拜送，今庶婦雖於房外之西，亦東面拜受，醮者亦北面拜送，故云「其儀則同」也。云「不饋者，共養統於適也」者，謂不盥饋特豚，以其共養統于適婦也。昏辭曰：「吾子有惠，貺室某也。」昏辭，擯者請事告之辭。吾子，謂女父也。稱有惠，明下達。貺，賜也。室猶妻也。子謂「公治長可妻也」。某，壻名。疏「昏辭」至「某也」○注「昏辭」至「壻名」○釋曰：鄭知昏辭是「擯者請事告之辭」者，以其言「吾子有惠，貺室某也」，是使告主人之辭，明知是擯者出門請事，使者告之辭也。知「吾子，謂女父」者，使人告擯者，稱前已有惠，貺其妻於壻某，申明是女父，乃得以女許人，故知吾子女父也。云「明下達」者，此擯者稱有惠貺室，即壻家舊已有辭下達女家，見許，今得言「貺室」也，故引上文「下達」以釋此也。引「子謂公治長可妻也」者，證以女許人稱貺室，室猶妻也。某有先人之禮，使某也請納采」。某，壻父名也。某

也，使名也。疏「某有」至「納采」○注「某壻」至「名也」○

釋曰：此亦是使者門外通連上語告擯者之辭也。以其使者稱向主人擯者，故知上某是壻父，下某是使者名也。

對曰：「某之子蠢愚，又弗能教。吾子命之，某不敢辭。」對曰者，擯出納賓之辭。某，女父名也。吾子，謂使者。今文「弗」為「不」，<sup>①</sup>無「能」字。疏

「對曰」至「敢辭」○注「對曰」至「能字」○釋曰：鄭知「對曰者，擯出納賓之辭」者，以其上文賓告擯者辭，下經致命主人，明此是中間擯者出領賓告者辭。<sup>②</sup>下經致語人告主人，<sup>③</sup>擯者又領主人此語，以告使者知也。致命，曰：

「敢納采。」問名，曰：「某既受命，將加諸卜，敢請女為誰氏？」某，使者名也。誰氏者，謙也，不必其主人之女。疏「致命曰敢納采」○釋曰：此使者升堂致命於主人辭。若然，亦當有主人對辭，如納徵致

①「今」，阮校云：毛本作「古」。

②「擯者出領賓告者辭」，曹校云當為「擯者出納賓告之辭」。

③「致語」，曹校云當為「出請」。

命主人對辭，不言之者，文不具也。問名，賓在門外請問名，主人許。無辭者，納采、問名同使，前已相親，於納采許昏訖，故於問名略，不言主人所傳辭也，是以於此直見賓升堂致命主人之辭也。自此已下有納吉、納徵、請期之等，皆有門外賓與摯者傳辭，及升堂致命，主人對，或理有不須而言，<sup>①</sup>或理須辭而文不具，以情商度，義可皆知也。

○注「某使」至「之女」○釋曰：知「某，使者名也」者，以使者對主人稱「某既受命」，明是使者之名也。云「誰氏者，謙也」者，以其下達乃納采，則知女之姓矣，今乃更問主人女為誰氏者，恐非主人之女，假外人之女收養之，是謙，不敢必其主人之女也。其本云問名，而云誰氏者，婦人不以名行，明本不問女之三月名，此名即姓號之名。若《尚書》孔注云：「虞氏，舜名。」舜為謚號，猶為名解之，明氏姓亦得為名。若然，本問名上氏姓，故云誰氏也。對曰：

「吾子有命，且以備數而擇之，某不敢辭。」卒曰某氏，不記之者，明為主人之女。

**疏**

「對曰」至「敢辭」

○釋曰：云「吾子有命」者，正謂行納采、問名，使者將命來，是已有命來擇，即是「且以備數而擇之」也。○注「卒曰」至「之女」○釋曰：云「卒曰某氏」者，主人終卒對客之

辭，當云某氏對使也。云「不記之者，明為主人之女」者，若是他女，當稱女氏以答。今不言之者，明是主人之女。容舊知之，故不對，是以云「明為主人之女」也。禮，

曰：「子為事故，至於某之室。某有先人之禮，請體從者。」言從者，謙不敢斥也。今文「於」為

「于」。對曰：「某既得將事矣，敢辭。」將，行。

「先人之禮，敢固以請。」主人辭。固，如故。「某辭不得命，敢不從也」。賓辭也。不得命者，不得

許己之命。納吉，曰：「吾子有貺命，某加諸

卜，占曰吉，使某也敢告。」貺，賜也。賜命，謂許

以女名也。某，壻父名。**疏**注「貺賜」至「父名」○釋曰：

知某是壻父名者，以其云「命某加諸卜」，是壻父卜，故知某是壻父名。對曰：「某之子不教，唯恐弗堪。」

子有吉，我與在，某不敢辭。」與猶兼也。古文

「與」為「豫」。**疏**「對曰」至「敢辭」○注「與猶兼也」○釋

①「而」，曹校云此字衍。

曰：「云『我與在』，以其夫婦一體，夫既得吉，婦吉可知，故云我兼在名吉中也。」<sup>①</sup>納徵，曰：「吾子有嘉命，

貺室某也。某有先人之禮，儷皮束帛，使某也請納徵。」致命，曰：「某敢納徵。」對曰：

「吾子順先典，貺某重禮，某不敢辭，敢不承命。」典，常也，法也。<sup>疏</sup>「納徵」至「承命」○釋曰：「吾

子有命」以下至「請納徵」，是門外向擯者辭也。云「致命，

曰：『某敢納徵』者，是所升堂致命辭也。云「對曰」者，是

堂上主人對辭也。請期，曰：「吾子有賜命，某

既申受命矣。惟是三族之不虞，使某也請

吉日。」三族，謂父昆弟、己昆弟、子昆弟。虞，度也。不

億度，謂卒有死喪，此三族者，己及子皆為服期，期服則踰年，欲及今之吉也。《雜記》曰：「大功之末，可以冠子、嫁

子。」<sup>疏</sup>「請期」至「吉日」○釋曰：云「某既申受命矣」者，

申，重也，謂前納采已後，每度重受主人之命也。云「惟是

三族之不虞，使某也請吉日」者，今將成昏，須及吉時，但

吉凶不相干，若值凶，不得行吉禮，故云惟是三族死生不可億度之事，若值死時，則不得娶，及今吉時，使某請吉日

以成昏禮也。○注「三族」至「嫁子」○釋曰：鄭知三族是

父、己、子三者之昆弟者，若大功之喪，服內不廢成禮，若期親內則廢，故舉合廢者而言。以其父昆弟則伯叔及伯叔母，己昆弟則己之親兄弟，子昆弟則己之適子、庶子者，皆己之齊衰期服之內親，故三族據三者之昆弟也。引《雜

記》者，見大功小功之末，既葬則可以嫁子、娶妻，經曰三族，不據之矣。今據父之昆弟期，於子小功，不得與子娶妻。若於子期，於父小功，亦不得娶妻。知今皆據壻之父

而言。若然，己父昆弟於子為小功，而言此三族者，己與子皆為服期者，亦據大判而言耳。對曰：「某既前受

命矣，唯命是聽。」前受命者，申前事也。曰：「某

命某聽命于吾子。」曰某，壻父名也。對曰：「某

固唯命是聽。」使者曰：「某使某受命，吾子

不許，某敢不告期。」曰某日。某，吉日之甲乙。

<sup>疏</sup>注「某吉日之甲乙」○釋曰：云「曰某日」者，是使者付主人吉日之辭。<sup>②</sup>云「某，吉日之甲乙」者，謂以十日配十

①「名」，阮本作「占」，《通解》無，曹校云此字衍。

②「付」，阮校云毛本作「傳」。

二辰，若云甲子、乙丑、丙寅、丁卯之類。故鄭略舉甲乙而言之也。對曰：「某敢不敬須。」須，待。凡使者

歸，反命，曰：「某既得將事矣，敢以禮告。」

告禮，所執脯。<sup>①</sup>**疏**注「告禮所執脯」○釋曰：知禮是所

執脯者，上文禮賓，賓皆北面取脯，降授從者。今此云歸

以反命，故知禮是所執脯也。主人曰：「聞命矣。」

父醯子，子，壻。**疏**「父醯子」○釋曰：女父禮女用醴，

又在廟。父醯子用酒，又在寢。不同者，父禮女者，以先

祖遺體許人，以適他族，婦人外成，故重之而用醴，復在廟

告先祖也。男子直取婦入室，無不反之，故輕之而用酒，

在寢。知醯子亦不在廟者，若在廟，以禮筵於戶西，右几，

布神位，今不言，故在寢可知也。命之，曰：「往迎

爾相，承我宗事。」相，助也。宗事，宗廟之事。勗

帥以敬先妣之嗣，若則有常。」勗，勉也。若猶女

也。勉帥婦道，<sup>②</sup>以敬其為先妣之嗣。女之行則當有常，

深戒之。《詩》云：「大姒嗣徽音。」**疏**「勗帥至有常」○

注「勗帥至有常」○釋曰：云「以敬其為先妣之嗣」者，謂

婦人入室，使之代姑祭也。《詩》云：「大姒嗣徽音」者，

《大雅·文王》詩。大姒者，文王妃。嗣，繼。徽，美也。

娶大姒，明以繼先妣美音也。引之者，證敬其為先妣之嗣

也。子曰：「諾。唯恐弗堪，不敢忘命。」賓

至，擯者請，對曰：「吾子命某，以茲初昏，

使某將，請承命。」賓，壻也。命某，某，壻父名。茲，

此也。將，行也。使某行昏禮來迎。**疏**「賓至至承命」

○注「賓壻至來迎」○釋曰：云「命某，某，壻父名」者，以

其經有二某，「命某」者，是壻自稱之，<sup>③</sup>以對擯者也。經

云「使某」者，<sup>④</sup>是壻名，故不言也。對曰：「某固敬

具以須。」父送女，命之，曰：「戒之敬之，夙

夜毋違命。」夙，早也，早起夜卧。命，舅姑之教命。古

文「毋」為「無」。**疏**「父送至違命」○釋曰：上送女之

時，父母俱戒訖，今此記人又云此戒者，當同是送女時，并

<sup>①</sup>「告」，阮校云：《通典》無「告」字。玩疏意，似亦無

「告」字。

<sup>②</sup>「婦道」，阮校引張淳云當作「道婦」。

<sup>③</sup>「之」，曹校云各本作「父」是。

<sup>④</sup>「經」，曹校云當為「繼」。

有此戒，續成前語。<sup>①</sup>庶母所戒亦然。以前後語時不同，故記人兩處記之。但父戒之，使無違舅命；母戒之，使無違姑命，故父云「命」，母云「戒」也。然若此注有云「命舅姑之教命」，<sup>②</sup>有「姑」字者，傳寫誤也。云「古文毋爲無」，不從者，以許氏《說文》毋爲禁辭，故從經今文毋爲正也。母施衿結帨，曰：「勉之敬之，夙夜無違宮事。」帨，佩巾。**疏**「宮事」○釋曰：則姑命婦之事，若

《內宰職》云后教六宮，婦人稱宮故也。庶母及門內，

施鞶，申之以父母之命。命之曰：「敬恭聽，宗爾父母之言。夙夜無愆，視諸衿鞶。」

庶母，父之妾也。鞶，鞶囊也。男鞶革，女鞶絲，所以盛帨巾之屬，爲謹敬。申，重也。宗，尊也。愆，過也。諸，之也。示之以衿鞶者，皆託戒使識之也。不示之以衣笄者，尊者之戒，不嫌忘之。視乃正字，今文作「示」，俗誤行之。

**疏**「庶母」至「衿鞶」○注「庶母」至「行之」○釋曰：云「男

鞶革，女鞶絲」者，《內則》文。男女用物不同，故并引男子鞶革，於經無所當也。云「所以盛帨巾之屬，爲謹敬」者，案《內則》云：「箴、管、線、纁，施鞶表。」鄭云：「鞶表言施，明爲箴、管、線、纁有之。」是鞶以盛帨巾之屬。此物所以

供事舅姑，故云謹敬也。云「不示之以衣笄者，尊者之戒，不嫌忘之」者，前文父戒以衣笄，此經母施衿結帨，庶母直示之以衿鞶，不示以衣笄，故鄭決之也。云「視乃正字，今文作示，俗誤行之」者，案《曲禮》云：「童子常視毋誑。」注云：「視，今之示字。」彼注破視從示，此注以視爲正字，以示爲俗誤，不同者，但古文字少，故眼目視瞻，<sup>③</sup>與以物示人，皆作視字，故此注云視乃正字。今文作示，是俗人以今示解古視，故云誤也。彼注云「視今之示字」者，以今曉古，故舉今文示而言，兩注相兼乃具也。壻授綬，姆辭曰：「未教，不足與爲禮也。」姆，教人者。宗子無父，母命之。親皆沒，己躬命之。宗子者，適長子也。命之，命使者。母命之，在《春秋》「紀裂繻來逆女」是也。躬猶親也，親命之，則「宋公使公孫壽來納幣」是也。言宗子無父，是有父者，<sup>④</sup>禮七十老而傳，八十齊喪之事不及。若是者，子代其父爲宗子，其取也，父命

① 「語」，阮校云：毛本作「文」。

② 「然若」，阮校云：毛本作「若然」。

③ 「目」原作「日」，據重刊單疏本改。

④ 「有」，阮校云：毛本「有」下重出「有」字，《集釋》脫。

之。**疏**「宗子」至「命之」○注「宗子」至「命之」○釋曰：云「宗子者，適長子也」者，案《喪服小記》云：「繼別宗，<sup>①</sup>繼禰者爲小宗。」大宗、小宗皆是適妻所生長子也。云「命之，命使者」者，謂納采已下至請期五者，皆命使者也。云「母命之，在《春秋》」紀裂繻來逆女」是也」者，案隱二年經書：「秋九月，紀裂繻來逆女。」《公羊傳》曰：「裂繻者何？紀大夫也。何以不稱使？昏禮不稱主人。」何休云：「爲養廉遠恥也。」又云：「然則曷稱？稱諸父兄師友。宋公使公孫壽來納幣，則其稱主人何？辭窮也。辭窮者何？無母也。」休注云：「禮，有母，母當命諸父兄師友，稱諸父兄師友以行。宋公無母，莫使命之，辭窮，故自命之。自命之，則不得不稱使。」又云：「然則紀有母乎？曰有。有則何以不稱母？母不通也。」休注云：「禮，婦人無外事，但得命諸父兄師友，稱諸父兄師友以行耳。母命不得達，故不得稱母通使文，所以遠別也。」服注亦云：「不稱主人，母命不通，故稱使。」<sup>②</sup>婦人無外事。」若然，直命使子之父兄師友，<sup>③</sup>使命使者，不自親命使者。此注云「命之，命使者」，似母親命者，鄭略言之，其實使子父兄師友命使者也。云「躬，猶親也，親命之，則『宋公使公孫壽來納幣』是也」者，成八年文。義取《公羊傳》，如向說舉納幣，其餘使

親命之也。<sup>④</sup>云「言宗子無父」至「不及」者，案《曲禮》：「七十曰老而傳。」注云：「傳家事在子孫，<sup>⑤</sup>是謂宗子之父。」又《王制》云：「八十齊喪之事弗及也。」<sup>⑥</sup>注云：「八十不齊，則不祭也。子代之祭，是謂宗子不孤。」二者皆是宗子有父，雖主家事，其昏事則父命使者也。支子，則稱其宗。支子，庶昆弟也。稱其宗子命使者。**疏**「支

子則稱其宗」○釋曰：云「稱其宗」者，謂命使者，當稱宗子以命之，以大、小宗皆然也。弟，稱其兄。<sup>⑦</sup>弟，宗子之母弟。**疏**「弟則稱其兄」○注「弟宗子之母弟」○釋曰：

知此弟是宗子同母弟者，以上支子謂庶昆弟，稱其宗子命使者，故知此弟宗子同母弟也。若不親迎，則婦人

三月然後壻見，曰：「某以得爲外昏姻，請

- ①「別」下，阮校云：《要義》、毛本有「爲」字。
- ②「稱」上，曹校云脫「不」字。
- ③「使」，曹校云此字衍。
- ④「使」，曹校云或「自」之誤。
- ⑤「在」，阮校引浦鏜云：「在」爲「任」之譌。
- ⑥「喪」原作「衰」，今據重刊單疏本改。
- ⑦「弟」下，阮校云：《通解》、楊氏有「則」字。

覲。」女氏稱昏，壻氏稱姻。覲，見。<sup>①</sup>疏「若不」至「請

覲」○釋曰：上已言親迎，自此已下至篇末，論壻不親迎，過三月及壻往見婦父母事也。<sup>②</sup>必亦待三月者，亦如三月婦廟見，一時天氣變，婦道成，故見外舅姑。自此至「敢不從」，並是壻在婦家大門外與摯者請對之辭。○注「女氏」至「覲見」○釋曰：「女氏稱昏，壻氏稱姻」者，《爾雅·釋親》文。所以別男女，則男曰昏，女曰姻者，義取壻昏時往娶，女則因之而來。及其親，則女氏稱昏，男氏稱姻，義取送女者昏時往男家，因得見之故也。主人對曰：

「某以得爲外昏姻之數，某之子未得濯漑於祭祀，是以未敢見。今吾子辱，請吾子之就宮，某將走見。」主人，女父也。以白造緇曰辱。疏

「主人」至「走見」○釋曰：云「某之子未得濯漑於祭祀」者，前祭之夕濯漑祭器，以其自此以前未廟見，未得祭祀，故未敢相見也。云「請吾子之就宮」者，使壻還就家，是欲往就見也。○注「主人」至「曰辱」○釋曰：云「以白造緇曰辱」者，謂以絜白之物造置於緇色器中，<sup>③</sup>是汙白色。猶今賓至己門，亦是屈辱，故云「以白造緇曰辱」也。對

曰：「某以非他故，不足以辱命，請終賜見。」非他故，彌親之辭。命，謂將走見之言。今文無「終賜」。疏「對曰」至「賜見」○注「非他」至「終賜」○釋曰：

此壻對摯者辭。云「非他故，彌親之辭」者，上摯云「得爲外昏姻」，是相親之辭，今又云「非他故」，是爲壻而來見，彌相親之辭也。對曰：「某得以爲昏姻之故，<sup>④</sup>不敢固辭，敢不從。」不言外，亦彌親之辭。古文曰「外昏姻」。主人出門左，西面。壻入門，東面。奠摯，再拜，出。出門，出內門。入門，入大門。出內門不出大門者，異於賓客也。壻見於寢。奠摯者，壻有子道，不敢授也。摯，雉也。疏「主人」至「拜出」○注「出門」至「雉也」○釋曰：云「出內門」、「入大門」者，以大

夫，士迎賓皆於大門外，故此決之也。云「壻見於寢」者，

①「見」下，阮校云：嚴州本、徐本皆有「也」字。

②「及壻」，曹校云當爲「壻乃」。

③「置」阮校云：《要義》作「之」。

④「得以」，阮校云：《集釋》、毛本作「以得」。

《聘禮》凡見賓客及上親迎皆於廟者，<sup>①</sup>聘禮敬賓客，故在廟。親迎在廟者，以先祖之遺體許人，故在廟。此壻見外舅姑，非賓，非親迎，故知在適寢也。云「奠摯者，壻有子道，不敢授也」者，凡執摯相見，皆親授受，此獨奠之，象父子之道質，故不親授，奠之而已。云「摯，雉也」者，以其士執雉，是其常也。摯者以摯出，請受。欲使以賓客

禮相見。**疏**「摯者以摯出請受」○注「欲使」至「相見」○

釋曰：案《聘禮》賓執摯入門右，從臣禮，<sup>②</sup>辭之乃出，由門左西進，北面從賓客禮。此亦然，故知所「請受」者，請退從賓客相見受之。壻禮辭，許，受摯，入。主人

再拜受，壻再拜送，出。出，已見女父。**疏**「壻禮」

至「送出」○注「出已見女父」○釋曰：云「受摯，入」者，亦如《聘禮》受摯乃更西人也。云「出，已見女父」者，以其相見訖，擬出，更與主婦相見也。見主婦，主婦

闔扉，立于其內。主婦，主人之婦也。見主婦者，

兄弟之道，宜相親也。闔扉者，婦人無外事。扉，左扉。

**疏**「見主」至「其內」○注「主婦」至「左扉」○釋曰：云

「見主婦者，兄弟之道，宜相親也」者，《爾雅》「母與妻之

黨為兄弟」，故知主婦於壻者，兄弟之道也，故云「宜相親也」。云「闔扉者，婦人無外事」者，婦人送迎不出門，見

弟不踰闔，<sup>③</sup>是無外事也。云「扉，左扉」者，《士喪禮》卜

葬云：「闔東扉，主婦立于其內。」既言東扉，即是左扉，

故知是左扉也。壻立于門外，東面。主婦一

拜，壻荅再拜，主婦又拜。壻出。必先一拜

者，婦人於丈夫必俠拜。主人請醴，及揖讓入，

醴以一獻之禮。主婦薦，奠酬，無幣。及，

與也。無幣，異於賓客。**疏**「主人」至「無幣」○注「及

與」至「賓客」○釋曰：訓及為與者，以主人與壻揖讓而

入寢門，升堂醴壻，故訓及為與也。云「無幣，異於賓客」

者，上《冠禮》醴賓酬之以幣，《昏禮》饗賓酬以束錦，《燕

禮》《大射》酬賓客皆有幣，此無幣，故云「異於賓客」也。

①「上」，阮校云：毛本作「士」。

②「從」下，阮校云：毛本有「君」字，陳本空一字。

③「見」，阮校云：《要義》無，毛本「見」下有「兄」字。



壻出，主人送，再拜。

儀禮卷第二 經二千五百七十三 注三千六百三十

儀禮疏卷第六 元缺第一葉、第二葉，今補。

江寧府知府陽城張敦仁編校 元和縣

學生員顧廣圻覆校

## 儀禮疏卷第七 儀禮卷第三

唐朝散大夫行大學博士弘

文館學士臣賈公彥等撰

### 士相見禮第三疏「士相見禮第三」○鄭《目錄》云：

「士以職位相親，始承摯相見禮。」①《雜記》會葬禮曰：「相見也，反哭而退。朋友，虞祔而退。」士相見於五禮屬賓禮，大小戴及《別錄》皆第三。」○釋曰：鄭云「士以職位相親，始承摯相見」者，釋經亦有大夫及庶人見君之禮，亦士見大夫之法，獨以「士相見」爲名者，以其兩士職位不殊，同類昵近，故以「士相見」爲首。云「《雜記》『相見也』」，②反哭而退。朋友，虞祔而退」者，以送葬之禮，恩厚者退遲，恩薄者退疾。引之者，證有執摯相見之義也。云「士相見於五禮屬賓禮」者，案《周禮·大宗伯》五禮，賓禮之別有八：春朝、夏宗、秋覲、冬遇、時會、殷同，此六者是五等諸侯見天子，兼有自相朝覲之禮。③彼又云「時聘曰問，殷

覲曰視」，二者是諸侯使臣出聘天子及自相聘之禮，並執玉帛而行，無執禽摯之法。此屬直新升爲士大夫之等，同國執禽摯相見及見君之禮，雖非出聘，亦是賓主相見之法，故屬賓禮也。且士卑，唯得作介，從君與卿大夫出向他國，無身自聘問之事。案《周禮》行夫是士官，其有「美惡無禮」，特行無介，始得出向他邦，亦非聘問之法也。然昏、冠及喪、祭，尊卑各自有禮，及執摯相見，唯有此《士相見》。其篇內含卿大夫相見，以其新升爲士，或士自相見，或士往見卿大夫，或卿大夫下見士，或見己國君，或士大夫見他國君來朝者。新出仕從微至著，以士爲先後，更有功乃升爲大夫已上，故以士爲總號也。又天子之孤卿、大夫、士與諸侯之孤卿、大夫、士執摯既同，相見之禮亦無別也。

### 儀禮 鄭氏注

士相見之禮。摯，冬用雉，夏用牯。左

①「禮」上，阮校云：《釋文》有「之」字。

②「記」下，阮校云：毛本有「會葬禮曰」四字。

③「覲」，曹校云衍字。

頭奉之，曰：「某也願見，無由達。某子以命命某見。」摯，所執以至者。君子見於所尊敬，必執摯以將其厚意也。士摯用雉者，取其耿介，交有時，別有倫也。雉必用死者，為其不可生服也。夏用脰，備腐臭也。左頭，頭，陽也。無由達，言久無因緣以自達也。某子，今所因緣之姓名也。以命者，稱述主人之意。今文「頭」為「脰」。

**疏**

「士相見」至「某見」○釋曰：自此至「送

于門外再拜」，論士與士相見之事也。云「某也願見，無由達」者，謂新升為士，欲見舊為士者，謂久無紹介中間之人達彼此之意，雖願見，無由得與主人通達相見也。云「某子以命命某見」者，某子是紹介中間之人姓名，以主人之命命，某是賓之名，命某來見主人也。案《少儀》：「始見君子者，辭曰某固願聞名於將命者」，謂以卑見尊法。彼又云「敵者曰：某固願見於將命者」，此兩士相見，亦是敵者，不言「願見於將命者」者，此既言「願見，無由達」，見敵者始欲相見。案下文及還摯者皆云「於將命者」，<sup>①</sup>明此亦有「願見於將命者」，不言者，文不具也。○注「摯所」至「為脰」○釋曰：云「摯，所執以至者」，摯得訓為至。升為士者，<sup>②</sup>元缺一字。彼人相見，欲相尊敬，必執禽鳥始得至，

故云「摯，所執以至者」也。云「士摯用雉」者，對大夫已上所執羔、鴈不同也。云「取其耿介，交有時，別有倫也」者，倫，類也。交接有時，至於別後，則雄雌不雜，謂春交秋別也。士之義亦然，義取耿介不犯於上也。云「雉必用死者，為其不可生服也」者，經直云「冬用雉」，知用死雉者，《尚書》云「三帛、二牲、一死摯」。<sup>③</sup>則雉，義取耿介，為君致死也。云「夏用脰，備腐臭也」者，案《周禮·庖人》云：「春行羔豚，夏行脰鱸。」鄭云：「脰，乾雉。鱸，乾魚。」脰鱸，曝熟而乾，乾則不腐臭，故此取「不腐臭」也。冬時雖死，形體不異，故存本名，稱曰「雉」。夏為乾脰，形體異，故變本名稱曰「脰」也。云「左頭，頭，陽也」者，《曲禮》云「執禽者左首」，雉與羔、鴈同是合生執之物，以不可生服，故殺之。雖死，猶尚左以從陽也。云「某子，今所因緣之姓名也」者，謂紹介之姓名。云「以命者，稱述主人之意者，言紹介之人稱述主人之辭意傳來賓也。云「今文頭為脰」

<sup>①</sup>「及」，曹校云衍字。

<sup>②</sup>「升」上，阮校云：毛本有「新」字。

<sup>③</sup>「二牲一死摯」，阮校云：毛本「牲」作「生」，「摯」作「雉」。按「生」、「摯」是也。

者，鄭不從今文者，以其脰，項也，項不得爲頭，故不從也。但此云「某子以命命某見」，謂舊未相見，今始來見主人，故須某子傳通。孺悲欲見孔子，不由紹介，故孔子辭以疾。且經云「某子」，鄭云「某子，今所因緣之姓名」。案《鄉飲酒》云：「某子受酬。」注云：「某者，衆賓姓。」又《鄉射》云：「某酬某子。」注云：「某子者，氏也。」與此注某子爲姓名不同者，彼旅酬下爲上，尊敬在上。以《公羊傳》：「名不若字，字不若子。」故下者稱姓以配子。彼對面語，故不言名，此非對面之言，於彼遙稱紹介之意，若不言名，直稱姓，是何人？故鄭以姓名解之也。若然，《特牲》云「皇祖某子」，注爲「伯子、仲子」者，以孫不宜云父祖姓，故以伯子、仲子言之，望經爲義，故注有殊。若然，注宜有名，無者誤也。主人對曰：「某子命某見，吾子有辱。請吾子之就家也，某將走見。」有，又也。某子命某往見，今吾子又自辱來，序其意也。走猶往也。今文無「走」。

**疏**「主人」至「走見」○釋曰：云「某子命某見」者，某子則是紹介姓名，以某子是中閒之人，故賓主共稱之也。此上下皆言請，不言辭。辭而不受，須相見，故言請而已。○注「有又」至「無走」○釋曰：鄭轉有爲

又者，以言某子以命命某往就彼見，吾子又自辱來，於義爲便，故從又不從有也。云「走猶往也」者，以言走，直取急往相見之意，非走驟之義，故釋從往也。云「今文無走」字者，無走，於文義不足，故不從今文從古文也。賓對曰：「某不足以辱命，請終賜見。」命，謂請吾子之就家。主人對曰：「某不敢爲儀，固請吾子之就家也，某將走見。」不敢爲儀，言不敢外貌爲威儀，忠誠欲往也。固如故也。今文「不」爲「非」。古文云「固以請也」。

**疏**注「不敢」至「以請」○釋曰：「固如故也」者，固爲堅固，堅固則如故，以再請如前，故云「固如故也」。云「今文不爲非」者，云非敢於義不便，故不從今文非也。云「古文云「固以請」者，固請於文從便，若有以字，於文賒緩，故不從古文「固以請」也。賓對曰：「某不敢爲儀，固以請。」言如固請終賜見也。今文「不」爲「非」。

主人對曰：「某也固辭，不得命，將走見。聞吾子稱摯，敢辭摯。」不得命者，不得見許之命也。走猶出也。稱，舉也。辭其摯，爲其大崇也。古文曰「某將走見」。

**疏**注「不得」至「走見」○釋曰：云

「走猶出也」者，亦如上之走往，彼據向賓家，故走爲往，此據出門，故云「走出也」。<sup>①</sup>云「辭其摯，爲其大崇也」者，凡賓主相見，唯此新升爲士有摯，又初不相識，故有摯爲重。對重相見，則無摯爲輕。是以始相見辭之，爲大崇故也。云「古文曰『某將走見』」者，上再番皆云「某將走見」，今此三者亦云「某將走見」，與前同。此疊古文不從者，以上第一番請賓主皆無「不敢爲儀」，第二番賓及主人皆云「不敢爲儀」，文句既異，<sup>②</sup>若不云「某」，於文不便，故須云「某」也。此三番於上已云「某也固辭，不得命」，於下不須云「某」，於文便，古文更云「某將走見」，文疊，故不從也。賓對曰：「某不以摯不敢見。」見於所尊敬而無摯，嫌大簡。**疏**注「見於」至「大簡」○釋曰：此士相見唯

是平敵相抗。<sup>③</sup>案《曲禮》云：「主人敬客則先拜客，客敬主人則先拜主人。」並不問爵之大小，唯以相尊敬爲先後，故雖兩士亦得云相尊敬，不敢空手，須以摯相見。若無摯相見，是則大簡略也。主人對曰：「某不足以習禮，敢固辭。」言不足習禮者，不敢當其崇禮來見己。**疏**注「言不」至「見己」○釋曰：案上經賓云「某不以摯不敢見」，是賓以崇禮來見主人。今主人不敢當其崇禮來見

己，故變文言「不足以習禮」，故鄭云「言不足習禮者，不敢當其崇禮來見己」也。賓對曰：「某也不依於摯不敢見，固以請。」言依於摯，謙自卑也。今文無「也」。

**疏**注「言依」至「卑也」<sup>④</sup>○釋曰：凡相見之禮，以卑見尊必依摯。《禮記·檀弓》云「魯人有周豐也者，哀公執摯請見之」者，是下賢，非正法。今《士相見》云「不依於摯不敢見」，謙自卑也。主人對曰：「某也固辭，不得命，敢不敬從。」出迎于門外，再拜。賓

荅再拜。主人揖，入門右。賓奉摯，入門左。主人再拜受。賓再拜送摯，出。右，就右也。左，就左也。受摯於庭，既拜受，送則出矣。不受摯

①「走」下，阮校云：毛本有「猶」字，今從毛本。

②曹校云：「儀」下「文」上，當有脫文，擬補云：「兩番主人辭，又皆云請吾子之就家也。」「文句既異」，「異」當爲「隔」。

③「抗」，阮校云：毛本作「抗」。

④「卑」，阮校疑爲「無」字之誤。

於堂，下人君也。今文無。<sup>①</sup>疏注「右就」至「文無」<sup>②</sup>○

釋曰：凡門出則以西爲右，以東爲左。入門則以東爲右，<sup>③</sup>以西爲左。依賓西主東之位也。知「受摯於庭」者，以其入門左右，不言揖讓而升之事，故知在庭也。云「既拜，送則出矣」者，欲見賓拜送摯訖而言出，則去還家，無意得待主人留己也。云「不受摯於堂，下人君也」者，《聘禮》賓升堂致命授玉，又下云「君在堂，升見無方階」，亦是升堂見君法，故云「不升堂，下人君也」。主人請見，賓反見，退。主人送于門外，再拜。請見者，爲賓崇禮來相接，以矜莊，歡心未交也。賓反見，則燕矣。下云「凡燕見於君」至「凡侍坐於君子」，博記反見之燕義。臣初見於君，再拜，奠摯而出。

**疏**

「主人請見」至「再拜」

○注「請見」至「而出」○釋曰：鄭解主人留賓之意。云「請見者，爲賓崇禮來相接」，則執摯來是也。云「以矜莊，歡心未交也」者，正謂入門拜受、拜送時賓主俱矜莊相敬，歡心未交也。云「賓反見則燕矣」者，上《士冠》禮賓、《士昏》納采之等，禮記皆有禮賓、饗賓之事，<sup>④</sup>明此行禮，主人留必不虛，宜有歡燕，故云「則燕矣」。以摯相見非聘問之禮，燕既在寢，明前相見亦在寢之庭矣。若諸文有留賓者

多是禮賓之事，<sup>⑤</sup>知此不行禮賓而云燕者，彼諸文皆是爲餘事相見，以其事重，故爲禮賓。此直當身相見，其事輕，故直有燕矣。是以諸文禮賓，此燕賓，故直云「請見」也。云「凡燕見於君」至「反見之燕義」者，凡燕見，或反見，或本來侍坐，非反見，下注云「此謂特見圖事，非立賓主之燕」是也。「侍坐於君子」之下乃有「侍坐，問夜膳葷」，賜食爵之等，不引證燕見者，彼直是侍坐法，非燕見之禮故也。云「臣初見於君，再拜奠摯而出」者，鄭欲見自「燕見于君」下至「凡侍坐於君子」皆反見燕法，其中仍有臣見于君法。臣始事見于君法，<sup>⑥</sup>禮畢奠摯而出，君亦當遣人留之燕也。若然，下有「他邦之人則還摯」，雖不見反燕，臣尚燕，他邦有燕可知，但文不具也。主人復見之，以其摯，曰：「鄙者吾子辱，使某見，請還摯於」

①「無」下，阮校云：《集釋》、《通解》、毛本俱有「也」字。

②「文無」，阮校云：毛本作「無也」。

③「門」，阮校云：毛本無。

④「記」，曹校云當爲「訖」。

⑤「若」下，曹校云脫「然」字。

⑥「事」，曹校云當爲「仕」。

將命者。」復見之者，禮尚往來也。以其摯，謂歸時所執來者也。歸，曩也。將猶傳也。傳命者，謂摯相者。

**疏**

「主人」至「命者」○釋曰：自此至「賓退送再拜」，論主人還于賓之事。<sup>①</sup>○注「復見」至「相者」○釋曰：云「復見之者，禮尚往來也」者，鄭解主人還摯之意。云「禮尚往來」，《曲禮》文。五等諸侯身自出朝及遣臣出聘，以其圭璋重，不可遙復，朝聘訖即還之，璧琮財輕，故不還。彼朝聘用玉，自爲一禮，有不還之義。其在國之臣，自執摯相見，雖禽摯皆還之。臣見於君則不還，義與朝聘異，不可相決也。云「將猶傳也。傳命者，謂摯相者」者，謂出接賓曰摯，入詔禮曰相，一也。故《聘禮》與《冠義》皆云每一門止一相，<sup>②</sup>是謂摯介爲相也。主人對曰：「某也既得見矣，敢辭。」讓其來荅己也。

**疏**「主人」至「敢辭」○

釋曰：上言主人，此亦言主人者，上言主人者，據前爲主人而言，此云主人者，謂前賓，今在己家而說也。賓對

曰：「某也非敢求見，請還摯于將命者。」言不敢求見，嫌褻主人，不敢當也。今文無也。

**疏**注「言

不」至「當也」○釋曰：云「嫌褻主人，不敢當也」者，歸者主

人見己，今即來見主人，賓主頻見，是褻也。今云「非敢求見」，嫌褻主人，不敢更相見也。故不敢當相見之法，直云「還摯」而已。主人對曰：「某也既得見矣，敢固辭。」固如故也。賓對曰：「某不敢以聞，固以請於將命者。」言不敢以聞，又益不敢當。

**疏**注

「言不敢」至「敢當」○釋曰：上云「非敢求見」，已是不敢當，此云「不敢以聞」，耳聞疏於目見，故云「又益不敢當」也。主人對曰：「某也固辭，不得命，敢不從。」許受之也。異日則出迎，同日則否。

**疏**注「異日」

至「則否」○釋曰：下云「賓奉摯人」，不言主人出迎，又不言厥明，是與前相見同日。知異日出迎者，《鄉飲酒禮》云明日「乃息司正」，主人出迎之。司正猶迎之，況同僚乎？是知異日出迎也。若然，《聘禮》公迎于大門內，至禮賓又出迎者，彼初是公迎彼初之命，<sup>③</sup>不爲迎賓身，故至醴賓身，雖同日亦出迎之。故鄭注云「公出迎者，己之禮更端」

① 「還」下，阮校引浦鏜云：脫「摯」字。

② 「故聘禮與冠義皆」，曹校云當爲「故周禮司儀」。

③ 下「初」字，曹校云殿本作「君」。

是也。《昏禮》賓爲男家使，初時出迎，至醴賓身，雖同日亦出迎也。《有司徹》前爲尸，後爲賓，所爲異，故云雖同日亦出迎。<sup>①</sup>此二者亦是更端之義也。案《鄉飲酒》及《公食大夫》皆於戒賓之時未行賓主之禮，是以賓至乃迎之，故雖同日亦迎賓，非更端之義也。賓奉摯入，主人再拜受。賓再拜送摯，出。主人送于門外，再拜。士見於大夫，終辭其摯。於其人也，一拜其辱也。賓退，送再拜。終辭其摯，以將不親荅也。凡不荅而受其摯，唯君於臣耳。大夫於士不出迎。入一拜，正禮也。送再拜，尊賓。**疏**「士見於大夫」至「再拜」○注「終辭」至「尊賓」○釋曰：云「以將不親荅也」者，事未至謂之將，如上士相見賓來見士，後將親荅就士家，則辭而受其摯。此則以將不親荅，終不受也。若然，經直云「終辭其摯」，不言一辭、再辭，亦有可知，但略而不言也。又《少儀》云始見君子曰「願聞名」，此不言願聞，亦文不具也。云「凡不荅而受其摯，唯君於臣耳」者，見下文「他邦之人則使摯者還其摯」，見己君不言還摯。又文有三辭：初辭、中辭、終辭。初辭之時則云「使某」。中辭云「命某」，以辭在中者，傳言而已，故云「命某」。然

「使某」者是尊君卑臣之義，其心重。若云「命某」者，尊君卑臣稍淺漸輕之義，故鄭云「或言命某，傳言耳」。必知有此義者，案僖九年《左傳》曰：「天子有事於文武，使孔賜伯舅胙，以伯舅耄老，加勞賜一級，無下拜。」是尊君稱使，傳言云命，有輕重之義也。若嘗爲臣者，則禮辭其摯，曰：「某也辭，不得命，不敢固辭。」禮辭，一辭其摯而許也。將不荅而聽其以摯入，有臣道也。賓入，奠摯，再拜。主人荅壹拜。奠摯，尊卑異，不親授也。古文「壹」爲「一」。賓出，使摯者還其摯于門外，曰：「某也使某還摯。」還其摯者，辟正君也。賓對曰：「某也既得見矣，敢辭。」辭君還其摯也。今文無。<sup>②</sup>摯者對曰：「某也命某，某非敢爲儀也。敢以請。」還摯者請使受之。賓對曰：「某也夫子之賤私，不足以踐禮，敢固辭。」家臣稱私。踐，行也。言某臣也，不足以行賓客

① 「云」，曹校以爲衍字。

② 「無」下，阮校云《集釋》、《通解》有「也」字。



禮。賓客所不荅者，不受摯。擯者對曰：「某也使

某，不敢爲儀也。固以請。」言使某，尊君也。或

言命某，傳言耳。賓對曰：「某固辭，不得命，敢

不從！」再拜受。受其摯而去之。**疏**注「受其摯而

去之」○釋曰：云「受其摯而去」者，以其嘗爲臣爲輕，既不

受其摯，又相見無饗燕之禮，故鄭云「而去」以絕之也。

下大夫相見，以鴈，飾之以布，維之以索，如

執雉。鴈取知時，飛翔有行列也。飾之以布，謂裁縫衣

其身也。維謂繫聯其足。**疏**「下大夫」至「執雉」○釋曰：

言「下大夫」者，國皆有三卿五大夫。言上大夫，據三卿，

則此下是五大夫也。二十七士與五大夫轉相副貳，則三

卿宜有六大夫，而五者，何休云：司馬事省，闕一大夫。○

注「鴈取」至「其足」○釋曰：云「鴈取知時」者，以其木落南

翔，冰泮北徂，隨陽南北，義取大夫能從君政教而施之。

云「飛翔有行列也」者，義取大夫能依其位次，尊卑有敘

也。上士執雉，「左頭奉之」，此云「如執雉」，明執鴈者亦

左頭奉之也。案《曲禮》云：「飾羔鴈者以纁。」彼天子卿大

夫非直以布，上又畫之，此諸侯卿大夫執摯雖與天子之臣

同，飾羔鴈者直用布爲飾，無纁。彼不言士，則天子之士

與諸侯之士同，亦無飾。士賤，故無別也。上大夫相

見，以羔，飾之以布，四維之，結于面，左頭，

如麋執之。上大夫，卿也。羔取其後帥，群而不黨也。

面，前也。繫聯四足，交出背上，於胸前結之也。如麋執

之者，秋獻麋，有成禮如之。或曰麋，孤之摯也。其禮蓋

謂左執前足，右執後足。今文「頭」爲「脰」。**疏**「上大夫」

至「執之」○注「上大」至「爲脰」○釋曰：云「上大夫，卿也」

者，即三卿也。云「羔取其從帥」者，凡羔羊群皆有引帥，

若卿之從君之命者也。云「群而不黨也」者，羊羔群而不

黨，義取三卿亦皆正直，雖群居，不阿黨也。云「繫聯四

足，交出背上，於胸前結之」者，謂先以繩雙繫前兩足，復

以繩繫後兩足，乃以雙繩於左右從腹下向背上交過，於胸

前結之也。云「如麋執之者，秋獻麋，有成禮如之」者，案

《周禮·獸人》云：「冬獻狼，夏獻麋，春秋獻獸物。」鹿、豕、

群獸及狐狸可也。麋是鹿子，與鹿同時獻之。又《庖人》

云「秋行犢麋」，則獻當在秋時，故云「秋獻麋」也。又案

《禮器》：「曲禮三千。」鄭云：「曲猶事也。事禮謂今禮也。

其中事儀三千。」則禮未亡之時，三千條內有此獻麋之法，

是有成禮可依，故此經得如之也。云「或曰麇，孤之摯也」者，案《大宗伯》及《大行人》與《聘禮》皆云孤執皮帛，謂天子之孤與諸侯之孤執皮帛。今此執麇者，謂新升為孤見己君法，至餘事則皆皮帛也。云「其禮蓋謂左執前足，右執後足」者，案經云「左頭」，則與雉、鴈同，是以《曲禮》云：「執禽者左首。」此鄭又云執之「蓋謂左執前足，右執後足」者，元缺起此。此釋經「麇執之」，<sup>①</sup>據四足而言之。凡以摯相見之法，唯有新升為臣，及聘朝，及他國君來，主國之臣見，皆執摯相見。常朝及餘會聚皆執笏，無執摯之禮。又執摯者，或平敵，或以卑見尊，皆用摯。尊無執摯見卑之法。《檀弓》云：哀公執摯見己臣周豐者，彼謂下賢，非正法也。如士相見之禮。大夫雖摯異，其儀猶如士。

**疏**「如士相見之禮」○釋曰：此下大夫及卿，其摯雖有羔鴈之異，其相見之儀則皆如士也。○注「大夫」至「如士」○釋曰：云「儀猶如士」者，或兩大夫，或兩卿相見，皆如上文「某也願見，無由達」已下至「主人拜送于門外」也。始見于君，執摯。至下，容彌蹙。下，謂君所也。蹙猶促也，促，恭慙貌也。其為恭，士、大夫一也。

**疏**注「下謂」至「一也」○釋曰：直云「見于君」，不辨臣之貴賤，

則臣之貴賤皆同，故鄭云「其為恭，士大夫一也」。不言所而言下者，凡臣視衿已下，故不言所，言下也。庶人見於君，不為容，進退走。容，謂趨翔。**疏**注「容謂趨翔」○釋曰：此不言民而言庶人，則是庶人在官，謂若《王制》云「庶人在官者，其祿以是為差」，即府史、胥徒是也。按鄭注《曲禮》云：「行而張足曰趨，行而張拱曰翔。」皆是庶人貌也。此庶人見君不趨翔，謂是常法。<sup>②</sup>《論語》是孔子行事，而云「趨進翼如」者，彼謂孔子與君圖事於堂，圖事訖，降堂向時揖處，至君前橫過向門，特加肅敬，與庶人同也。<sup>③</sup>士、大夫則奠摯，再拜稽首，君荅壹拜。言君荅士大夫一拜，則於庶人不荅之。庶人之摯驚。古文「壹」作「一」。

**疏**注「言君」至「作一」○釋曰：臣拜君云「再拜稽首」，則「君荅一拜」者當作空首，則九拜中奇拜是也。云「言君荅士大夫一拜，則於庶人不荅之」者，案《曲禮》「君於士不荅拜」，謂己士。此得與大夫

① 「經」下，曹校云脫「如」字。

② 曹校云「翔」下有脫文，「謂」當為「彼」。

③ 「同」上，曹校云脫「不」字。

同荅一拜者，士賤，君不荅拜，此以新升爲士，故荅拜。

《聘禮》問勞云荅士拜者，亦以新使反，故拜之也。云「庶人之摯驚」者，案《大宗伯》云：「以禽作六摯，庶人執驚。」注云：「驚取其不飛還。」象庶人安土重遷是也。若他

邦之人，則使摯者還其摯，曰：「寡君使某還摯。」賓對曰：「君不有其外臣，臣不敢辭。」再拜稽首，受。**疏**釋曰：賓不辭即受摯，以君

所不臣，禮無受他臣摯法，賓如此法，故不敢亢禮於他君，故不辭即受之也。凡臣無境外之交，今得以摯執見他邦君者，謂他國之君來朝，此國之臣因見之，謂若《掌客》「卿皆見以羔」之類是也。《春秋》卿大夫與他國之君相見者，皆因聘會乃見之，非特行也。凡燕見于君，必辯君之南面。若不得，則正方，不疑君。辯猶正也。君南面，則臣見正北面。君或時不然，當正東面，若正西面，不得疑君所處邪鄉之。此謂特見圖事，非立賓主之燕也。疑，度之。**疏**釋曰：案上文注以此爲博記反見之燕

義，則此與燕義燕禮立賓主之燕別，<sup>①</sup>以其此經君之面位正南，臣北面向之。若不得南面，或君東西面，則臣亦正

方向之，不可預度君之面位，邪立向之。皆與《燕禮》君在

阼階西面爲正異，故知此經是特見皆圖事，<sup>②</sup>并與賓反見之燕義也。知有「圖事」者，《論語·鄉黨》云孔子與君圖

事于庭，圖事于堂，《燕禮》亦云君與卿圖事之時，有此面位，無常之法也。君在堂，升見無方階，辯君所

在。升見，升堂見於君也。君近東，則升東階，君近西，

則升西階。**疏**注「升見」至元缺止此。「西階」○釋曰：此文

據君所在，隨便升階，無常之事，亦謂反燕及圖事之法。

若立賓主，君升自阼階，賓及主人升自西階，《燕禮》所云是也。凡言，非對也，妥而後傳言。凡言，謂已

爲君言事也。妥，安坐也。傳言猶出言也。若君問，可對

則對，不待安坐也。古文「妥」爲「綏」。**疏**「凡言」至「傳

言」○注「凡言」至「爲綏」○釋曰：此據臣與君言之法也。

云「凡言，謂已爲君言事也」者，謂臣有圖，爲君言也。《禮

記·少儀》云：「量而後入，不入而後量。」是臣有事將人見

① 「義燕」，曹校云此二字衍。

② 「皆」，曹校云此字衍。

君，須量己所言，亦當量君安坐，乃可得入，<sup>①</sup>而後傳出己言，向君道之。云「妥，安坐也」者，《爾雅·釋詁》文。與

君言，言使臣。與大人言，言事君。與老者

言，言使弟子。與幼者言，言孝弟於父兄。

與衆言，言忠信慈祥。與居官者言，言忠

信。博陳燕見言語之儀也。言使臣者，使臣之禮也。大

人，卿大夫也。言事君者，臣事君以忠也。祥，善也。居

官，謂士以下。**疏**「與君」至「忠信」○釋曰：上文據與君

言，此文則總說尊卑言語之別。云「與君言，言使臣。與

大人言，言事君」者，但君臣相對，有事即言，不必與君言

恒言使臣，與臣言恒言事君。今唯言使臣、事君者，下供

上命，禮法當然，故君以使臣爲主，臣以事君爲正，無妨更

言餘事，已下皆隨事爲主可也。云「與老者言，言使弟子」

者，謂七十致仕之人。依《傳書》：大夫致仕爲父師，士致

仕爲少師，教鄉閭子弟。雷次宗云：「學生事師，雖無服，

有父兄之恩，故稱弟子也。」云「與幼者言，言孝弟於父兄」

者，幼既與老者相對，此幼即弟子之類，孝弟事父兄之名，

是人行之本，故云「言孝弟于父兄」。「與衆言，言忠信慈

祥」者，此文承老幼之下，亦非朝廷之臣，但是鄉閭長幼共

聚之處，使之行忠信慈善之事也。云「與居官者言，言忠

信」者，此與在朝之士言，以忠信爲主也。○注「博陳」至

「以下」○釋曰：云「博陳燕見言語之儀也」者，據已上博陳

與君燕見舉動言語，知此博陳也。<sup>②</sup>云「言使臣者，使臣

之禮也」者，并「事君以忠」，並是《論語》孔子對定公之文。

云「大人，卿大夫也」者，此云「言事君」，明非天子、諸侯，

又非士，是卿大夫可知。又案下文云「凡與大人言，始視

面，中視抱，卒視面」，並是臣視君之法，則大人據君也。

又《禮運》云：「大人世及以爲禮。」鄭解爲諸侯者，以彼上

文云「天下爲家」，以據天子，明下云「大人」是諸侯可知。

《易·革卦》云「君子豹變」據諸侯，則「大人虎變」是天子

可知。又案《論語》云「狎大人」，注爲天子、諸侯爲政教

者，<sup>③</sup>彼據小人不在朝廷，故以大人爲天子、諸侯政教解

之。鄭皆望文爲義，故解大人不同。云「居官，謂士以下」

者，以上大夫云事君，已據居官卿大夫，其居官之內，唯有

二十七士，并府、史、胥、徒，故云「士以下」也。凡與大

①「乃可得入」，曹校云當在「亦當量君安坐」上。

②「陳」下，曹校云似脫「燕見言語之儀」六字。

③「爲」，曹校云當作「謂」。

人言，始視面，中視抱，卒視面，毋改。衆皆若是。始視面，謂觀其顏色，可傳言未也。中視抱，容其思之，且爲敬也。卒視面，察其納己言否也。毋改，謂傳言見答應之間，當正容體以待之，毋自變動，爲嫌解情不虛心也。衆謂諸卿大夫同在此者。皆若是，其視之儀無異也。古文「毋」作「無」，今文「衆」爲「終」。

**疏**「凡與」至

「若是」○注「始視」至「爲終」○釋曰：云「中視抱，容其思之，且爲敬」者，案《曲禮》：「天子視不上於袷，袷，交頤也。」不下於帶，上於袷則敖，下於帶則憂。視大夫得視面，此視君得視面者，彼據尋常視君法，此據與君言時，故不同也。云「且爲敬」者，此言抱即面相袷，不視袷是敬君之常禮，故云「且爲敬」也。云「爲嫌解情不虛心也」者，《禮記》云：「虛中以治之。」鄭注云：「虛中，言不兼念餘事。」是虛心之意也。云「衆謂諸卿大夫同在此者」，言於君視之高下如此，其卿大夫視君之儀與言者無異也。云「古文毋作無」，不從者，《說文》云毋，蓋亦禁辭，<sup>①</sup>故不從有無之無也。云「今文衆爲終」，不從者，以上已有卒，卒爲終，故從古爲衆也。若父，則遊目，毋上於面，毋下於帶。子於父主孝不主敬，所視廣也，因觀安否

何如也。今文「父」爲「甫」，古文「毋」作「無」。

**疏**

「若父」

至「於帶」○注「子於」至「作無」○釋曰：案《曲禮》大夫之臣視大夫得視面不得遊目，士之臣視士得旁遊目。今子視父應與視君同，不上於袷。與士大夫同者，以「子於父主孝不主敬，所視廣者，因視安否何如也」。若不言，立則視足，坐則視膝。不言則伺其行起而已。

**疏**

「若不」至「視膝」○注「不言」至「而已」○釋曰：已上皆據臣子與君父言語之時，此據不言之時。鄭言「伺其行起」者，行解經立，行由立始，故以行解立。是以《論語》云：「立不中門。」鄭云：「立行不當根闌之中央。」是亦以行解立，一也。又以起解坐，以其起由坐始故也。凡侍坐於君子，君子欠伸，問日之早晏，以食具告。改居，則請退可也。君子謂卿大夫及國中賢者也。志倦則欠，體倦則伸。問日晏，<sup>②</sup>近於久也。具猶辨也。<sup>③</sup>

① 曹校云：「毋」下有脫文，宜補云：「止之也，此云毋改，蓋亦禁辭。」。

② 「日」下，阮校云：「敎氏有「蚤」字。」

③ 「辨」原本作「辯」，據阮校改。

改居，謂自變動也。古文「伸」作「信」，「早」作「蚤」。

**疏**

「凡侍」至「可也」○注「君子」至「作蚤」○釋曰：此陳侍坐於君子之法。鄭云君子卿大夫者，禮之通例，大夫得稱君子，亦得稱貴人，而士賤不得也。知「及國中賢者」者，《鄉射禮》云：「徵唯所欲，以告於鄉先生君子，可也。」鄭云：「鄉先生，鄉大夫致仕者。君子，有大德行不仕者。」則《曲禮》云「博文強識而讓，敦善行而不怠，謂之君子」是也。云「志倦則欠，體倦則伸」，鄭注《曲禮》亦然。云「古文伸作信，早作蚤」者，此二字古通用，故《大宗伯》云「侯執身圭」，<sup>①</sup>爲信字，《詩》云「一之日其蚤」，<sup>②</sup>獻羔祭韭，爲蚤字。既通用，疊古文者，據字體非直從今爲正，亦得通用之義也。夜侍坐，問夜，膳葷，請退可也。問夜，問其時數也。膳葷，謂食之。葷，辛物，葱薤之屬，食之以止卧。<sup>③</sup>古文「葷」作「薰」。

**疏**「夜侍」至「可也」○注「問夜」至「作薰」○釋曰：云「問夜，問其時數也」者，謂若鍾鼓漏刻之數也。云「古文葷作薰者」，《玉藻》云：「膳於君，有葷桃茢。」作此葷。鄭注《論語》作煮，義亦通。若作薰，則《春秋》「一薰一蕕」，薰，香草也，非葷辛之字，故疊古文不從也。若君賜之食，則君祭先飯，徧

嘗膳，飲而俟。君命之食，然後食。君祭先飯，

食其祭食，<sup>④</sup>臣先飯，示爲君嘗食也。此謂君與之禮食。<sup>⑤</sup>膳謂進庶羞。既嘗庶羞，則飲，俟君之徧嘗也。今云「啗嘗膳」。

**疏**若君「至「後食」○注「君祭」至「嘗膳」○釋

曰：此經及下經論臣侍君坐，得賜食之法。鄭云「先飯，示爲君嘗食也」者，凡君將食，必有膳宰進食，則膳宰嘗君前之食，備火齊不得，下文是也。今此文謂膳宰不在，則侍食者自嘗自己前食。既不嘗君前食，則不正嘗食，故云「示爲君嘗食」也。云「此謂君與之禮食」者，謂君與臣小小禮食法，仍非正禮食，正禮食則《公食大夫》是也。彼君前無食，此君臣俱有食，故知小小禮食。此即《玉藻》云：「若賜之食，而

<sup>①</sup>「身」，阮校云：毛本作「伸」。孫校以「身」爲後人以鄭意改之，當作「伸」爲是。

<sup>②</sup>「一」，《詩·豳風·七月》作「四」。

<sup>③</sup>「之」下，阮校云：《集釋》有「可」字。

<sup>④</sup>「食其」，阮校云：敖氏作「謂君」，盧文弨云：宋本作「於其」。

<sup>⑤</sup>「此」，阮校云：楊復作「食」。「與」下，阮校云：《集釋》有「臣」字。

君客之，則命之祭然後祭。彼云「客之」，則此注禮食亦不得祭，<sup>①</sup>故一也。但此文不云「客之」，「命之祭然後祭」，文不具也。若臣嘗食，<sup>②</sup>不得云禮食，亦不得祭，故鄭注《玉藻》云「侍食則正不祭」是也。若有將食者，則俟君之食，然後食。將食猶進食，謂膳宰也。膳宰進食，則臣不嘗食。《周禮·膳夫》<sup>③</sup>：「品嘗食，王乃食。」疏「若有」至「後食」○注「將食」至「乃食」○釋曰：云「膳宰進食，則臣不嘗食」者，臣為君嘗食，本為膳宰不在，今膳宰既在，明臣不嘗食也。是以《玉藻》云「若有嘗羞者，則俟君之食然後食，飯飲而俟」，注云「不祭侍食，不敢備禮也。不嘗羞，膳宰存也」是也。云「膳夫」者，天子膳夫，則諸侯之膳宰。引之者，證經將食之人是膳宰，因將膳與君品嘗食。凡君食，臣有侍食之時，唯子不侍食。是以《文王世子》云：「命膳宰曰，末有原，應曰諾，然後退。」是大子不侍食。若卿大夫已下則有侍食法，故《內則》云「父没母存，冢子御食，群子婦佐餼」是也。若君賜之爵，則下席，再拜稽首，受爵，升席，祭，卒爵而俟，君卒爵，然後授虛爵。受爵者於尊所。至於授爵，坐授人耳。必俟君卒爵者，若欲其醕然也。今文曰

「若賜之爵」，無「君」也。疏「若君」至「虛爵」○注「受爵」

至「君也」○釋曰：云「受爵者於尊所」者，《曲禮》亦是賜爵法，而云「酒進則起，拜受於尊所」是也。云「至於授爵，坐授人耳」者，見《曲禮》與《玉藻》并此文，並無立授之文，故知坐授也。云「必俟君卒爵者，若欲其醕然也」者，此經文與《玉藻》文同，皆燕而君客之賜爵法，故臣先飲，以酒是甘味，欲美君之味，故先飲。必待君卒爵而後授虛爵者，臣意若欲君盡爵然也。案《曲禮》云：「侍飲於長者，酒進則起，拜受於尊所。長者辭，少者反席而飲。長者舉未醕，少者不敢飲。」彼是大燕飲禮，故鄭注引《燕禮》曰「公卒爵而後飲」。案《燕禮》當無筭爵後，得君賜爵，待君卒爵乃飲，是也。退，坐取屨，隱辟而后屨。君為之興，則曰：「君無為興，臣不敢辭。」君若

① 「不」，曹校云此字涉下誤衍。

② 「臣嘗」，阮校云：《要義》作「尋常」。曹校云：「單疏亦作「尋常」是也，此本誤。」

③ 「夫」下，阮校云：《通解》、毛本有「授祭」二字。

降送之，則不敢顧辭，遂出。謂君若食之、飲之而退也。隱辟，俛而逡巡。興，起也。辭君興而不敢辭其降，於己大崇，不敢當也。

**疏**「退坐」至「遂出」○注「謂

君」至「當也」○釋曰：云「謂君若食之、飲之而退也」者，以上云「若君賜之食」、「若君賜之爵」，下而云退者，<sup>①</sup>明爲此二者而退也。云「隱辟，俛而逡巡」者，案《曲禮》云「鄉長者而屢」，此亦當然。云「不敢辭其降」者，謂君降送時，明有不降法，故《曲禮》云「就屢跪而舉之，屏於側」，注云「謂獨退也」。云若者，不定之辭也。大夫則辭退下，比及門，三辭。下亦降也。<sup>②</sup>

**疏**「大夫」至「三辭」○

釋曰：云「大夫則辭退下」者，對上「不敢辭」是士，士卑，不敢辭降。大夫之內兼三卿、五大夫，臣中尊者，故得辭降也。<sup>③</sup>若先生異爵者，請見之，則辭。辭不得命，<sup>④</sup>則曰：「某無以見，辭不得命，將走見。」先見之。先生，致仕者也。異爵，謂卿大夫也。辭，辭其自降而來。走猶出也。先見之者，出先拜也。《曲禮》曰：「主人敬賓則先拜賓。」**疏**「若先」至「見之」○注「先生」至「拜賓」○釋曰：此先生即《鄉飲酒》云「就先生

而謀賓介」，亦一也，故彼注與此注皆云「致仕者也」。云「異爵，謂卿大夫也」者，此《士相見》，本文是士，故以卿大夫爲異爵也。訓走爲出者，亦謂士見異爵，取急意而言走，其實非走，直出也。引《曲禮》者，欲見言敬客，<sup>⑤</sup>先拜也。彼云「客」，此云「賓」者，對文賓、客異，散文賓、客通，故變文云「賓」也。非以君命使，則不稱寡。大

夫、士則曰寡君之老。謂擯贊者辭也。不稱寡者，<sup>⑥</sup>不言寡君之某，言姓名而已。大夫卿士其使，則皆曰寡君之某。《檀弓》曰：「仕而未有祿者，君有饋焉曰獻，使焉曰寡君之老。」**疏**「非以」至「之老」○注「謂擯」至「之老」○釋曰：云「非以君命使，則不稱寡」者，此則《玉藻》云

<sup>①</sup>「下而云」，曹校云當作「而下云」。

<sup>②</sup>「亦」，阮校云：《通解》作「猶」。

<sup>③</sup>「故」，阮校云：毛本作「大」。

<sup>④</sup>「辭」，武威漢簡甲本此字不重，沈文倬以爲下「辭」字誤衍。

<sup>⑤</sup>「言」，阮校云：毛本作「主」。曹校云「言」字似衍。

<sup>⑥</sup>「者」，阮校云：毛本作「君」。



「大夫私事使，私人擯，則稱名」，以其非聘問之禮，則爲私事使，私人擯也。《聘禮》云：「若有言，則以束帛，如享禮」，引《春秋》「晉侯使韓穿來言汶陽之田歸於齊」，《玉藻》注亦引之是也。鄭云：「謂擯贊者辭也」者，以《玉藻》自「諸侯之於天子」以下至大夫，皆云「擯者曰」，故知不自稱，是擯贊之辭也。云「其使則皆曰寡君之某」者，釋經「大夫，士則曰寡君之老」，爲公事使者也。此則《玉藻》云「公士擯則曰寡大夫寡君之老」，<sup>①</sup>大夫有所往必與公士爲賓，亦一也。彼注云「謂聘也，大聘使上大夫，小聘使下大夫，則曰寡君之某」，故鄭總云某也。若然，經直云大夫，鄭兼云士者，經本文是士，則云「非以君命使」，可以兼士也。但士無特聘問，或作介往他國，亦有稱謂，而云寡君之士某也。云《檀弓》「曰仕而未有祿」者，謂試爲大夫、士，直有試功之祿，未有正祿。云「君有饋焉曰獻」者，謂有饋物于君，亦與正祿者同稱獻。云「使焉云寡君之老」者，於他國君邊自稱寡君之某。此文亦兼士、大夫，引之者，證公事使稱寡君之某也。凡執幣者不趨，容彌蹙，以爲儀。不趨，主慎也。以進而益恭，爲威儀耳。今文無「容」。

**疏**「凡執」至「爲儀」○釋曰：案《小行人》「合六

幣」，玉、馬、皮、圭、璧、帛，皆稱幣，下文別云「執玉」，則此幣謂皮馬享幣及禽摯皆是。○注「不趨」至「無容」○釋曰：凡趨有二種：有疾趨，「行而張足曰趨」是也；有徐趨，則下文「舒武，舉前曳踵」是也。今此經云「不趨」者，不爲疾趨，故云「主慎也」。既不云疾趨，又不爲下文徐趨，但徐疾之間爲之，故「以進而益恭，爲威儀也」。執玉

者則唯舒武，舉前曳踵。唯舒者，重玉器，尤慎也。武，迹也。舉前曳踵，備躔跲也。今文無「者」。古文「曳」作「拙」。

**疏**「執玉」至「曳踵」○釋曰：此篇直見在國以禽摯相見之禮，<sup>②</sup>無執玉朝聘鄰國之事，而云「執玉者」，因執摯相見，故兼見朝聘執玉之禮也。<sup>③</sup>案《玉藻》記徐趨之節云「圈豚行」，又與此不同者，文有詳略，俱是徐趨也。○注「唯舒」至「作拙」○釋曰：云「唯舒者，重玉器，尤慎也」者，案《玉藻》云「執龜玉不趨」，不趨者，不爲疾

<sup>①</sup>「君」上原無「寡」字，阮校云：毛本有「寡」字。《玉藻》有「寡」字。據補。

<sup>②</sup>「以」，阮校云：閩本作「爲」。

<sup>③</sup>「見」，阮校云：毛本作「言」。

趨，又《曲禮》云「凡執主器，執輕如不克」，故爲「重玉器，尤慎也」。云「備蹠跲也」者，蹠跲則顛倒，恐損玉，故徐趨也。凡自稱於君，士、大夫則曰下臣，宅者在邦則曰市井之臣，在野則曰草茅之臣，庶人則曰刺草之臣，他國之人則曰外臣。宅者，謂致仕者也。致仕者，去官而居宅，或在國中，或在野。《周禮·載師》之職：「以宅田任近郊之地。」刺猶剷除也。今

「宅」爲「託」。古文「茅」作「苗」。疏「凡自」至「外臣」○釋曰：云「凡自稱於君，士、大夫則曰下臣」者，此與君言之時。案《玉藻》云「上大夫曰下臣」，與此同也。○注「宅者」至「作苗」○釋曰：此亦自稱於君。以其致仕不在，故指宅而言，故曰「宅者，謂致仕者也」。云「或在國中，或在野」者，案《爾雅》「郊外曰野」，則自郊至畿五百里內皆名野。又案《鄉大夫職》「國中七尺，野自六尺」，此亦云在國、在野，相對其言，國外則云野，則云宅在野者，<sup>①</sup>城外畿內皆是也。云「《載師》之職」者，彼鄭注云「宅田，致仕者之家所受田也」，引之證彼言「宅田」據地，此言「宅」據所居，一也。云「刺猶剷除也」者，案《詩》有「其鏹斯趙」，注云「趙，刺也」，故以刺爲剷除草

木者也。

儀禮卷第三 經七百五十三 注一千六百八十九  
儀禮疏卷第七 元缺第六葉，今補。

江寧府知府陽城張敦仁編校 元和縣  
學生員顧廣圻覆校

① 「則」上，阮校云：毛本有「國內」二字。

## 儀禮疏卷第八 儀禮卷第四

唐朝散大夫行大學博士弘

文館學士臣賈公彥等撰

### 鄉飲酒禮第四疏

「鄉飲酒禮第四」○鄭《目錄》云：

「諸侯之鄉大夫三年大比，獻賢者能者於其君，<sup>①</sup>以禮賓之，與之飲酒。於五禮屬嘉禮。大戴此乃第十，小戴及《別錄》此皆第四。」○釋曰：鄭知此鄉飲酒是諸侯之鄉大夫獻賢能法者，案《春官·小胥》掌樂縣之法，而云「凡縣鍾磬，半爲堵，全爲肆」，注云「鍾磬者編縣，二八十六枚而在一虞，謂之堵。鍾一堵磬一堵謂之肆。半之者，謂諸侯之卿大夫士也。諸侯之卿大夫半天子之卿大夫，西縣鍾，東縣磬。士亦半天子之士，縣磬而已」，今此下唯縣磬而無鍾，故以爲諸侯鄉大夫也。若然，謂諸侯鄉大夫，<sup>②</sup>是大夫爲之，亦應鍾磬俱有，而直有磬者，鄭彼注云「賓鄉人之賢者，<sup>③</sup>從士禮也」，故縣磬而已。若然，天子鄉大夫賓

賢能從士禮，亦鍾磬俱有，不得獨有磬也。知諸侯之鄉大夫非士者，案《鄉射·記》云「士則鹿中，大夫則兕中」，又經有「堂則物當楣，序則物當棟」，則非直州射，兼有諸侯鄉大夫「以五物詢衆庶」行射之禮，則知諸侯鄉大夫是大夫爲之可知也。凡鄉飲酒之禮，其名有四。案此賓賢能謂之鄉飲酒，一也。又案《鄉飲酒義》云「六十者坐，五十者立侍」，是黨正飲酒，亦謂之鄉飲酒，二也。《鄉射》州長春秋習射於州序，先行鄉飲酒，亦謂之鄉飲酒，三也。案《鄉飲酒義》又有卿大夫、士飲國中賢者，用鄉飲酒，四也。其《王制》云「習射尚功，習鄉尚齒」，還是鄉飲酒黨飲酒法。<sup>④</sup>

### 儀禮 鄭氏注

#### 鄉飲酒之禮。主人就先生而謀賓、介。

主人，謂諸侯之鄉大夫也。先生，鄉中致仕者。賓、介，處士賢者。《周禮·大司徒》之職：「以鄉三物教萬民，而賓

① 「獻」上，阮校云：《釋文》有「將」字。

② 「謂」上，曹校云似脫「鄭」字。

③ 「云」，阮校云：當從《要義》作「方」。

④ 「鄉飲酒黨」，阮校云：毛本作「州長黨正」。

興之。一曰六德：知、仁、聖、義、忠、和。二曰六行：孝、友、睦、姻、任、恤。三曰六藝：禮、樂、射、御、書、數。」《鄉大夫》：「以正月之吉受法于司徒，退而頒之于其鄉吏，使各以教其所治，以考其德行，察其道藝。及三年大比而興賢者能者，鄉老及鄉大夫帥其吏，與其衆寡，以禮禮賓之。厥明，獻賢能之書於王。」是禮乃三年正月而一行也。諸侯之鄉大夫貢士於其君，蓋如此云。古者年七十而致仕，老於鄉里，大夫名曰父師，士名曰少師，而教學焉，恒知鄉人之賢者，是以大夫就而謀之。賢者爲賓，其次爲介，又其次爲衆賓，而與之飲酒，是亦將獻之，以禮禮賓之也。今郡國十月行此飲酒禮，以《黨正》每歲「邦索鬼神而祭祀，則以禮屬民，而飲酒于序，以正齒位」之說然，此篇無正齒位之事焉。凡鄉黨飲酒，必於民聚之時，欲其見化，知尚賢尊長也。《孟子》曰：「天下有達尊三：爵也、德也、齒也。」疏「鄉飲」至「賓介」○釋曰：自此至「介亦如之」，論鄉大夫與先生謀賓、介并戒告之儀。「主人就先生而謀賓、介」者，謂鄉大夫尊敬之，先就庠學者若先生，<sup>①</sup>謀此二人，道藝優者爲賓，稍劣者爲介。○注「主人」至「齒也」○釋曰：云「賓、介，處士賢者」，案《玉藻》云「大夫素帶，士練帶，居士錦帶，弟子縞帶」，鄭玄以「居士」在「士」之下，

「弟子」之上，解爲道藝處士，非朝廷之士。此處士亦名「君子」，即《鄉射禮》云「徵唯所欲，以告於先生，君子可也」，鄭亦云「君子，有大德行不仕者」，以其未仕，有德自處，故名處士君子也。云「賢者」，義取鄉大夫之興賢能者而言也。云「《周禮》至「書數」，並《大司徒》職文。故彼鄭注云：「物猶事也。興猶舉也。民三事教成，鄉大夫舉其賢者能者，以飲酒之禮賓客之，既則獻其書於王矣。知，明於事。仁，愛人以及物。聖，通而先識。義，能斷時宜。忠，言以中心。和，不剛不柔。善於父母爲孝，善於兄弟爲友。睦，親於九族。姻，親於外親。任，信於友道。恤，振憂貧者。禮，五禮之義。樂，六樂之歌舞。射，五射之法。御，五御之節。書，六書之品。數，九數之計。」引此天子司徒者，欲兼諸侯司徒，亦使鄉大夫教民以三物，教成亦使鄉大夫行鄉飲酒之禮，尊之爲賓客，興舉之也。云「鄉大夫」已下至「於王」，並《周禮·地官·鄉大夫》職文。云「正月之吉」，謂周之正月朔日也。云「受法于司徒」者，謂六鄉大夫皆於大司徒處受三物教民賓舉之法

①「先就庠學者若先生」，曹校云：「者，當爲『中』。若，盧氏文昭改『告』，從之。」

也。云「退而頒之于其鄉吏，使各以教其所治」者，吏即州長、黨正、族師、閭胥之等是也。云「以考其德行，察其道藝」者，「德行」即六德、六行，道藝正謂民中有道藝者，考察知其優者，擬舉之也。云「及三年大比，而興賢者能者」，「大比」謂三年大案比戶口之時而興舉之。賢者即德行者也，能者即道藝者也。云「鄉老」謂三公，二鄉公一人。云「及鄉大夫帥其吏」者，即帥其鄉吏州長已下。云「與其衆寡」者，即鄉中之人也。云「以禮禮賓之」者，以鄉飲酒之禮禮而賓舉之也。云「厥明，獻賢能之書於王」者，今日行鄉飲酒之禮，至其明日，獻此賢能之書于王，王再拜而受之，登于天府也。云「是禮乃三年正月而一行也」者，欲見彼是天子鄉大夫法，諸侯鄉大夫無文，以此約之，故云「諸侯之鄉大夫貢士於其君，蓋亦如此云」，但無正文，故云「蓋」以疑之也。云「古者年七十」至「學焉」，案《略說》云「大夫七十而致仕，老於鄉里，名曰父師，士曰少師，以教鄉人子弟於門塾之基，而教之學焉」是也。<sup>①</sup>云「賢者爲賓，其次爲介，又其次爲衆賓，而與之飲酒，是亦將獻之，以禮禮賓之也」者，謂據此經，諸侯鄉大夫貢士之法，亦如天子之鄉大夫貢法，故云亦也。<sup>②</sup>若據鄉貢一人，其介與衆賓不貢之矣，但立介與衆賓，輔實行鄉飲酒

之禮，待後年還以貢之耳。案《射義》云「古者天子之制，諸侯歲獻貢士」，注引舊說「大國三人，次國二人，小國一人」，大國三鄉，次國二鄉，小國一鄉，所貢之士與鄉同，則鄉送一人至君所，其國有遂，數亦同其鄉，并有公邑、采地，皆有賢能貢之，而貢士與鄉數同。不言遂與公邑、采地所貢者，蓋當鄉送一人至君所，君又總校德之大小，取以貢之，縱取鄉外，仍準鄉數爲定。鄉大夫雖行飲酒禮，賓之于君其簡訖，<sup>③</sup>仍更行飲酒禮，賓之於王。是《易·觀》「盥而不薦」，<sup>④</sup>鄭注云「諸侯貢士於天子，鄉大夫貢士於其君，必以禮賓之。唯主人觀而獻賓，賓盥而酢主人，設薦俎，則弟子也」，是鄉大夫及諸侯貢士皆行飲酒禮禮賓也。云「今郡國」至「之說然」者，鄭欲解此《鄉飲酒》貢士法，彼漢時所行飲酒禮者是正齒位，與此不同之意。漢

①「學」，阮校云：《要義》作「孝」。

②「亦」原本作「六」，據阮本改。

③「君其」，阮校云：毛本作「其君」。

④「是」，盧文弨疑是衍文，或當作「案」。阮校云：下當有「以」字，疏每省之。

時已罷諸侯之國而爲郡，郡有大守，而封王子、母弟者仍爲國，故云「郡國」也。云「十月行此飲酒禮」者，謂行此鄉飲酒禮也。云「以《黨正》每歲邦索鬼神而祭祀」者，則《禮記·郊特牲》云：「蜡者，索也，歲十二月合聚萬物而索饗之。」周謂之十二月，即夏之十月，農功畢而蜡祭也。云「則以禮屬民而飲酒于序，以正齒位」者，屬，聚也，謂當蜡祭之月，黨正聚民於序學中，以三時務農將闕於禮，此時農隙，故行正齒位之禮。則《禮記·鄉飲酒義》云「六十者坐，五十者立侍。六十者三豆，七十者四豆，八十者五豆，九十者六豆」，年長者在上，是正齒位之法也。云「之說然」者，漢時十月飲酒禮取此《黨正》之文而然，與此篇《鄉飲酒禮》異也。云「此篇無正齒位焉」者，以其此篇以德行為本而貢之，無《黨正》正齒位法也。云「凡鄉黨飲酒，必於民聚之時」者，此鄉飲酒必於三年大比民聚之時，《黨正》鄉飲酒亦於大蜡民聚之時也。云「皆欲其見化，知尚賢尊長也」者，尚賢據此篇鄉飲酒，尊長據《黨正》鄉飲酒也。但《黨正》飲酒以鄉大夫臨觀行禮，或鄉大夫居此黨內，則亦名鄉飲酒也。云《孟子》者，《孟子·公孫丑》篇。齊王召，孟子不肯朝，後不得已而朝之，宿於大夫景丑之家。<sup>①</sup>景子譏之曰：<sup>②</sup>「禮云，父召無諾，君召不俟駕而

行，<sup>③</sup>固將朝矣。聞君命而遂不果，宜與夫禮，若不相似然？」對曰：「天下有達尊三：爵也、德也、齒也。朝廷莫如爵，鄉黨莫如齒，輔世長民莫如德，惡有得其一，<sup>④</sup>以慢其二哉？」是也。引之者，證鄉大夫飲酒是尚德也，《黨正》飲酒尊長尚齒也。<sup>⑤</sup>爵則於此無所當，連引之耳。主人戒賓，賓拜辱，主人荅拜。乃請賓，賓禮辭，許。主人再拜，賓荅拜。戒，警也，告也。拜辱，出拜其自屈辱，至己門也。請，告以其所爲來之事。不固辭者，素所有志。**疏**「主人」至「荅拜」○注「戒警」至「有志」○釋曰：云「拜辱，出拜其自屈辱，至己門也」者，知賓出門者，見《冠禮》「主人宿賓，賓出門左」，《鄉射》戒賓亦出門，故知此亦出門。云「所爲來之事」者，謂行鄉飲酒之禮也。云「不固辭者，素所有志」者，不如《士相見》固辭，

- ①「丑」下，阮校云：毛本有「氏」字。
- ②「子」，阮校云：《要義》作「丑」。
- ③「君」下，阮校云：毛本有「命」字。
- ④「有得」，阮校云：毛本作「得有」。
- ⑤「尊長」，阮校云：毛本作「是」。

此禮辭即許者，以其主人與先生謀時，賓已知欲貢己，又賓以學習德業，擬爲賓主，情意相許，是以不固辭，爲素有志也。案《冠禮》主人先拜，賓荅拜，此賓先拜，主人荅拜者，彼《冠禮》主人戒同寮，同寮尊，又使之加冠於子，尊重之，故主人先拜；此則鄉大夫尊矣，賓是鄉人，卑矣，又將貢己，宜尊敬主人，故賓先拜辱也。是以下注云「去又拜辱者，以送謝之」也。主人退，賓拜辱。退猶去也。去又拜辱者，以送謝之。介亦如之。如戒賓也。疏

「介亦如之」○注「如戒賓也」○釋曰：言「如戒賓」者，亦如上「主人戒賓」已下，「賓拜辱」已上之事。「謀賓、介」及「戒」亦言賓、介意，<sup>①</sup>不言衆賓，衆賓德劣。但謀介時，雖不言衆賓，亦當謀之。故上注兼言「其次爲衆賓」。至於戒速之日，必當遣人戒速使知，但略而不言，故下云「賓及衆賓皆從之」是也。《鄉飲酒義》云「主人親速賓及介，而衆賓自從之」，亦據不得主人戒速，而爲自從也。乃席賓、主人、介、席，敷席也。夙興往戒，歸而敷席。賓席牖前，南面。主人席阼階上，西面。介席西階上，東面。疏「乃席賓主人介」○注「席敷」至「東面」○釋曰：知「夙興往戒，歸而敷席」，不別日者，下記云「鄉朝服而謀賓、

介，皆使能」，而「不宿戒」，是同日也。鄭知賓、介與主人席位如此者，案《鄉飲酒義》云「主人者尊賓，故坐賓於西北，而坐介於西南以輔賓。賓者，接人以義者也，故坐於西北。主人者，接人以仁以德厚者也，故坐於東南，而坐僕於東北，以輔主人也」。又云「賓必南面，介必東鄉，介賓主也」，《鄉射》云「乃席賓，南面。席主人于阼階上，西面」，以此故知賓、主及介其位然也。衆賓之席，皆不屬焉。席衆賓於賓席之西。不屬者，不相續也。皆獨坐，明其德各特。疏「衆賓」至「屬焉」○注「席衆」至「各特」○釋曰：鄭知衆賓席在「賓席之西」者，見《鄉射》云「席賓南面，東上，衆賓之席繼而西」，此衆賓之席亦當然，但此不屬爲異耳。云「皆獨坐，明其德各特」者，《鄉射》注云「言繼者，甫欲習衆庶，未有所殊別」，此乃特貢於君，故衆賓之席皆不屬焉，明三物已久，其德各特，故不屬續。其席雖不屬，猶統賓爲位，同南面也。尊兩壺于房戶間，斯禁，有玄酒，在西。設篚于禁南，東肆。加二勺于兩壺。斯禁，禁切地無足者。玄酒在

①「意」，阮校云：毛本作「竟」。

西，上也。肆，陳也。

**疏**「尊兩」至「兩壺」○注「斯禁」至

「陳也」○釋曰：凡設尊之法，但醴尊見其質，皆在房內，故《士冠禮》禮子、《婚禮》禮婦醴皆在房隱處。若然，《聘禮》禮賓尊於東廂，不在房者，見尊欲與卑者為禮，相變之法。設酒之尊皆於顯處見其文，是以此及醢子與《鄉射》、《特牲》、《少牢》、《有司徹》皆在房戶之間是也。《燕禮》、《大射》尊在東楹之西者，君尊專大惠也。云「設筐于禁南，東肆」者，言「東肆」以頭首為記，從西向東為肆，則大頭在西也。云「斯禁，禁切地無足者」，斯，漸也，漸盡之名，故知「切地無足」。《昏禮》、《冠禮》皆云「禁」者，士禮以禁戒為名，卿大夫、士並有禁名，故鄭以大夫、士雙言也。是以《玉藻》云「大夫側尊用楹，士側尊用禁」，注云「楹，斯禁也」，大夫、士禮之異也。《禮器》云「大夫、士楹禁」，注云「楹，斯禁也，謂之楹者，無足有似於楹，或因名云耳。大夫用斯禁，士用楹禁」，然則禁是定名，言楹者是其義稱，故《禮器》大夫、士總名為楹禁。案《特牲禮》云實獸於楹，注云「楹之制如今大木輿矣」，則楹是輿，非承尊之物，「以禁與斯禁無足似輿，故世人名為楹」。若然，周公制禮，《少牢》名為楹，則以周公為「世人」，或有本無「世人」字者，是以《少牢》不名斯禁，謂之為楹，取不為酒戒。《特

牲》云「壺禁在東序」，記云「壺、楹禁饌于東序」，注云「禁言楹者，祭尚厭飫，得與大夫同器，不為神戒也」，其實不用。云「楹禁」，不敢與大夫同名「斯禁」，作記解注，故云「士用楹禁」，明與《少牢》「楹」同也。若然，士之楹禁，大夫之斯禁，名雖異，其形同，是以《禮器》同名「楹禁」也。其餘《士冠》、《昏禮》禮賓用醴，不飲，故無禁，不為酒戒。若天子、諸侯承尊之物謂之豐，上有舟，是尊與卑異號也。設洗于阼階東南，南北以堂深，東西當東榮。水在洗東，筐在洗西，南肆。榮，屋翼。

**疏**「設洗」至「南肆」○注「榮屋翼」○釋曰：云「南北以堂

深」者，堂深謂從堂廉北至房室之壁，堂下洗北去堂遠近深淺取於堂上深淺。假令堂深二丈，洗亦去堂二丈，以此為度。云「榮，屋翼」者，榮在屋棟兩頭，與屋為翼，若鳥之有翼，故《斯干》詩美宣王之室云「如鳥斯革，如翬斯飛」，與屋為榮，故云榮也。羹定。肉謂之羹，定猶孰也。

**疏**「羹定」○注「肉謂」至「孰也」○釋曰：云「肉謂之羹」

者，《爾雅》文。言「肉」，正謂其狗。孰云「定」者，孰即定止然，故以定言之。言此者，以與速賓時節為限，不敢煩勞賓，故限之也。主人速賓，賓拜辱，主人荅拜，



還，賓拜辱。速，召也。還猶退。

**疏**「主人」至「拜辱」

○釋曰：自此至「皆從之」，論主人往賓門召之使來之事。案《鄉射》云「主人朝服，乃速賓。賓朝服出迎，再拜」，彼云「乃速賓」，此不云「主人乃」者，彼戒、速別服，故云「乃」以閒之，此戒、速雖與彼同，但此戒、速同服，故不云「乃」。云「主荅拜，還，賓拜辱」，案《聘禮》云賓入境，至近郊，使下大夫至賓館，下大夫遂以賓入，賓送不拜。又《公食大夫禮》使大夫戒賓，「大夫還，賓不拜送，遂從之」，鄭注云「不拜送者，爲從之，不終事皆不拜送」。此獨拜送者，亦是鄉大夫尊，賓卑，又擬貢，故特拜辱而送之，異於餘者。介亦如之。如速賓也。賓及衆賓皆從之。從猶隨也。言及衆賓，介亦在其中矣。

**疏**「賓及」至「從之」○

注「從猶」至「中矣」○釋曰：鄭云「言及衆賓，介亦在其中矣」者，上文戒及速皆言賓與介，不言衆賓，及從主人來，即言賓及衆賓。衆賓不戒不速，尚從主人，則介在，從主人可知也。主人一相，迎于門外，再拜賓。賓荅拜。拜介。介荅拜。相，主人之吏，擯贊傳命者。**疏**「主人」至「荅拜」○注「相主」至「命者」○釋曰：自此至「荅再拜」，論主人迎賓入，升堂并拜至之事。云「主

人一相，迎于門外」者，謂主人於群吏中立一相，使傳賓主之命，主人乃自出迎賓於大門外。必非一相迎賓者，案

《鄉飲酒義》云「主人拜，迎賓于庠門之外」，明主人自迎。

若然，主人輒言「一相」者，欲見使一相傳命乃迎，故云「相，主人之吏，擯贊傳命者」也。若然，《士相見》注「異日則拜迎，同日不拜迎」者，彼以摯相見法，此自以賓舉賢能，故與彼異也。揖衆賓。差益卑也。拜介、揖衆賓，

皆西南面。**疏**「揖衆賓」○注「差益」至「南面」○釋曰：云

「差益卑」者，以上文主人迎賓而拜介，是介差卑於賓，今於衆賓不拜，直揖之而已，故云「差益卑也」。知「拜介、揖衆賓皆西南面」者，以其賓、介、衆賓立位在門外，位以北爲上，主人與賓正東西相當，則介與衆賓差在南東面明，知主人正西面拜賓，則側身向西南拜介、揖衆賓矣。主人揖，先人。揖，揖賓也。先入門而西面。**疏**「主人

揖先人」○注「揖揖」至「西面」○釋曰：此鄉大夫行鄉飲酒在庠學，唯有一門。即向階，門內既有三揖，故主人導賓，揖而先入門，至內霤，西向待賓也。賓厭介，入門左。介厭衆賓入。衆賓皆入門左，北上。皆入門西，東面。賓之屬相厭，變於主人也。推手曰揖，引

手曰厭。今文皆作「揖」。又曰「衆賓皆入左」，無「門」。

**疏**「賓厭」至「北上」○注「皆人」至「無門」○釋曰：主人入

後賓乃厭介，介厭衆賓相隨入門，皆東面北上定位。<sup>①</sup>賓

既北上，主人西面相向，揖訖，乃相背各向堂塗，介與衆賓

亦隨賓至西階下也。云「賓之屬相厭，變於主人也」者，以

賓與介、衆賓等自用引手而入，故不揖，是變於主人也。

云「推手揖，引手曰厭」者，<sup>②</sup>厭字或作撻字者，古字義亦

通也。<sup>③</sup>云「推手揖」者，案《周禮·司儀》云「土揖庶姓，

時揖異姓，天揖同姓」，鄭以「推手小下之」爲「土揖」，「平

推手」爲「時揖」，「推手小舉之」爲「天揖」，皆以推手爲揖。

又案僖二年《公羊傳》「荀息進曰：『虞、郭見與？』」獻公揖

而進之，何休云「以手通指曰揖」。與此別者，「推手」解

其揖狀，<sup>④</sup>「通指」道其揖意也，鄭則解揖體，何氏釋其揖

意，相兼乃足也。云「引手曰厭」者，以手向身引之。云

「今文皆作揖」者，鄭不從也。云「又曰衆賓皆入門左，無

門」，亦不從也。主人與賓三揖，至于階，三讓，

主人升，賓升。主人阼階上當楣北面再拜。

賓西階上當楣北面荅拜。三揖者，將進，揖；當

陳，揖；當碑，揖。楣，前梁也。復拜，拜賓至此堂，尊之。

**疏**「主人」至「荅拜」○注「三揖」至「尊之」○釋曰：云「三

讓，主人升」者，主人先升，賓後升，故《鄉射》云「主人升一

等，賓升」是也。云「三揖者，將進，揖；當陳，揖；當碑，

揖」者，《爾雅》「陳，堂塗也」。云「楣，前梁也」者，對後梁

爲室戶上。云「復拜，賓至此堂，尊之」者，案《公食禮》云

「公升二等，賓升」，「公當楣北鄉至再拜」，《燕禮》、《大射》

皆云「主人升自西階，賓右至再拜」，《鄉飲酒義》亦云「拜

至，拜洗」。此不云「至」者，略之，是知此升堂拜亦是拜至

可知。凡拜至者，皆是尊之也。主人坐，取爵于筐，

降洗。將獻賓也。**疏**「主人」至「降洗」○注「將獻賓也」

○釋曰：自此至「主人阼階上荅拜」，論主人盥洗、獻賓之

節也。云「主人坐，取爵于筐」者，筐在堂上尊南，故取之

乃降也。賓降。從主人也。主人坐，奠爵于階

上。

①「定」，阮校云：閩本作「賓」。

②「揖」上，阮校云：毛本、《要義》有「曰」字。又《要義》

下「推手曰揖」句無「曰」字。

③「亦通」，阮校云：《要義》作「通用」。

④「揖」原作「厭」，據重刊單疏本改。

前，辭。重以己事煩賓也。事同曰讓，事異曰辭。

**疏**

注「重以」至「曰辭」○釋曰：主人獻賓，乃是主人人事，故云「重以己事煩賓也」。云「事同曰讓，事異曰辭」者，事同謂若上文主人與賓俱升階而云「三讓」是也，事異若此文主人有事，賓無事，是事異則曰辭。此對文爲義，若散文則通。是以《周禮·司儀》云「主君郊勞，交擯三辭，車逆拜辱，三揖，三辭，拜受」，注云：「三辭，重者先辭，辭其以禮來於外，後辭，辭升堂。」事同而云辭，是其通也。賓對。對，荅也。賓主之辭未聞。

**疏**注「賓主之辭未聞」○釋

曰：其辭未聞者，謂若《冠禮》醮辭之等，雖行事辭不見，於後以次見辭，此則無見辭之事，故云「未聞」也。主人坐

取爵，興，適洗，南面坐，奠爵于篚下，盥洗。

已盥乃洗爵，致絜敬也。今文無「奠」。

**疏**「主人」至「盥

洗」○注「已盥」至「無奠」○釋曰：案《鄉飲酒義》云「主人盥洗揚觶，所以致絜也。拜至，拜洗，拜受，拜送，所以致敬也」。此經先言盥，後言洗，則盥手乃洗爵者，所以致絜，鄭取《鄉飲酒義》爲言也。若然，盥手洗爵，止是致絜，拜受之等，乃是致敬。并言敬者，鄭注兼拜至、拜受而言

耳。賓進，東北面辭洗。必進東行，示情。

**疏**「賓

進東北面辭洗」○釋曰：案下經云「賓復位，當西序，東面」，注云「言復位者，明始降時位在此」者，案《鄉射》「賓進，東北面辭洗」，彼注云「必進者，方辭洗，宜違其位也。言東北面，則位南於洗矣」。是其賓初降立，至于序南，東鄉，至於主人洗爵，乃東行，故此得「北面辭洗」也。云「示情」者，賓進前就主人，示謙下主人之情也。主人坐，奠爵于篚，興，對。賓復位，當西序，東面。

言復位者，明始降時位在此。

**疏**「主人」至「東面」○注

「言復」至「在此」○釋曰：上經奠爵于階前者，主人未洗，見賓降，即奠爵，故在階前奠爵。此即至洗，<sup>①</sup>將洗爵，見賓辭，故「奠爵於篚，興，對」，故不同也。云「言復位者，明始降時位在此」者，上始降時直言「賓降」，不言處所，於此見之，是舉下以明上之義也。主人坐取爵。沃洗者西北面。沃洗者，主人之群吏。

**疏**「主人」至「北面」

①「即」，阮校引浦鏜云「既」誤作「即」。

○注「沃洗」至「群吏」○釋曰：知「主人群吏」者，下記云「主人之贊者西面，北上，不與」，注云「贊，佐也，謂主人之屬佐助主人之禮事，徹鼎沃盥，設薦俎」是也。卒洗，主人壹揖，壹讓，升。俱升。古文「一」作「壹」。<sup>①</sup>

**疏**「卒洗」至「讓升」○注「俱升」○釋曰：知「俱升」者，《鄉射》云「主人卒洗，一揖，一讓，以賓升」，明俱升可知。若然，上文主人先升，賓乃升者，以初至之時，賓客之道，進宜難，故主人升導之。至此以辭讓訖，故略威儀而俱升也。

賓拜洗。主人坐，奠爵，遂拜，降盥。復盥，爲手盥汗。**疏**「賓拜」至「降盥」○注「復盥爲手盥汗」○釋曰：言「奠爵，遂拜」者，因事曰遂。是以《燕禮》云「賓受酬，坐祭酒，遂奠于薦東」，注云「遂者，因坐而奠，不北面」，是其類也。凡賓主行事，相報皆言荅，此不言荅，省文也。賓降，主人辭，賓對，復位，當西序。

卒盥，揖，讓，升。賓西階上疑立。疑讀爲「疑然從於趙盾」之疑。疑，正立自定之貌。**疏**「賓降」至「疑立」○注「疑讀」至「之貌」○釋曰：言「揖，讓，升」，不言「一揖，一讓」，從上可知。云「疑讀爲「疑然從於趙盾」之疑」，

疑，正立自定之貌」者，案宣公六年《公羊傳》云「晉靈公欲殺趙盾，於是伏甲于宮中，召趙盾而食之。趙盾之車右祁彌明者，國之力士也，仇然從乎趙盾而入，放乎堂下而立，何休云「仇然，壯勇貌」，鄭氏以「仇然從乎趙盾而入，放乎堂下而立」，不取何休注義，以《鄉射》注云「疑，止也，有矜莊之色，自定」，其義不殊，字義與何少異也。主人坐取爵，賓之，賓之席前西北面獻賓。獻，進也，進酒於賓。**疏**「主人」至「獻賓」○注「獻進」至「於賓」○釋曰：云「西北面」者，賓在西階北面，將就席受，故「西北面」，向其席故也。賓西階上拜。主人少退。少退，少辟。賓進受爵以復位。主人阼階上拜送爵。賓少退。復位，復西階上位。**疏**「賓進」至「少退」○釋曰：云「賓進」者，以賓西階上疑立，今見主人西北面獻於己席前，故賓進，將於席前受之故也。案《鄉

① 「一作壹」，阮校云：徐本、毛本、《集釋》、《通解》、《要義》「壹」、「一」互易。

射《云》賓進受爵於席前，復位，此不言席前，文不具也。  
**薦脯醢。**薦，進也。進之者，主人有司。**疏**「薦脯醢」

○注「薦進」至「有司」○釋曰：知非主人自薦者，案《昏禮》禮賓贊者薦脯醢，《周禮》膳宰薦脯醢，皆非主人，故知此亦非主人，是有司也。**賓升席自西方。**升由下也。

升必中席。**疏**「賓升席自西方」○注「升由」至「中席」○

釋曰：案《曲禮》云「席南鄉北鄉，以西方爲上」，今升席自西方。云「升由下」者，以賓統於主人，以東方爲上，故以西方爲升由下也。**乃設折俎。**牲體枝解，節折在俎。

**疏**「乃設折俎」○注「牲體」至「在俎」○釋曰：凡解牲體之

法，有全蒸其豚解爲二十一體，<sup>①</sup>體解即此折俎是也。是以下有「賓俎脊、脅、肩」，「介俎脊、脅、肫、胙」，是體解也。主人阼階東疑立。賓坐，左執爵，祭脯醢，

坐，坐於席。祭脯醢者，以右手。**疏**「主人」至「脯醢」○

注「坐坐」至「右手」○釋曰：知賓坐坐於席上者，上文賓升席，下文降席，故知此坐在席可知。云「祭脯醢者，以右手」者，此經「左執爵」，明祭用右手，是以《鄉射》亦云「右祭脯醢」。莫爵于薦西，興，右手取肺，卻

左手執本，坐，弗繚，右絕末以祭，尚左手，噉之，興，加于俎。興，起也。肺，離之本端厚大者。繚猶紵也。大夫以上威儀多，紵絕之。尚左手者，明垂紵之，乃絕其末。噉，嘗也。**疏**「莫爵」至「于俎」○

注「興起」至「嘗也」○釋曰：莫爵於薦右者，爲取肺奠之，將舉，故奠於右。《禮記·少儀》云「取俎進俎，不坐」，是以取時莫爵興，至加于俎又興也。云「肺，離之本端厚大者」，此是舉肺判者，於下記文。<sup>②</sup>本謂根本，肺之大端，故云「厚大」。云「繚猶紵也」者，弗繚即弗紵，一也。云「大夫以上威儀多」者，此《鄉飲酒》大夫禮，故云繚祭，《鄉射》士禮，云「絕祭」，但云繚必兼絕，言絕不得兼繚，是以此經云繚兼言絕也。言「大夫以上」，則天子、諸侯亦繚，絕兼有，但禮篇亡，無以可知也。案《周禮》

<sup>①</sup>「其豚解」，阮校疑「其」當在「豚解」下，屬「爲二十一體」爲句。曹校云：「此數語有脫字，當云：『有全蒸其豚，謂之豚解，有解爲二十一體，謂之體解，體解即此折俎是也。』」

<sup>②</sup>「於」上，曹校云似脫「見」字。

大祝云：①辨九祭，「七曰絕祭，八曰繚祭」，注云「本同，禮多者繚之，禮略者絕則祭之」，亦據此與《鄉射》而言也。大夫已上為繚祭，《燕禮》、《大射》雖諸侯禮，以賓皆大夫為之，臣在君前，故不為繚祭，皆為絕祭也。云「嘑，嘗也」者，嘑至齒則嘗之也。

**坐挽手，遂祭酒。**挽，拭也。

古文「挽」作「說」。

② **疏**「坐挽手遂祭酒」○注「挽拭」至

「作說」○釋曰：案《內則》事佩之中有挽，則賓客自有挽巾以拭手也。坐挽手，因事曰遂，因坐祭酒，故云「遂」也。

案《鄉射》「坐挽手，執爵，遂祭」，此不言「執爵」，省文也。

**興，席末坐，啐酒，啐亦嘗也。**

**疏**「興席末坐啐酒」

○注「啐亦嘗也」○釋曰：言「席末」，謂於席之尾，故云

「末」。《鄉飲酒義》云「祭薦祭酒，敬禮也。嘑肺，嘗禮也。

啐酒，成禮也。於席末，言是席之正，非專為飲食也。此

所以貴禮而賤財也」，注云「祭薦、祭酒、嘑肺於席中，唯啐

酒於席末」是也。啐酒於席末者，酒是財，賤財之義也。

云「啐亦嘗」者，亦前肺云「嘑」，是至齒為嘗。此酒云

「啐」，謂入口為嘗，雖至齒、入口不同，皆是嘗也。又肺於

前用之，不得言「成禮」，酒後乃用，故云「成禮」，異於肺

也。降席坐，奠爵，拜，告旨，執爵興。主人

阼階上荅拜。降席，席西也。旨，美也。

**疏**「降席」至

「荅拜」○注「降席」至「美也」○釋曰：賓拜告旨，主人拜崇酒，其節同，義即異矣。賓言旨，甘主人之味，啐則拜之。

主人云崇者，崇，充也，謝賓以酒惡相充實，飲訖乃崇酒，

先後亦同也。③ 賓西階上北面坐，卒爵，興，坐

奠爵，遂拜，執爵興。主人阼階上荅拜。卒，

盡也。於此盡酒者，明此席非專為飲食起。

**疏**「賓西」至

「荅拜」○注「卒盡」至「食起」○釋曰：言「遂拜」者，亦因奠

爵不起，因拜也。④ 云「於此盡酒者，明此席非專為飲食

起」者，但此席為賓賢能起，故謂在席盡爵，⑤ 於此西階上

① 「云」下，阮校云：《通解》、毛本有「繚祭以手從肺本循

之至于末乃絕以祭絕祭不循其本直絕以祭」二十六

字。

② 「說」，阮校云：疑「說」字本作「悅」。下同。

③ 「亦」下，曹校云脫「不」字。

④ 「因」，曹校云似當為「遂」。

⑤ 「謂」下，阮校云：毛本有「不」字。《通解》無「謂」字。曹校云有「不」字似是。

卒之也。云「不專爲飲食」者，<sup>①</sup>啐酒於席末，兼爲飲食之事，故以「不專」言之也。

### 儀禮疏卷第八

江寧府知府陽城張敦仁編校 元和縣

學生員顧廣圻覆校

① 「食」下，阮校云：毛本有「起」字。

## 儀禮疏卷第九

唐朝散大夫行大學博士弘

文館學士臣賈公彥等撰

賓降洗。將酢主人。

**疏**「賓降洗」○注「將酢主人」○

釋曰：自此已下至「西階上荅拜」，論賓酢主人之事。云

「將酢主人」者，案《爾雅》云「酢，報也」，前得主人之獻，今將酌以報之，故降洗而致絜敬，故云「將酢主人」也。主

人降。亦從賓也。降，降立阼階東，西面。**疏**「主人降」

○注「降立」至「西面」<sup>①</sup>○釋曰：知面位如此者，案下云

「主人復阼階東，西面」，故知此當於阼階東，西面也。賓

坐奠爵，興，辭。西階前也。**疏**「賓坐奠爵興辭」○

注「西階前也」○釋曰：鄭知「西階前」者，《鄉射》云「賓西

階前東面坐奠爵，興，辭降」，此亦然故也。主人對。

賓坐取爵，適洗南，北面。主人阼階東南面

辭洗。賓坐奠爵于筐，興，對。主人復阼階

東，西面。賓東北面盥，坐取爵，卒洗，揖讓

如初，升。主人拜洗。賓荅拜，興，降盥，如

主人禮。賓實爵，主人之席前東南面酢主

人。主人阼階上拜。賓少退。主人進受

爵，復位。賓西階上拜送爵。薦脯醢。主

人升席自北方。設折俎，祭如賓禮。祭者，祭

薦、俎及酒，亦嘑、啐。**疏**「主人」至「賓禮」○注「祭者」至

「嘑啐」○釋曰：此賓坐取爵，適洗南，盥，坐取爵，卒洗。

以此言之，則賓未盥，主人辭洗，案《鄉射》賓盥訖將洗，主

人乃辭洗，先後不同者，彼與鄉人習禮輕，故盥訖乃辭洗；

此鄉人將賓舉之，<sup>②</sup>故未盥先辭洗，重之故也。若然，《鄉

射禮》內兼有鄉大夫，即尊，與州長同於盥後辭洗者，以其

盥後辭洗是禮之常故也。<sup>③</sup>但《鄉射》賓坐取爵，適洗，坐

①「降立」，阮校云：閩本作「亦從」。

②「舉」，阮校云：《要義》作「興」。

③「故」，阮校云：《要義》作「然」。



奠爵于篚下，主人辭洗之時，賓方奠爵于篚下。<sup>①</sup>此不奠爵篚下，便言奠爵于篚者，《鄉射》云賓坐取爵洗之時，未得主人之命，故得奠於篚下，得主人之命，乃奠于篚。此則賓取爵，適洗，未奠之時主人即辭，故奠于篚也。云「揖讓如初，升」者，謂前主人卒洗，「一揖，一讓，升」也。云「降盥，如主人禮」者，謂如主人降盥禮，則此賓降，主人亦降，賓辭降，主人對，一與主人降辭已下同也。云「祭如賓禮」者，如上賓祭時「坐，左執爵，右祭脯醢，奠爵于薦西，興，右手取肺，卻左手執本，坐，弗繅，右絕末以祭，尚左手，嘑之，興，加于俎，坐，挽手，遂祭酒，興，席末坐，啐酒」，故云「祭如賓禮」。云「祭者祭薦、俎及酒」者，薦謂脯醢，俎即離肺也。云「亦嘑，啐」者，直云「祭如賓禮」，嫌祭不嘑，啐，故鄭明之，云亦嘑肺啐酒，是以下文云「不告旨」，明亦啐也。不告旨。酒已物也。自席前適阼階上，北面，坐卒爵，興，坐奠爵，遂拜，執爵興。賓西階上荅拜。自席前者，啐酒席末，因從北方降，由便也。**疏**「自席」至「荅拜」○注「自席」至「便也」○釋曰：案《曲禮》云：「席東鄉西鄉，以南方爲上；南鄉北鄉，以西方爲上。」凡升席必由下，降由上，今主人當降

自南方，以啐酒於席末，遂因從席北頭降，又從北向南，北面拜，是由便也。若降由上之正，亦是便，故下云主人作相，降席自南方，不由北方，亦由便也。主人坐奠爵于序端，阼階上北面再拜崇酒。賓西階上荅拜。東西牆謂之序。崇，充也，言酒惡相充實。**疏**

「主人坐奠爵于序端」○注「東西」至「充實」○釋曰：「奠爵于序端」者，擬後酬賓訖，取此爵以獻介也。云「東西牆謂之序」者，《爾雅·釋宮》文。但彼云「東西廂」，廂即牆，故變言之也。主人坐，取觶于篚，降洗。賓降，主人辭降。賓不辭洗，立當西序，東面。不辭洗者，以其將自飲。**疏**「主人」至「東面」○釋曰：自此至「復位」，論主人酬賓之事。○注「不辭」至「自飲」○釋曰：酬酒先飲乃酬賓，故云「將自飲」。若然，既自飲而盥洗者，禮法宜絮故也。若然，經云「賓降，主人辭」，應奠爵，不言者，理在可知，故爲文略也。卒洗，揖，讓，升。賓西階上疑立。主人實觶酬賓，阼階

①「下」，曹校云此字衍。

上北面坐奠觶，遂拜，執觶興。賓西階上荅拜。酬，勸酒也。酬之言周，忠信爲周。

**疏**「卒洗」至

「荅拜」○注「酬勸」至「爲周」○釋曰：云「賓西階上疑立」者，待主人自飲故也。云「酬之言周，忠信爲周」者，此解

主人將酬賓先自飲之意。以其酬賓，若不自先飲，主人不忠信，<sup>①</sup>恐賓不飲，示忠信之道，故先自飲乃飲賓爲酬也。

「忠信爲周」，《國語》文。坐祭，遂飲，卒觶，興，坐

奠觶，遂拜，執觶興。賓西階上荅拜。主人

降洗，賓降，辭，如獻禮。升，不拜洗。不拜

洗，殺於獻。**疏**「坐祭」至「拜洗」○注「不拜洗殺於獻」○

釋曰：云「坐祭，遂飲」者，因坐祭即飲，飲卒觶，因事曰遂，

故曰「遂」。云「辭，如獻禮」者，主人辭賓降，主人爲己洗

爵，<sup>②</sup>此與獻賓時同，故云「辭，如獻禮」。禮殺，升堂不拜

洗，與獻時異，故別言之，使不蒙「如」也。禮殺於獻者，獻

時拜洗，禮初不殺故也。賓西階上立。主人實

觶，賓之席前，北面。賓西階上拜。主人少

退，卒拜，進坐，奠觶于薦西。賓已拜，主人奠其

觶。**疏**「賓西」至「薦西」○注「賓已」至「其觶」○釋曰：

「賓已拜，主人奠其觶」者，非久停，下文賓取之奠于薦東是也。賓辭，坐取觶，復位。主人阼階上拜送。賓北面，坐奠觶于薦東，復位。酬酒不舉，

君子不盡人之歡，不竭人之忠，以全交也。**疏**「賓辭」至

「復位」○注「酬酒」至「交也」○釋曰：「賓辭」，不解所辭之事。案《鄉射》「二人舉觶于賓與大夫，進，坐奠于薦右。

賓與大夫辭，坐受觶以興」，注云「辭，辭其坐奠觶」。以彼

云「賓與大夫辭」，即云「坐受觶以興」，若自手受之以舉

觶，是禮已，故賓與大夫可以當亢荅之禮，得云辭其親奠。

此禮初，<sup>③</sup>賓謙卑，不辭其奠，故經不云「坐受以興」。然

此辭是主人復親酌己，<sup>④</sup>故《鄉射》「主人酬賓云「賓辭」，鄭

注云「辭主人復親酌己」是也。云「酬酒不舉，君子不盡

人之歡，不竭人之忠，以全交也」者，並《曲禮》文。案彼

「歡」謂飲食，「忠」謂衣服，引之并謂飲食者，鄭於彼歡與

忠相對解之，故歡爲飲食，忠爲衣服，通而言之，總爲飲

① 「主人」，阮校云：《通解》、毛本作「是」。

② 「主人」上，曹校云脫「賓辭」二字。

③ 「禮」，阮校云：毛本作「與」。

④ 「是」下，曹校云脫「辭」字。

食，於義合也。云「全交」者，所有飲食與己，己盡之，恐人嫌貪而交絕，故不盡，為全交。酬酒不飲，亦是全交，故引為證也。此以「莫於薦東」為「酬酒不舉」，案《燕禮》二人媵爵于公，「莫于薦南」，彼皆舉為旅酬而在左者，鄭彼注云「莫于薦南，不敢必君舉也」。案《特牲》主人酬賓，「莫于薦北」，彼舉旅而在左者，鄭彼云「行神惠」，故不與此同也。主人揖，降。賓降，立于階西，當序，東面。主人將與介為禮，賓謙不敢居堂上。

**疏**「主人」至「東面」○注「主人」至「堂上」○釋曰：自此下至「主人介右荅拜」，論主人獻介之事。主人以介

揖，讓，升，拜，如賓禮。主人坐取爵于東序端，降洗。介降，主人辭降，介辭洗，如賓禮。升，不拜洗。介禮殺也。

**疏**「主人」至「拜

洗」○注「介禮殺也」○釋曰：案上主人迎賓之時，介與眾賓從人，又主人與賓三揖，至於階之時，介與眾賓亦隨至西階下，東面。今此文云「揖，讓，升，如賓禮」，則唯於升堂時相讓，無庭中三揖之事矣。升堂而云「拜」者，謂拜至亦如賓矣。云「介禮殺也」者，謂不拜洗，是以《鄉飲酒義》

云「三讓以賓升，拜至獻酬辭讓之節繁，及介省矣」是也。介西階上立。不言疑者，省文。

**疏**注「不言疑者省

文」○釋曰：此決上獻酬辭賓時，<sup>①</sup>賓於西階上疑立，此亦當獻酒節，而不言「疑」者，省文也。主人實爵，介之席前西南面獻介。介西階上北面拜。主人少退。介進，北面受爵，復位。主人介右北面拜送爵。介少退。主人拜于介右，降尊以就卑也。今文無「北面」。

**疏**「主人」至「少退」○注「主人」至

「北面」○釋曰：云「主人介之席前西南面獻介」者，以介席東面，故邪向之，若獻賓時於賓席前北面向之也。「主人拜于介右，降尊以就卑也」者，以主人獻賓時，主人自在階，今於獻介，主人來在西階介右，是介卑，故降主人之尊，就西階介之東北面拜也。至旅酬皆同階者，禮殺故也。主人立于西階東。薦脯醢。介升席自北方，設折俎，祭如賓禮。不啻肺，不啻酒，

①「獻酬辭賓」，曹校云：「辭」字衍，殿本刪「辭」字，「獻」下增「賓」字。

不告旨，自南方降席，北面坐，卒爵，興，坐奠爵，遂拜，執爵興。主人介右荅拜。不啻，啐，下賓。

**疏**「主人」至「荅拜」○注「不啻啐下賓」○釋

曰：云「主人立于西階東」者，始獻介之時，近西在介右，今於設薦之時，主人無事，稍近東。案上獻賓薦設之時，主人云「疑立」，此不言者，文略也。云「主人介右荅拜」者，還近西，於前立處荅拜也。介降洗。主人復降階，

降辭，如初。

如賓酢之時。

**疏**「介降」至「如初」○注

「如賓酢之時」○釋曰：自此至「介降立于賓南」，論介酢主人之事。云「主人復降階，降辭，如初」者，如賓酢主人之時，介辭主人從己降，主人辭介爲己洗，一皆如之也。卒

洗，主人盥。

盥者，當爲介酌。

**疏**「卒洗主人盥」○注

「盥者當爲介酌」○釋曰：此主人自飲而盥者，尊介也。是以《鄉射》云大夫將酢主人，「卒洗，主人盥」，注云「盥者雖將酌自飲，尊大夫，不敢褻」，是其類也。介揖，讓，

升，授主人爵于兩楹之間。就尊南授之。介不自

酌，下賓。酒者，賓主共之。

**疏**「介揖」至「之間」○釋曰：

「揖，讓，升」者，謂一揖一讓升也。云「授主人爵于兩楹之

間」，以爵授主人也。○注「就尊」至「共之」○釋曰：知兩

楹間是尊南者，以上云「尊於房、戶間」，房、戶間當兩楹之北，故云「就尊南授之」也。云「介不自酌，下賓」者，以

其賓親酌以酢主人，此不自酌，故云「下賓」也。云「酒者，賓主共之」者，此鄭解酒賓主共之，故賓自酌以酢主人，介

卑，故不敢酌，是以《鄉飲酒義》云「尊於房、戶之間，賓主共之」是也。介西階上立。主人實爵，酢于西

階上，介右坐奠爵，遂拜，執爵興。介荅拜。

主人坐祭，遂飲，卒爵，興，坐奠爵，遂拜，執

爵興。介荅拜。主人坐奠爵于西楹南，介

右再拜崇酒。介荅拜。奠爵西楹南，以當獻衆賓。

**疏**「介西」至「荅拜」○釋曰：此主人既受爵，介無事，故

於西階上立，不言「疑立」，可知也，亦省文。○注「奠爵」至「衆賓」○釋曰：知此奠爵爲衆賓者，案下文云「主人

揖，升，坐取爵于西楹下」是也。《鄉射》無介，故獻衆賓時，於東序端取爵，獻訖奠爵于筐也。主人復降階，

揖，降。介降，立于賓南。

**疏**「主人」至「賓南」○

釋曰：向來主人與介行禮於西階上，事訖，故復降階，揖，

讓，降。<sup>①</sup>「介降，立于賓南」者，以將獻衆賓，故介無事，就賓南也。主人西南面三拜衆賓。衆賓皆荅壹拜。三拜，壹拜示偏，不備禮也。不升拜，賤也。

**疏**

「主人」至「壹拜」○注「三拜」至「賤也」○釋曰：自此已下至「奠于篚」，論獻衆賓之事。云「西南面」者，以其主人在阼階下，衆賓在賓介之南，故西南向拜之。云「三拜，壹拜示偏，不備禮也」者，衆賓各得主人一拜，主人亦偏得一拜，是不備禮。故《鄉射》云「三拜衆賓，衆賓皆荅壹拜」，彼注云「三拜，示偏也。壹拜，不備禮也」。大夫禮皆然，故《少牢》云「主人三拜養者，養者皆荅拜」，鄭云「三拜，旅之示偏也」。又《有司徹》云「主人降南面，拜衆賓于門東，三拜。衆賓門東北面皆荅壹拜」，大夫尊故也。士則荅再拜，故《特牲》云「主人三拜衆賓，衆賓荅再拜」，鄭云「衆賓再拜者，士賤，旅之得備禮」是也。云「不升拜，賤也」者，此決上主人與賓介行禮皆升堂拜，至此三拜，賓賤，<sup>②</sup>故不升拜至也。主人揖，升，坐取爵于西楹下，降洗，升，實爵，于西階上獻衆賓。衆賓之長升拜受者三人。長，其老者。言三人，則衆賓多矣。

**疏**「主人」至「三人」○注「長其」至「多矣」○釋曰：云「主

人揖，升」者，從三人爲首，一一揖之而升也。云「降洗，升，實爵」者，以下不更言洗，則以下因此不復洗矣。云「西階上獻衆賓」者，下別言衆賓之長三人，則衆賓之中兼言堂下衆賓，故鄭云「衆賓多矣」。自三人已下，於下便以次歷言之矣。云「拜受者三人」，則堂下衆賓不拜受矣。主人拜送。於衆賓右。**疏**「主人拜送」○注「於衆賓右」○釋曰：知在衆賓右拜送者，約上文「介右」而知也。坐祭，立飲，不拜既爵，授主人爵，降，復位。既，卒也。卒爵不拜，立飲，立授，賤者禮簡。

**疏**「坐祭」

至「復位」○注「既卒」至「禮簡」○釋曰：云「卒爵不拜，立飲，立授爵」，賤者禮簡者，賓賢能，以賢者爲賓，其次爲介，不問長幼，其三賓德劣于賓、介，則數年之長幼，故上衆賓之長也。<sup>④</sup>賓、介則坐祭、坐飲，又拜既爵，此三賓則坐祭，與賓、介同，不拜既爵，立飲，立授，則異，賤，故禮簡

<sup>①</sup>「揖讓降」，曹校云：「讓」字衍，降不讓。

<sup>②</sup>「賓」上，曹校云脫「衆」字。

<sup>③</sup>「爵」，阮校云：毛本無。上鄭注無。

<sup>④</sup>「上」，阮校云：閩本作「此」。曹校云「上」下脫「云」字。

也。衆賓獻，則不拜，受爵，坐祭，立飲。次三人以下也。不拜，禮彌簡。

**疏**「衆賓」至「立飲」○注「次三」至「彌簡」○釋曰：此據堂下衆賓不拜受，簡於三人，故云「禮彌簡」也。每一人獻，則薦諸其席。謂三人也。

**疏**「每一」至「其席」○注「謂三人也」○釋曰：上已云獻，此以下別言薦。云「每一人」，還發三人而言。云「每一人獻，則薦諸其席」，則一一得獻即薦之，以其言席，又下別言衆賓，則此三是三人，<sup>①</sup>故鄭云「三人」也。衆賓辯有脯醢。亦每獻薦於其位，位在下。今文「辯」皆作「徧」。

**疏**「衆賓辯有脯醢」○注「亦每」至「作徧」○釋曰：

云「亦每獻薦於其位」者，如上三人一一薦之。知「位在下」者，以其言堂下立侍，不合有席，既不言席，故位在下。既不言其數，則鄉人有學識者皆來觀禮，皆入飲酒之內。是以《鄉射》云旅酬堂上，「辯」卒受者興，以旅在下者，明衆賓在堂下也。主人以爵降，奠于筐。不復用也。

**疏**「主人」至「于筐」○釋曰：以此合一獻徧，不復用，故以主人爵降，<sup>②</sup>奠於筐也。揖，讓，升，賓厭介升，介厭衆賓升，衆賓序升，即席。序，次也。即，就也。

今文「厭」皆爲「揖」。

**疏**「揖讓」至「即席」○注「序次」至「爲揖」○釋曰：自此至「舉觶者降」，論徧獻衆賓訖，將以旅酬之事。<sup>③</sup>云「衆賓序升」者，謂三賓堂上有席者，以年長爲首，以次即席也。云「今文厭皆爲揖」，不從者，以賓相引以手，不得爲揖故也。一人洗，升，舉觶于賓。一人，主人之吏。發酒端曰舉。

**疏**「一人」至「于賓」○注「一人」至「曰舉」○釋曰：此一人舉觶，爲旅酬也。云「發酒端曰舉」者，從上至下徧飲訖，又從上而起，是「發酒端曰舉」也。實觶，西階上坐奠觶，遂拜，執觶

興。賓席末荅拜。坐祭，遂飲，卒觶，興，坐奠觶，遂拜，執觶興。賓荅拜。降洗，升，實觶，立于西階上。賓拜。賓拜，拜將受觶。

**疏**「實觶」至「賓拜」○注「賓拜拜將受觶」○釋曰：云「賓席末荅拜」者，謂於席西，南面，非謂席上近西爲末，以其無席上拜法也。已下賓拜皆然。進，坐奠觶于薦西。賓

<sup>①</sup> 上「三」字，阮校云《通解》、毛本無，曹校云無者是。

<sup>②</sup> 「以主人」，曹校云「以」字當在「主人」下。

<sup>③</sup> 「以」，曹校云當爲「行」。

辭，坐受以興。舉觶不授，下主人也。言坐受者，明行事相接，若親受，謙也。

**疏**「進坐」至「以興」○注「舉觶」至「謙也」○釋曰：云「舉觶不授，下主人也」者，決上主人獻賓皆親授，而奠之今不親授，<sup>①</sup>是下主人。《鄉射》注云「不授，賤不敢也，下主人」，明此亦賤不敢授也。云「言坐受者，明行事相接，若親受，謙也」者，若於人手相授受，名為受，不於人取之，<sup>②</sup>不得言受。今於地取之而言受者，以主人奠之，<sup>③</sup>賓取之，而無隔絕，雖於地，若手受之，故云「明行事相接，若親受之，謙也」。舉觶者西階上拜送。賓坐奠觶于其所。所，薦西也。

**疏**「舉

觶」至「其所」○注「所薦西也」○釋曰：賓奠於其所者，待作樂後，立司正，賓乃取此觶以酬主人。以其將舉，故且奠之於右也。舉觶者降。事已。

**疏**「舉觶者降」○注

「事已」○釋曰：案《鄉射》舉觶者降後有大夫，此不言者，大夫觀禮之人，或來或否，故不言也。設席于堂廉，

東上。為工布席也。側邊曰廉。《燕禮》曰：「席工於西

階上，少東。樂正先升，北面。」此言樂正先升，立于西階東，則工席在階東。

**疏**「設席」至「東上」○注「為工」至

「階東」○釋曰：自此下至「樂正告于賓，乃降」，論主人樂賓之事。大判總為作樂，其中別有四節之殊，有歌，有笙，有間，有合，次第不同也。案《燕禮》「席工于西階上」，即云「樂正先升」，《大射》亦云「席工于西階上，工六人，四瑟」，始云「小樂正從之」。不同者，《燕禮》主於歡心，尚樂，故先云「樂正先升」；《大射》主於射，略於樂，故辨工數，乃云「樂正從之」也。若然，此主於樂，不與燕同，<sup>④</sup>而席工下辨工數，乃云樂正升者，此臣禮避初也。<sup>⑤</sup>至於《鄉射》亦應主於射，略於樂，而不言工數，先云樂正，而不與《大射》同者，<sup>⑥</sup>亦是避初之事也。云「為工布席也」者，以《鄉射》、《燕禮》、《大射》皆「席工」連言，此不言「席工」，文不具爾。故此為工布席，下云「工入升」，明此席也。<sup>⑦</sup>

①「而奠之今不親授」，曹校云當為「今不親授而奠之」。

②「人」下，曹校云當補「受之於地」四字。

③「以主人奠之」，曹校云：「主」當為「一」，或「人」下脫「之吏」二字。

④「不」，阮校云：毛本作「正」。

⑤「初」，曹校云：各本作「君」，似是。

⑥「而」，曹校云此字衍。

⑦「席」下，曹校云似脫「為工」二字。

引《燕禮》者，欲證此席爲工，又取此工席在西階東，<sup>①</sup>以其此經云「堂廉東上」，不言階東，故取《燕禮》「西階上少東」，樂正又在工西。此下云樂正「於西階東」，據樂正於西階東而立，在工西，則知工席更在階東北面可知。但此言近堂廉，亦在階東，彼云「階東」，亦近堂廉也。工四人，二瑟，瑟先。相者二人，皆左何瑟，後首，跨越，內弦，右手相。四人，大夫制也。二瑟，

二人鼓瑟，則二人歌也。瑟先者，將入序在前也。相，扶工也，衆賓之少者爲之，每工一人。《鄉射禮》曰：「弟子相工，如初人。」天子相工使視瞭者。凡工，瞽矇也，故有扶之者。師冕見，及階，子曰「階也」；及席，子曰「席也」，固相師之道。後首者，變于君也。跨，持也。相瑟者則爲之持瑟，其相歌者徒相也。越，瑟下孔也。內弦，側擔之者。

**疏**「工四」至「手相」○注「四人」至「之者」○釋曰：云「四

人，大夫制也」者，此鄉大夫飲酒而云「四人」，《大射》諸侯禮而云「六人」，故知四人者大夫制也。《燕禮》亦諸侯禮而云「四人」者，鄭彼注云「工四人者，燕禮輕，從大夫制也」。鄉射是諸侯之州長，士爲之，其中兼有鄉大夫以三物詢衆庶行射禮法，<sup>②</sup>故工亦四人，大夫制也。若然，士

當二人，天子當八人，爲差次也。云「二瑟，二人鼓瑟，則二人歌也」者，既云「工四人」，二人瑟，明二人鼓瑟可知也。<sup>③</sup>云「相，扶工也，衆賓之少者爲之」者，見《鄉射》云

「樂正適西方，命弟子」，弟子則衆賓之少者也。云「每工一人」者，案《周禮》瞽三百人，<sup>④</sup>又此經二人瑟，「相者二人皆左何瑟」，又《大射》「僕人正相大師」，以諸文言之，故知「每工一人」。若然，此經「工四人」，二人瑟，相二人，則工二人歌，雖不言相，亦二人可知，以空手無事，故不言也。云《鄉射禮》曰「弟子相工，如初人」者，彼謂將射，

樂正命弟子相工，遷樂於下，降時如初人之次第，<sup>⑤</sup>亦瑟先歌後，引之證弟子相工之事。天子相亦使眡瞭爲之，<sup>⑥</sup>知者，見《周禮》·眡瞭職云「凡樂事相瞽」是也。云「凡

①「取」下，曹校云當有「證」字。

②「三」，曹校云當爲「五」。

③「二人瑟明二人鼓瑟可知也」，曹校云：「二入瑟」當爲

「二人鼓瑟」，「二人鼓瑟」當爲「二人歌」。

④「瞽三百人」下，曹校云當補「眡瞭三百人」。

⑤「時」，阮校云：毛本作「將」。

⑥「相」下，阮校云：毛本衍「工」字。曹校云注有「工」

字，「工」下「亦」字乃衍耳。



工，瞽矇也」者，鄭司農云「無目眊謂之瞽，有目眊而無見謂之矇，有目無眸子謂之眊，故《詩·大雅》云「矇矇奏工」是也。引《論語》者，證瞽人無目，須扶之義也。」云「師」，即大師之官，無目，瞽矇之長也。云「後首者，變於君也」者，案《燕禮》云「小臣左何瑟，面鼓」，注云「燕尚樂，可鼓者在前也」，此鄉飲酒亦尚樂而不面鼓，是變於君也。案大射主於射，略於樂，鄉射亦應主於射，略於樂，所以面鼓，亦是變於君也。云「挈，持也」者，瑟底有孔越，以指深入謂之挈也。云「其相歌者，徒相也」者，徒，空也，無可荷，空以右手相，以經不言故也。<sup>①</sup>云「內弦側擔之」者，以左於外側擔之，<sup>②</sup>使弦向內也。樂正先升，立于西階東。正，長也。**疏**「樂正」至「階東」○注「正長也」

○釋曰：案《周禮》有大司樂、樂師、天子之官。此樂正者，諸侯及大夫、士之官，當天子大司樂。言「先升」，對後升。<sup>③</sup>云「長」，樂官之長也。工人，升自西階，北面坐。相者東面坐，遂授瑟，乃降。降立于西方，近其事。**疏**「工人」至「乃降」○注「降立」至「其事」○釋曰：「工人，升」，不言歌、瑟先後，案上文已云瑟先其歌，可知也。鄭知「降立於西方，近其事」者，《鄉射》云「樂正

適西方，命弟子贊工遷樂」，故知西方是近其事也。工歌

《鹿鳴》、《四牡》、《皇皇者華》。三者皆《小雅》篇

也。《鹿鳴》，君與臣下及四方之賓燕，講道脩政之樂歌也。此采其已有旨酒，以召嘉賓，嘉賓既來，示我以善道，又樂嘉賓有「孔昭」之明德，可則倣也。《四牡》，君勞使臣之來樂歌也。此采其勤苦王事，念將父母，懷歸傷悲，忠孝之至，以勞賓也。《皇皇者華》，君遣使臣之樂歌也。此采其更是勞苦，自以為不及，欲諮謀于賢知，而以自光明也。**疏**「工歌」至「者華」○注「三者」至「光明」○釋曰：凡

歌《詩》之法，皆歌其類。此時貢賢能，擬為卿大夫或為君所燕食，以《鹿鳴》詩也；或為君出聘，以《皇皇者華》詩也；或使反為君勞來，以《四牡》詩也。故賓賢能而預歌此三篇，使習之也。云「三者皆《小雅》篇也」者，其詩見於《小雅》之內也。云「《鹿鳴》，君與臣下及四方之賓燕，講道脩政之樂歌也」者，自此已下，鄭皆先引《詩》序於上，復

① 「故也」，阮校云：閩本「也」作「言」。

② 「左」下，阮校云：毛本，《通解》有「手」字，閩本「手」字擠入。曹校云「左」下似脫「手」字。

③ 「後」上，曹校云似脫「工」字。

引《詩》經於下。以其子夏作序，所以序述經意，故鄭並引之也。案《鹿鳴》序云《鹿鳴》，燕群臣、嘉賓也，「然後群臣、嘉賓得盡其心」之事，還依序而言也。云「此采其已有旨酒，以召嘉賓，嘉賓既來，示我以善道」至「可則傲也」者，案彼經云「我有旨酒，以燕樂嘉賓之心」，又云「示我周行」，「德音孔昭」。視民不佻，是則是傲」之事。《四牡》序云「勞使臣之來也」，經云「王事靡盬，我心傷悲」，「豈不懷歸」，「將母來諗」。《皇皇者華》序云「君遣使臣也」，經云「於彼原隰。馳驅征夫，每懷靡及」，「周爰諮謀」之事。故鄭依而引之為證也。卒歌，主人獻工。工左瑟，一人拜，不興，受爵。主人阼階上拜送爵。一人，工之長也。凡工賤，不為之洗。

**疏**「卒歌」至「送

爵」○注「一人」至「之洗」○釋曰：云「一人，工之長也」者，謂就四人之內為首者也。云「凡工賤，不為之洗」者，下「大師為之洗」，是君賜者為之洗，明自外不為之洗也。案此《鄉飲酒》及《燕禮》，同是主歡心尚樂之事，故有升歌、笙、間、合樂，及其獻工、獻笙後，間、合不獻，以知二節自前已得獻，故不復重獻。《鄉射》主於射，略於樂，無笙、間，<sup>①</sup>唯有合樂，笙工並為，至終總獻之。<sup>②</sup>《大射》亦主於

射，略於樂，但不間歌，不合樂，故有升歌《鹿鳴》三終，主人獻工，乃後下管《新宮》，<sup>③</sup>不復得獻，此君禮異於《鄉射》也。若《鄉射》與《大射》同略於樂，《大射》不略升歌而略笙、間、合者，<sup>④</sup>二《南》是鄉大夫之正，《小雅》是諸侯之正，鄭注《鄉射》云「不略合樂者，不可略其正」。諸侯不略《鹿鳴》之等，義亦然也。薦脯醢。使人相祭。使

人相者，相其祭酒、祭薦。

**疏**「薦脯醢使人相祭」○注「使

人」至「祭薦」○釋曰：知「使人相祭」者，<sup>⑤</sup>以相者扶工之人，每事使之指授，故知還使相者為之。知「祭酒、祭薦」者，以其云獻、薦脯醢，即云相祭，知「相其祭酒、祭薦」也。工飲，不拜既爵，授主人爵。坐授之。**疏**注「坐授之」○釋曰：知「坐授之」者，以經不云興，故知坐授之

①「無」下，曹校云脫「升歌」二字。

②「終」，阮校云：毛本作「經」。

③「乃後」，阮校云：毛本作「後乃」。

④「而略笙間合者」，曹校云：「笙」字衍。管即笙，未嘗略之。

⑤「祭」，曹校云當為「者」。

也。衆工則不拜，受爵，祭，飲，辯有脯醢，<sup>①</sup>不祭。祭，飲，獻酒重，無不祭也。今文「辯」爲「徧」。

**疏**「衆工」至「不祭」○注「祭飲」至「爲徧」○釋曰：言「獻酒重，無不祭也」者，衆工諸事皆不備，尚祭飲，則知得獻酒無有不祭，故云「獻酒重，無不祭也」。其正酬亦祭，至於旅酬以下則不祭而已。<sup>②</sup>故下記云「凡旅不洗，不洗者不祭」，鄭注云「敬禮殺也，不甚絮也」。此衆工亦不洗而祭，是以云「獻酒重，無不祭也」。大師則爲之洗。

賓、介降，主人辭降，工不辭洗。大夫若君賜之樂，謂之大師，則爲之洗，尊之也。賓、介降，從主人也。工，大師也。上既言獻工矣，乃言大師者，大師或瑟或歌也。其獻之，瑟則先，歌則後。**疏**「大師」至「辭洗」○注

「大夫」至「則後」○釋曰：天子、諸侯有常官，則有大師也。大夫則無常官，若君賜之樂，并樂人與之，則亦謂之大師，主人爲之洗。若然，工非大師則無洗。云「賓、介降，從主人也」者，案《鄉射》云「大師則爲之洗，賓降」，注云「大夫不降，尊也」，此既大夫禮，則有大夫，亦不降可知也。云「工，大師也」者，既言「大師則爲之洗」，而云「工不辭洗」，故知工即大師。是以《論語》云「師冕見，孔子爲之相」，鄭

云「相，扶工」，是工爲樂人之摠稱也。云「上既言獻工矣，乃言大師者，大師或瑟或歌也」者，以其前工有瑟有歌，後別言大師，則大師能瑟，或在瑟中，若大師能歌，或在歌中，故云「大師或瑟或歌也」。云「其獻之，瑟則先，歌則後」者，以其序人及升堂皆瑟先歌後，其獻法皆先瑟後歌，是以知獻之瑟先歌後，隨大師所在，以次獻之也。《燕禮》云「卒歌，主人洗，升，獻工。工不興，左瑟，一人拜受爵」，注云「左瑟，便其右。一人，工之長者也」。《燕禮》諸侯禮，有常官，不言大師，以燕禮主爲臣子，故工四人，從大夫制，其大師入工，不別言之也。《大射》云「主人洗，升，實爵，獻工。工不興，左瑟」，注云「大師無瑟，於是言左瑟者，節也。若大師在歌，<sup>③</sup>亦先得獻」，與《燕》異也。笙

入堂下，磬南北面立。樂《南陔》、《白華》、《華黍》。笙，吹笙者也，以笙吹此詩以爲樂也。《南陔》、《白華》、《華黍》、《小雅》篇也，今亡，其義未聞。昔周

①「辯」，阮校云：「閩本作「辨」，注同。」

②「而已」，阮校引浦鏜云：「此二字衍。曹校云：「而」上當補「飲」字，「祭」字句絕。」

③「若」下，曹校云脫「然」字。

之興也，周公制禮作樂，采時世之詩，以為樂歌，所以通情相風切也，其有此篇明矣。後世衰微，幽、厲尤甚，禮樂之書，稍稍廢棄。孔子曰：「吾自衛反魯，然後樂正，《雅》、《頌》各得其所。」謂當時在者而復重雜亂者也，惡能存其亡者乎？且正考父校商之名《頌》十二篇于周大師，歸以祀其先王，至孔子二百年之間，五篇而已，此其信也。

**疏**

「笙人」至「華黍」○釋曰：此升歌訖得獻，<sup>①</sup>乃始入也。云「磬南北面」者，磬既南面，其南當有擊磬者，在磬南北面。而云「笙人，磬南北面」者，在磬者之南，<sup>②</sup>北面也。○注「笙吹」至「信也」○釋曰：言《小雅》篇也者，今序仍在《魚麗》之下，是《小雅》也。云「今亡，其義未聞」者，案《詩·魚麗》之下見子夏序，序此三篇。案彼子夏序云「《南陔》，孝子相戒以養也。《白華》，孝子之絜白也。《華黍》，時和歲豐，宜黍稷也」，此已上是子夏序文。則云「有其義而亡其辭」者，此是毛公續序。云「有其義」，指子夏序有其義也。云「而亡其辭」者，謂《詩》辭亡矣。若然，彼亡辭，此亡義，與此義異也。云「昔周之興也，周公制禮作樂」至「明矣」者，欲明周公制此《儀禮》之時，有此三篇之意也。云「後世衰微，幽、厲尤甚」者，《禮運》云孔子曰「我觀周道，幽、厲傷之，吾舍魯何適」，是「幽、厲尤甚」者也。

「禮樂之書，稍稍廢棄」者，自幽、厲已後，稍稍更加廢棄，此篇之失也。<sup>③</sup>又引「孔子」以下至「其信」者，欲明孔子以前，言亡三篇之意也。<sup>④</sup>案《南陔》注云：「孔子論《詩》，《雅》、《頌》各得其所，時俱在耳，篇第當在於此。時遭戰國及秦之世而亡之，其義則與衆篇之義合編，故存。至毛公為《詁訓傳》，乃分衆篇之義，各置於其篇端。」彼詩鄭注又與此不同者，鄭君注《禮》之時，未見《毛傳》，以為此篇孔子前亡，注《詩》之時，既見《毛傳》，以為孔子後失。必知戰國及秦之世者，以子夏作序，具序三篇之義，明其詩見在，毛公之時亡其辭，故知當戰國及秦之世也。主人獻之于西階上。一人拜，盡階不升堂，受爵。主人拜送爵。階前坐祭，立飲，不拜既爵，升，授主人爵。一人，笙之長者也。笙三人，和

①「得獻」，阮校云：「閩本作「笙」。曹校云「笙」字當補在「得獻」之下，三字並存。」

②「磬」上，曹校云脫「擊」字。

③「此」上，曹校云似脫「致」字。

④「言」，曹校云當為「已」。

一人，凡四人。《鄉射禮》曰：「笙一人拜于下。」**疏**「主人」

至「人爵」○注「一人」至「於下」○辭曰：自此至「不祭」，論獻笙者之事。云「一人拜」者，謂在地拜，乃「盡階不升堂，

受爵」也。云「一人，笙之長者也」者，笙者四人，今言一人受爵，明據爲首長者而言也。云「笙三人，和一人，凡四人」者，案《鄉射·記》云「三笙一和而成聲」，注「三人吹笙，一人吹和，凡四人。《爾雅》曰「笙小者謂之和」是也。

云《鄉射禮》曰：「笙一人拜于下」者，即此一人拜者，亦在堂下可知。但獻工之時，拜送在西階東，<sup>①</sup>以工在階東故也。此主人拜送笙之時在西階上，以其笙在階下，故不同也。衆笙則不拜受爵，坐祭，立飲。辯有脯醢，不祭。亦受爵于西階上。薦之皆於其位磬南。

今文「辯」爲「偏」。

**疏**「衆笙」至「不祭」○注「亦受」至「爲

偏」○釋曰：衆笙除一人之外，二人者不備禮，<sup>②</sup>故亦受爵於西階上者，<sup>③</sup>與一人同也。云「薦之皆於其位磬南」者，依前笙人，立于磬南之處，是其類也。<sup>④</sup>乃閒，歌《魚

麗》，笙《由庚》；歌《南有嘉魚》，笙《崇丘》；歌《南山有臺》，笙《由儀》。閒，代也，謂一歌則一

吹。六者皆《小雅》篇也。《魚麗》言大平年豐物多也。此采其物多酒旨，所以優賓也。《南有嘉魚》言大平君子有酒，樂與賢者共之也。此采其能以禮下賢者，賢者疊蔓而歸之，與之燕樂也。《南山有臺》言大平之治，以賢者爲本。此采其愛友賢者，爲邦家之基，民之父母，既欲其身之壽考，又欲其名德之長也。《由庚》、《崇丘》、《由儀》今亡，其義未聞。**疏**「乃閒」至「由儀」○釋曰：此一經堂下

吹笙，堂上升歌，閒代而作，故謂之「乃閒」也。○注「閒代」至「未聞」○釋曰：云「謂一歌則一吹」者，謂堂上歌《魚麗》終，堂下笙中吹《由庚》續之，以下皆然。此《魚麗》、《南有嘉魚》、《南山有臺》其詩見在。云「六者皆《小雅》篇也」者，見編在《小雅》之內，故知之。見在者，鄭君亦先引其序，後引其詩。案《魚麗》序云「《魚麗》美萬物盛多也」，詩云「君子有酒，旨且多」。《南有嘉魚》序云「大平之君子至誠，樂與賢者共之也」，詩云「君子有酒，嘉賓式燕以

①「在西階東」，曹校云當爲「在阼階上」。

②「二」，阮校云：「閩本作「三」。曹校云作「三」是。

③「故」下，曹校云脫「不拜受爵」四字。

④「類」，阮校引浦鏜云：「類」當「位」字誤。

樂」。《南山有臺》序云「樂得賢也，得賢則能為邦家立大平之基矣」，詩云「樂只君子，邦家之基」，又云「樂只君子，民之父母」，「遐不眉壽」是也。此其鄭君所言義意。云《由庚》、《崇丘》、《由儀》今亡，其義未聞者，案《詩》序云《由庚》，萬物得由其道也。《崇丘》，萬物得極其高大也。《由儀》，萬物之生各得其宜也。有其義而亡其辭，此毛公續序，義與《南陔》、《白華》、《華黍》同。堂上歌者不亡，堂下笙者即亡，蓋當時方以類聚，笙歌之詩各自一處，故存者併存，亡者併亡也。乃合樂，《周南》：《關雎》、《葛覃》、《卷耳》；《召南》：《鵲巢》、《采芣》、《采蘋》。合樂，謂歌樂與衆聲俱作。<sup>①</sup>《周南》、《召南》、《國風》篇也，王后、國君夫人房中之樂歌也。《關雎》言后妃之德，《葛覃》言后妃之職，《卷耳》言后妃之志，《鵲巢》言國君夫人之德，《采芣》言國君夫人不失職。《采蘋》言卿大夫之妻能脩其法度。昔大王、王季居于岐山之陽，躬行《召南》之教，以興王業，及文王而行《周南》之教，以受命。《大雅》云「刑于寡妻，至于兄弟，以御于家邦」，謂此也。其始一國耳，文王作邑于豐，以故地為卿士之采地，乃分為二國：周，周公所食；召，召公所食。於時文王

三分天下有其二，德化被于南土，是以其詩有仁賢之風者屬之《召南》焉，有聖人之風者屬之《周南》焉。夫婦之道，生民之本，王政之端。此六篇者，其教之原也，故國君與其臣下及四方之賓燕，用之合樂也。鄉樂者，《風》也。《小雅》為諸侯之樂，《大雅》、《頌》為天子之樂。鄉飲酒升歌《小雅》，禮盛者可以進取也。燕合鄉樂，禮輕者可以逮下也。《春秋傳》曰：「《肆夏》、《繁遏》、《渠》，天子所以享元侯也，《文王》、《大明》、《緜》，兩君相見之樂也。」然則諸侯相與燕，升歌《大雅》，合《小雅》；天子與次國、小國之君燕亦如之，與大國之君燕，升歌《頌》，合《大雅》。其笙、間之篇未聞。疏「乃合」至「采蘋」○注「合樂」至「未聞」○釋曰：此一經論堂上元缺一字。堂下衆聲俱合之事也。云「合樂謂歌樂衆聲俱作」者，謂堂上有歌、瑟，堂下有笙、磬，合奏此詩，故云「衆聲俱作」。云「《周南》、《召南》、《國風》篇也」者，案《論語》注「《國風》之首篇」，謂十五《國風》之篇首，義可知也。云「王后、國君夫人房中之樂歌也」者，案《燕禮·記》云「有房中之樂」，注云「弦歌《周南》、

① 「樂與」，疏無「與」字，阮校云：《通典》無「樂」字。

《召南》之詩，而不用鍾、磬之節。謂之房中者，后、夫人之所諷誦，以事其君子」是也。既名「房中之樂」，用鍾、鼓奏之者，諸侯、卿大夫燕饗亦得用之，故用鍾、鼓。婦人用之乃不用鍾、鼓，則謂之「房中之樂」也。云「《關雎》言后妃之德」以下至「脩其法度」，《周南》三篇即言后妃，《召南》三篇則言夫人。不同者，此雖同是文王之化，《召南》是文王未受命已前之事，諸侯之禮，故稱夫人；《周南》是文王受命稱王之後，天子之禮，故稱后也。<sup>①</sup>云「昔大王、王季居于岐山之陽」者，案《魯頌》云「后稷之孫，實維大王，居岐之陽」，鄭云「大王自豳徙居岐陽」，是大王居於岐陽也。兼言王季者，王季，大王之子，繼大王後，亦居岐陽，至文王始居于豐，故兼言王季也。云「躬行《召南》之教以興王業」者，大王得「鸛鳴于岐」，又「實始翦商」；王季又「纂我祖考」，<sup>②</sup>是其「以興王業」也。云「及文王而行《周南》之教以受命」者，文王徙居豐，得赤雀之命，故云「以受命」也。鄭注《鄉射》云「昔大王、王季、文王始居岐山之陽」，彼兼言文王者，欲見文王未受命以前，亦得《召南》之化。<sup>③</sup>知者，案《羔羊》詩序云「《召南》之國化文王之政」，《標有梅》序云「《召南》之國被文王之化」。此不兼言文王者，據文王徙豐受命之後，專行《周南》之教。是《周南》十

一篇唯言文王之化，不言大王、王季也。《大雅》云「刑于寡妻」者，是《大雅·思齊》之詩也。引之者，證文王施化，自近及遠，自微至著之意。云「其始一國耳」者，謂大王自豳遷于岐山，「周原膺膺」，過百里之地。<sup>④</sup>言此者，欲見徙居于豐以後，二分天下，以此故國分與二公，故云「文王作邑于豐，以故地爲卿士之采地，乃分爲二國」也。云「周、周公所食，召、召公所食」者，此二公身爲三公，下兼卿士，即上「采地」一也。<sup>⑤</sup>云此者，欲見采地得稱周、召之意。云「於時文王三分天下有其二，德化被于南土」者，欲見周、召皆稱「南」之意也。云「是以其詩有仁賢之風者屬之《召南》焉」者，謂文王未受命以前也。云「有聖人之風者屬之《周南》焉」者，謂受命以後也。故《詩》序云：「《關雎》、《麟趾》之化，王者之風，故繫之周公。《鵲巢》、《騶虞》之德，諸侯之風也，先王之所以教，故繫之召

①「后」下，阮校云：毛本有「妃」字。

②「我」，浦鏜云疑「戎」。

③「得」，曹校云當爲「行」。

④「過」上，曹校云殿本增「不」字。

⑤「即」上，曹校云脫「所食」二字。



公。」必將二《南》繫此二公者，天子不風，文王受命稱王，故繫於二公也。云「夫婦之道，生民之本，王政之端」者，欲見合樂之時，作此六篇之意也。云「故國君與其臣下及四方之賓燕，用之合樂也」者，此據《燕禮》而言之也。云「鄉樂者，《風》也」者，亦據《燕禮》而言，故《燕禮·記》云「遂合鄉樂」者，據此《鄉飲酒》鄉大夫所作也。云「《小雅》為諸侯之樂」者，則升歌《鹿鳴》之等是也。云「《大雅》、《頌》為天子之樂」者，《肆夏》、《繁遏》、《渠》之等是也。云「鄉飲酒升歌《小雅》，禮盛者可以進取也」者，據此鄉飲酒為饗禮，升歌《鹿鳴》，進取諸侯之樂，饗禮盛，可以進取也。云「燕合鄉樂，禮輕者可以逮下也」者，逮，及也，以燕禮輕，故言可以逮下也。鄭君據《儀禮》上下而言，其實饗、燕同樂。知者，穆叔如晉，晉侯饗之，歌《鹿鳴》之三，是與燕禮同樂也。若然，《小雅》云鄉或「進取」，<sup>①</sup>燕可以「逮下」者，饗亦逮下也。云「《春秋傳》曰」者，襄公四年《左氏傳》文。彼云：「穆叔如晉，晉侯享之。金奏《肆夏》之三，不拜。工歌《文王》之三，又不拜。歌《鹿鳴》之三，三拜。韓獻子使行人子員問之曰：『吾子舍其大而重拜其細，敢問何禮也？』」穆叔對曰：「三《夏》，天子所以享元侯也，使臣弗敢與聞。《文王》，兩君相見之樂也，

臣不敢及。《鹿鳴》所以嘉寡君也，敢不拜嘉。」引之者，證《肆夏》、《繁遏》、《渠》是《頌》，謂天子之樂歌。案《鍾師》杜子春注引呂叔玉云：「《肆夏》，《時邁》也。《繁遏》，《執競》也。《渠》，《思文》也。」鄭君不從，以為「《詩》篇名，《頌》之族類也，此歌之大者，載在樂章，樂崩亦從而亡之，是以《頌》不能具」是也。云「然則諸侯相與燕，升歌《大雅》，合《小雅》；天子與次國、小國之君燕亦如之；與大國之君燕，升歌《頌》，合《大雅》」者，此約穆叔云「《肆夏》、《繁遏》、《渠》，天子所以享元侯」，《肆夏》、《繁遏》、《渠》則《頌》也。元侯，大國之君也。凡合樂者，遏取卑者一節，<sup>②</sup>故歌《頌》合《大雅》也。若元侯自相享，亦依此。案《詩譜》云「天子、諸侯燕群臣及聘問之賓，皆歌《鹿鳴》，合鄉樂」，鄭云諸侯相燕，天子與國君燕，與大國之君燕，《國語》及襄公四年公言饗見之者，<sup>③</sup>亦欲饗同也。<sup>④</sup>向來所言，皆據升歌、合樂，有此尊卑之差。

①「小雅」，曹校云當為「此注」。

②「遏」，曹校云殿本改作「通」。

③下「公」字，曹校以為衍字。

④「欲」下，曹校云似脫「明燕」二字。



若納賓之樂，天子與五等諸侯同用《肆夏》。是以《燕禮》納賓用《肆夏》。《禮記·郊特牲》云：「大夫之奏《肆夏》由趙文子始也」，是大夫不得用之，其諸侯以上同用之也。云「其笙、閒之篇未聞」者，案《鄉飲酒禮》笙閒之樂前與升歌同在《小雅》，則知元侯及國君相饗燕，笙閒亦同升歌矣。而云「未聞」知，<sup>①</sup>謂如《由庚》、《由儀》之等，篇名未聞。工告于樂正曰：「正歌備。」樂正告于賓，乃降。樂正降者，以正歌備，無事也。降立西階東，北面。

**疏**「工告」至「乃降」○注「樂正」至「北面」○釋曰：鄭知

「降立西階東，北面」者，以其堂上時在西階之東，北面，知降堂下亦然，在笙、磬之西，亦得監堂下之樂，故知位在此也。此《鄉飲酒》及《鄉射》大夫禮卑，無大師，故工告樂備。國君禮備，有大師告樂備。《大射》不告樂備者，是禮主於射，略於樂故也。主人降席自南方。不由北方，由便。**疏**「主人降席自南方」○注「不由北方由便」○釋曰：自此至「退立于顰南」，論立司正之事。云「不從北方，由便」者，主人之席南上，升由下，降由上，是其常，而言「不從北方，由便」者，解禮故所以升由下，降由上者，是由便也。側降。賓、介不從。**疏**「側降」○注「賓介不

從」○釋曰：側者，特也，賓、介不從，故言「側」。上來主人降，賓、介皆從降，此獨不從者，以其方燕，禮殺故也。作

相爲司正。司正禮辭，許諾。主人拜，司正

荅拜。作，使也。禮，樂之正既成，將留賓，爲有解惰，立

司正以監之。拜，拜其許。**疏**「作相爲司正」○注「作使」

至「其許」○釋曰：上經云「一相迎于門外」，今將燕，使爲

司正監察賓主之事，故使相爲司正也。云「禮、樂之正既

成者，謂主人與賓行獻酢之禮，是禮成也；升歌、笙、閒、

合樂三終，是樂成也，故鄭摠言「禮、樂之正既成」也。主

人升，復席。司正洗顰，升自西階，阼階上

北面受命于主人。主人曰：「請安于賓。」

司正告于賓。賓禮辭，許。爲賓欲去，留之，告賓

於西階。**疏**「主人」至「辭許」○注「爲賓」至「西階」○釋

曰：此司正升西階，適阼階上。案《鄉射》云「司正升自西

階，由楹內適阼階上，北面」，彼此同。此不言「由楹內」

者，省文也。云「告賓於西階」者，《鄉射》云「司正西階

①「知」，阮校云：「閩本」者「俱誤作「知」，毛本作「者」。

上，故知也。司正告于主人。主人阼階上再拜。賓西階上荅拜。司正立于楹閒以相拜。皆揖，復席。再拜，拜賓許也。司正既以賓許告主人，遂立楹閒以相拜。賓、主人既拜，揖就席。

**疏**「司

正」至「復席」○注「再拜」至「就席」○釋曰：凡相拜者，當在賓、主拜前。今相見云在賓拜下者，<sup>①</sup>以經云「司正告于主人」，因即拜賓，賓即荅拜，文理切，不得先言「相拜」，故退之在下，其實相時在賓主拜前。<sup>②</sup>是以《鄉射》云「司正告于主人，遂立楹閒以相拜。主人阼階上再拜。賓西階上荅再拜」，是其相拜在前也。云「賓、主既拜，揖就席」者，以《鄉射》賓、主拜訖，即揖就席故也，知此亦然也。司正實觶，降自西階，階閒北面，坐奠觶，退，共，少立。階閒北面，東西節也，其南北當中庭。共，拱手也。少立，自正慎其位也。己帥而正，孰敢不正？《燕禮》曰：「右還，北面。」**疏**「司正」至「少立」○注「階閒」至「北面」○釋曰：云「階閒北面，東西節也」者，階閒謂兩階之間，東西等，是東西節也。云「其南北當中庭」者，案《鄉射》云「司正實觶，降自西階，中庭北面，坐奠

觶」，此經雖不言中庭，宜與彼同，故云「中庭」也。云「己帥而正，孰敢不正」者，此是《論語》孔子語季康子之言也。彼言「子帥」，指季康子為「子」，此言「己帥」，指司正為「己」。欲見司正退也，云「共，拱手也。少立，自正慎其位也」者，欲見令賓主亦皆正慎其位也。<sup>③</sup>云「《燕禮》曰：

「右還，北面」者，《燕禮》「司正降自西階，右還，北面」，取不背其君。此亦降自西階，亦右還，北面，取不背大夫也，故引以為證也。坐取觶，不祭，遂飲，卒觶，興，

坐奠觶，遂拜，執觶興，盥，洗，北面坐，奠觶于其所，退，立于觶南。洗觶奠之，示絜敬。立於

其南，以察衆。

**疏**「坐取」至「觶南」○注「洗觶」至「察衆」

○釋曰：「執觶興，洗，北面」者，案《鄉射》、《大射禮》皆直云「取觶，洗，南面反奠於其所」，不云「盥」，此俗本有「盥」者誤。又此文及《鄉射》奠空觶，皆位南北面奠之，《燕

<sup>①</sup>「今相見云」，曹校云當為「今相拜文」。

<sup>②</sup>「時」，阮校云：毛本作「拜」。

<sup>③</sup>「欲見司正退也」至「亦皆正慎其位也」，曹校云：此文多衍，當為：「欲見司正退，拱手少立，自正慎其位者，欲令賓主亦皆正慎其位也。」

禮》、《大射》皆南面奠之者，以國君禮盛儀多故也。

### 儀禮疏卷第九

江寧府知府陽城張敦仁編校 元和縣  
學生員顧廣圻覆校

# 儀禮疏卷第十

唐朝散大夫行大學博士弘

文館學士臣賈公彥等撰

賓北面坐，取俎西之觶，阼階上北面酬主人。主人降席，立于賓東。初起旅酬也。凡旅酬者，少長以齒，終於沃盥者，皆弟長而無遺矣。

**疏**「賓北」

至「賓東」○釋曰：自此至「司正降，復位」，論堂上堂下偏行旅酬之事。云「取俎西之觶」者，謂前一人舉觶，奠于薦右，今為旅酬而舉之。前主人酬賓，奠于薦東者不舉，故言「俎西」以別之。云「主人降席」，不云自南方、北方者，案下記云「主人、介凡升席自北方，降席自南方」，指此文也。○注「初起」至「遺矣」○釋曰：云「凡旅酬者，少長以齒」以下，並是《鄉飲酒義》文，是以彼云「賓酬主人，主人酬介，介酬衆賓，少長以齒，終於沃洗者焉，知其能弟長而無遺矣」。案下記云「主人之贊者西面北上，不與」，注云

「贊，佐也，謂主人之屬，佐助主人禮事，徹鼎、沃盥、設薦俎者。與，及也。不及，謂不及獻酒」。言「不及獻酒」，則旅酬亦「不與」，旅酬所以酬正獻也。記又云「無筭爵，然後與」。若然，此旅酬得終於沃洗者，鄭解酬之大法，欲見堂上賓、主人之黨無不與，<sup>①</sup>故鄭君連引無筭爵旅酬而言「終沃洗也」，<sup>②</sup>其實此時未及沃洗也。賓坐奠觶，遂拜，執觶興。主人荅拜。不祭，立飲，不拜，卒觶，不洗，實觶，東南面授主人。賓立飲，卒觶，因更酌以鄉主人，將授。主人阼階上拜。賓少退。主人受觶。賓拜送于主人之西。旅酬同階，禮殺。**疏**注「旅酬同階禮殺」○釋曰：決上正酬時不同階，今同階，故云「禮殺」也。賓揖，復席。酬主人訖。主人西階上酬介。介降席自南方，立于主人之西，如賓酬主人之禮。主人揖，復

① 「上」，曹校云當為「下」。

② 「爵」下，阮校云：毛本有「與」字。「旅」，曹校云當為「之」。

席。其酌實觶，西南面授介。自此以下旅酬，酌者亦如之。

**疏**注「其酌」至「如之」○釋曰：知「西南面授介」者，

案賓酬主人時，於阼階上東南面向之，則知此主人酬介，

于西階上西南面可知。云「自此已下旅酬，酌者亦如之」

者，謂亦如主人酬介，其酬酌介實觶，<sup>①</sup>西南面授之，以其

旅酬皆西階上故也。司正升相旅，曰：「某子受

酬。」受酬者降席。旅，序也。於是介酬衆賓，衆賓

又以次序相酬。某者，衆賓姓也，同姓則以伯、仲別之，又

同則以且字別之。**疏**注「旅序」至「別之」○釋曰：上文

「作相爲司正」，注云「將留賓，爲有懈惰，立司正以監之」，

今以賓、主及介旅酬不監之，至衆賓乃監者，以其主人與

賓、介習禮已久，又各一位，不嫌失禮；至於衆賓，既不久

習禮，又同在一位，恐其失禮，故須監之也。云「某者，衆

賓姓也」者，以「某」在「子」上，故知是「衆賓姓」也。若單

言「某」，則是字，故《鄉射》云「某酬某子」，注云「某者，字

也」。云「同姓則以伯、仲別之」者，但此衆賓之內，有同

姓，司正命之則呼伯、仲別之也。云「又同則以且字別之」

者，爲同姓之中有伯、仲同者，則以某甫且字別之也。司

正退，立于序端，東面。辟受酬者，又使其贊上贊

下也。始升相西階西，北面。**疏**「司正」至「東面」○注

「辟受」至「北面」○釋曰：司正初時在堂上西階西，北面命

受酬者訖，退立于西序端。東面者，一則案此下文「衆受

酬者受自左」，即是司正立處，故須辟之；二則東面時贊上

贊下便也。云「始升相西階西，北面」者，雖無正文，以衆

賓之席在賓西南面，介酬在西階上，司正升相旅，當在西

階西，北面命賓，<sup>②</sup>故知位如此也。受酬者自介右。

由介東也，尊介，使不失故位。**疏**「受酬者自介右」○注

「由介」至「故位」○釋曰：北面以東爲右，故鄭云「由介東

也」。云「尊介，使不失故位」者，凡授受之法者，授由其

右，受由其左，即下文「衆受酬者」是也。此受介酬者應自

介左，而自介右者，介位在西，故云「尊介，使不失故位」

也。衆受酬者受自左。後將受酬者皆由西，變於介

也。今文無「衆酬者」。<sup>③</sup>**疏**「衆受」至「自左」○注「後

①「介」，阮校云：「閩本作「并」。曹校云「介」字衍。

②「命」下，曹校云脫「衆」。

③「衆酬者」，阮校云：「衆」字疑當作「受」。

將「至」酬者」○釋曰：言「衆受酬者」，謂上衆賓之內爲首者一人，自介右受之，自第二以下，并堂下衆賓，皆自左受之。言「變於介」者，即是授受之常法也。拜，興，飲，

皆如賓酬主人之禮。嫌賓以下異也。辯，卒受

者以觶降，坐奠于篚。辯，辯衆賓之在下者。《鄉

射禮》曰：「辯，遂酬在下者，皆升，受酬于西階上。」疏注

「辯」至「階上」○釋曰：引《鄉射》者，彼禮與此同，經直言「辯」，不云「遂酬在下者，皆升，受酬于西階上」者，文不具，故引以證也。司正降，復位。觶南之位。疏「司

正降復位」○注「觶南之位」○釋曰：「復位」者，以相旅畢，堂上無事，故降復觶南之位。使二人舉觶于賓、

介，洗，升，實觶，于西階上皆坐奠觶，遂拜，

執觶興。賓、介席末荅拜。皆坐祭，遂飲，

卒觶，興，坐奠觶，遂拜，執觶興。賓、介席

末荅拜。二人亦主人之吏。若有大夫，則舉觶于賓與

大夫。《燕禮》曰：「媵爵者立于洗南，西面，北上，序進，盥

洗。」疏「使二至荅拜」○注「二人至盥洗」○釋曰：自

此至「無筭樂」，論賓主燕坐，爵、樂無數之事。云「賓、介

席末荅拜」者，賓於席西南面荅拜，介於席南東面荅。①

云「二人亦主人之吏」者，亦上一人舉觶是主人之吏，以其主人使之，故知皆是主人之吏也。云「若有大夫，則舉觶

于賓與大夫」者，以其大夫尊於介故也。引《燕禮》者，證

此二人舉觶將盥時，②亦「於洗南，西面，北上」，以次盥手

也。逆降，洗，升，實觶，皆立于西階上。賓、

介皆拜。於席末拜。疏注「於席末拜」○釋曰：言「席

末拜」者，賓在席西南面，介在席南東面，以其俱是荅拜，

故同前席末拜也。皆進，薦西奠之。賓辭，坐取

觶以興。介則薦南奠之，介坐受以興。退，

皆拜送，降。賓、介奠于其所。賓言取，介言受，

尊卑異文。今文曰「賓受」。疏「皆進」至「其所」○釋曰：

言「皆進」者，一人之賓所奠觶于薦西，一人之介所奠觶于

薦南。○注「賓言」至「異文」○釋曰：尊者得卑者物言取，

是以《家語》云定公假馬於季氏，孔子曰「君於臣有取無

①「介於席南」，曹校云：「南」當爲「北」，下節「介在席

南」同。

②「盥」，曹校云當爲「洗」。

假」，故賓尊言取，介卑言受也。司正升自西階，受

命于主人。主人曰：「請坐于賓。」賓辭以

俎。至此盛禮俱成，酒清肴乾，賓、主百拜，强有力者猶

倦焉。張而不弛，弛而不張，非文武之道。請坐者，將以

賓燕也。俎者，肴之貴者，辭之者，不敢以禮殺當貴者。

**疏**「司正」至「以俎」○釋曰：云「司正升自西階，受命于主

人」，此不言阼階上受。案《鄉射》「司正升自西階，阼階上

受命于主人，適西階上，北面，請坐於賓」，則此亦同彼。

云「主人曰：『請坐于賓』」者，亦是使司正傳語於賓也。○

注「至此」至「貴者」○釋曰：自此以上皆立行禮，人皆勞

倦，故「請坐於賓」也。云「酒清肴乾」者，案《聘義》云「酒

清，人渴而不敢飲也。肉乾，人飢而不敢食也」。彼上云

「聘，射之禮，至大禮也」，則是聘、射皆有飲酒禮，故此《鄉

飲酒》引之。云「賓、主百拜」者，《樂記》文。彼是飲酒禮，

與此同，故引而相證。但此鄉飲酒之禮，雖無百拜，舉全

數而言也。云「强有力者」，亦《聘義》文。言此者，欲見自

此以前未得安坐飲食也。①云「張而不弛，弛而不張，非

文武之道」者，此《雜記》文。略而言之，此以弓弩喻行禮

之法：張而不弛，以喻旅酬已前立行禮；弛而不張，喻無

筭爵以後坐食。一張一弛，是文武之道，張而不弛，弛而

不張，非文武之道，故後須坐也。云「俎者，肴之貴者」，謂

骨體貴而肉賤，故云「肴之貴者」。云「辭之者，不敢以禮

殺當貴者」，自旅以前立行禮是盛，自此後無筭爵坐以

禮，②謂之殺，故今將坐，辭以俎，「不敢以禮殺當貴者」。

案《燕禮》「司正奠觶于中庭，請徹俎而坐，此禮司正監旅

訖，二人舉觶後，將行無筭爵，始「請坐于賓」。不同者，

《燕禮》「司正之前云二人致爵」，③三舉，旅得爵多，故司正

奠時即坐燕，此禮由來未行旅酬，故使二人舉觶，徹俎後

乃坐也。主人請徹俎，賓許。亦司正傳請告之。

司正降，階前命弟子俟徹俎。西階前也。弟子，

賓之少者。俎者，主人之吏設之，使弟子俟徹者，明徹俎

賓之義。**疏**「司正降階」○注「西階」至「之義」○釋曰：云

「弟子，賓之少者」，以其稱「弟子」，故知是賓之少者；西階

前命之，故知賓弟子。賓敬主人而使弟子徹俎，故云「賓

①「食」，阮校云：《要義》作「酒」。

②「以」，阮校引浦鏜云「行」誤「以」。

③「人」，曹校云當為「次」。

之義」也。司正升，立于席端。<sup>①</sup>待事。

**疏**「司正」

至「席端」○釋曰：司正降階前命弟子徹俎訖，即升，立于席端。弟子仍未徹俎，故鄭云待事也。賓降席，北

面。主人降席，阼階上北面。介降席，西階

上北面。尊者降席，席東南面。皆立，相須徹俎

也。尊者，謂此鄉之人仕至大夫者也，今來助主人樂賓，

主人所榮而遵法者也，因為名，或有無，來不來，用時事

耳。今文「遵」為「僕」，或為「全」。

**疏**

「賓降階」至「南

面」○釋曰：皆立者，將取俎以授人。遵不北面者，以其

尊，故席東南面向主人。○注「皆立」至「為全」○釋曰：云

「皆立，相須徹俎也」者，須，待也，受俎之人一時徹而授之

也。云「尊者，謂此鄉之人仕至大夫者也」者，以《鄉射》云

「大夫若有尊者，入門左」，注云「謂此鄉之人為大夫者也。

謂之尊者，方以禮樂化民，欲其遵法之也」。既云「大夫若

有遵」，明士不得有遵，又士立于下，不得升堂，故知此遵

是大夫也。云「或有無」者，下文云「賓若有遵」，言「若

者，不定之辭，故知或有或無也。云「來不來，用時事耳」

者，言來之與不來，事在當時，故云「用時事耳」。賓取

俎，還授司正，司正以降，賓從之。主人取

俎，還授弟子，弟子以降自西階，主人降自

阼階。介取俎，還授弟子，弟子以降，介從

之。若有諸公、大夫，則使人受俎，<sup>②</sup>如賓

禮。衆賓皆降。取俎者皆鄉其席，既授弟子，皆降復

初人之位。

**疏**

「賓取」至「皆降」○釋曰：「主人取俎，還授

弟子，弟子以降自西階」，案《燕禮》膳宰徹公俎，降自阼

階，與此不同者，彼公不降，故宰夫降阼階，此主人降自阼

階，故弟子降自西階也。○注「取俎」至「之位」○釋曰：云

「取俎者皆鄉其席」者，以其俎在席前，鄉席取俎，還轉授

之，故經皆言「還授」也。云「既授弟子，皆降復初人之位」

者，以其下云「揖，讓，如初，升」，故知此降時亦復初人之

位，位在東階、西階相讓也。<sup>③</sup>說屨，揖，讓，如初，

<sup>①</sup>「席」，阮校云：唐石經、楊氏、敖氏俱作「序」。

<sup>②</sup>「階」，阮校云：「階」字疑衍，或是「席」字之誤。毛本

無。

<sup>③</sup>「受」，阮校云：唐石經、《集釋》作「授」。

<sup>④</sup>「讓」下，曹校云似脫「之所」二字。



升，坐。說屨者，爲安燕當坐也。必說於下者，屨賤不空居堂。<sup>①</sup>說屨，主人先左，賓先右。今文「說」爲「稅」。

**疏**「說屨」至「升坐」○釋曰：自此以下至「再拜」，論無筭爵，飲酒禮終，送賓之事也。云「如初，升，坐」者，謂賓主初入，揖讓而升堂。升堂雖同，前則升堂立，此則即席坐，與前異也。○注「說屨」至「爲稅」○釋曰：云「說屨者，爲安燕當坐也」者，凡堂上行禮之法：立行禮不說屨，坐則說屨，屨空則不宜陳於側，故降說屨，然後升坐也。云「說屨，主人先左，賓先右」者，案《曲禮》云「上於東階則先右足，上於西階則先左足」，鄭注云「近於相鄉，敬也」。案《玉藻》著屨之法，坐左納右，坐右納左，今說之亦北面鄉階，主人先坐左，賓先坐右，亦取近於相鄉，敬之義也。乃羞。羞，進也，所進者狗載醢也。鄉設骨體，所以致敬也。今進羞，所以盡愛也。敬之愛之，所以厚賢也。

**疏**「乃羞」○注「羞進」至「賢也」○釋曰：知「所進者狗載醢」者，案下記云「其牲狗」，《禮記》又云「薦羞不踰牲」，則所羞者狗載也。但醢是舊作之物，諸經又不見以狗作醢，則載必狗也，醢則當兼有餘牲也。云「鄉設骨體，所以致敬也。今進羞，所以盡愛也」者，骨體貴，人不食，故云「致

敬」，載醢賤，人所食，故云「盡愛」也。無筭爵，筭，數也。賓主燕飲，爵行無數，醉而止也。《鄉射禮》曰「使二人舉觶于賓與大夫」，又曰「執觶者洗，升，實觶，反奠於賓與大夫」，皆是。

**疏**「無筭爵」○注「筭數」至「皆是」○釋曰：引《鄉射禮》者，證此「無筭爵」從首至末，更從上至下，唯醉乃止。鄭云「皆是」者，從首至末皆是行無筭爵之義。無筭樂。燕樂亦無數，或閒或合，盡歡而止也。《春秋》

襄二十九年吳公子札來聘，請觀于周樂，此國君之無筭。

**疏**「無筭樂」○注「燕樂」至「無筭」○釋曰：云「燕樂亦無數者，亦上「無筭爵」也。案上升歌、笙、閒、合樂皆三終，言有數，此即無也。云「或閒或合，盡歡而止也」者，以其不言《風》、《雅》，故知「或閒」如上閒歌，用《小雅》也，「或合」，用二《南》也。言「或閒或合」者，於後科用其一，但不並用也。引《春秋》者，彼是國君禮，此是大夫禮，見其異也。但無筭之樂，還依尊卑用之。案《春秋》爲季札所歌《大雅》與《頌》者，但季札請觀周樂，魯爲之盡陳。又魯周公之後，歌樂得與元侯同，故無筭之樂，《雅》、《頌》並作

①「空」，阮校云：楊本作「宜」。

也。賓出，奏《陔》。《陔》，《陔夏》也。陔之言戒也，

終日燕飲，酒罷以《陔》爲節，明無失禮也。《周禮·鍾師》

「以鍾、鼓奏九《夏》」，是奏《陔夏》則有鍾、鼓矣。鍾、鼓

者，天子、諸侯備用之，大夫、士鼓而已。蓋建於阼階之

西，南鼓。《鄉射禮》曰：「賓興，樂正命奏《陔》。賓降及

階，《陔》作。賓出，衆賓皆出。」**疏**「賓出奏陔」○注「陔陔」

至「皆出」○釋曰：云「《陔》，《陔夏》也」者，《周禮·鍾師》

有《陔夏》，故云《陔夏》也。云「《周禮·鍾師》以鍾、鼓奏

九《夏》」者，案《鍾師》云「凡樂事以鍾、鼓奏九《夏》」：《王

夏》、《肆夏》、《昭夏》、《納夏》、《章夏》、《齊夏》、《族夏》、

《禘夏》、《驚夏》，杜子春云「王出入奏《王夏》，尸出入奏

《肆夏》，牲出入奏《昭夏》，四方賓來奏《納夏》，臣有功奏

《章夏》，夫人祭奏《齊夏》，族人侍奏《族夏》，客醉而出奏

《陔夏》，公出入奏《驚夏》」。言「以鍾、鼓」者，庭中先擊

鍾，却擊鼓，而奏此九《夏》，故云「是奏《陔夏》則有鍾、鼓

矣」。云「鍾、鼓者，天子、諸侯備用之」者，《鍾師》「天子禮

有鍾、鼓，《大射》諸侯禮亦具有鍾、鼓，故云「天子、諸侯備

用之」。云「大夫、士鼓而已」者，案《鄉射》云「不鼓不釋」，

明無鍾可知。此且語鍾、鼓，<sup>①</sup>若用九《夏》，則尊卑不同。

天子則九《夏》俱作，諸侯則不用《王夏》，得奏其《肆夏》以

下，大夫以下據此文用《陔夏》，其餘無文。云「蓋建於阼

階之西，南鼓」者，據此奏《陔夏》之時，其鼓約《大射》「建

鼓在阼階西，南鼓」而知，無正文，故云「蓋」。彼注云「鼓

不在東縣南，爲君也」。此鄉大夫無東縣，直有一鼓而已，

故縣在阼階之西，南鄉主人也。<sup>②</sup>引《鄉射》者，證賓出遠

近《陔》作之義。云「賓出，衆賓皆出」者，經賓據正賓，不

言衆賓與介，則賓出之時，衆賓與介俱出可知。主人送

于門外，再拜。門東西面拜也。賓、介不荅拜，禮有

終也。**疏**「主人」至「再拜」○注「門東」至「終也」○釋曰：

云「門東西面拜也」者，此約主人迎賓之時，門東西面拜，

今送賓還依此位立也。云「賓、介不荅拜，禮有終也」者，

於迎賓、介時，賓、介荅拜，今送賓，主人再拜，若賓、介荅

拜，是行禮無終畢，故賓、介不荅，是禮有終也。不言衆賓

者，迎送俱不拜，故不言也。賓若有尊者諸公、大

夫，則既一人舉觶，乃入。不干主人正禮也。遵

① 「此且語鍾鼓」，阮校云：《要義》作「此且論鼓」。

② 「主人」上，曹校云似脫「爲」字。

者，諸公、大夫也。謂之賓者，同從外來耳。大國有孤，四命，謂之公。

**疏**

「賓若」至「乃入」○釋曰：自此已下至「不

加席」，<sup>①</sup>論鄉內有諸公、大夫來觀禮，主人迎之與行禮事

也。○注「不干」至「謂之公」○釋曰：言「不干主人正禮」

者，正禮謂賓主獻酢是也，是以一人舉觶爲旅酬始，乃入。

若然，即是作樂前人，而於此篇末乃言之者，以其無常，或

來或不來，故於後言之也。云「尊者，諸公、大夫也」者，孤

只一人而言諸者，案鄭注《燕禮》云「諸公者，謂大國之孤

也，孤一人言諸者，容牧下三監」。案《王制》云：「天子使

其大夫監於方伯之國，國三人。」《王制》所陳是殷法，言

「容」者，周公制禮時，因而不改，故云「容」也。云「大國有

孤，四命」者，《周禮·典命》文。「謂之公」者，若天子有三

公也。席于賓東，公三重，大夫再重。席此二者

於賓東，尊之，不與鄉人齒也。天子之國，三命者不齒；於

諸侯之國，爵爲大夫則不齒矣。不言尊者，尊者亦卿大

夫。

**疏**

「席于」至「再重」○注「席此」至「大夫」○釋曰：言

「三重」、「再重」者，席有地可依，若衣裳在身，一領即爲一

重，再重、三重猶二領、三領也。云「席此二者於賓東」者，

賓在戶牖之間，酒尊又在戶東，席此二者又在酒尊之東，

但繼賓而言耳。云「尊之，不與鄉人齒也」者，「鄉人」謂衆

賓之席，在賓西，故云「不與鄉人齒」。案上注云「此篇無

正齒位之事」，今此言齒者，彼云「無正齒位」者，對《黨正》

飲酒，鄉人五十已上、九十已下有齒法，《鄉飲酒》貢士以

德爲次，<sup>②</sup>故云「無正齒位」之禮。此言齒者，謂士已上來

觀禮，乃有齒法。云「天子之國，三命者不齒」者，案《周

禮·黨正職》云「國索鬼神而祭祀，則以禮屬民而飲酒于

序，以正齒位。壹命齒于鄉里，再命齒于父族，三命不

齒」，彼是天子黨正飲酒法，故知天子之國三命不齒。此

是天子貢人鄉飲酒法，<sup>③</sup>鄭引之爲證者，欲見天子鄉飲

酒，三命不齒同也。云「於諸侯之國，爵爲大夫則不齒矣」

者，以此篇及《鄉射》皆云「若有大夫」，不辨命數，故知爵

爲大夫即不齒也。皆謂《鄉射》、《鄉飲酒》之禮，若《黨正》

飲酒則與此異。案《文王世子》云「其朝于公，內朝，則東

面北上。臣有貴者以齒」，下文云「庶子治之，雖有三命，

不踰父兄」，鄭注云「治之，治公族之禮也，唯於內朝則然，

① 「不」下，阮校引浦鍾云：脫「去」字。

② 「次」，阮校云：閩本作「比」。

③ 「天子」，曹校云蓋「大夫」之誤。

其餘會聚之事，則與庶姓同」，又引《黨正》飲酒云「一命齒於鄉里，再命齒於父族，三命不齒。不齒者，特爲位，不在父兄行列中」。但《文王世子》是諸侯之法，即諸侯黨正飲酒，還與天子同，但諸侯之國，一命已上至三命，大夫、士具有。言「一命齒於鄉里」者，公、侯、伯之士一命，與堂下鄉人齒，以其士立堂下故也；子、男之士不命，與一命之士同齒於階下；子、男之大夫一命，坐於上，與六十已上齒於堂。「再命齒於父族」者，謂子、男之卿與公、侯、伯之大夫以父族爲賓，則與之齒，異姓爲賓，則不與之齒，席於尊東。「三命不齒」者，謂公、侯、伯之卿，雖父族爲賓，亦不與之齒，席於尊東也。云「不言尊者，尊者亦卿大夫」者，案上文「賓若有尊者」，與諸公、大夫雖文異，諸公、大夫則遵也，故鄭云「尊者，諸公、大夫也」，明此經不言尊者，亦卿大夫可知。公如大夫人。主人降，賓、介降，衆賓皆降，復初位。主人迎，揖，讓，升。公升，如賓禮，辭一席，使一人去之。<sup>①</sup>如讀若今之若。主人迎之於門內也。辭一席，謙，自同於大夫。

**疏**「公如」至「去之」○釋曰：此據諸公、大夫人，賓、介與衆賓皆避之，降復西階下東面位。○注「如讀」至「大夫」

○釋曰：鄭曰「如讀若今之若」者，前無大夫人，直以大夫與主人爲禮是其當，公則非當，故鄭讀如「若今之若」，謂大夫之於公更無異禮矣。云「主人迎於門內」者，以經「公如大夫」，主人不言出，故知迎於門內也。云「辭一席，謙，自同於大夫」者，大夫再重，公三重，故辭去一席，同於大夫再重。大夫則如介禮。有諸公，則辭加席，委于席端，主人不徹。無諸公，則大夫辭加席，主人對，不去加席。加席，上席也，大夫席再重。

**疏**「大夫」至「加席」○釋曰：云「大夫則如介禮」者，以其公如賓，故大夫則如介禮。主人迎賓，賓厭介，此公與大夫同人，公亦厭大夫，故云「大夫如介禮」。云「有諸公，則辭加席，委於席端，主人不徹」者，大夫再重是其正，大夫以公在，故謙，委加席於席端，主人不徹也。○注「加席」至「再重」○釋曰：云「加席，上席也」者，以其再重、三重席皆一種，故云「上席」也。記云「蒲筵，緇布純」，明無異也。以其鄉大夫賢者，<sup>②</sup>公與大夫來觀禮而已，故俱加

① 「使一人」，阮校云：敎氏作「主人」。

② 「賢」上，阮校云：閩本有「貢」字擠入。

重數，更無異席也。《公食大夫禮》異國之客有別席，是以《公食大夫》云「宰夫設筵，加席，几」，又記云「司宮具几與蒲筵常，緇布純，加萑席尋」，又上注云「謂三命大夫也」，<sup>①</sup>孤爲賓，則莞筵紛純，加藻席畫純」，是與當國之大夫異也。《燕禮》云「司宮筵賓于戶西，東上，無加席也」者，以其燕私故也。《大射》云「司宮設賓席于戶西，南面，有加席」，與公侯同者，<sup>②</sup>以其大射辨尊卑故也。明日，賓

服鄉服以拜賜。<sup>③</sup>拜賜，謝恩惠。鄉服，昨日與鄉大

夫飲酒之朝服也，不言朝服，未服以朝也。今文曰「賓服鄉服」。

**疏**「明日」至「拜賜」○注「拜賜」至「鄉服」○釋

曰：鄭知鄉服是朝服者，下記云「朝服而謀賓，介」是也。

此賓言「鄉服」，其《鄉射》賓言「朝服」，不同者，案《鄉射》

記云「大夫與則以公士爲賓」，謂在朝著朝服是其常，此

賓是鄉人子弟，未仕，雖著朝服，仍以「鄉服」言之，故鄭云

「不言朝服，未服以朝也」。主人如賓服以拜辱。

拜賓復自屈辱也。《鄉射禮》曰：「賓朝服以拜賜于門外，

主人不見。如賓服，遂從之，拜辱於門外，乃退。」**疏**「主

人」至「拜辱」○注「拜賓」至「乃退」○釋曰：引《鄉射》者，

於此文不具，故引以爲證，明彼此賓、主皆不相見，造門外

拜謝而已。主人釋服，釋朝服，更服玄端也。古文

「釋」作「舍」。**疏**「主人釋服」○釋曰：自此已下至「鄉樂

唯所欲」，<sup>④</sup>論後日息司正，徵唯所欲，更行飲酒之禮。○

注「釋朝」至「作舍」○釋曰：言「釋朝服，更服玄端也」者，

以其昨日正行賓舉飲酒之禮，相尊敬，故朝服，此乃燕私，

輕，故玄端勞也。<sup>⑤</sup>乃息司正。息，勞也，勞賜昨日贊

執事者，獨司司正，司正庭長也。**疏**注「息勞」至「長也」

○釋曰：鄭云「勞賜昨日贊執事者」者，案下記云「主人之

贊者西面北上，不與」，鄭注云「主人之屬，佐助主人禮事，

徹晷，沃盥，設薦元缺起此。俎者。與，及也。不及，謂不獻

酒」，明此時勞可知。今獨言「司正」，司正是庭長，故獨言

之也。無介，勞禮略也。<sup>⑥</sup>司正爲賓。**疏**注「勞禮」至

①「上」，阮校引浦鏜云：「下」誤「上」。

②「侯」，曹校云此字衍。

③「上」服「字，阮校云：《通解》、敖氏無。

④「所」，阮校引浦鏜云：「所」衍字。

⑤「勞」，阮校云：《通解》、毛本無。曹校云：各本無

「勞」字是，或者「勞」上脫「以」字。

⑥「略」，阮校云：毛本「略」下有「故」字，閩本作「殺」。

「爲賓」○釋曰：此勞時司正爲賓，當立介以輔賓，無介者，勞禮略故也。不殺，市買若因所有可也。不殺則無俎。

**疏**注「市買」至「無俎」○釋曰：市買無正文，鄭以意言之。

云「不殺則無俎」者，其殺則俎以盛骨體，既言「不殺」，故知無俎也。薦脯醢，羞同也。<sup>①</sup>

**疏**注「羞同也」○釋曰：以其脯醢與正行飲酒同有此薦，故云「羞同也」。

羞所有，在有何物。**疏**注「在有何物」○釋曰：羞謂上文正行飲酒之時用狗臠，今不殺，故言「羞唯所有」也。云

「在有何物」者，雜物皆是也。徵唯所欲，徵，召也。

**疏**注「徵召也」○釋曰：昨日正行飲酒，不得喚親友，故今

禮食之餘，別召知友，故言「徵唯所欲」也。以告於先

生、君子可也。告，請也。先生不以筋力爲禮，於是

可以來。君子，國中有盛德者。可者，召不召唯所欲。

**疏**注「告請」至「所欲」○釋曰：案《曲禮》云「老者不以筋

力爲禮」，此先生，老人教學者，故云「先生不以筋力爲禮」，

於是「可以來」也。云「君子，國中有盛德者」者，此君子則

《曲禮》「博聞強識」，<sup>②</sup>敦善行而不殆，謂之君子」也。又

《玉藻》云「居士錦帶」，鄭云「居士，道藝處士」，亦一也。

云「可者，召不召唯所欲」者，上文云「徵唯所欲」，上下相成解也。賓、介不與。禮瀆則褻。古文「與」爲

「預」。<sup>③</sup>**疏**注「禮瀆」至「爲預」○釋曰：賓、介昨日正行

禮，今又召之，則是數，數則瀆，瀆則不敬，故云「禮瀆則褻」，是以不與。鄉樂唯欲。鄉樂，《周南》、《召南》。

六篇之中，唯所欲作，不從次也。不歌《鹿鳴》、《魚麗》者，

辟國君也。**疏**注「鄉樂」至「君也」○釋曰：云「鄉樂」，《周

南》、《召南》者，上注以二《南》爲鄉大夫之樂，《小雅》爲

諸侯之樂，故知二《南》也。但鄉燕同樂，<sup>④</sup>上正行飲酒，

歌《小雅》，今燕不歌《鹿鳴》、《魚麗》，是避國君也。

記。鄉朝服而謀賓、介，皆使能，不宿

戒。鄉，鄉人，謂鄉大夫也。朝服，冠玄端，緇帶，素鞶，

<sup>①</sup>「羞」，阮校云：敖氏作「薦」，疑鄭注「羞」亦是「薦」字之誤。

<sup>②</sup>「則」，阮校云：毛本作「即」。

<sup>③</sup>「預」，阮校云：徐本、《集釋》作「豫」。

<sup>④</sup>「鄉」，曹校云當爲「饗」。

白屨。今郡國行鄉飲酒之禮，玄冠而衣皮弁服，<sup>①</sup>與《禮》異。再戒爲宿戒。禮將有事，先戒而又宿戒。

**疏**「記鄉」

至「宿戒」○釋曰：上經直云主人與先生謀賓、介，不云服衣，<sup>②</sup>不云使能及不宿戒之事，故記之也。○注「鄉鄉」至

「宿戒」<sup>③</sup>○釋曰：「鄉，鄉人，謂鄉大夫」者，以鄉大夫爲主

人，故知鄉大夫。知「朝服，冠玄端，緇帶，素鞞，白屨」者，玄端即朝服之衣，裳又與鞞同色，屨亦同裳色，故知義然也。云「再戒爲宿戒。禮將有事，先戒而又宿戒」者，此即

《士冠》先戒賓及宿是也。此直戒而不宿，<sup>④</sup>與《冠禮》異。

蒲筵，緇布純。筵，席也。純，緣也。

**疏**釋曰：《公

食·記》云「蒲筵常，緇布純」，此不言「常」，文不具也。倍尋曰常，丈六尺也。尊，綌冪，賓至徹之。綌，葛

也。冪，覆尊巾。其牲狗也，狗取擇人。亨于堂東

北。祖陽氣之所始也。陽氣主養。《易》曰：「天地養萬

物，聖人養賢以及萬民。」**疏**注「祖陽」至「萬民」○釋曰：

此據《鄉飲酒義》而言，以正月三陽生之月，萬物出地，盛於東南，<sup>⑤</sup>故云「祖陽氣之所始也」。引《易·頤》彖辭者，

義取養賢能而賓舉之事也。獻用爵，其他用觶。爵

尊，不襲用之。

**疏**注「爵尊不襲用之」○釋曰：案上獻賓、

獻衆賓等，皆用一升之爵，至酬及旅酬之等，皆用三升之觶。以獻爲初，相敬，故用爵。以酬之等皆用爲相勸，故用觶。是以鄭云「爵尊，不襲用之」也。薦脯五挺，橫

祭于其上，出自左房。挺，猶臠也。《鄉射禮》曰：

「祭半臠，臠長尺有二寸。」左在東，陽也，陽主養。房，饌陳處也。冠禮之饌，脯醢南上。《曲禮》曰：「以脯脩置者，左胸右末。」**疏**注「挺猶」至「右末」○釋曰：此「橫祭于元缺

止此。其上」者，於脯爲橫，於人爲縮，其挺有五，通祭者

六，故《鄉射·記》云「薦脯用籩，五臠，祭半臠，橫于上」，

「臠長尺二寸」，則祭半臠者長六寸。此脯不言長短者，記文不具也。云「冠禮之饌，脯醢南上」者，欲見此房中之饌

①「冠」，阮本作「端」。

②「衣」，曹校云當爲「亦」。

③下「鄉」原作「人」，阮校云：「人」當作「鄉」。按此疏引注文標起訖，阮校是，據改。

④「宿」下，曹校云脫「戒」字。

⑤「盛於東南」，曹校云：「當爲「始於東北」，或者「盛」上脫「始於東北而」五字。

亦南上也。引《曲禮》者，欲見此脯與《曲禮》脯羞，雖胸、挺有異，其設之皆橫於人前，鄭彼注云「屈中曰胸」。以左手案之，右手擘之便。」**俎由東壁，自西階升。**亨

狗既孰，載之俎，饌於東方。

**疏**「俎由」至「階升」○注「亨

狗」至「東方」○釋曰：亨狗於東方，孰乃載之於俎，饌陳於

東壁。既饌於東方，恐由東階升，故記辯之云「自西階升」

也。**賓俎：脊、脅、肩、肺。主人俎：脊、脅、**

**臂、肺。介俎：脊、脅、肫、胈、肺。**①**肺皆**

**離。皆右體，進腍。**凡牲前脰骨三：肩、臂、肫也；

後脰骨二：膊、胈也。②尊者俎尊骨，卑者俎卑骨。《祭

統》曰：「凡為俎者，以骨為主，骨有貴賤。凡前貴後賤。」

離猶揜也。腍，理也，進理謂前其本也。今文「胈」作

「骼」。**疏**「賓俎」至「進腍」○注「凡牲」至「作骼」○釋曰：

此序體賓用肩，主人用臂，介用胈，其間有肫、肫在而介不

用者，蓋為大夫俎，③故此闕焉。是以《鄉射·記》云「賓

俎脊、脅、肩、肺。主人俎脊、脅、臂、肺」，注云「賓俎用肩，

主人用臂，尊賓也。若有尊者，則俎其餘體」，是肫、肫為

大夫明矣。大夫雖尊，不奪賓，主正禮，故用體卑於主人

與賓而尊於介也。或有介俎肫、胈，不言者，④欲見用體

無常。若有一大夫，即介用肫，若有二大夫，則介用胈，故肫、胈兩見亦是也。云「後脰骨二：膊、胈也」者，此皆如

《特牲》、《少牢》，不取軑也。云《祭統》者，據祭祀歸俎之

法，此據飲酒生人之禮。引之者，取一邊骨有貴賤之義。

以其賓用肩，主人用臂，介用胈，前貴於後也。以爵拜

者，不徒作。作，起也。言拜既爵者不徒起，起必酢主

人。**疏**「以爵拜者不徒作」○注「作起」至「主人」○釋曰：

經直云「以爵拜者不徒作」，鄭知「拜既爵者不徒起，起必

酢主人」者，以其拜受爵者有不酢主人法，故上經衆賓之

長一人受爵而不酢主人，⑤故此是拜既爵，起必酢主人者

也。坐卒爵者拜既爵，立卒爵者不拜既爵。

降殺各從其宜，不使相錯。唯工不從此禮。**疏**「坐卒」至

①「肫」，阮校云：毛本、《通解》、敖氏無。今案，據疏文，

「肫」或衍文。

②「膊」，阮校云：「膊」即「肫」字。

③「為」，阮校云：毛本作「以」。

④「不」，阮校云：敖氏引作「兩」。曹校云當為「兩」。

⑤「一人受爵」，曹校云：「一」當為「三」，「受」上脫「拜」字。



「既爵」○注「降殺」至「此禮」○釋曰：以其工無目，不使立卒爵，<sup>①</sup>唯坐卒爵，不拜既爵，與立卒爵者同，故云「唯工不從此禮」也。凡奠者於左，不欲者，不欲其妨。

**疏**

「凡奠者於左」○注「不飲」至「其妨」○釋曰：奠於左者，謂主人酬賓之觶，主人奠於薦右，客不盡主人之歡，奠之於左，是不欲其妨後奠爵也。將舉於右。便也。

**疏**

舉於右」○注「便也」○釋曰：謂若上文一人舉觶為旅酬始，二人舉觶為無算爵始，皆奠於右，是其將舉者於右，以右手舉之便也。衆賓之長一人辭洗，如賓禮。

於三人之中，復差有尊者，餘二人雖為之洗，不敢辭，其下不洗。

**疏** 衆賓「至」賓禮」○注「於三」至「不洗」○釋曰：

此記上主人獻衆賓時，「主人揖，升，坐取爵于西楹下，降洗爵」，衆賓長一人降，亦進，東向辭洗，如賓禮。是於三人之中，復差尊者得辭洗，「餘二人雖為之洗，不敢辭」也。云「其下不洗」者，謂其堂下立者，不為之洗，獻之而已。

立者東面，北上。若有北面者，則東上。賢

者衆寡無常也，或統於堂，或統於門。

**疏**「立者」至「東

上」○注「賢者」至「於門」○釋曰：此謂堂下立者，鄉人賢者或多或少，若少則東面北上，統於堂也。若多，東面立

不盡，即門西北面東上，統於門也。樂正與立者皆

薦以齒。謂其飲之次也。尊樂正，同於賓黨。不言飲

而言薦，以明飲也。<sup>②</sup>既飲皆薦於其位。樂正位西階東，

北面。

**疏**「樂正」至「以齒」○注「謂其」至「北面」○釋曰：

云「謂其飲之次也」者，謂樂正與立者以齒受旅，是飲之次也。云「薦」者，以先飲乃薦，依飲之次而薦之，故明飲

也。<sup>③</sup>必知飲、薦相將者，案上經云「衆賓徧有脯醢」，<sup>④</sup>鄭

注云「亦每獻薦於其位，位在下」，此言「樂正與立者皆薦

以齒」，明受獻乃薦，於衆賓在下者同也。<sup>⑤</sup>凡舉爵，

三作而不徒爵。謂獻賓、獻大夫、獻工皆有薦。

**疏**

「凡舉」至「徒爵」○釋曰：徒，空也。謂獻賓、獻大夫、獻工不空以爵獻之而已，皆有薦脯醢。樂作，大夫不入。

後樂賢者。

**疏**「樂作大夫不入」○注「後樂賢者」○釋曰：

①「不」上，阮校云：《通解》有「故」字。

②「以」下，阮校云：《集釋》、敖氏有「薦」字。

③「明」上，曹校云似脫「以薦」二字。

④「徧」原作「徧」，今據重刊單疏本改。

⑤「於」，曹校云當為「與」。

大夫之人，當一人舉觶之後，未樂作之前，以助主人樂賢。若樂作之後，後樂賢者，<sup>①</sup>故不入也。獻工與笙，取爵于上筐。既獻，奠于下筐。明其異器，敬也。如是則獻大夫亦然。上筐三爵。

**疏**「獻工」至「下筐」○

注「明其」至「三爵」○釋曰：鄭知「上筐三爵」者，以上經初主人獻賓時，云「取爵於筐，降洗」，獻賓，受酢，主人奠爵于序端，酬賓訖，又「取爵於東序端」以獻介，受酢訖，「奠爵于西楹南」，降，三拜衆賓訖，猶升取爵于西楹下，<sup>②</sup>獻堂上堂下衆賓，訖，「主人以爵降，奠于筐」，是其上筐一爵也。此記又云「獻工與笙，取爵于上筐。既獻，奠于下筐」，是上筐二爵也。又《鄉射禮》獻大夫云「主人揖，讓以大夫升，拜至。大夫荅拜。主人以爵降，洗，獻大夫」，此篇亦有大夫，故知上筐有三爵也。其笙則獻諸西

階上。謂主人拜送爵也。於工拜于阼階上者，以其坐於

西階東也。古文無「上」。

**疏**「其笙」至「階上」○注「謂

主」至「無上」○釋曰：上經主人獻笙於西階上，此記人又言之者，<sup>③</sup>爲拜送爵而言也，<sup>④</sup>故鄭云「主人拜送爵」也。云「於工拜于阼階上者，以其坐於西階東也」者，以工坐於西階東，主人不得西階上拜送爵故也。此笙在西階，獻於

西階上，<sup>⑤</sup>嫌亦阼階拜送，故此明之也。磬，階閒縮雷，北面鼓之。縮，從也，雷以東西爲從。鼓猶擊也。

大夫而特縣，方賓鄉人之賢者，從士禮也。射則磬在東。

古文「縮」爲「蹙」。

**疏**「磬階」至「鼓之」○注「縮從」至「爲

蹙」○釋曰：言「大夫而特縣」者，案《周禮·小胥》「半爲堵，全爲肆」，鄭注云：「鍾、磬者編縣之，<sup>⑥</sup>二十八枚而在一虞，謂之堵。鍾一堵，磬一堵，謂之肆。半之者，謂諸侯之卿大夫、士也。諸侯之卿大夫西縣鍾，東縣磬。」今諸侯卿大夫合鍾、磬俱有，今直云磬，是以鄭云「大夫而特縣，方賓鄉人之賢者，從士禮也」。云「射則磬在東」者，據《鄉

<sup>①</sup>「後」上，阮校云：毛本有「則」字，閩本「後」下有「於」字。

<sup>②</sup>「猶」，曹校云當爲「又」。

<sup>③</sup>「者」原作「也」，據重刊單疏本改。

<sup>④</sup>「送」字原重，阮校云：毛本《通解》不重「送」字，按重者非也。據刪。

<sup>⑤</sup>「上」原誤「工」，據重刊單疏本改。

<sup>⑥</sup>「編」原作「縮」，阮校引浦鏜云：「編」誤「縮」。按浦云是也。據改。

射》而言，避射位，故在東，與此階間異也。主人、介，

凡升席自北方，降自南方。席南上，升由下，降由

上，由便。**疏**「主人」至「南方」○注「席南」至「由便」○釋

曰：案《曲禮》云「席南鄉北鄉以西方爲上，東鄉西鄉以南方爲上」，鄭注云「坐在陽則上左，在陰則上右」，是以主人

與介席南方爲上，故「升由下，降由上」者，便也。若然，席

坐在陰，<sup>①</sup>以東爲上者，統於主人也。司正既舉觶，

而薦諸其位。司正，主人之屬也。無獻，因其舉觶而

薦之。**疏**「司正」至「其位」○注「司正」至「薦之」○釋曰：

案下文云「主人之贊者西面北上，不與。無筭爵，然後

與」，是其「無獻」也，故因舉觶薦諸其位。凡旅，不洗。

敬禮殺也。**疏**「凡旅不洗」○注「敬禮殺也」○釋曰：案上

「二人舉觶」，皆爲旅始，不可不自絜，故洗。自此以後旅

酬皆不洗，故云「凡旅，不洗」也。不洗者不祭。不甚

絜也。既旅，士不入。後正禮也。既旅，則將燕矣。

**疏**「既旅士不入」○注「後正」至「燕矣」○釋曰：旅謂旅

酬，所酬獻皆拜受，<sup>②</sup>故云「正禮」。既旅之後，無筭爵，行

燕飲之法，非正禮，故士不入，後正禮故也。徹俎，賓、

介、遵者之俎。受者以降，遂出，授從者。以

送之。<sup>③</sup>**疏**「徹俎」至「從者」○釋曰：以上文正經賓、介、

遵者之俎直云「降自西階」，無出之文，故記之。上之必授

從者，<sup>④</sup>以其已所當得也。主人之俎以東。藏於東

方。**疏**「主人之俎以東」○注「藏於東方」○釋曰：已上文

直云主人授弟子俎，<sup>⑤</sup>弟子以降自西階，不言「以東」，

故記人辨之。云「藏於東方」者，以其主人，故云藏之。

樂正命奏《陔》，賓出，至于階，《陔》作。**疏**

「樂正」至「陔作」○釋曰：《陔》謂《陔夏》，《詩》篇名。命擊

鼓者，賓降自西階，恐賓醉失禮，故至階奏之。若有諸

公，則大夫於主人之北，西面。其西面者，北上，

統於公。**疏**「若有」至「西面」○注「其西」至「於公」○釋

①「席」上，曹校云脫「賓」字。

②「獻皆」，阮校云：毛本「皆」下有「拜送」二字，閩本無

「獻」字。曹校云「獻」字衍。

③「以」，阮校云：毛本無，《通解》未刻。

④「上」，曹校云當爲「出」。

⑤「直」原誤「三」，據重刊單疏本改。

曰：若無諸公，則大夫南面，西上，統於遵也。<sup>①</sup>主人

之贊者西面北上，不與。贊，佐也，謂主人之屬佐

助主人禮事，徹鼎、沃盥、設薦俎者。西面北上，統於堂

也。與，及也。不及，謂不獻酒。

**疏**「主人」至「不與」○

注「贊佐」至「獻酒」○釋曰：云「西面北上，統於堂也」者，

以其主人之屬故也。無筭爵，然後與。燕乃及之。

**疏**注「燕乃及之」○釋曰：以其主人之屬，非主人所敬，故

無筭爵乃得酒也。

儀禮卷第四 經二千六百三十八 注三千九百三十八

儀禮疏卷第十 元缺第七葉，今補。

江寧府知府陽城張敦仁編校 元和縣

學生員顧廣圻覆校

① 「遵」，阮校云：閩本、《通解》作「賓」。曹校云作「賓」

是。

## 儀禮疏卷第十一 儀禮卷第五

唐朝散大夫行大學博士弘

文館學士臣賈公彥等撰

### 鄉射禮第五疏

「鄉射禮第五」○鄭《目錄》云：「州長春

秋以禮會民，而射於州序之禮。謂之鄉者，州，鄉之屬。

鄉大夫或在焉，不改其禮。射禮於五禮屬嘉禮，大戴十

一，小戴及《別錄》皆第五。」○釋曰：鄭云「州長春秋以禮

會人，而射於州序」者，《周禮·地官·州長職》文也。鄭

引之者，證此鄉射是州長射法。云「謂之鄉」者，欲見州長

射得名鄉射之意。云「州，鄉之屬」者，《周禮·大司徒職》

云「五州爲鄉」，是州屬鄉，故云「州，鄉之屬」。云「鄉大夫

或在焉」者，一鄉管五州，鄉大夫或宅居一州之內，則鄭注

《禮記》云「或則鄉之所居州黨，而鄉大夫來臨此射禮」，是

爲鄉大夫在焉，則名鄉射。又鄉大夫三年大比，與賢者能

者訖，而以鄉射之禮五物詢衆庶，亦行此州長射禮以詢

之，亦是鄉大夫在焉，故名爲鄉射。云「不改其禮」者，雖鄉大夫在，其禮仍依州長射禮，故云「不改其禮」。案經鄉大夫射於庠，云「堂則由楹外」，又云「堂則物當楣」，又云「大夫用兕中」，其禮與士射於序別而云「不改」者，大判鄉大夫、士射，<sup>①</sup>先行鄉飲酒禮，及未旅而射，爲不改，其實亦有少異也。鄭云「射禮於五禮屬嘉禮」者，案《周禮·大宗伯》云「以嘉禮親萬民」，下有「以賓射之禮親故舊，朋友」，故知屬嘉禮也。

儀禮 鄭氏注

鄉射之禮。主人戒賓。賓出迎，再拜。

主人荅再拜，乃請。主人，州長也。鄉大夫若在焉，

則稱鄉大夫也。戒猶警也，語也。出迎，出門也。請，告

也，告賓以射事。不言拜辱，此爲習民以禮樂，不主爲賓

己也。不謀賓者，時不獻賢能，事輕也。今郡國行此禮以

季春。《周禮》鄉老及鄉大夫，三年正月「獻賢能之書於

王，退而以鄉射之禮五物詢衆庶」。諸侯之鄉大夫既貢士

①「判」，阮校云：《通解》、毛本作「射」。「鄉」，阮校云：

毛本作「卿」。曹校云作「鄉」訛，單疏作「卿」。

於其君，亦用此禮射而詢衆庶乎？

**疏**「鄉射」至「乃請」

○釋曰：自此至「無介」，論州長將射，先戒賓之事。案大射前三日宰夫戒宰及司馬，又射前一日樂人宿縣，此不言日數，則戒賓與射同日矣，禮同鄉飲酒也。以其鄉射先行鄉飲酒，鄉飲酒戒賓與飲酒同日，知此鄉射戒賓與射亦同日也。○注「主人」至「庶乎」○釋曰：案鄉大夫是諸侯鄉大夫，則此州長亦諸侯之州長，以士爲之。是以經云「釋獲者，執鹿中」，記云「土鹿中」，是皆爲此州長射而言，是諸侯州長可知。若天子州長，中大夫爲之。若然，記云「大夫兕中」者，爲鄉大夫詢衆庶而言也。云「鄉大夫若在焉，則稱鄉大夫也」者，謂大夫來臨禮之時，州長戒賓不自稱，稱鄉大夫以戒賓也。云「出迎，出門也」者，謂出序之學門，亦如《鄉飲酒》出庠門，皆有一門，入門即至堂耳。云「不言拜辱者，此爲習民以禮樂，不主爲賓己也」者，對《鄉飲酒》主人戒賓，賓拜辱者，彼爲賓也，<sup>①</sup>非爲「習民以禮樂」故也。云「不謀賓者，時不獻賢能，事輕也」者，還決《鄉飲酒》獻賢能，故須「就先生而謀賓、介」，禮重，對此不獻賢能爲輕，故不謀賓也。云「今郡國行此禮以季春」者，漢時雖無諸侯國，<sup>②</sup>而置郡爲守，其王之子弟猶名國，其君曰相，故鄭注《禮記》云「如今從太守、相臨之禮」是也。

引之者，證時節與周異也。云「《周禮》至「衆庶」，皆《周禮·鄉大夫》職文。引之者，證此鄉射中兼有鄉大夫行射禮，故有射於堂及兕中之事。云「五物」者，案彼云「一曰和，二曰容，三曰主皮，四曰和容，五曰興舞」，鄭注云「和載六德，容包六行也。庶民無射禮，因田獵分禽，則有主皮。主皮者，張皮射之，無侯也。主皮、和容、興舞，則六藝之射與禮樂與？當射之時，民必觀焉，因詢之也」是也。鄭云「和載六德」者，和是六德之下，六德大，故舉下以載上也。容爲孝者，人有孝行則性行含容，故以孝爲容，孝是六行中之大，故舉上以包下，故云「容包六行」也。云「主皮」「六藝之射」者，但六藝中射總言諸射，<sup>③</sup>不專據主皮，但三物教萬民，射唯有主皮。此詢衆庶不兼士已上，故以主皮爲六藝之射。以和容爲禮者，「禮之用，和爲貴」，又行禮有容儀，是以漢時謂禮爲容，故以禮爲和容也。以樂爲興舞者，爲樂必興舞，故興舞以表樂也。若然，六德與六行，在身所有，故可舉少以兼多，六藝施於

<sup>①</sup>「賓」，阮校引浦鏜云：當爲「己」字之誤。

<sup>②</sup>「諸」，阮校云：《要義》無。

<sup>③</sup>「藝」下，阮校云：《通解》、毛本有「之」字。

外，非獨身所行，不可舉一以包六。但六者之中，御與書、數三者於施化民爲緩，<sup>①</sup>故特舉禮樂與射而言之。鄭以主皮、和容、興舞非射及禮樂之正名，故云「乎」以疑也？<sup>②</sup>賓禮辭，許。主人再拜。賓荅再拜。主人退。賓送，再拜。退還射宮，省錄射事。

**疏**

注「退還」至「射事」○釋曰：「射宮」者，鄉庠、州序是也。知「省錄射事」者，即下文云「乃張侯」之等是也。下言飲酒之事，知不爲飲酒事者，以飲酒者止爲射事，故以射爲主也。無介。雖先飲酒，主於射也，其序賓之禮略。

**疏**「無介」○注「雖先」至「禮略」○釋曰：鄭云「雖先飲酒」

者，自此已下先言飲酒，獻後乃射，以是《禮記·射義》云「古者諸侯之射也」，<sup>③</sup>必先行燕禮。卿大夫、士之射也，必先行鄉飲酒之禮是也。但鄉飲酒之禮有介一人以輔賓，此無介者，主於射，序賓之禮略，故無介以輔賓也。乃席

賓，南面，東上。不言於戶、牖之間者，此射於序。

**疏**「乃席」至「東上」○注「不言」至「於序」○釋曰：自此以下至「羹定」，論將射預前設席位、尊、壘、樂懸及張侯之事也。<sup>④</sup>云「不言於戶、牖之間者，此射於序」者，決鄉飲酒

在庠，以其序無室，庠有室，此據州長射於序，以其無室，無戶、牖，設席亦當戶、牖之處耳。言「東上」，亦主人在東，故席端在東，不得以《曲禮》「席南向北向，西方爲上」，因陰陽解之也。衆賓之席繼而西。言繼者，甫欲習衆庶，未有所殊別。

**疏**

「衆賓」至「而西」○注「言繼」至

「殊別」○釋曰：甫，始也，言始欲習衆庶，未有所殊別，此決《鄉飲酒》三賓之席不屬殊別，彼有德之人，故各自特不繼，有所殊別。席主人於阼階上，西面。阼階，

東階。尊於賓席之東，兩壺，斯禁，左玄酒，皆加勺。筐在其南，東肆。斯禁，禁切地無足者

也。設尊者北面，西曰左，尚之也。肆，陳也。

**疏**

「尊於」

至「東肆」○注「斯禁」至「陳也」○釋曰：云「斯禁，禁切地無足者也」者，案州長是士，應言禁制不言者，<sup>⑤</sup>其中兼有

<sup>①</sup>「於施」，阮校引浦鏜改作「皆於」。

<sup>②</sup>「也」，阮校云毛本作「之」。

<sup>③</sup>「以是」，曹校云當爲「是以」。

<sup>④</sup>「懸」，阮校云：毛本作「縣」。

<sup>⑤</sup>「制」，曹校云當爲「此」。

卿大夫禮，故舉大夫斯禁，與《鄉飲酒》同。云「設尊者北面，西曰左，尚之也」者，經云「左玄酒」，據人設尊北面，故以西爲左。若據酒，則以南面爲正，地道尊右，以西爲右。玄酒在右，故云「尚之」。若然，云「左」，據設尊，又云「尚之」，據酒尊也。設洗于阼階東南，南北以堂深，東西當東榮。水在洗東。筐在洗西，南肆。榮，屋翼也。縣于洗東北，西面。此縣謂磬也。縣於東方，辟射位也。但縣磬者半天子之士，無鍾。

**疏**注「此縣」至「無鍾」○釋曰：云「此縣謂磬也」者，對《大射》縣鍾、磬、罍具有也。云「縣于東方，辟射位也」者，此言決《鄉飲酒》無射事，<sup>①</sup>縣於階間也。云「但縣磬者半天子之士，無鍾」者，案《周禮·小胥》職云「半爲堵，全爲肆」，鄭云：「鍾、磬者編縣之，二八十六枚而在一虞謂之堵，鍾一堵、磬一堵謂之肆。半之者，謂諸侯之卿大夫、士也。諸侯之卿大夫半天子之卿大夫。」天子之卿大夫判縣者，東西各有鍾、磬爲肆；諸侯之卿大夫判縣者，分一肆於兩廂，東縣磬，西縣鍾；若天子之士特縣者，直東廂有鍾磬二虞爲一肆；諸侯之士分取磬而已，縣於東方，爲特縣。故云「無鍾」，對大夫及天子士有鍾。若然，此既兼鄉大夫

詢衆庶，當爲判縣，宜有鍾，而總云「無鍾」者，方以禮樂化民，雖大夫亦同士特縣也，若《鄉飲酒》方賓鄉人之賢者，從士禮也。其天子、諸侯鍾、磬、罍具，卿大夫、天子士已下亦無罍。知者，以其諸侯卿大夫、士半天子卿大夫、士，若有罍，添鍾、磬爲三，半不得，故知卿大夫已下皆無罍也。乃張侯，下綱不及地武，侯謂所射布也。綱，持舌繩也。武，迹也，中人之迹尺二寸。侯象人，綱即其足也，是以取數焉。

**疏**「乃張」至「地武」○注「侯謂」至「數焉」○釋曰：此已下論預張侯之事。鄭知侯用布，<sup>②</sup>案下記云獸侯大夫、士皆言「布侯」，則餘賓射、大射，其侯皆用布，此《鄉射》采侯二正，亦用布可知。云「綱，持舌繩也」者，《周禮·梓人》云「上綱與下綱出舌尋，緝寸焉」，注云「綱所以繫侯於植者也」，故云「綱，持舌繩也」。云「武，迹也，中人之迹尺二寸」者，無正文，蓋目驗當時而言，似云中人定扼圍九寸也。<sup>③</sup>《漢禮》云「五武成步，步六尺」，或據此而言也。云「侯象人」者，案鄭注《梓人》云「上下皆

①「言」下，阮校云：毛本有「射」字。

②「布」下，曹校云似脫「者」字。

③「定」，阮校云浦鏜改作「之」，曹校云改「之」是也。



出舌一尋者，亦人張手之節也」，以其張侯之法，下兩舌半上舌，兩頭綱皆出一尋，即是上廣下狹，象人張足六尺，張臂八尺，故云「象人」也。云「綱即其足也」者，謂經下綱象足。云「是以取數焉」者，以下綱象足，張之六尺，是取數於武也。①、不繫左下綱，中掩束之。事未至也。

**疏**「不繫」至「束之」○注「事未至也」○釋曰：案下記云

「東方謂之右个」，注云「侯以向堂爲面」也，則此「左下綱」以西畔而言。云「中掩束之」者，案記云鄉侯一丈，「倍中以爲躬」，躬二丈，「倍躬以爲左右舌」，舌四丈，兩舌各出一丈；又云「下舌半上舌」，則左右各出五尺，今將此五尺與下綱不繫者中掩，左廂向東，待將射乃解之，故云「事未至也」。乏參侯道，居侯黨之一，西五步。容謂

之乏，所以爲獲者御矢也。侯道五十步，此乏去侯北十丈，西三丈。**疏**「乏參」至「五步」○注「容謂」至「三丈」○

釋曰：「乏參侯道」者，謂三分侯道。云「居侯黨之一」者，黨，旁也，謂在侯西北邪向之，故以旁言之。其居旁之一者，謂侯道內三分之，居一分之地，十丈也。云「西五步」者，據侯之正北落西有五步，即三丈也。云「容謂之乏」者，案《周禮·射人》職云「王以六耦射三侯，三獲三容，五

正」，彼據王三侯有三容，容者以革爲之，可以容身，故云「容」也。云「乏」者，謂矢於此匱乏不去，故云「乏」也。云「獲者御矢也」者，謂唱獲者，恐矢至身，②故云「獲者御矢也」。云「侯道五十步」者，記云「鄉侯五十弓」，弓之下制六尺，與步相應，故鄭云「步」也。云「此乏去侯北十丈」者，五十步計之，步六尺，五十步則三十丈，三分取一爲十丈。云「西三丈」者，經云「西五步」，五六三十，故云三丈也。遠近如此者，一得避矢，一得去堂二十丈，聞唱獲聲，是其節也。羹定。肉謂之羹。定猶孰也。謂狗孰可食。

**疏**「羹定」○注「肉謂」至「可食」○釋曰：云「謂狗孰」

者，此與《鄉飲酒》同亨狗於東方是也。主人朝服，乃速賓。賓朝服出迎，再拜。主人荅再拜，退。賓送，再拜。速，召也。射，賓輕也，戒時玄端。

今郡國行此鄉射禮皮弁服，與《禮》爲異。**疏**「主人」至

「再拜」○釋曰：自此至「當楣北面荅再拜」，論主召賓從己之事。此主人與賓俱朝服。案《鄉飲酒》賓主俱不言服

① 「是」下，曹校云脫「以」字。

② 「至」，阮校云：毛本、《通解》「至」下有「其」字。

者，以彼賓禮重，故戒與速賓俱朝服，故不言。此習禮輕，見故戒時玄端，召時乃朝服，故須言之也。必此戒時玄端者，<sup>①</sup>見《公食大夫》云「賓朝服，即位于大門外，如聘」，注云「於是朝服，則初時玄端」，宜與彼同。皆是戒時不言服，後速時朝服，故知此亦「戒時玄端」矣。且《鄉飲酒》戒，速俱不言服，知皆朝服者，下記云「鄉朝服而謀賓、介」是也。云「今郡國」已下，引之者，欲見與周異也。賓及

衆賓遂從之。及門，主人一相，出迎于門外，再拜。賓荅再拜。相，主人家臣，擯贊傳命者。

**疏**「賓及」至「再拜」○注「相主」至「命者」○釋曰：《鄉飲

酒》云「賓及衆賓皆從之」，彼兼介，故云「皆」，此無介，故不言「皆」也。云「主人一相，出迎于門外」，注與《鄉飲酒》同。此亦主人自迎，而言一相者，使之傳賓言，兼相禮也。

揖衆賓。差卑，禮宜異。**疏**「揖衆賓」○注「差卑禮宜

異」○釋曰：此賓與衆賓，同是鄉人無爵者，而云「差卑」者，唯據立爲賓者尊，衆賓即不爲卑，<sup>②</sup>不論有爵無也。<sup>③</sup>

云「禮宜異」者，賓則拜之，衆賓則揖之，是其異也。主人

以賓揖，先人。以猶與也。先人，入門右，西面。**疏**

「主人」至「先人」○注「以猶」至「西面」○釋曰：云「以猶與」者，案《左氏傳》云「蔡人以吳子與楚人戰于柏舉」，彼「以」者，能東西之曰「以」，「以」謂驅使前人之稱，此言嫌有驅使之稱，故以爲「與」，謂主人與賓，是以爲平敵之義，故須訓之。云「先人，入門右，西面」者，此注亦與《鄉飲酒》同，以其賓入東面，故西面待之。賓厭衆賓。衆

賓皆入門左，東面，北上。賓少進。引手曰厭。**疏**「賓厭」至「少

進」○注「引手」至「衆賓」○釋曰：此經亦與《鄉飲酒》同，

此云「賓少進」，彼亦宜然，不言者，文不具也。主人以

賓三揖，皆行。及階，三讓。主人升一等，

賓升。三讓而主人先升者，是主人先讓於賓。不俱升

者，賓客之道，進宜難也。**疏**「主人」至「賓升」○注「三

讓」至「難也」○釋曰：言「皆行」者，賓主既行，衆賓亦行，

故云「皆行」。《鄉飲酒》亦皆行，不言者，文略也。知「主

<sup>①</sup>「必」下，阮校云：《要義》有「以」字。

<sup>②</sup>「即」下，阮校云：毛本無「不」字。

<sup>③</sup>「無」下，阮校云：毛本有「爵」字。

人先讓於賓者，元空一字。以其主人之法，先升導賓，賓後升。「進宜難」，禮之常然，<sup>①</sup>故知主人先讓賓也。此先升一等，禮之常，燕禮君升二等者，尊君故也。主人阼階上當楣北面再拜。賓西階上當楣北面荅再拜。主人拜賓至此堂。**疏**注「主人拜賓至此堂」○釋

曰：知拜是拜至者，《鄉飲酒義》云「拜至，拜洗」，《公食》亦云「當楣北嚮再拜」，<sup>②</sup>故知拜是拜至。主人坐取爵于上筐，以降。將獻賓也。**疏**「主人」至「以降」○注

「將獻賓也」○釋曰：自此至「主人阼階上荅拜」，論主人獻賓之事。凡取爵于筐以降者，皆是上筐，《鄉飲酒》不言「上」者，文略也。賓降。從主人也。主人阼階前西面，坐奠爵，興，辭降。重以主人事煩賓也。今文無「阼階」。賓對。對，荅。**疏**「賓對」○注「對荅」○

釋曰：《鄉飲酒》注云「賓主之辭未聞」，此不注，從可知。主人坐取爵，興，適洗，南面，坐奠爵于筐下，盥洗。盥手又洗爵，致絜敬也。古文「盥」皆作「澆」。賓進，東北面，辭洗。必進者，方辭洗，宜違位也。言東北面，則位南於洗矣。主人坐，奠爵于

筐，興，對。賓反位。反從降之位也。《鄉飲酒》

曰：「當西序，東面。」主人卒洗，壹揖，壹讓，以賓升。賓西階上北面拜洗。主人阼階上北面奠爵，遂荅拜，乃降。乃降，將更盥也。古文「壹」皆作「一」。賓降，主人辭降，賓對。主人卒盥，壹揖，壹讓，升。賓升，西階上疑立。疑，止也，有矜莊之色。**疏**注「疑止」至「之色」○釋曰：《鄉飲

酒》注：「疑讀爲『疑然從於趙盾』之疑，疑，正立自定之貌。」此言「疑，止也，有矜莊之色」，二注相兼乃具也。主人坐取爵，實之，賓席之前西北面獻賓。<sup>③</sup>進酒於賓也。<sup>④</sup>凡進物曰獻。**疏**注「進酒」至「曰獻」<sup>⑤</sup>○釋曰：云「凡進物曰獻」者，欲見此賓乃是鄉民而已，無尊

①「常然」，阮校云：毛本「常」作「當」，《要義》「然」作「法」。

②「再」上，曹校云脫「至」字。

③「席之」，阮校引敖氏曰：當作「之席」。

④「酒」，阮校云：毛本、《通解》無。

⑤「酒」，阮校云：毛本作「於」。

卑上下，猶言「獻」者，此獻直是進物，而言獻進之也。①

案《周禮·玉府》注云「古者致物於人，尊之則曰獻」，彼據尊敬前人。雖卑亦曰獻，若齊侯獻捷於魯之類，義與此別也。賓西階上北面拜。主人少退。少退，猶少

辟也。疏注「少退猶少辟也」○釋曰：《鄉飲酒》文與此

同，注云「少退，少辟」，及下文云「賓少退」，注云「少退，逡

巡」，義亦與此同。賓進，受爵于席前，復位。復

位，西階上位。主人阼階上拜送爵。賓少退。

薦脯醢。薦，進。賓升席自西方。賓升，降由下

也。疏注「賓升降由下也」○釋曰：凡席升由下，降由上。

下文降席不由上者，以主人在東，敬主人，不得降由上。

又於席西拜便，使升降皆由下，故云「賓升、降由下也」。

乃設折俎。牲體枝解節折以實俎也。主人阼階東

疑立。賓坐，左執爵，右祭脯醢，奠爵于薦

西，興，取肺，坐，絕祭。卻左手執本，右手絕末以

祭也。肺離上爲本，下爲末。疏注「卻左」至「爲末」○釋

曰：鄭皆約《鄉飲酒》知之也。尚左手，濟之。濟，嘗

也。右手在下，絕以授口嘗之。興，加于俎，坐挽

手，執爵，遂祭酒，興，席末坐，啐酒。挽，拭也。啐，嘗也。古文「挽」作「說」。降席，坐奠爵，

拜，告旨。降席，席西也。旨，美也。執爵興。主

人阼階上荅拜。賓西階上北面，坐卒爵，

興，坐奠爵，遂拜，執爵興。卒，盡。主人阼階

上荅拜。賓以虛爵降。將洗以酢主人。疏「賓以

虛爵降」○注「將洗以酢主人」○釋曰：自此至「賓西階上

荅拜」，論賓酢主人之事。《鄉飲酒》不言「虛爵」，直云「降

洗」，此直云「虛爵降」，不言「洗」，互見爲義，相兼乃具也。

主人降。從賓也。降立阼階東，西面，當東序。疏注

「從賓」至「東序」○釋曰：皆《鄉飲酒》文也。賓西階前

東面坐奠爵，興，辭降，主人對。賓坐取爵，

適洗，北面坐奠爵于筐下，興，盥洗。賓北面

盥洗，自外來。疏注「賓北」至「外來」○釋曰：對主人自

① 「獻進」，阮校云：毛本作「進獻」。

內出南面是也，①上文「主人坐取爵，適洗，南面」是也。

主人阼階之東，南面辭洗。賓坐奠爵于篚，興，對。主人反位。反位，從降之位也。主人辭洗，

進。**疏**注「反位」至「洗進」○釋曰：云「反位從降之位也」

者，即上東序之西南面位。②云「主人辭洗，進」者，經直

言「反」，不言「進」，鄭以言反位由前進，乃反位，故鄭却本之「主人辭洗進」也。賓卒洗，揖讓如初，升。**疏**

「賓卒」至「初升」○釋曰：言「如初」，則亦一揖、一讓也。

主人拜洗。賓荅拜。興，降盥，如主人之禮。賓升，實爵，主人之席前東南面酢主人。酢，報。主人阼階上拜。賓少退。主人

進受爵，復位。賓西階上拜送爵。薦脯醢。

主人升席自北方。乃設折俎。祭如賓禮。

祭薦、俎及酒，亦嘑、啐。不告旨。酒已物。自席前

適阼階上，北面，坐卒爵，興，坐奠爵，遂拜，

執爵興。賓西階上北面荅拜。自，由也。啐酒

於席末，由前降，便也。

**疏**注「自由」至「便也」○釋曰：鄭

知義然者，亦約《鄉飲酒》得知也。主人坐奠爵于序

端，阼階上再拜崇酒。賓西階上荅再拜。序

端，東序頭也。崇，充也。謝酒惡相充滿也。**疏**「主人坐

奠爵于序端」○釋曰：「奠爵于序端」，此擬下獻衆賓，故云

「取爵于序端」，③與《鄉飲酒》同也。主人坐，取觶于

篚，以降。將酬賓。**疏**「主人」至「以降」○注「將酬賓」

○釋曰：自此至「當西序」，論酬賓之事。賓降。主人

奠觶，辭降。賓對，東面立。主人坐取觶，

洗。賓不辭洗。不辭洗，以其將自飲。卒洗，揖

讓，升。賓西階上疑立。主人實觶，酬之，

阼階上北面坐奠觶，遂拜，執觶興。酬，勸酒。

賓西階上北面荅拜。主人坐祭，遂飲，卒

觶，興，坐奠觶，遂拜，執觶興。賓西階上北

①「是」，阮校云陳、閩、《通解》俱無「是」字，曹校云無者是。

②「西南」，曹校云此二字當倒。

③「云」上，曹校云似脫「下」字。

面荅拜。主人降洗，賓降，辭，如獻禮。以將

酌己。**疏**注「以將酌己」○釋曰：鄭言此者，前不辭洗，主

人自飲，至此辭洗，以將酌己，故辭也。升，不拜洗。

酬禮殺也。賓西階上立。主人實觶，賓之席

前北面。酬賓。賓西階上拜。主人坐奠觶于

薦西。賓辭，坐取觶以興，反位。賓辭，辭主人

復親酌己。**疏**注「賓辭」至「酌己」○釋曰：此射前獻時親

酌己，<sup>①</sup>今復親酌己。主人阼階上拜送。賓北面

坐奠觶于薦東，反位。酬酒不舉。**疏**「主人阼階

上拜送」○注「酬酒不舉」○釋曰：《鄉飲酒》注引《曲禮》

「不盡人之歡」之事，此不言，亦從鄭注可知。<sup>②</sup>主人

揖，降。賓降，東面立于西階西，當西序。主

人將與衆賓爲禮，賓謙，不敢獨居堂。主人西南面，

三拜衆賓。衆賓皆荅壹拜。三拜，示偏也。壹

拜，不備禮也。獻賓畢乃與衆賓拜，敬不能並。**疏**「主

人」至「壹拜」○注「三拜」至「能並」○釋曰：云「三拜，示偏

也」元空一字。者，衆賓無問多少，止爲三拜而已，是示偏

也。云「一拜，不備禮也」者，衆賓人皆壹拜，是拜不備禮。

此亦荅大夫拜法，<sup>③</sup>以其此禮中含卿大夫法，<sup>④</sup>若荅士拜

則亦再拜，見於《特性》也。云「獻賓畢乃與衆賓拜」者，自

爾來唯與賓拜，未與衆賓拜，今始拜之，故云「敬不能並」。

主人揖，升，坐取爵于序端，降，洗，升，實

爵，西階上獻衆賓。衆賓之長升拜受者三

人。長，其老者。言三人，則衆賓多矣。國以多德行、道

藝爲榮，何常數之有乎？

**疏**「主人」至「三人」○注「長

其」至「有乎」○釋曰：「衆賓之長升拜受者三人」，此雖非

賓賢能，其衆亦三人在堂上，<sup>⑤</sup>與《鄉飲酒》數同。其堂下

衆賓無定數，<sup>⑥</sup>故鄭云「言三人，則衆賓多矣」。云「國以

多德行、道藝爲榮」者，案《周禮·大司徒》：「以鄉三物教萬

①「射」，阮校引浦鏜改爲「辭」，曹校云當爲「對」。

②「鄭注」，曹校云殿本改爲「彼注」。

③「亦」下，阮校云：《要義》有「無」字。

④「卿」，阮校云《要義》作「鄉」，曹校云作「卿」是。

⑤「衆」下，曹校云脫「賓」字。

⑥「下」原作「上」，阮校云：毛本「上」作「下」，是也。據改。

民：一曰六德，二曰六行，三曰六藝，此既鄉人，則德行亦據六德、六行，道藝則六藝也。此並與《鄉飲酒》賓、介與衆賓之類並來，<sup>①</sup>與在射中。是以「孔子射於矍相之圃，觀者如堵牆」，彼亦據孔子爲鄉大夫，習人以禮樂之射，至於誓之於後「僅有存焉」，亦無常數之事也。主人拜送。拜送爵於衆賓右。

**疏**「主人拜送」○注「拜送」至「賓右」○釋曰：知在「衆賓右」者，約《鄉飲酒》獻衆賓皆於西階上賓右知之也。<sup>②</sup>坐祭，立飲，不拜既爵，授

主人爵，降，復位。既，盡。**疏**「坐祭」至「復位」○

釋曰：此還上三人者，降復賓南東面位。衆賓皆不拜

受爵，坐祭，立飲。自第四已下，又不拜受爵，禮彌

略。**疏**「衆賓」至「立飲」○注「自第」至「彌略」○釋曰：此

謂堂下衆賓無數者，故鄭云「自第四以下」。云「又不拜受

爵，禮彌略」者，三賓雖「坐祭，立飲，不拜既爵」，仍拜受，

此衆賓非直「坐祭，立飲，不拜既爵」，又「不拜受爵」，故云

「禮彌略」也。每一人獻，則薦諸其席。諸，於。

**疏**「每一」至「其席」○釋曰：此還據堂上三人有席者，故

云「薦諸其席」，謂席前也。衆賓辯有脯醢。薦於其

位。**疏**「衆賓辯有脯醢」○注「薦於其位」○釋曰：還據堂

下無席者，故鄭云「薦於其位」，不席也。<sup>③</sup>主人以虛

爵降，奠于筐。不復用。揖，讓，升。賓厭衆

賓，升。衆賓皆升，就席。**疏**「揖讓」至「就席」○

釋曰：自此以下至「舉觶者降」，論旅酬之事。一人洗，

舉觶於賓，一人，主人之吏。**疏**「一人洗舉觶于賓」○

注「一人主人之吏」○釋曰：「主人之吏」，亦謂府、史以下，

非屬官也。升，實觶，西階上坐奠觶，拜，執觶

興。賓席末荅拜。舉觶者坐祭，遂飲，卒

觶，興，坐奠觶，拜，執觶興。賓荅拜。降，

洗，升，實之，西階上北面。將進奠觶。賓拜。

拜受觶。舉觶者進，坐奠觶于薦西。不授，賤，不

敢也。**疏**注「不授賤不敢也」○釋曰：以其是主人之吏，

① 上「與」字，曹校以爲衍字。

② 「賓右」上，曹校云脫「衆」字。

③ 「不」下，阮校云毛本有「云」字，曹校云各本有「云」字是。

既賤，故不敢親授，奠之也。賓辭，坐取以興。若親

受然。**疏**注「若親受然」○釋曰：云「若親受然」者，賓辭，

即坐取以興，故云「若親受然」也。舉觶者西階上拜

送。賓反奠于其所。舉觶者降。**疏**「舉觶」至

「舉觶者降」○釋曰：云「反奠于其所」者，還於薦西，以其射後賓北面舉之爲旅酬，故不奠于薦東也。大夫若有

尊者，則入門左。謂此鄉之人爲大夫者也。謂之遵

者，方以禮樂化民，欲其遵法之也。其士也於旅乃入，鄉

大夫，士非鄉人，<sup>①</sup>禮亦然，主於鄉人耳。今文「遵」爲

「僕」。**疏**「大夫」至「門左」○注「謂此」至「爲僕」○釋曰：

云「大夫若有尊者」，言「若」者，或無，不定，故云「若」也。

鄭知是當鄉大夫者，以其鄉射既與人行射禮，<sup>②</sup>而言「大

夫」者，當鄉大夫可知。云「其士也於旅乃入」者，下記云

「士既旅不入」，明未旅間皆得入，是以未旅而射，其士皆

在也。知「鄉大夫、士非鄉人，禮亦然」者，以其同是鄉大

夫、士，禮無異故也。但異鄉不助主人樂賓爲別也。<sup>③</sup>

主人降。迎大夫於門內也。不出門，別於賓。**疏**「主

人降」○注「迎大」至「於賓」○釋曰：鄭知「迎大夫於門內」

者，以其上文大夫入門左，此經直云「主人降」，不云出，故知迎大夫在門內可知。<sup>④</sup>賓及衆賓皆降，復初位。不敢居堂，俟大夫入也。初位，門內東面。**疏**「賓

及」至「初位」○注「不敢」至「東面」○釋曰：知「初位，門內東面」者，上文「賓厭衆賓，皆入門左，東面，北上」，故知也。主人揖，讓，以大夫升，拜至。大夫荅

拜。主人以爵降，大夫降，主人辭降，大夫辭洗，如賓禮。席于尊東。尊東，明與賓夾尊也。

不言東上，統於尊也。**疏**「主人」至「尊東」○注「尊東」至

「尊也」○釋曰：上云「尊於賓席之東」，則在尊西，今大夫言「席於尊東」，明「與賓夾尊」可知。<sup>⑤</sup>云「不言東上，統

於尊也」者，席於尊東，繼尊而言，又不言東上，西上，是以

①「鄉大夫」，曹校云「鄉」殿本改作「卿」，疏同。

②「人」上，阮校云：浦鏜增「鄉」字。

③「不」下，曹校云似脫「必」字。

④「在」，阮校云：毛本作「於」。

⑤「與」原作「爲」，孫校云「爲」當爲「與」。曹校云殿本作「與」。據改。



下云「大夫降席東，<sup>①</sup>南面」，降由下，故知西上，統於尊也。升，不拜洗。主人實爵，席前獻于大夫。大夫西階上拜，進受爵，反位。主人大夫之右拜送。大夫辭加席，主人對，不去加席。辭之者，謙，不以己尊加賢者也。不去者，大夫再重席，正也。賓一重席。

**疏**「升不至加席」○注「辭之」至「重

席」○釋曰：云「升，不拜洗」者，以大夫尊，故不拜洗也。云「反位」者，大夫反西階上位。云「主人大夫之右拜送」者，謂在大夫之東拜送爵也。云「辭之者，謙，不敢以己尊加賢者」，鄉射之禮，鄉人爲賓，下記云「若大夫與則以公士爲賓」，亦選賢者爲之，故辭加席，又「不以己尊加賢者也」。<sup>②</sup>云「不去者，大夫再重席，正也」者，《鄉飲酒》云「公三重，大夫再重」，故知大夫再重席，禮之正也。云「賓一重席」者，鄉人故一重，縱公士爲賓，亦一重也。乃薦脯醢。大夫升席，設折俎，祭，如賓禮。不啻肺，不啻酒，不告旨。西階上卒爵，拜，主人荅拜。凡所不者，殺於賓也。大夫升席由東方。

**疏**「乃薦」至「荅拜」○注「凡所」至「東方」○釋曰：云「凡

所」，謂經中三事，以其殺於賓。若然，上云「不拜洗」，亦是殺於賓之類也。云「大夫升席由東方」者，以其大夫席西上，升由下，故知大夫升席由東方也。大夫降洗。

將酢主人也。大夫若衆，則辯獻，長乃酢。**疏**「大夫降

洗」○注「將酢」至「乃酢」○釋曰：自此至「皆升就席」，論大夫酢主人訖，賓主皆升就席之事。知「大夫若衆，則辯獻，長乃酢」者，此經據一大夫而言，故獻大夫即酢。案《有司徹》主人洗爵獻長賓于西階上，然後「衆賓長升，拜受爵。宰夫贊主人酌，若是以辯。乃升長賓。主人酌，酢于長賓」，<sup>③</sup>西階上北面，賓在左，注云「主人酌，自酢，序賓意，賓卑，不敢酢」，賓戶與凡平飲酒禮同，可以相參，亦是辯獻長乃酢也。<sup>④</sup>主人復阼階，降辭如初。卒洗，主人盥。盥者，雖將酌自飲，尊大夫，不敢褻。

①「席」，曹校云此字當重。

②「又」，曹校云此字衍。

③「酢」字原本無，阮校云：毛本「酌」下有「酢」字。據補。

④「酢」原作「酌」，今據重刊單疏本改。

**疏**「主人」至「人盥」○注「盥者」至「不敢褻」○釋曰：云

「盥者，雖將酌自飲」者，以其下文大夫洗爵，升授主人爵，是主人酌以自酢，故云「雖將酌自飲」。云「不敢褻」者，決

《有司徹》主人自酌不盥，<sup>①</sup>是此爲尊大夫，雖自酢亦不敢褻也。揖，讓，升。大夫授主人爵于兩楹間，

復位。主人實爵，以酢于西階上，坐奠爵，

拜。大夫荅拜。坐祭，卒爵，拜。大夫荅

拜。主人坐奠爵于西楹南，再拜崇酒。大

夫荅拜。主人復降階，揖，降。將升賓。**疏**「揖

讓」至「揖降」○注「將升賓」○釋曰：云「主人坐奠爵於西

楹南」者，前獻賓，賓酢主人，主人飲酢訖，奠爵于東序端，

將後獻衆賓，<sup>②</sup>不得奠于篚中；此受大夫酢，不奠于篚者，

爲士於旅乃人，擬獻士，故奠爵于此也。大夫降，立

于賓南。雖尊，不奪人之正禮。**疏**「大夫」至「賓南」○

注「雖尊」至「正禮」○釋曰：大夫尊，在堂則席之于尊東，

特尊之。今降而在賓下者，欲使賓主相對行禮，若在

北，<sup>③</sup>北則妨賓主揖讓之正禮，故云「不奪主人之正禮」。<sup>④</sup>

主人揖，讓，以賓升。大夫及衆賓皆升，就

席。席工于西階上，少東。樂正先升，北面立于其西。言少東者，明樂正西側階，不欲大東，辟射

位。**疏**「席工」至「其西」○注「言少」至「射位」○釋曰：自

此至「告于賓」，論作樂之事。云「席工」者，謂爲工設席，

下文乃升席也。云「言少東者，明樂正西側階」者，既言

「席工于西階上，少東」，則在西階東矣，復云「樂正立于其

西」，則近席西。其言從近，故知樂正側近西階東，則「不

欲大東，辟射位」。《大射》亦同此注，《燕禮》注亦然者，燕

亦容有射法。《鄉飲酒》工位與此同，注不言者，不射故

也。工四人，二瑟，瑟先。相者皆左何瑟，面

鼓，執越，內弦，右手相。人，升自西階，北

面，東上。工坐。相者坐授瑟，乃降。瑟先，

賤者先就事也。相，扶工也。面，前也。鼓在前，變於君

也。執越，內弦，右手相，由便也。越，瑟下孔，所以發越

①「酌」，曹校云似當爲「酢」。

②「後」，曹校云當爲「復」。

③「北」，阮校云：毛本作「其」。

④「主」，阮校云：毛本無。

其聲也。前越言執者，內有弦結，手入之淺也。相者降，立西方。**疏**「工四」至「乃降」○釋曰：云「四人，**①**二瑟」，

則是二人歌可知。經不言相歌二人者，以其空相，亦與瑟者同，**②**故不言，直言瑟之難者也。○注「瑟先」至「西方」

○釋曰：云「瑟先，賤者先就事也」者，案《大射》大師、少師歌，衆工瑟，是知瑟者賤也。凡工者皆先瑟後歌，是賤者先即事，故序亦在前。若然，得獻亦在前，以隨其先後而取之故也。**③**云「鼓在前，變於君也」者，《鄉射》與《大射》相對，《大射》君禮而後首，此臣禮前首，故云「變於君」。

《燕禮》與《鄉飲酒》相對，是以《燕禮》面鼓，又與《鄉飲酒》後首相變。云「執越，內弦，右手相」者，案《鄉飲酒》注云「內弦，側擔之」者，據瑟體而言，《燕禮》注云「內弦，弦爲主」者，據弦體而說，此言「內弦，右手相，由便」，語異義同也。云「前越言執者，內有弦結，手入之淺也」者，瑟體首寬尾狹，內越孔雖長，**④**廣狹亦等，但弦居瑟上，近首鼓處則寬，近尾不鼓處并而狹，側持之法，近鼓持之，人則近，手入則深。**⑤**是以通與《燕禮》言「面鼓」，**⑥**則云「執之手入淺也」，《大射》與《鄉飲酒》言「後首」，則云「挾越」，手入深故也。云「相者降，立西方」者，其相者是弟子，位在西者，是以下文云「樂正適西方，命弟子贊工遷樂于下」，故

知此相工是弟子，故降立還於西方也。笙入，立于縣中，西面。堂下樂相從也。縣中，磬東立，西面。**疏**

「笙入」至「西面」○注「堂下」至「西面」○釋曰：云「堂下樂相從也」者，案上文云「縣于洗東北，西面」，此云「立于縣中」，明是堂下相從，皆在東方也。云「縣中，磬東立，西面」者，謂在磬東，當磬之東。鄭知不在磬西西面者，若磬西西面，則笙者背磬，不可，故知在磬東西面也。乃合

樂，《周南》：《關雎》、《葛覃》、《卷耳》；《召南》：《鵲巢》、《采芣》、《采蘋》。不歌，不笙，不間，志在射，略於樂也。不略合樂者，《周南》、《召南》之風，鄉樂也，不可略其正也。昔大王、王季、文王始居岐山

**①**「云」下，阮校云：《要義》、毛本有「工」字。

**②**「亦」，曹校云當爲「不」。

**③**「取」，阮校引浦鏜云：「取」疑「次」字誤。

**④**「內」，曹校云當爲「前」。

**⑤**「近鼓持之入則近手入則深」，曹校云：文有脫訛，殿本改云：「近鼓持之，手入則淺，近尾持之，手入則深。」

**⑥**「通」，曹校云曾爲「此」。

之陽，躬行《召南》之教，以成王業。至三分天下，乃宣《周南》、《召南》之化，本其德之初，「刑于寡妻，至于兄弟，以御于家邦」，故謂之鄉樂，用之房中，以及朝廷饗燕、鄉射飲酒。此六篇，其風化之原也，是以合金石絲竹而歌之。

**疏**「乃合」至「采蘋」○釋曰：言「乃」者，以其作樂之法，先歌後乃合樂，<sup>①</sup>今不歌，不笙，不間，唯合樂，故言「乃」以見非常故也。○注「不歌」至「歌之」○釋曰：據《鄉飲酒》、《燕禮》作樂有四節，今不歌，不笙，不間，唯有合樂，故云「志在射，略於樂也」。云「合樂者」，<sup>②</sup>《周南》、《召南》之風，鄉樂也者，上注已云《頌》及《大雅》天子樂，《小雅》諸侯樂，此二《南》鄉大夫樂，但鄉飲酒、鄉射是大夫、士為主，故大夫、士樂為鄉樂者也。云「不可略其正也」者，二《南》是大夫、士之鄉樂，己之正樂，故云「不可略其正者」也。云「昔大王」已下，於《鄉飲酒》注已說，義具於彼，此注略言之耳。若然者，<sup>③</sup>《燕禮》與《鄉飲酒》文同，注又與《燕禮》不異者，<sup>④</sup>以其鄉射與鄉飲酒同是大夫、士禮。鄉大夫、士行射禮，<sup>⑤</sup>先行鄉飲酒禮，《鄉飲酒》與《鄉射》自為首尾，故《鄉飲酒》注具於此略言。燕禮是諸侯禮，天子、諸侯射先行燕禮，則《燕禮》與《大射》自為首尾，是以

《燕禮》歌、笙、間、合，鄭亦具注之，《大射》又略言之也。工不興，告于樂正曰：「正歌備。」不興者，瞽矇禮略也。

**疏**「工不」至「歌備」○注「不興」至「略也」○釋曰：言「正歌」者，升歌也。<sup>⑥</sup>升歌《鹿鳴》是上歌諸侯樂，非己正樂，故以二《南》為正歌也。言「備」者，凡作樂皆三終，此「備」明亦三終也。云「不興者，瞽矇禮略也」者，以工告樂正，以卑告尊，當興，今以瞽矇無目，不可責其備禮，故不興者，於禮略也。樂正告于賓，乃降。

樂正降者，堂上正樂畢也。降立西階東，北面。**疏**「樂

正」至「乃降」○注「樂正」至「北面」○釋曰：言「告于賓」者，作樂主為樂賓，今歌備，故告賓言「歌備」也。言「樂正降者，堂上正樂畢也」者，以其鄉飲酒、燕禮但升歌、笙、間、

①「歌」下，曹校云脫「次笙次間」四字。

②「云」下，據注文當脫「不略」二字。

③「者」，曹校云此字衍。

④「燕禮」，曹校云當為「鄉飲」。

⑤「鄉」，原作「卿」，今據阮校改。

⑥「升歌也」，曹校云此三字衍。

合樂，<sup>①</sup>皆是正歌，今略去升歌、笙、閒三者，唯有合樂於堂上，故云「堂上正樂畢也」。云「正樂」者，對後無筭樂非正樂也。下射雖歌《騶虞》，亦是堂下，非堂上，故以「堂上」決之也。云「降立西階東，北面」者，此無正文，約堂上樂正位在西階東，北面，今降亦當在西階東，北面也。主人取爵于上筐，獻工。大師則爲之洗。尊之也。君賜大夫樂，又從之以其人，謂之大師。**疏**「主人」

至「之洗」○注「尊之」至「大師」○釋曰：自此至「反升就席」，<sup>②</sup>論主人獻工、笙之事。但天子、諸侯官備，有大師、

少師，瞽人作樂之長，大夫、士官不備，不合有大師。君有賜大夫、士樂器之法，故《春秋左氏》云晉侯歌鍾二肆，取半以賜魏絳，魏絳於是乎始有金石之樂，禮也。時以樂人賜之，故鄭云「君賜大夫樂，又從之以其人，謂之大師」也。賓降，主人辭降。大夫不降，尊也。**疏**「賓降主人辭

降」○注「大夫不降尊也」○釋曰：云「大夫不降，尊也」者，此賓降，大夫若降，直與賓共文。今不言大夫降，《鄉飲酒》亦云賓、介降，<sup>③</sup>不言大夫降，明大夫皆不降，以其尊故也。工不辭洗。卒洗，升，實爵。工不興，左瑟，一人拜受爵。左瑟，辟主人授爵也。一人，無

大師則工之長者。**疏**「工不」至「受爵」○釋曰：此言「工

不辭洗」及「一人拜受爵」，皆上大師也，不言大師，言工人者，欲見有大師則大師不辭洗，拜受爵；若無大師，則凡工不辭洗，拜受爵，故變言「工」與「一人」。假令大師左瑟，<sup>④</sup>先獻，若歌則後獻，亦先獻工一人，是以鄭云「一人，無大師則工之長者」，以《鄉飲酒》獻工時云「一人不興，<sup>⑤</sup>受爵」，注云「一人，工之長也」，<sup>⑥</sup>大師爲歌者，未得獻，先獻瑟工之長者也。主人阼階上拜送爵。薦脯

<sup>①</sup>「但升歌笙閒合樂」，曹校云：「但」當爲「俱」，「樂」下似脫「皆有」二字。

<sup>②</sup>「就」字原本無，阮校云：毛本「升」下有「就」字。按下經文正作「反升就席」，毛本是也，據補。

<sup>③</sup>「降」原本無，阮校云：毛本「介」作「降」，按毛本是。孫校云：此奪「降」字耳，「介」字則不當刪，毛本改未盡允。據改。

<sup>④</sup>「左」，曹校云當爲「在」。

<sup>⑤</sup>「人」下，曹校云脫「拜」字。

<sup>⑥</sup>「工之長也」原本作「笙之長者也」，阮校云：浦鏜據《鄉飲酒》注改「笙」爲「工」，刪「者」字。按此涉「一人拜盡階不升堂受爵」注文而誤。浦鏜是也，據改。

醢。使人相祭。人，相者。**疏**「主人」至「相祭」○注

「人相者」○釋曰：云「人，相者」，則弟子相之。既相工，明

祭亦相之可知。工飲，不拜既爵，授主人爵。

衆工不拜受爵，祭，飲。辯有脯醢，不祭。

祭，飲，不興受爵，坐祭，坐飲。**疏**「工飲」至「不祭」○注

「祭飲」至「坐飲」○釋曰：云「工飲，不拜既爵」者，還是上

「一人拜受爵」者，雖不拜既爵，仍拜受也。下衆工又對上

「一人拜受爵」，衆工不拜受爵也。鄭云「祭，飲，不興受

爵，坐祭，坐飲」者，對上賓主坐祭，<sup>①</sup>立飲，故云「坐祭，坐

飲」，亦不拜既爵可知也。不洗，遂獻筓于西階

上。不洗者，賤也。衆工而不洗矣，而著筓不洗者，筓賤

於衆工，正君賜之，猶不洗也。**疏**「不洗」至「階上」○注

「不洗」至「洗也」○釋曰：云「衆工而不洗矣，而著筓不洗

者，筓賤於衆工，正君賜之，猶不洗也」，鄭云此者，欲見工

在上，貴，君賜之大師爲之洗；筓賤，位在下，正謂君賜之

筓人，<sup>②</sup>猶不爲之洗，況衆筓乎？欲取賜筓人不爲之洗

之意，不取衆筓不爲洗也。筓一人拜于下，盡階，

不升堂，受爵。主人拜送爵。階前坐祭，立

飲，不拜既爵，升，授主人爵。衆筓不拜受

爵，坐祭，立飲。辯有脯醢，不祭。主人以

爵降，奠于筐。**疏**「筓一」至「于筐」○釋曰：此經總

獻筓人，雖賤中亦有尊卑，故一人升階受爵，餘者不升，<sup>③</sup>

不拜既爵則同也。反升，就席。亦揖讓，以賓升，衆賓

皆升。**疏**「反升就席」○注「亦揖」至「皆升」○釋曰：云

「亦揖讓，以賓升，衆賓皆升」者，謂亦前「大夫若有遵者，

則入門左。主人降，賓及衆賓皆降」，主人共大夫行禮訖，

「主人揖，讓，以賓升。大夫及衆賓皆升，就席」，相似，故

云「亦」。若然，上賓降時，雖不言衆賓降，衆賓卑，從降可

知，故今從賓升也。主人降席，自南方，禮殺，由便。

**疏**「主人」至「南方」○注「禮殺由便」○釋曰：自此盡「未

旅」，論立司正之事也。云「禮殺，由便」者，對上文主人受

酢爵時禮盛，故主人降席自北方，啐酒於席末，亦然，今此

① 「賓主」，曹校云當爲「衆賓」。

② 「謂」，曹校云當作「爲」。

③ 「故一人升階受爵餘者不升」，曹校云「升階」當爲「拜升」，「不升」當爲「不拜」。

立司正禮殺，故降席自南方，故云「禮殺，由便」也。側降，賓不從降。

**疏**「側降」○注「賓不從降」○釋曰：「側降」，猶特降，故云「賓不從降」也。作相爲司正。司

正禮辭，許諾。主人再拜。司正荅拜。爵備

樂畢，將留賓以事，爲有解倦失禮，<sup>①</sup>立司正以監之，察儀法也。《詩》云：「既立之監，或佐之史。」**疏**「作相」至「荅

拜」○注「爵備」至「之史」○釋曰：云「爵備」者，謂賓及衆

賓與尊者，并工、笙並得獻，是爵備也。云「樂畢」者，合樂

訖，是樂畢，以無升笙與間，故不言樂成，而云「畢」而已也。云「將留賓以事」者，下有射事，射訖行旅無筭之事，

故須立司正以監之。但中間爲射繫，<sup>②</sup>變司正爲司馬，射

訖反爲司正，以監察儀法也。引《詩》者，證監與正爲一

物，皆察儀法也。主人升，就席。司正洗觶，升

自西階，由楹內適阼階上，北面受命于主

人，洗觶者當酌，以表其位、顯其事也。楹內，楹北。

**疏**「主人」至「主人」○注「洗觶」至「楹北」○釋曰：云「受命于

主人」者，謂受主人請安賓之命，是以下云「請安于賓」，鄭

注云「傳主人之命」也。西階上北面，請安于賓。

傳主人之命。賓禮辭，許。司正告于主人，遂

立于楹間以相拜。相謂贊主人及賓相拜之辭。主

人阼階上再拜，賓西階上荅再拜，皆揖就

席。爲已安也。今文「揖」爲「升」。司正實觶，降自

西階，中庭北面坐奠觶，興，退，少立。奠觶，

表其位也。少立，自脩正，慎其位也。古文曰「少退，立」。

**疏**「司正」至「少立」○注「奠觶」至「退立」○釋曰：此云

「北面坐奠觶」，《鄉飲酒》亦然者，此二者皆臣禮，故北面奠觶。《燕禮》、《大射》皆司正南面奠觶者，彼是君禮，欲

取還不背君，故南面奠觶。故《大射》云「南面坐奠觶，興，

右還，北面，少立，坐取觶，興。坐不祭，卒觶，奠之，興，再

拜稽首。左還，南面坐取觶，洗，南面反奠于其所，北面

立」，注云「皆所以自昭明於衆也。將於觶南北面則右還，

於觶北南面則左還，如是得從觶西往來也。必從觶西往

來者，爲君在阼，不背之也」，又取威儀多。此及《鄉飲酒》

①「解」，阮校云：毛本作「懈」。

②「繫」，阮校云陳、閩、《通解》俱無「繫」字，曹校云無者是。

在阼非君，直北面奠觶，又威儀簡故也。進，坐取觶，

興，反坐，不祭，遂卒觶，興，坐奠觶，拜，執

觶興，洗，北面坐奠于其所，今文「坐取觶」，無

「進」。又曰「坐奠之，拜」。興，少退，北面立于觶

南。立觶南，亦其故擯位。**疏**「興少」至「觶南」○注「立

觶」至「擯位」○釋曰：云「立觶南，亦其故擯位」者，案上未

有擯位，此云擯位者，案《射禮》云「擯者退中庭」，是擯者

在中庭有位；《燕禮》、《大射》皆擯者爲司正，則此《鄉射》

及《鄉飲酒》云「作相爲司正」，相即擯者也，故知觶南者，

中庭故擯位也。末旅。<sup>①</sup>旅，序也。末以次序相酬，以

將射也。旅則禮終也。**疏**「末旅」○注「旅序」至「終也」

○釋曰：旅，衆也。而言「序」者，謂衆以次序相酬。必於

「末旅」而射者，旅則醉，禮恐終不得射，<sup>②</sup>故於末旅而射

也。此大夫、士禮，將射先行鄉飲酒，行旅酬而已，<sup>③</sup>故射

前未旅而射，後乃始行旅酬。燕禮、大射國君禮，故先行

燕禮。雖行一獻，以其辨尊卑，故行四舉旅。大射主爲

射，故再拜訖即射；<sup>④</sup>燕禮主爲燕，故三舉旅乃射，彼皆與

此不同也。三耦俟于堂西，南面，東上。司正既

立，司射選弟子之中德行、道藝之高者以爲三耦，使俟事於此。**疏**「三耦」至「東上」○注「司正」至「於此」○釋曰：

自此已下盡「樂正北面立于其南」，論三番射事。鄭知「司

正既立，司射即選弟子之中爲三耦，俟事於此」者，經云

「俟於堂西」，明此時始選，故知既立司正，司射乃選弟子，

使「俟事於此」也。故記云「三耦者，使弟子、司射前戒

之」，注云「弟子，賓黨之少者也。前戒，謂先射請戒之。」

司射適堂西，袒、決、遂，取弓于階西，兼挾

乘矢，升自西階。階上北面告于賓曰：「弓

矢既具，有司請射。」司射，主人之吏也。於堂西袒、

決、遂者，主人無次，隱蔽而已。袒，左免衣也。決，猶闔

也，以象骨爲之，著右大擘指，以鉤弦闔體也。遂，射韞

也，以韋爲之，所以遂弦者也，其非射時則謂之拾，拾，斂

也，所以蔽膚斂衣也。方持弦矢曰挾。乘矢，四矢也。

①「末」，阮本作「未」。

②「恐終」原作「終恐」，阮校云：「終恐」誤倒，據乙。

③「行旅」，阮校云：毛本「行」上有「後」字，《要義》「旅」

下衍「酢」字。曹校云各本「行」上有「後」字是也。

④「拜」，曹校云當爲「旅」。



《大射》曰：「挾乘矢於弓外，見鏃於弣，右巨指鉤弦。」古文「挾」皆作「接」。

**疏**

「司射」至「請射」○注「司射」至「作

接」○釋曰：云「司射取弓于階西，兼挾乘矢」者，以其司射之弓矢豫陳於西階，<sup>①</sup>故司射於堂西袒、決、遂訖，即取弓矢於階西，是以下記云「司射之弓矢與扑倚于西階之西」

是也。云「有司請射」者，此「有司」謂司馬，故《大射》云「司射自阼階前曰：『爲政請射。』」注「爲政，謂司馬」。司馬政官，主射禮。諸侯之州長無司馬官，直言「有司請射」，以比司馬也。云「司射，主人之吏也」者，《大射》諸侯禮，有大射正爲長，射人次之，司射又次之，小射正次之，<sup>②</sup>皆是士爲之；則此大夫、士禮，不得用士，故知是主人之吏爲之可知。云「於堂西袒、決、遂者，主人無次，隱蔽而已」者，此對《大射》人君禮，有次在東方，不須適堂西也。云「袒，左免衣也」，知袒左者，凡事無問吉凶皆袒左，是以《士喪》主人左袒，此及《大射》亦皆袒左，不以吉凶相反。唯有受刑袒右，故《覲禮》云「乃右肉袒于廟門之東」，注云「右肉袒者，刑宜施於右」是也。云「決，猶闔也，以象骨爲之」者，《大射》注亦然。案《繕人》云「掌王之用弓、弩、矢、箠、簠、簋、決、拾」，鄭注云：「《士喪禮》決用正王棘若樺棘，則天子用象骨與？」無正文，故引《士喪禮》，又言

「與」以疑之。若然，諸侯及大夫生用象，死用棘，天子無問死生皆用象者，蓋取其滑也。云「著右大擘指，以鉤弦闔體也」，知者，以右巨指鉤弦，故知著於右大擘指也。以右擘著極，是以《大射》云「朱極三」，注云「以朱韋爲之。三者，食指、將指、無名指是也」。云「遂，射韞也，以韋爲之，以遂弦者也」者，《大射》注亦云「遂，射韞也，以朱韋爲之，著左臂，所以遂弦也」。云「其非射時則謂之拾，拾，斂也，所以蔽膚斂衣也」者，此篇及《大射》將射云「袒、決、遂」，射訖則云「說決、拾」。於公雖射亦謂之拾，故《大射》云「公就物，小射正奉決拾以筈，大射正執弓，皆以從於物」，彼亦臨時而云拾，以公射袒朱襦，言拾以見斂衣，故變文以見義也。云「所以蔽膚斂衣也」者，言「蔽膚」據士「斂衣」據大夫已上。是以下記「大夫與士射，袒薰襦」，《燕禮·記》云「君射，袒朱襦」，若對君，大夫亦與士同，亦「蔽膚」也。云「方持弦矢曰挾」，知者，下記云「凡挾矢，於二指之間橫之」，是言其方可知。引《大射》「挾乘矢於弓外，見鏃於弣」，是其方也。若側持弓矢則名執，故下文云

① 「西階」，曹校云當爲「階西」。

② 「正」下，阮校云：毛本有「又」字。

「司射猶袒、決、遂，左執弓，右執一个，兼諸弦，面鏃」，注云「側持弓矢曰執。面，猶尚也。并矢於弦，尚其鏃」是也。云「乘矢，四矢也」者，下云「司射搢三，挾一个」，又《詩》云「四矢反兮」，是四矢曰乘。凡物四皆曰乘也。引《大射》者，欲見挾爲方持弦矢。賓對曰：「某不能，爲二三子許諾。」言某不能，謙也。二三子，謂衆賓已下。

**疏**「賓對」至「許諾」○注「言某」至「已下」○釋曰：「二三子，謂衆賓以下」者，謂除三耦之外，通射者而言，故云「謂衆賓以下」也。若然，《投壺》禮賓固辭乃許者，彼因燕而爲之，再辭乃許；此爲衆習禮，不專爲己，故一辭即許。<sup>①</sup>《大射》不請者，<sup>②</sup>彼爲擇士而射，故不須云許，直告射節而已；此爲衆庶習禮，故云「爲二三子許諾」，亦一辭而許也。司射適阼階上，東北面告于主人曰：「請射于賓，賓許。」司射降自西階，階前西面，命弟子納射器。弟子，賓黨之年少者也。納，內也。射器，弓、矢、決、拾、旌、中、籌、楅、豐也。賓黨東面，主人之吏西面。

**疏**「司射」至「射器」○注「弟子」至「西面」○釋曰：鄭知「弟子」是「賓黨之年少者」，以其賓黨

西方東面，今以西面命之，明是賓黨，是以鄭云「賓黨東面，主人之吏西面」也。言「弟子」，故知少者。知「射器，弓矢」以下者，並案下文所陳用者知之也。云「賓黨東面，主人之吏西面」者，案《投壺》賓黨及主黨皆爲弟子，皆得與投壺者，彼燕法主歡心，故皆與；今此射與鄉人習禮，《鄉飲酒》同，上下經文黨皆不與也。<sup>③</sup>乃納射器，皆

在堂西。賓與大夫之弓倚于西序，矢在弓下，北括。衆弓倚于堂西，矢在其上。上，堂西廉。矢亦北括。

**疏**「乃納」至「其上」○注「上堂」至「北括」○釋曰：云「賓與大夫之弓倚于西序，矢在弓下，北括。衆弓倚于堂西，矢在其上」者，以其序在堂上，故矢在弓下，堂西，矢在堂上，隨其弓在堂下，<sup>④</sup>隨其所宜而已。云「上，堂西廉」者，以其在堂西，故矢在上者，還在堂上之廉稜也。云「矢亦北括」者，其在堂上西序者北括，故知堂下

①「一」，曹校云：似當爲「不」，下同。

②「請」，曹校云：似當爲「許」，「許」上宜加「云」字。

③「黨」上，曹校云脫「主」字。

④「隨其弓在堂下」，阮校云：毛本「下」作「上」。曹校云殿本刪「隨」字。

者於上亦北括也。主人之弓矢在東序東。亦倚于東序也。矢在其下，北括。

**疏**「主人」至「序東」○注「亦倚」至「北括」○釋曰：上賓、大夫弓矢在西序，矢在北括，<sup>①</sup>此主人弓矢如上也。

司射不釋弓矢，遂以比三耦於堂西。三耦之南，北面，命上射曰：

「某御於子。」命下射曰：「子與某子射。」比，

選次其才相近者也。古文曰「某從於子」。

**疏**「司射」至

「子射」○注「比選」至「於子」○釋曰：言「遂以」者，司射因

上階前令弟子納射器，不釋弓矢，遂比三耦，因曰遂，故云

「遂以」也。云「比，選次其才相近者也」者，才雖各自用，

乃因選其力相近爲宜也。<sup>②</sup>司正爲司馬。兼官，由

便也。立司正，爲泣酒爾，今射，司正無事。

**疏**「司正爲

司馬」○注「兼官」至「無事」○釋曰：言「兼官」者，若以諸

侯對大夫，大夫兼官，諸侯具官；特以諸侯對天子，天子具

官，諸侯兼官，各有所對，故云「兼官」。云「由便也」者，使

司正爲司馬，不煩餘官也。案《射義》云：「孔子射於矍相

之圃，射至於司馬，使子路執弓矢出延射，又使公罔之裘、

序點揚觶而語。」但此篇是州長春、秋習射法，兼士有鄉大

夫。<sup>③</sup>三年貢士之後，以五物詢衆庶，射於庠。鄉大夫五

物詢衆而引孔子射於矍相之事，則孔子魯之鄉大夫也。

以其天子鄉大夫卿爲之，<sup>④</sup>諸侯鄉大夫使下大夫爲之，是

其差也。但鄉飲酒之禮，二人舉觶爲無筭爵，據此篇未旅

先射，射訖行旅酬，酬訖乃始二人舉觶爲無筭爵。<sup>⑤</sup>未射

時詢衆庶，得使公罔之裘、序點二人揚觶者，揚觶實在射

後，一酬訖始行之。今孔子詢衆庶之時，借取無筭爵時於

旅也語，故使公罔之裘、序點二人揚觶以詢衆庶。此篇司

射恒執弓矢，子路亦執弓矢，則子路爲司射也。射於矍相

時，云「射至司馬」，此文又云「司正爲司馬」，則使子路詢

衆庶時，當此節也。司馬命張侯。弟子說束，遂

繫左下綱。事至也。今文「說」皆作「稅」。

**疏**「司馬」

至「下綱」○注「事至也」○釋曰：上張侯時「不繫左下綱，

<sup>①</sup>「在下」，曹校云殿本有「弓下」二字。

<sup>②</sup>「因」，曹校云當爲「應」。

<sup>③</sup>「士」，曹校云殿本刪「士」字。

<sup>④</sup>「大夫卿」原作「卿大夫」，阮校云：毛本「卿」字在「夫」字下，按毛本是。據乙。

<sup>⑤</sup>「乃」原作「賓」，今據重刊單疏本改。

中掩束之，今弟子說其束，不致地，遂繫左下綱於植，事至故也。司馬又命獲者倚旌于侯中。為當負侯也。獲者，亦弟子也。謂之獲者，以事名之。

**疏**「司馬」

至「侯中」○注「為當」至「名之」○釋曰：案下記云「司馬階前命張侯，遂命倚旌」，以記言之，司馬命張侯與命倚旌，其事相因，故云「遂」，明同是西階前也。云「為當負侯也」者，下云「司馬命獲者執旌以負侯」是也。知「獲者，亦弟子」者，堂下位主人之黨在東，賓弟子在西，下云「獲者由西方坐取旌，倚于侯中」，言由西方，是賓黨弟子可知，亦上張侯者也。①云「以事名之」者，以其唱獲，故名「獲者」也。獲者由西方坐取旌，倚于侯中，乃退。樂正適西方，命弟子贊工遷樂于下。當辟射也。贊，佐也。遷，徙也。弟子相工如初人，降自西階。阼階下之東南，堂前三筭，西面北上坐。筭，矢幹也。今文無「南」。

**疏**「弟子」至「上坐」○

注「筭矢幹也」○釋曰：言「如初人」者，亦如上升堂時，相者亦在左，何瑟，面鼓，內弦，右手相，如人升時也。云「筭，矢幹也」者，案《矢人》注「矢幹長三尺」，是去堂九尺

也。樂正北面立于其南。北面鄉堂，不與工序也。

**疏**「樂正」至「其南」○注「北面」至「序也」○釋曰：云「不與工序也」者，工西面北上，以南北為序，樂正北面，則東西為列，故云「不與工序也」。

### 儀禮疏卷第十一

江寧府知府陽城張敦仁編校 元和縣

學生員顧廣圻覆校

①「亦」，曹校云「亦」字當重。

## 儀禮疏卷第十二

唐朝散大夫行大學博士弘

文館學士臣賈公彥等撰

司射猶挾乘矢，以命三耦，各與其耦讓取弓矢，拾。猶，有故之辭。拾，更也。

**疏**「司射」至「矢拾」

○注「猶有」至「更也」○釋曰：自此盡「取扑，搯之，以反位」，論司射誘射，教三耦射法之事。大射有次，「三耦取弓矢於次」，注云「取弓矢，不拾者，次中隱蔽處」。則此無次，「取弓矢，拾者，拾，更也，遞取弓矢，見威儀故也。云「猶，有故之辭」者，前已云「司射兼挾乘矢」，此云「猶」，是「有故之辭」。云此者，欲見司射恒執弓矢未改之意。三耦皆袒、決、遂。有司左執弣，右執弦而授弓。有司，弟子納射器者也。凡納射器者，皆執以俟事。

**疏**「三耦」至「授弓」○注「有司」至「俟事」○釋曰：前「有

司請射」解為司馬，此有司為弟子者，以有事者皆有司，故鄭注解上「有司請射」與《大射》「為政請射」同，故解為司馬；此經以納射器使弟子，不見出文，則弟子執射器入者，即使守之以授用者，故知有司還是弟子，是以鄭云「凡納射器者，皆執以俟事」。遂授矢。受於納矢而授之。

**疏**「遂授矢」○注「受於」至「授之」○釋曰：此授矢者，則

上文有司授弓者，以其弟子執弓矢，故授弓訖，復授矢，是以鄭云「受於納矢而授之」。三耦皆執弓，搯三而挾一个。未違俟處也。搯，插也，插於帶右。

**疏**「三耦」

至「一个」○注「未違」至「帶右」○釋曰：上云「三耦俟于堂西」，又云「遂以比三耦於堂西」，此云「三耦皆執弓，搯三而挾一个」，前後皆因前位，去未違俟處。①下文乃云「三耦皆進，由司射之西，立于其西南，東面北上」，是移本位者也。云「搯，插也，插於帶右」者，以其左手執弓，右手抽矢而射，故知插於帶右，故《詩》云「左旋右抽」是也。司射先立于所設中之西南，東面。三耦皆進，

①「去」，阮校云：毛本作「乃」。曹校云：「去」當為「云」，「云」上當補「故」字。

由司射之西，立于其西南，東面北上而俟。司射東面立于三耦之北，搢三而挾一个。爲當誘射也。固東面矣，復言之者，明卻時還。

**疏**「司射」

至「一箇」○注「爲當」至「時還」○釋曰：云「固東面矣，復言之者，明卻時還」者，司射先在中西南東面，今三耦立定，司射卻來向三耦之北東面，明司射卻時右還，<sup>①</sup>西南東面也。<sup>②</sup>揖，進。當階，北面揖；及階，揖；

升堂，揖。豫則鉤楹內，堂則由楹外。當左物，北面揖。鉤楹，繞楹而東也。序無室，可以深也。

周立四代之學於國，而又以有虞氏之庠爲鄉學，《鄉飲酒義》曰「主人迎賓於庠門外」是也。庠之制有堂有室也。今言豫者，謂州學也，讀如「成周宣謝災」之謝，《周禮》作序。凡屋無室曰謝，宜從謝。州立謝者，下鄉也。左物，下物也。今文「豫」爲「序」，序乃夏后氏之學，亦非也。

**疏**「揖進」至「面揖」○注「鉤楹」至「非也」○釋曰：凡行射禮，耦耦各相對揖。故司射誘射，發東面位，揖進。當西階，北面揖；及階，揖；升堂，揖。訖，東行向兩楹間物，須過西楹，是以豫則鉤楹內北過，以記云「序則物當棟」。物

近北，故過由楹北也。堂則由楹外過而東行，以記云「堂則物當楣」，物近南，故過由楹南也。云「當左物」者，以南面爲正，東爲左物，北面又揖也。云「鉤楹，繞楹而東也」者，北而東也。云「序無室，可以深也」者，據州立序而言。云「周立四代之學於國」者，案《王制》云有虞氏上庠、下庠，夏后氏東序、西序，殷人左學、右學，周人東膠、虞庠，「周立四代」者，通已爲四代。但質家貴右，故虞、殷大學在西郊，小學在國中；文家貴左，故夏、周大學在國中，王宮之東，小學在西郊。周所立前代學者，立虞、夏、殷三代大學。若然，則虞氏上庠，則周之小學，爲有虞氏之庠制，在西郊也；立殷之右學則瞽宗，周立之亦在西郊；立夏后氏之東序，則周之東膠，立在王宮之東。以其改東序爲東膠，東膠二代名，<sup>③</sup>故云「周立四代學」，《文王世子》亦論四代學中學樂之事。云「而又以有虞氏之庠爲鄉學」者，與周立虞庠同制，故引《鄉飲酒義》爲證鄉立庠之義也。<sup>④</sup>

①「右」，曹校云似當爲「左」。

②「東」上，曹校云脫「向乃」二字。

③「二」上，曹校云脫「兼」字。

④「爲」，曹校云此字衍。

云「庠之制有堂有室也」者，則此篇云「堂則由楹外」，又記云「堂則物當楣」是也。《論語》云「由也，升堂矣，未入於室」，室、堂相將，有室必有堂。言此者，見庠則室、堂俱有，對榭則有堂無室也。云「今言豫者，謂州學也」者，《周禮·地官·州長》職云「春、秋以禮會民而射于序」是也。云「讀如『成周宣榭災』之『榭』」者，案宣公十六年經書「成周宣榭火」，彼雖不據學，以其無室，與《爾雅》「無室曰榭」同，故引以爲證也。云「《周禮》作序」者，據《州長》職文。云「凡屋無室曰榭，宜從榭」者，鄭廣解榭名，《爾雅》云「闔謂之臺，有木者謂之榭」，及「成周宣榭」及此「州立榭」，皆是無室，故云「凡」以該之，不得從豫及序，故云「宜從榭」也。云「州立榭者，下鄉也」者，以其鄉之庠有室有堂，州榭則有堂無室，故云「下鄉」也。云「今文豫爲序，序乃夏后氏之學，亦非也」，不從今文者，以其虞庠、夏序皆是有室，州之序則無室，故云「非」。言「亦」者，古文爲「豫」已非，今文作夏后氏之序，亦非。若然，《禮記·學記》及《州長》職并下記皆作「序」，鄭不破之者，以鄉立虞庠，依虞有室，州立夏序，去室猶取序名，是以鄭注《州長》云「序，州黨之學也」，故不破之也。及物揖。左足履物，不

方足，還視侯中，俯正足。方猶併也，志在於射，

左足至，右足還併足，則是立也，南面視侯之中，乃俯視併正其足。疏「及物」至「正足」。○注「方猶」至「其足」○

釋曰：云「志在於射」者，解足未正先視侯中之意。①言

「左足至」者，解「左足履物」也。「右足還併足，則是立也」

者，解經「不方足」、「還」及「正足」之言。若然，云還時兼

視侯中也。此不言畫物早晚，案《大射》「納射器」之下，即

言「工人士與梓人升自北階兩楹間，疏數容弓，若丹若墨，

度尺而午」，此不言者，卑者文略，亦當在納射器後即畫之

也。不去旌。以其不獲。疏「不去旌」○注「以其不

獲」○釋曰：以其旌擬唱獲，今以三耦誘射，②不唱獲，故

不去旌也。誘射，誘，猶教也。將乘矢。將，行也。

行四矢，象有事於四方。疏「將乘矢」○注「將行」至「四

方」○釋曰：云「象有事於四方」者，《詩》云「四矢反兮，以

御亂兮」，是四矢有事於四方。執弓不挾，右執弦。

不挾，矢盡。疏「執弓」至「執弦」○注「不挾矢盡」○釋

①「解」下，曹校云脫「不方足還及」五字。

②「三耦」，曹校云當爲「司射」。

曰：案上文司射將射時，云「搢三而挾一个」，又云「將乘矢」，故知矢盡，空執弦也。南面揖，揖如升射。

降，出于其位南，適堂西，改取一个，挾之。

改，更也。不射而挾之，示有事也。今文曰「適序西」。

**疏**「南面」至「挾之」○釋曰：云「出于其位南，適堂西」者，

上文司射位設于「所設中之西南，東面」，今乃適位南，而北迴適堂西者，取教衆耦威儀之法故也。云「改取一个，挾之」者，此不在西階而在堂西，故適堂西，即云「改取一个」也。遂適階西，取扑，搢之，以反位。扑，所以撻犯教者。《書》云：「扑作教刑。」**疏**「遂適」至「反位」

○注「扑所」至「教刑」○釋曰：引《書》者，《舜典》文也。彼

謂教學之刑，此爲教射法，教雖不同，用扑是一，故引爲證也。司馬命獲者執旌以負侯。欲令射者見侯與旌，深有志於中。

**疏**「司馬」至「負侯」○注「欲令」至「於

中」○釋曰：自此盡「搢扑」，論三耦爲第一番射法。云

「欲令射者見侯與旌，深有志於中」者，凡射主欲中侯，使獲者舉旌唱獲，以是豫使見之，望深有志於中也。<sup>①</sup>獲

者適俟，執旌負侯而俟。俟，待也。今文「俟」爲

「立」。**疏**「獲者」至「而俟」○釋曰：俟，待也。而待者，謂

待司馬命去侯。司射還，當上耦，西面，作上耦

射。還，左還也。作，使也。**疏**「司射」至「耦射」○注

「還左還也」○釋曰：知「左還」者，經云「還，當上耦」，上耦

位在司射之西南，東面，司射還欲西面，與上耦相當，故知左還迴身當之，取便可知也。司射反位。上耦揖，

進。上射在左，並行。當階，北面揖。及

階，揖。上射先升三等，下射從之，中等

中，猶閒也。**疏**「司射」至「中等」○釋曰：云「司射反位」

者，反中西南東面位也。上射升堂，少左。下射

升。上射揖，並行。並，併也，併東行。**疏**「上射」

至「並行」○注「併東行」○釋曰：知併行，<sup>②</sup>「併東行」者，

以其既言「升」，乃言「併行」，故知「併東行」，向物也。云

「少左」者，言上射先升，少左，避下射升階也。皆當其

物，北面，揖。及物，揖。皆左足履物，還，

<sup>①</sup>「望」，曹校云當在「見之」上。

<sup>②</sup>「併」，阮校云：毛本作「並」，下同。按毛本爲是。



視侯中，合足而俟。司馬適堂西，不決，遂，袒執弓。不決，遂，因不射不備。

**疏**「皆當」至「執弓」

○注「不決」至「不備」○釋曰：「皆左足履物」者，謂先以左足履物東頭，合足而俟司馬命去侯。云「因不射不備」，此決司射誘射行事，袒即決，遂，執弓挾矢，今司馬不射，故不備，直袒而已也。若然，《大射》司馬正不射而袒，<sup>①</sup>又復決，遂者，彼大射志於射，故司馬正雖不射，袒復決，遂，以其不為射，仍不挾矢也。出于司射之南，升自西階，鉤楹，由上射之後，西南面立于物間。右執簫，南揚弓，命去侯。鉤楹，以當由上射者之後也。簫，弓末也。《大射》曰：「左執附。」揚猶舉也。

**疏**

「出于」至「去侯」○注「鉤楹」至「舉也」○釋曰：「鉤楹」者，於西楹西而北，東行過由上射之後。乃「西南面立于物間」者，欲取南揚弓，向侯便故也。「右執簫」者，不可一手揚弓，故引《大射》曰左手執附，左當卻手，則右執簫者，右當覆手也。獲者執旌，許諾，聲不絕，以至于乏。坐，東面，偃旌，興而俟。聲不絕，不以宮、商，不絕而已，鄉射威儀省。偃猶仆也。

**疏**「獲者」至「而

俟」○注「聲不」至「仆也」○釋曰：云「而俟」者，待射者發矢當坐，故下云「獲者坐而獲」也。云「鄉射威儀省」者，決《大射》云「負侯皆許諾，以宮趨直西」，及乏南，又諾以商，至乏聲止，是其唱諾為宮、商，是其威儀多。此不者，威儀省故也。司馬出于下射之南，還其後，降自西階。反，由司射之南適堂西，釋弓，襲，反位，立于司射之南。圍下射者，明為二人命去侯。

**疏**「司馬」至「之南」○注「圍下」至「去侯」○釋曰：司馬由

上射之後，立於物間，命去侯訖，物間南行，西向適階，降，是其順矣。今命去侯訖，乃圍下射之後，繞下射之東南行，而適西階去。<sup>②</sup>若出物間西行，則似直為上射命去侯，是以并下射圍繞之，明為二人命去侯也。司射進，

與司馬交于階前，相左，由堂下西階之東，北面視上射。命曰：「無射獲，無獵獲。」上射揖。司射退，反位。射獲，謂矢中人也。獵，矢

<sup>①</sup>「不」上，阮校云：毛本有「雖」字。

<sup>②</sup>「去」，曹校云殿本作「者」。

從傍。**疏**「司射」至「反位」○注「射獲」至「從傍」○釋曰：

云「交于階前，相左」者，既云「司射與司馬交于階前，相左」，乃云「由堂下西階邊東，<sup>①</sup>北面」，則相左之時在西階之西，司馬由北而西行，司射由南而東行，各以左相迎，<sup>②</sup>故云「相左」也。司射既不升堂，不得云「司射向北，司馬向南而「相左」也。云「射獲，謂矢中人也」者，人謂獲者，亦以事名。云「獵，矢從傍」者，謂從乏傍也。乃射，上射既發，挾弓矢，而后下射射。拾發，以將乘矢。古文「而后」作「後」，非也。《孝經說》「然后」曰：「后者，後也。」當從「后」。<sup>③</sup>**疏**「乃射」至「乘矢」○注「古文」至「從后」○釋曰：引《孝經說》，取《孝經緯·援神契》文。彼說《孝經》云「然後能保其社稷」之等，皆作「后」，后者後也，<sup>④</sup>故不從古文「後」，是以云「當從后」。獲者坐而獲。射者中則大言獲。獲，得也。射講武田之類，是以中為獲也。**疏**「獲者坐而獲」○注「射者」至「獲也」○釋曰：此未釋筭，故下經云「獲而未釋獲」，鄭云「但大言獲，未釋其筭」是也。云「獲，得也。射講武田之類，是以中為獲也」者，《詩》云「舍拔則獲」，謂射著禽獸為獲，<sup>⑤</sup>獲則得

也，戰伐得囚俘亦曰獲，射著正鵠亦曰獲。但「舉旌以宮」大言獲也，「偃旌以商」小言獲也。舉旌以宮，偃旌以商。宮為君，商為臣，聲和律呂相生。**疏**注「宮為」至

「相生」○釋曰：「宮為君，商為臣」，《禮記·樂記》文。宮數八十一，數最濁，故為君，配中央土。商數七十二，次君，故為臣，配西方金。云「聲和律呂相生」者，以其以黃鍾之初九，下生林鍾之初六，林鍾又上生大簇之九二。初九與九二雖非以次相生，大簇亦由黃鍾所生，故云「聲和由律呂相生」，故「舉旌以宮，偃旌以商」，不取其餘律呂也。獲而未釋獲。但大言獲，未釋其筭。卒射，皆執弓，不挾，南面揖。揖如升射。不挾，亦右執弦，如司射。上射降三等，下射少右，從之，中

①「遠」，曹校云殿本作「之」。

②「迎」，阮校云：毛本作「近」。

③「古文」至「從后」，阮校云：《要義》節錄注云：「古文后作後，非」。又云：依疏當作「《孝經說》說然后曰」，各本少一「說」字。

④「者後」原作「孝經」，阮校據《要義》改，茲從之。

⑤「著」原作「諸」，阮校據《通解》、《要義》諸本改，從之。

等。並行，上射於左。降，下。

**疏**「上射」至「於左」○釋曰：此上射，下射升與降皆上射爲先，又上射升降皆在左。

與升射者相左，交于階前，相揖。由司馬之南適堂西，釋弓，說決、拾、襲而俟于堂西，南面東上。三耦卒射，亦如之。司射去扑，倚于西階之西。升堂，北面告于賓曰：「三耦卒射。」去扑乃升，不敢佩刑器即尊者之側。

**疏**「與升」至「卒射」○注「去扑」至「之側」○釋曰：云

「不敢佩刑器即尊者之側」者，此司射將升堂即賓前，故去扑於階西乃升，是不敢佩刑器即於尊者之側也。《大射》「司射去扑，倚于階西。適阼階下，北面告于公曰：『三耦卒射』」，不升堂亦去扑者，國君尊，雖堂下亦去扑也。賓

揖。以揖然之。

**疏**「賓揖」○注「以揖然之」○釋曰：《大

射》「司射告公：『三耦卒射』」，不見公揖然之者，公尊故也。司射降，搢扑，反位。司馬適堂西，**疏**「司

馬適堂西」○釋曰：自此盡「加于楅」，論三耦射訖取矢之事。袒執弓，由其位南進，與司射交于階前，相左，升自西階，鉤楹，自右物之後，立于物

間，西南面揖弓，命取矢。揖，推之也。

**疏**注「揖

推之也」○釋曰：推手曰揖，引手曰厭，故《周禮·司儀》「天揖、時揖、土揖」，<sup>①</sup>鄭注皆以「推手」解之，是以推手爲揖。但揖弓者，向侯而推之，以其命取矢故也。揚弓者，向乏而揚之，以其命去侯故也。獲者執旌許諾，聲不絕，以旌負侯而俟。俟弟子取矢，以旌指教之。

**疏**

注「俟弟」至「教之」○釋曰：此即下文「弟子取矢，委于楅」是也。司馬出于左物之南，還其後，降自西

階。遂適堂前，北面立于所設楅之南，命弟子設楅。楅猶幅也，所以承筈矢者。<sup>②</sup>**疏**「司馬」至

「設楅」○注「楅猶」至「矢者」○釋曰：云「楅猶幅也」，訓楅爲幅者，義取若布帛有邊幅整齊之意，故云「所以承筈齊矢」，即下云「委于楅，北括」。又《大射》云「既拾取矢，楅之」，注云「楅，齊等之」，是其承筈也。<sup>③</sup>乃設楅于中

①「儀」原作「士」，阮校云：「天揖、時揖、土揖爲「司儀」文。據改。」

②「筈」下，阮校云：「聶氏、《通解》、楊氏、毛本有「齊」字。」  
③「也」上，曹校云脫「齊矢」二字。

庭，南當洗，東肆。東肆，統於賓。**疏**「乃設」至「東

肆」○注「東肆統於賓」○釋曰：此弟子設楅之時，司馬教之，故《大射》云「小臣師設楅，司馬正東面以弓爲畢」，鄭注云「畢，所以教助執事者」，明此亦然。云「東肆，統於賓」者，然則楅有首尾，故下記云「楅長如筈，博三寸，厚寸有半，龍首」，鄭注云「兩端爲龍首」。若然，則有首無尾而言西上者，應有刻飾記之爲首尾也。司馬由司射之

南退，釋弓于堂西，襲，反位。弟子取矢，北面坐，委于楅，北括，乃退。司馬襲，進，當楅南，北面坐，左右撫矢而乘之。撫，拊之也，

就委矢左右手撫而四四數分之也。上既言襲矣，復言之者，嫌有事即袒也。凡事升堂乃袒。**疏**「司馬」至「乘之」

○注「撫拊」至「乃袒」○釋曰：云「司射之南退」，<sup>①</sup>釋弓者，司馬往堂西釋弓，還依三耦所行之處，亦取威儀進止之事，故曰「司射之南」也。云「委矢于楅，北括」者，順射時矢南行故也。云「撫，拊之也」者，言撫者，撫拍之義，言拊者，取拊近之理，故轉從拊也。云「就委矢左右手撫而四四數分之也」者，謂司馬北面就所委矢之南，北面以右手撫四矢於東，以左手撫四矢於西，是四四數而分之也。

云「上既言襲矣，復言之者，嫌有事即袒也」者，案上文「命弟子設楅」，退時已襲，今復言「襲，進」者，嫌有事則袒，故重言之也。云「凡事升堂乃袒」者，堂下雖有事亦不袒，若司射不問堂上堂下，有事即袒，司馬與司射遞行事，恐同，故明之也。若矢不備，則司馬又袒，執弓如初，升，命曰：「取矢不索。」索猶盡也。弟子自西方應曰：「諾！」乃復求矢，加于楅。**增故**曰加。羈獲者許諾，至此弟子曰諾，事同，互相明。**疏**注

「增故」至「相明」○釋曰：上言「獲者執旌許諾」，故曰「羈獲者許諾」。至此弟子曰「諾」，以其事同，互相明也。言「互」者，「獲者執旌許諾」，不言弟子許諾，則弟子亦許諾。此直言「弟子自西方應曰：『諾』」，不言獲者應諾，則獲者亦應諾可知。以其事同省文，故互相明之。司射倚扑于階西，升，請射于賓，如初。賓許諾。賓、主人、大夫若皆與射，則遂告于賓。適阼階上，告于主人。主人與賓爲耦。言若者，或射或

①「云」下，曹校云脫「司馬由」三字。

否，在時欲耳。射者繹己之志，君子務焉。大夫，遵者也。

告賓曰：「主人御于子。」告主人曰：「子與賓射。」疏「司

射」至「爲耦」○注「言若」至「賓射」○釋曰：自此盡「比衆

耦辯」，論次番將射，比衆耦之事。但射禮三而止，第一番

直司射與三耦誘射，不釋筭；第二番三耦與衆耦俱射，釋

筭；第三番兼有作樂，爲射節。云「言若者，或射或否」者，

以「若」是不定之辭，故知「或射或否」。「射者繹己之志」

者，《禮記·射義》文。繹謂陳己之志意也。云「大夫，遵

者也」者，上云「大夫有遵者」是也，故與賓主同在任情之

限。云「告賓曰：『主人御于子。』」告主人曰：「子與賓

射」，此約下大夫與士射之辭。以賓比大夫，以主人比

士，尊賓之義也。遂告于大夫，大夫雖衆，皆與

士爲耦。以耦告于大夫曰：「某御於子。」大

夫皆與士爲耦，謙也。來觀禮，同爵自相與耦，則嫌自尊

別也。大夫爲下射而云御於子，尊大夫也。士謂衆賓之

在下者及群士來觀禮者也。禮，一命已下齒於鄉里。疏

「遂告」至「於子」○注「大夫」至「鄉里」○釋曰：云「大夫爲

下射而云御於子，尊大夫也」者，上命三耦云「命上射曰：

『某御於子。』命下射曰：『子與某子射』，今命大夫云「某

御于子」，與上射同者，尊大夫也，大夫雖爲下射，其辭不

與下射同也。云「士謂衆賓之在下」者，言衆賓則與賓俱

來者也。下記云「大夫與，則公士爲賓」，鄭注云「公士，在

官之士」，則衆賓之內亦有士矣，與賓俱至，則得主人之所

命者也。其將射而至者，非主人之所命，直來觀禮者也。

但是一命已下，莫問先後而至，皆齒于堂下，故鄭摠云「士

謂衆賓之在下者及群士來觀禮者也」。云「禮，一命以下

齒于鄉里」者，《周禮·黨正》禮十月行正齒位之禮云「一

命齒于鄉里，①再命齒于父族，三命不齒」。案《鄉飲酒》

注云「此篇無正齒位之禮」，則鄉射先行鄉飲酒之禮，亦無

正齒位之法，而云「一命以下齒于鄉里」者，鄉飲酒、鄉射

雖無正齒位之禮，士立于下，是以一命者在下，與鄉里齒，

是其常法。諸侯之士無再命以上，若爲公、卿大夫，自在

尊東爲遵也。言「士謂衆賓之在下者」，則堂上三賓不與

大夫爲耦矣，亦皆射，故下文云「衆賓與射者皆降」是也。

西階上北面作衆賓射。作，使。司射降，搢

扑，由司馬之南適堂西立，比衆耦。衆耦，大夫

① 下「禮」，阮校云：《要義》作「事」。

耦及衆賓也。命大夫之耦曰：「子與某子射。」其命衆耦如三耦。

**疏**「司射」至「衆耦」○注「衆耦」至「三耦」○釋曰：

云「衆耦，大夫耦及衆賓也」者，言大夫之耦，唯謂堂下之士，言衆賓則兼堂上三賓，故下云衆賓皆降。云「命大夫之耦曰：『子與某子射』」，此即上文命下射之辭也。云「其命衆耦如三耦」者，上命三耦云「命上射曰：『某御於子。』」命下射曰：「子與某子射」是也。以其俱是士，故命辭同。

衆賓將與射者皆降，由司馬之南適堂西，繼三耦而立，東上。大夫之耦爲上。若有東面者，則北上。言若有者，大夫士來觀禮及衆賓多，

無數也。

**疏**「衆賓」至「北上」○注「言若」至「數也」○釋

曰：言「由司馬之南適堂西」者，上文司馬位在司射之南東面，是也。云「多，無數也」者，以其言「若」，亦是不定之辭，故無常數也。衆賓若少，以南面爲正；若多不受，則西邊東面，北上。若然，大夫來在尊東爲遵，而此言之者，鄭總解來觀禮之意，不謂大夫輒在此位也。賓、主人與大夫皆未降。言未降者，見其志在射。

**疏**「賓主」至

「未降」○注「言未」至「在射」○釋曰：言「未降」，後有降階

之理，故下云「三耦卒射，賓、主人、大夫揖，皆由其階降」，與耦俱升射也。言「志在射」者，以其射在於堂上故也。

司射乃比衆耦辯。衆賓射者降，比之耦，乃徧。

**疏**

「司射」至「耦辯」○注「衆賓」至「乃徧」○釋曰：云「衆賓射者降，比之耦，乃徧」者，以上文司射降比衆耦，下文乃云「衆賓將與射者皆降」，鄭恐衆賓堂上後降者不比，故兼堂上後降亦比，乃徧也。遂命三耦拾取矢。司射反

位。反位者，俟其袒、決、遂來。

**疏**「遂命」至「反位」○

注「反位」至「遂來」○釋曰：自此盡「爲上」，論拾取矢并衆耦皆就射位之事。云「反位者，俟其袒、決、遂來」者，下文云「三耦拾取矢，進立于司馬之西南」是也。此司射反位，不言先。下將欲爲下番射，「司射堂西命三耦及衆賓皆袒、決、遂，執弓就位，司射先反位」，鄭注云：「言先三耦及衆賓。曷不言先三耦，未有拾取矢位，無所先。」以此言之，明言「先反」者，對未反位之辭。俱有位得言「先」，若一有一無，不得言「先」，即此文，是以下文注決此也。若俱無，亦得言「先」，故上云「司射比三耦於堂西」，云「司射先立於所設中之西南、東面。三耦皆進，由司射之西，立于其西南，東面北上而俟」，是其皆未有位，亦得言「先」。

三耦拾取矢，皆袒、決、遂，執弓，進立于司馬之西南。必袒、決、遂者，明將有射事。

**疏**「三耦」

至「西南」○注「必袒」至「射事」○釋曰：「立于司馬之西南」者，案上司射位在中西南，司馬位在司射南，今立于「司馬之西南」，亦東面北上也。云「必袒、決、遂者，明將有射事」者，始取未有射事而袒、決、遂者，以其取矢即訖有射，<sup>①</sup>故豫著之，故云「將有射事」也。司射作上耦取矢。作之者，還，當上耦，如作射。

**疏**「司射」至「取

矢」○注「作之」至「作射」○釋曰：案上文司射作射之時，左「還，當上耦，西面，作上耦射」，今作取矢亦如之，故云「還，當上耦，如作射」。司射反位。上耦揖，進，

當楅，北面揖，及楅，揖。當楅，楅正南之東西。

**疏**「司射」至「楅揖」○注「當楅」至「東西」○釋曰：此上耦

發位東行時，一南一北並行，及將至楅南，下耦在南稍進，<sup>②</sup>當前楅南，俱北面揖。其時上射稍西，下射稍東，東西相當，故云「當楅，楅正南之東西」也。上射東面，

下射西面。上射揖，進，坐，橫弓，卻手自弓下取一个，兼諸弣，順羽，且興，執弦而左

還，退，反位，東面揖。橫弓者，南踣弓也。卻手由

弓下取矢者，以左手在弓表，右手從裏取之便也。兼并矢於弣，當順羽，既又當執弦也。順羽者，手放而下，備不整理也。不言毋周，在阼非君，周可也。

**疏**「上射」至「面

揖」○注「橫弓」至「可也」○釋曰：言「順羽，且興」者，謂以右手順羽之時則興，故云「且興」也。言「左還」者，以左手向外而西回。「東面揖」者，揖下射使取矢也。云「橫弓者，南踣弓也」者，覆左手以執弓，卻右手以取矢便，故知不北踣弓也。云「以左手在弓表」者，表，弓背也，覆手以執背，故云「左手在弓表」。云「右手從裏取之便也」者，覆手在表執弓，右手卻在裏取矢，故云「便」也。云「不言毋周，在阼非君，周可也」者，案《大射》云「左旋毋周」，<sup>③</sup>反面揖，鄭注云「左還反其位，毋周，右還而反東面也。君在阼，還周，則下射將背之」，此直云「左還，反位」，不言「毋周」，明還周可也。鄭云「下射將背之」，則上射背，左還毋

①「即訖」，阮校云毛本作「訖即」，曹校云毛本是。

②「耦」，曹校云當為「射」。

③「旋」，《大射》作「還」。

周也。下射進，坐，橫弓，覆手自弓上取一個，興。其他如上射。覆手由弓上取矢者，以左手在弓裏，右手從表取之亦便。

**疏**「下射」至「上射」○注

「覆手」至「亦便」○釋曰：云「以左手在弓裏，右手從表取之亦便」者，上射在西云「南路弓」，此不云路弓，則亦南路弓。知者，以其亦用左手執弓，覆右手取矢，則執弓卻左手可知，既仰左手向上執弓而南路，故用右手弓上向下取矢亦便也。既拾取乘矢，揖，皆左還，南面揖，皆少進，當楅南，皆左還，北面，搢三，挾一個。楅南。鄉當楅之位。

**疏**「既拾」至「一個」○注「楅

南」至「之位」○釋曰：云「楅南，鄉當楅之位」者，上云「進，當楅北面揖」，今至此位，皆還北面也。揖，皆左還，

上射於右，上射轉居右，使其反位也。下射左還，少南行，乃西面。

**疏**「揖皆」至「於右」○注「上射」至「西面」○

釋曰：云「上射轉居右，使其反位也」者，此決射時升降，上射皆居左，彼自堂西，不復庭位故也；此復庭位，故上射轉在右，是以鄭云「使其反位也」。云「下射左還，少南行，乃西面」者，以其初北面時，東西相當，今西行宜並，故下射

少南行，乃西面，取並行故也。與進者相左，相揖，退反位。<sup>①</sup>相左，皆由進者之北。

**疏**「與進」至「反位」

○注「相左」至「之北」○釋曰：云「由進者之北」者，以其進取矢者東行，此則西行，由進者之北，則得相左也。三耦

拾取矢，亦如之。後者遂取誘射之矢，兼乘

矢而取之，以授有司于西方，而后反位。取

誘射之矢，挾五個。弟子逆受於東面位之後。

**疏**「三耦」

至「反位」○注「取誘」至「之後」○釋曰：云「三耦拾取矢，

亦如之」者，上云三耦之中上耦外而言之。<sup>②</sup>云「取誘射

之矢，挾五個」者，以其前拾取矢，皆搢三挾一個乃反位，

此則先取四矢，亦搢三挾一個，乃并取誘射四矢兼挾之，

故五個也。云「弟子逆受於東面位之後」者，弟子即納射

器者，因留主授受於堂西西方，今見下耦將司射矢來，向

位仍西面，弟子即往逆受之。訖，下射乃反東面，故云「授

有司于西方，而后反位」，謂反向東面位，是以鄭亦云「弟

<sup>①</sup>「退」字原無，唐石經有「退」字，阮校引錢大昕說謂

「退」字當有，據補。

<sup>②</sup>「上云」上，曹校云脫「除」字。



子逆受於東面位之後」也。衆賓未拾取矢，皆袒、

決、遂，執弓，搯三挾一个，由堂西進，繼三耦之南而立，東面，北上，大夫之耦爲上。未

猶不也。衆賓不拾者，未射，無楅上矢也。言此者，嫌衆賓、三耦同倫，初時有射者。後乃射，有拾取矢，禮也。

**疏**「衆賓」至「爲上」○注「未猶」至「禮也」○釋曰：云「未

猶不也」者，若言未，謂此第一番初時未有拾取矢禮，<sup>①</sup>以

其第一番唯有三耦射，無賓射法，不得云未，是以轉爲不，

以其全不拾取矢也。云「言此者，嫌衆賓、三耦同倫，初時

有射者」，此解經云衆賓不拾之意，有此嫌，故明之。云

「後乃射，有拾取矢，禮也」者，據第三番衆賓乃射，自然有

楅上拾取矢禮，<sup>②</sup>後文見之也。司射作射，如初。

一耦揖，升，如初。司馬命去侯，獲者許諾。

司馬降，釋弓，反位。司射猶挾一个，去扑，

與司馬交于階前，升，請釋獲于賓。猶，有故之

辭。司射既誘射，恒執弓挾矢，以掌射事，備尚未知，當教

之也。今三耦卒射，衆足以知之矣，猶挾之者，君子不必

也。**疏**「司射」至「于賓」○注「猶有」至「必也」○釋曰：自

此盡「共而俟」，論第二番射之事。案《大射》第二番射，司

馬命去侯，云「如初」，此司馬命去侯，不言「如初」者，此臣

禮，威儀省。司馬初命去侯時，獲者許諾，聲不絕，以至于

乏。再番、三番命去侯，獲者直許諾，無不絕聲，故不言

「如初」。大射君禮，威儀多，故第二番與前同，獲者以宮、

商趨之，故言「如初」；於第三番禮殺，復不以宮、商，直許

諾，又不得言「如初」。云「今三耦卒射，衆足以知之矣，猶

挾矢者，君子不必也」者，三耦教射者，<sup>③</sup>三耦卒射，衆賓

足知射禮，猶挾矢教之者，君子不必也者。<sup>④</sup>案《論語》孔

子云「君子無必，無固，無我」，以不必即知，故仍教之。

賓許。降，搯扑，西面立于所設中之東，北面命釋獲者設中，遂視之。視之，當教之。**疏**

「賓許」至「視之」○注「視之當教之」○釋曰：云「當教之」

者，謂教其釋筭，安置左右及數筭告勝負之事亦教之也。

釋獲者執鹿中，一人執筭以從之。鹿中，謂射

①「初」，阮校云陳、閩作「射」，曹校云作「射」似是。

②「自然」，曹校云此二字似衍。

③「三耦」，曹校云當爲「司射」。

④「者」，曹校云此字衍。

於謝也，於庠當兕中。

**疏**「釋獲」至「從之」○注「鹿中」至

「兕中」○釋曰：以州長是士，射于樹。鄉大夫是大夫爲之，射于庠。下記云「士則鹿中，大夫兕中」，故云「鹿中，

謂射於樹也，於庠當兕中」也。

釋獲者坐設中，南

當楅，西當西序，東面。興，受筭，坐，實八

筭于中，橫委其餘于中西，南末。興，共而

俟。興，還北面受筭，反東面實之。

**疏**「釋獲」至「而俟」

○注「興還」至「實之」○釋曰：云「設中，南當楅」，南北

節，「西當西序」，東西節。云「興，還北面受筭，反東面實

之者，以其所納射器皆在堂西，執中與筭皆從堂西來，向

西序之南，南面，執中者既東面坐，<sup>①</sup>設訖，興，還向北面

受筭，迴向東面實之也。

司射遂進，由堂下北面

命曰：「不貫不釋。」貫猶中也，不中正不釋筭也。

古文「貫」作「關」。

**疏**「司射」至「不釋」○注「貫猶」至「作

關」○釋曰：言「不貫」者，以其以布爲侯，故中者貫穿布

侯，故以中爲貫也，是以鄭云「貫猶中也」，中則貫也。上

射揖。司射退，反位。釋獲者坐取中之八

筭，改實八筭于中，興，執而俟。執所取筭。

**疏**

「上射」至「而俟」○注「執所取筭」○釋曰：八筭者，人四矢，一耦八矢，雖不知中否，要須一矢則一筭，改實八筭，

擬後來者用之。乃射。若中，則釋獲者坐而釋

獲，每一個釋一筭，上射於右，下射於左。

若有餘筭，則反委之。委餘筭，禮尚異也。委之合

於中西。

**疏**「乃射」至「委之」○注「委餘」至「中西」○釋

曰：云「上射於右，下射於左」者，以釋筭者東面爲正，依投

壺禮，賓黨於右，主黨於左，是以上射於右，賓黨也，下射

於左，主黨也。云「委餘筭，禮尚異也」者，手中餘筭未知

有幾，不可盡中，所有餘亦得於後釋，要委餘於地。別取

中內八筭者，禮尚異，故不用餘者。云「委之合於中西」

者，筭法多少，視射人多少不定，要橫委其餘於中西，手中

餘者與之合也。又取中之八筭，改實八筭于

中。興，執而俟。三耦卒射。賓、主人、大

夫揖，皆由其階降，揖。主人堂東袒，決、

遂，執弓，搯三挾一个。賓於堂西亦如之。

①「執」上，阮校云：毛本有「故」字，監本「故」字擠入。

皆由其階，階下揖，升堂，揖。主人爲下射。皆當其物北面揖，及物，揖，乃射。卒，南面揖，皆由其階，階上揖，降階，揖。賓序西，主人序東，皆釋弓，說決、拾、襲，反位。升，及階，揖，升堂，揖，皆就席。或言堂，或言序，亦爲庠，謝互言也。賓、主人射，大夫止於堂西。

**疏**「又取」

至「就席」○注「或言」至「堂西」○釋曰：上云「樹則鉤楹內」，謂射於樹者也；「堂則由楹外」，謂射於庠者也。此當有鄉大夫射於庠，亦有州長射於序，故互見其義。「互言」者，今袒決遂則言堂東西，見在庠在樹亦然。釋弓、說決拾則言序東序西，序則樹也，在庠亦然。故言「互言」之，<sup>①</sup>周公省文，欲兩見之也。云「大夫止於堂西」者，上賓、主人、大夫俱降，無堂西之文，下云「大夫袒、決、遂，就其耦」，<sup>②</sup>故知此時止於堂西，故記云「大夫降，立于堂西以俟射」也。大夫袒、決、遂，執弓，搢三挾一個，由堂西出于司射之西，就其耦。大夫爲下射。揖，進。耦少退，揖，如三耦。及階，耦先升。卒射，揖，如升射。耦先降，降階，

耦少退。皆釋弓于堂西，襲。耦遂止于堂西，大夫升就席。耦於庭不並行，尊大夫也。在堂如

上射之儀，近其事，得申。

**疏**「大夫」至「就席」○注「耦

於」至「得申」○釋曰：言「在堂如上射之儀」者，謂耦先升，是如上射身先升法，<sup>③</sup>以其近射事，故得申也。衆賓繼

射，釋獲，皆如初。司射所作唯上耦。於是言

唯上耦者，嫌賓、主人射亦作之。《大射》三耦卒射，司射請于公及賓。**疏**「衆賓」至「上耦」○注「於是」至「及賓」

○釋曰：云「於是言唯上耦者，嫌賓、主人射亦作之」，鄭言此者，若二耦射，<sup>④</sup>下即言「所作唯上耦」，則賓、主人射作之未可知。故於衆賓射訖乃言此，明賓、主射不作可知，故於此乃言「所作唯上耦」，明除賓、主矣，故鄭云「於是言唯上耦，嫌賓、主射亦作之」。引《大射》者，公尊，公與賓

<sup>①</sup>「故言互言之」，阮校云：毛本作「故曰序東西」，《通

解》作「皆互言之也」，陳、閩、監本「曰」字亦俱作「言」。

<sup>②</sup>「就」上，曹校云似脫「由堂西」三字。

<sup>③</sup>「身」，曹校云此字可刪。

<sup>④</sup>「二」，曹校云當爲「三」。

射不作，直請，記云「賓、主人射，則司射擯升降」，是雖不作，猶爲擯相之，但不請也。卒射，釋獲者遂以所

執餘獲，升自西階，盡階，不升堂。告于賓

曰：「左右卒射。」降，反位，坐委餘獲于中

西。興，共而俟。司射不告卒射者，釋獲者於是有

事，宜終之也。餘獲，餘筭也，無餘筭則空手耳。俟，俟數

也。**疏**「卒射」至「而俟」○注「司射」至「數也」○釋曰：云

「宜終之也」者，決前番射司射告卒射，此二番射不告卒

使獲者告，是「宜終之也」。云「餘獲，餘筭」者，一耦不必

盡中，故有餘筭也。云「無餘筭則空手耳」者，或賓、主八

矢盡中，釋八筭，故空手告也。司馬袒，決，執弓，

升，命取矢，如初。獲者許諾，以旌負侯，如

初。司馬降，釋弓，反位。弟子委矢，如初。

大夫之矢則兼束之以茅，上握焉。兼束大夫

矢，優之，是以不拾也。束於握上，則兼取之順羽便也。

握謂中央也。不束主人矢，不可以殊於賓也。言大夫之

矢，則矢有題識也，肅慎氏貢楛矢，銘其括。今文「上」作

「尚」。**疏**「司馬」至「握焉」○注「兼束」至「作尚」○釋曰：

自此盡「司馬乘矢」，論取矢之事。云「束于握上，則兼取之順羽便也」者，握上則兼取之順持之處，<sup>①</sup>今束於握之上，取持於中央握之，向下順羽便，故乘矢總束之也。云

「不束主人矢，不可以殊於賓也」者，主人鄉大夫，則是大夫官，當束之，不敢殊別於賓；<sup>②</sup>若主人是州長，則士，自

然不束也。「肅慎氏」者，<sup>③</sup>《國語》文。引之者，證矢有題

識，以有題識，故束者得知是大夫之矢也。司馬乘矢

如初。司射遂適西階西，釋弓，去扑，襲，進

由中東，立于中南，北面視筭。釋弓，去扑，射事

已。**疏**「司馬」至「視筭」○注「釋弓」至「事已」○釋曰：凡

言「遂」者，因上事，司射於上無事而言「遂適」者，以司射

與司馬遞行事，今以司馬進乘矢，「司射遂適西階西，釋

弓，去扑」也。云「射事已」，此始再番射，未已而言已者，

前番不釋獲，今據第二釋獲之成功，則爲已。是以下記云

「司射釋弓矢，視筭，與獻釋獲者釋弓矢」，注云「唯此二

「上」，曹校云此字衍。

②「不」上，曹校云脫「不束者」三字。

③「者」上，曹校云當依注補「貢楛矢銘其括」六字。

事，休武主文」。休武者，射訖數筭；主文者，洗爵獻釋獲者，是也。釋獲者東面于中西坐，先數右獲。

固東面矣，復言之者，爲其少南就右獲。

**疏**「釋獲」至「右

獲」○注「固東」至「右獲」○釋曰：釋獲者在中西東面釋筭之時，賓黨於右，主黨於左，今將數筭，宜就之，是以「少南就右獲」，更東面也。一筭爲純。純猶全也。耦陰陽。

**疏**「二筭爲純」○注「純猶」至「陰陽」○釋曰：云「耦陰陽」

者，陰陽對合，故二筭爲「耦陰陽」也。一純以取，實

于左手，十純則縮而委之。縮，從也，於數者東西

爲從。古文「縮」皆爲「蹙」。

**疏**「縮從」至「爲蹙」○釋

曰：凡言從橫者，南北爲從，東西爲橫，今釋筭者東面而言從橫，則據數筭東爲正，<sup>①</sup>是以東西者爲從，南北者爲橫，故鄭云「於數者東西爲從」也。每委異之。易校數。

有餘純，則橫於下。又異之也。自近爲下。

**疏**「有

餘」至「於下」○釋曰：此則以南北爲橫也。一筭爲

奇，奇則又縮諸純下。奇猶虧也。又從之。興，

自前適左，東面，起由中東就左獲，少北於故，東面鄉

之。**疏**注「少北」至「鄉之」○釋曰：云「少北於故」，故則

右筭也，又移至左筭之後，東面鄉之，是以云「少北於故」。

坐，兼斂筭，實于左手，一純以委，十則異之。變於右。**疏**注「變於右」○釋曰：云「變於右」者，右

則一一取之於地，實于左手，此則總斂於左手，一一取之於左手，委於地，是變也。必變之者，禮以變爲敬也。其

餘如右獲。謂所縮所橫。司射復位。釋獲者

遂進取賢獲，執以升自西階，盡階，不升堂，

告于賓。賢獲，勝黨之筭也，齊之而取其餘。

**疏**「司

射」至「于賓」○注「賢獲」至「其餘」○釋曰：云「齊之而取其餘」者，解經「取賢獲」，以筭爲獲，以其唱獲則釋筭，故名筭爲獲。左右數齊，有餘則賢獲，故以告也。若右

勝，則曰「右賢於左」；若左勝，則曰「左賢於右」。以純數告。若有奇者，亦曰奇。賢

猶勝也。言賢者，射之以中爲僞也。<sup>②</sup>假如右勝，告曰

<sup>①</sup>「東」下，曹校云脫「面」字。

<sup>②</sup>「僞」，阮校云：徐本作「僞」。

「右賢於左若干純、若干奇」。

**疏**「若右」至「曰奇」○注

「賢猶」至「干奇」○釋曰：「若干」者，數不定之辭。凡數法，一二已上得稱若干。奇，則一也。一外無若干，鄭亦

言「若干」者，因純有若干，奇亦言若干。奇言「若干」者，衍字也。若左右鈞，則左右皆執一筭以告，

曰：「左右鈞。」降，復位，坐，兼斂筭，實八

筭于中，委其餘于中西，興，共而俟。

**疏**「若

左」至「而俟」○釋曰：此將為第三番射，故豫設之。或實

或委，一如前法也。司射適堂西，命弟子設豐。

將飲不勝者，設豐所以承其爵也。豐，形蓋似豆而卑。

**疏**「司射」至「設豐」○注「將飲」至「而卑」○釋曰：自此盡

「徹豐與觶」，論罰爵之事。云「設豐所以承其爵也」者，案

燕禮君尊有豐，此云「承爵」，豐則兩用之。《燕禮》注「豐，

形似豆，卑而大」，此不言大，彼以承尊，故言大；此承爵，

不言大，或小耳。弟子奉豐，升，設于西楹之西，

乃降。勝者之弟子洗觶，升酌，南面坐奠于

豐上。降，袒，執弓，反位。勝者之弟子，其少者

也。耦不酌，下無能也。酌者不授爵，略之也。執弓反射

位，不俟其黨，已酌有事。

**疏**「弟子」至「反位」○注「勝

者」至「有事」○釋曰：知弟子是少者，以其執弟子禮使令，

故知少者也。云「執弓反射位，不待其黨，已酌有事」者，

以此弟子由堂西，固在射賓中矣。黨即衆賓是也。案下

文「三耦及衆射者，皆與其耦進立于射位」，今酌者不待其

黨與俱進而先反射位者，由已酌酒有事訖，其黨未得司射

命，又無事，不得共酌者同就射位，故酌者先得反射位也。

司射遂袒，執弓，挾一个，搯扑，北面于三耦

之南，命三耦及衆賓勝者皆袒、決、遂，執張

弓。執張弓，言能用之也。右手執弦，如卒射。

**疏**「司

射」至「張弓」○注「執張」至「卒射」○釋曰：云「右手執弦，

如卒射」者，上文卒射「執弓不挾，右執弦」，矢盡故也。此

非卒射，亦執張弓，為無矢，亦右執弦也，故注云「如卒

射」。不勝者皆襲，說決拾，卻左手，右加弛

弓于其上，遂以執弣。固襲說決拾矣，復言之者，

起勝者也。執弛弓，言不能用之也。兩手執弣，又不得執

弦。**疏**注「固襲」至「執弦」○釋曰：云「固襲說決拾矣」

者，謂前降堂時，既襲說決拾矣。云「起勝者也」者，謂至

此復言不勝者，謂以此襲說決拾，以不能用也，起發勝者祖決遂能用也。云「兩手執弣，又不得執弦」者，上勝者言執張弓如卒射，則左手執弓，<sup>①</sup>右手執弦，此則云執弣，明仰弓於左手之上，執弣橫之，而不得執弦，則宜右手共執弓弣，故云「兩手執弣，又不得執弦」也。司射先反位。居前俟所命來。

**疏**「司射先反位」。○注「居前俟所命來」。○釋曰：云「居前俟所命來」者，以衆射者皆止於堂西，未向射位，而司射先反位，於下文衆耦等乃來就射位，是得命即來，故云「俟所命來」也。來訖，司射乃作之也。三耦及衆射者皆與其耦進立于射位，北上。司射作升飲者，如作射。一耦進，揖，如升射。及階，勝者先升，升堂，<sup>②</sup>少右。先升，尊賢也。少右，辟飲者也，亦相飲之位。

**疏**「三耦至「少右」○注「先升」至「之位」○釋曰：云「少右，辟飲者也」者，以其豐於西楹之西，正當西階，飲者升少西，又當辟豐上之爵，故云「少右，辟飲者也」。<sup>③</sup>云「亦相飲之位」者，以其相飲者皆北面於西階，授者在東，飲者在西，故云「亦相飲之位」。不勝者進，北面，坐取豐上之

觶，興，少退，立卒觶，進，坐奠于豐下，興，揖。立卒觶，不祭不拜，受罰爵，不備禮也。右手執觶，

左手執弓。**疏**注「右手」至「執弓」○釋曰：此無正文，以

祭禮皆左手執爵，用右手以祭，故知此亦用左手執弓，右手執觶可知也。不勝者先降，後升先降，略之不由次。**疏**注「後升」至「由次」○釋曰：此對射時升降皆有上

射在先，<sup>④</sup>今後升先降，故云略之不由次第也。與升飲

者相左，交于階前，相揖，出于司馬之南，遂

適堂西，釋弓，襲而俟。俟復射。**疏**注「俟復射」

○釋曰：待復射者，謂待第三番射也。<sup>⑤</sup>有執爵者。

主人使贊者代弟子酌也。於既升飲而升自西階，立于序端。**疏**「有執爵者」○注「主人」至「序端」○釋曰：以初使

①「弓」，曹校云當爲「弣」。

②「升」，阮校云：《通解》、毛本無。

③「者」原作「酒」，據重刊單疏本改。

④「有」，曹校云此字衍。

⑤「待」，阮校云：毛本兩「待」字俱作「俟」，《通解》止截下句亦作「俟」。

勝黨弟子酌酒於豐上以發首，故使弟子，今云「有執爵者」，明主人使贊者代弟子酌於豐上，以次至終也。贊者謂主人之賤不射者，<sup>①</sup>此則《鄉飲酒》云「主人之贊者」之類也。云「於既升飲而升自西階，立于序端」者，謂於上耦既飲訖，贊者乃升自西階，酌訖，奠於豐上，如下文贊者即立于序端，立于序端，<sup>②</sup>文出于《大射》也。執爵者坐取觶，實之，反奠于豐上。升飲者如初。每者輒酌，以至於徧。

**疏**「執爵」至「如初」○注「每者」至

「於徧」○釋曰：云「執爵者坐取觶，實之」者，謂初飲訖反奠於豐上，<sup>③</sup>贊者取此觶實之，反奠于豐上。云「升飲者如初」，已下皆如初，故鄭云「每者輒酌，以至於徧」也。

三耦卒飲。賓、主人、大夫不勝，則不執弓。

執爵者取觶，降，洗，升，實之，以授于席前。

優尊也。受觶，以適西階上，北面立飲，受罰爵

者不宜自尊別。卒觶，授執爵者，反就席。大

夫飲，則耦不升。以賓、主人飲，耦在上，嫌其升。

若大夫之耦不勝，則亦執弛弓，特升飲。尊

者可以孤無能。<sup>④</sup>衆賓繼飲射爵者辯，乃徹豐

與觶。徹猶除也。設豐者反豐於堂西，執爵者反觶於

筐。司馬洗爵，升，實之以降，獻獲者于侯。

鄉人獲者賤，明其主以侯爲功得獻也。**疏**「司馬」至「于

侯」○注「鄉人」至「獻也」○釋曰：自此盡「負侯而侯」，論

司馬獻獲者之節。云「鄉人獲者賤，明其主以侯爲功得獻

也」者，案《大射》云「司馬正洗散，遂實爵，獻服不。服不

侯西北三步，北面拜受爵」，注云「近其所爲獻」。彼國君

禮，使服不士官唱獲，故就其所爲唱獲獻之，<sup>⑤</sup>此鄉人獲

者賤，故獻於侯，明以侯爲功得獻也。薦脯醢，設折

俎，俎與薦皆三祭。皆三祭，爲其將祭侯也，祭侯三

處也。**疏**「薦脯」至「三祭」○注「皆三」至「處也」○釋曰：

「三處」者，下文右與左、中是也。獲者負侯，北面拜

受爵。司馬西面拜送爵。負侯，負侯中也。拜送

<sup>①</sup>「賤」下，曹校云脫「吏」字。

<sup>②</sup>「序」，阮校云：《要義》作「席」。

<sup>③</sup>「反奠於豐上」，曹校云「反」當爲「坐」，「上」當爲「下」。

<sup>④</sup>「能」下，阮校云：毛本有「對」字。

<sup>⑤</sup>「獲」下，曹校云脫「處」字。



爵不同面者，辟正主也。其設薦、俎西面錯，以南爲上，爲受爵于侯，薦之於位。古文曰「再拜受爵」。

**疏**「獲者」至

「送爵」○注「負侯」至「受爵」○釋曰：知「負侯中」者，以下云「適右个」，又「適左个」，後言「中」，明先居中可知。云

「拜送爵不同面者，辟正主也」者，案上文正主獻賓、獻衆賓皆北面，與受獻者同面，今此與受獻不同面，故云「辟正主也」。云「其設薦、俎西面錯，以南爲上」者，獲者據文東面，而云西面錯，據設人而言。以南爲上者，《特牲》、《少牢》東面簋、豆皆以南方爲上，故知此亦然。云「受爵於侯，薦之於位」者，此云「負侯，北面拜受爵」，是受爵于侯。云「薦之於位」者，下云「左个之西北三步，東面設薦」，是薦之於位也。若然，不薦亦在侯者，以其酒在人手，可得就侯獻獲者，薦乃設之於地，若與酒俱在侯所，則正祭侯，何名獻獲也？若《大射》則獻與薦俱在乏，乃適侯祭之，君禮與此異也。獲者執爵，使人執其薦與俎從之，適右个，設薦、俎。獲者以侯爲功，是以獻焉。人謂主人贊者，上設薦、俎者也。爲設簋在東，豆在西，俎當其北也。言使設，新之。

**疏**「獲者」至「薦俎」○注「獲者」至「新之」○釋曰：此將祭侯也。云「獲者以侯爲功，是

以獻焉」者，以獲者卑賤，因侯有功乃得獻，今還以得獻之酒獻侯，故云「是以獻」也。云「人謂主人贊者」，以其前使爲獲者設薦、俎，是主人之贊者，今還使之設薦、俎，故知人是主人贊者。知「簋在東，豆在西，俎當其北也」者，以其侯以北面爲正，依《特牲》、《少牢》皆簋在右，故知簋在東右廂，豆在西左廂可知也。云「言使設，新之」者，鄭意嫌更使人設之，其實薦此者仍前人，而云使人設薦俎，示新之而已，故云言使設也。獲者南面坐，左執爵，

祭脯醢，執爵興，取肺，坐祭，遂祭酒。爲侯祭

也。亦二手祭酒反注，<sup>①</sup>如《大射》。

**疏**「獲者」至「祭酒」

○注「爲侯」至「大射」○釋曰：此正祭侯，故獲者南面鄉侯祭，故鄭云「爲侯祭也」。云「亦二手祭酒反注，如《大射》」者，案《大射》云「獲者左執爵，右祭薦、俎，二手祭酒」，鄭注云「二手祭酒者，南面於俎之北，當爲侯祭於豆閒，爵反注，爲一手不能正也。此薦俎之設，如於北面人焉」，此祭亦然，故云「如《大射》」也。興，適左个，中皆如

①「反」，阮校云：徐本作「及」。

之。<sup>①</sup>先祭左个，後中者，以外即之至中，若神在中也。

左个之西北三步，東面設薦、俎。獲者薦右東面立飲，不拜既爵。不就乏者，明其享侯之餘也。立飲薦右，近司馬，於是司馬北面。

**疏**「左个」至「既

爵」○注「不就」至「北面」○釋曰：云「不就乏者，明其享侯之餘也」者，若就乏，則已所當得，今不就乏近侯者，明享侯之餘。云「立飲于薦右，近司馬」者，解在薦右之意也。

知「於是司馬北面」者，此約獻釋獲者司射之位。案下文司射獻釋獲者，「釋獲者薦右東面拜受爵，司射北面拜送爵」，故知此時司馬亦北面也。若然，釋獲者在司射之西，北面立飲，此獲者不北面飲者，案《大射》注「此歸受獻之位也，不北面者，嫌爲侯卒爵」，此亦然，故不北面也。司

馬受爵，奠于筐，復位。獲者執其薦，使人執俎從之，辟設于乏南。遷設薦、俎就乏，明已所得禮也。言辟之者，不使當位，辟舉旌偃旌也。設于南，右之也。凡他薦、俎，皆當其位之前。

**疏**「司馬」至「乏

南」○注「遷設」至「之前」○釋曰：云「遷設薦俎就乏，明已所得禮也」者，前設近侯，見享侯之餘，此近乏者，乏者已

所有事之處，遷近乏，是明其已所得禮故也。云「設于南，右之也」者，以右取之便也。云「凡他薦、俎，皆當其位之前」者，言「凡」，見廣解薦處，謂凡燕及食并祭祀之薦、俎，皆當其位之前，唯此與《大射》獲者與釋獲者薦、俎辟設，不當前也。獲者負侯而俟。

**疏**「獲者負侯而俟」○

釋曰：獲者既受獻，負侯而俟第三番射也。司射適階西，釋弓矢，去扑，說決、拾、襲、適洗、洗爵，升，實之以降，獻釋獲者于其位少南。薦脯醢，折俎，有祭。不當其位，辟中。

**疏**「司射」至「有

祭」○注「不當其位辟中」○釋曰：自此盡「反位」，論司射獻釋獲之事。此薦脯醢及折俎，有肺祭，<sup>②</sup>一與獻獲者同，但彼三祭，此一祭爲異也。一祭者，亦薦有祭肺，<sup>③</sup>俎有祭肺，以爲將食而祭，故言「有祭」也。云「不當其位，辟中」者，以釋獲者位在中西，故獻之於其位少南，所以辟中也。釋獲者薦右東面拜受爵。司射北面拜

①「皆」，阮校云：《通解》、敖氏作「亦」。

②「肺」，曹校云此字衍。

③「肺」，曹校云當爲「脯」。

送爵。釋獲者就其薦，坐，左執爵，祭脯醢，興，取肺，坐祭，遂祭酒，興，司射之西北面立飲，不拜既爵。司射受爵，奠于筐。釋獲者少西辟薦，反位。辟薦少西之者，爲復射妨司射視筭也，亦辟俎。

**疏**「釋獲」至「反位」○注「辟薦」至「辟俎」○釋曰：云「亦辟俎」者，上獻獲者訖，獲者執其薦，使人執俎從之，設于乏南，此釋獲者受獻訖，釋獲者少西辟薦，不云辟俎，亦辟俎與獲者同可知，故云「亦辟俎」也。司射適堂西，袒、決、遂，取弓于階西，挾一个，搯扑，以反位。爲將復射。

**疏**

「司射」至「反位」

○注「爲將復射」○釋曰：自此盡「反位」，論將爲下番射，作之使拾取矢之事。司射去扑，倚于階西，升，請射于賓，如初。賓許。司射降，搯扑，由司馬之南適堂西，命三耦及衆賓皆袒、決、遂，執弓就位。位，射位也。不言射者，以當序取矢。

**疏**「司射」至「就位」○注「位射」至「取矢」○釋曰：云「位，射位」者，知是射者，下云「各以其耦反於射位」，故知此是

射位，在司射之西南東面者也。云「不言射者」，<sup>①</sup>以當序取矢者，以此當次序拾取矢射，故不言射位也。司射先反位。言先三耦及衆賓也，既命之即反位，不俟之也。羣不言先三耦，未有拾取矢位，無所先。

**疏**

「司射先

反位」○注「言先」至「所先」○釋曰：「言先三耦及衆賓也」者，此下有「三耦及衆賓」，故知「先三耦及衆賓」也。云「羣不言先三耦，未有拾取矢位，無所先」者，案前第二番將射，「命三耦拾取矢，司射反位」，不言先，未有位，無所先，故決之。第二番無位者，以司射之西南有三耦射位，至再番司射反於故位，三耦將移於司馬之西南拾取矢之位，未往之時，未有故位，三耦既無故位，故司射不得言先，故以此決之也。凡射，大射與鄉射各有三位。此鄉射無次，有堂西取弓矢、袒、決、遂及比耦之位，又有三耦射位，在司射位西南，又有拾取矢及再番射位，是三位。大射有次，次內有袒、決、遂、取弓矢之位，又有堂東次比耦

①

「射」下原有「位」字，阮校云：毛本「射」下無「位」字，毛本是。據刪。

之位，<sup>①</sup>又有射位并拾取矢之位，是亦有三位。但君臣禮異，故位事不同也。三耦及衆賓皆袒、決、遂，執

弓，各以其耦進，反于射位。以猶與也。今文

「以」爲「與」。**疏**「三耦」至「射位」○注「以猶與也」<sup>②</sup>○

釋曰：訓以爲與者，《春秋》之義，能東西之曰「以」。若存

「以」字，謂言尊卑不同，任意以之，故轉爲「與」，則平敵之義也。司射作拾取矢，三耦拾取矢，如初，反

位。賓、主人、大夫降，揖，如初。主人堂

東，賓堂西，皆袒、決、遂，執弓，皆進，階前

揖，南面相俟而揖行也。**疏**「司射」至「前揖」○注「南

面」至「行也」○釋曰：言「南面」者，謂賓主各於堂東西，南

面立相待。言「揖行」者，謂各於堂上北面相見而揖，<sup>③</sup>揖

訖行向楅也。及楅揖，拾取矢，如三耦。及楅，當

楅東西也。主人西面，賓東面，相揖，拾取矢。不北面揖，

由便也。**疏**「及楅」至「三耦」○注「及楅」至「便也」○釋

曰：云「及楅，當楅東西也」者，賓主出堂東西相見，揖訖，

東西行至楅所也。云「不北面揖，由便也」者，決三耦及衆

賓皆於楅南北面揖，及楅揖，此則無楅南北面揖，賓主各

由東西便故也。<sup>④</sup>卒，北面，搯三挾一个。亦於三耦爲之位。**疏**「卒北」至「一个」○注「亦於三耦爲之位」

○釋曰：經云「搯三挾一个」，與上三耦取矢訖「搯三挾一

个」同，又同處，故云「亦於三耦爲之位」也。揖，退。皆

已揖，左還，各由其塗反位。**疏**「揖退」○注「皆已」至「反

位」○釋曰：云「皆已揖，左還，各由其塗反位」者，謂賓主

北面揖退之時，賓主皆左還相背，各向堂塗反堂東西之

位。知左還者，約上三耦也。賓堂西，主人堂東，

皆釋弓矢，襲。及階，揖，升堂，揖，就席。

將袒先言主人，將襲先言賓，尊賓也。**疏**「賓堂」至「就

席」○注「將袒」至「賓也」○釋曰：袒是盡敬之事，襲是脩

容之禮，故上經將袒先言主人，此經襲則先言賓，是尊賓

故也。大夫袒、決、遂，執弓，就其耦。降，袒，

<sup>①</sup>「又有堂東次比耦之位」，曹校云當爲「又有次北比耦之位」。

<sup>②</sup>「猶與也」，阮校云：毛本作「猶至爲與」。

<sup>③</sup>「堂上北面」，曹校云「上」當爲「下」，「北」當爲「南」。

<sup>④</sup>「東」上，曹校云脫「堂」字。

決、遂於堂西，就其耦於射位，與之拾取矢。

**疏**「大夫」至

「其耦」○注「降袒」至「取矢」○釋曰：知「於堂西」者，上文

「賓、主人、大夫降」，賓堂西袒、決、遂，又上文大夫射時，

堂西袒、決、遂，故知也。揖，皆進，如三耦。耦東

面，大夫西面。大夫進，坐，說矢束，說矢束

者，下耦以將拾取。

**疏**「揖皆」至「矢束」○注「說矢」至

「拾取」○釋曰：「大夫西面」者，爲下射故也。興，反

位。而后耦揖，進，坐，兼取乘矢，順羽而

興，反位，揖。兼取乘矢者，尊大夫，不敢與之拾也。

相下相尊，君子之所以相接也。

**疏**「興反」至「位揖」○注

「兼取」至「接也」○釋曰：此大夫與耦取矢踣弓，覆手仰

手，一如上三耦法。其揖退之儀亦如上，左還而西也。

大夫進，坐，亦兼取乘矢，如其耦，北面，搯

三挾一个，亦於三耦爲之位。揖，退。耦反位。

大夫遂適序西，釋弓矢，襲，升，即席。大夫不

序於下，尊也。衆賓繼拾取矢，皆如三耦，以反

位。司射猶挾一个以進，作上射，如初。一

耦揖，升，如初。進，前也。晁言「還，當上耦，西面」，

是言進，終始互相明也。今文或言「作升射」。

**疏**「司射」

至「如初」○注「進前」至「升射」○釋曰：自此盡「退中與筭

而俟」，論第三番用樂射之事。云「晁言「還，當上耦，西

面」，是言進，終始互相明也」者，上番將射時，云「司射還，

當上耦，西面，作上耦射」，不言進，明還當上耦時者，進近

上耦乃作之。此直進作射，不言「還，當上耦」，明進時亦

還當上耦而作之，故言「終始互相明也」。司馬升，命

去侯。獲者許諾。司馬降，釋弓，反位。司

射與司馬交于階前，去扑，襲，升，請以樂樂

于賓。賓許諾。司射降，搯扑，東面命樂正

曰：「請以樂樂于賓，賓許。」東面於西階之前也。

不就樂正命之者，傳尊者之命於賤者，遙號令之可也。樂

正亦許諾，猶北面不還，以賓在堂。

**疏**「司馬」至「賓許」

○注「東面」至「在堂」○釋曰：知「在西階之前，不就樂正

命之」者，以經云「司射降，搯扑」，即言「東面命樂正」，無

行進之事，故知西階之前遙命之也。云「樂正亦許諾」，知

者，案《大射》云「司射東面命樂正曰：『命用樂。』樂正曰：

「諾」，是樂正許諾之事。此不言者，文不具，故言之。云「猶北面不還，以賓在堂」者，此亦無文，樂正位東階東南，北面，大師位東北，西面，賓在堂，南面，樂正猶北面，不還西面，是以下文特云「東面命大師」，明此時不西面受命矣。《大射》鄭注彼云「樂正西面受命」，<sup>①</sup>左還，東面命大師，與此禮異者，雖無正文，鄭以義言，君在阼故也。司

射遂適階間，堂下北面命曰：「不鼓不釋。」不與鼓節相應，不釋筭也。鄉射之鼓五節，歌五終，所以將八矢。一節之間當拾發，四節四拾，其一節先以聽也。

**疏**「司射」至「不釋」○注「不與」至「聽也」○釋曰：云「鄉

射之鼓五節」者，以卿大夫、士用五節，是以《射人》云：王以《騶虞》九節，諸侯以《貍首》七節，卿大夫以《采蘋》五節，士以《采蘋》五節，是卿大夫、士同五節。云「歌五終，所以將八矢」者，下記云「歌《騶虞》若《采蘋》，皆五終」是也。云「一節之間當拾發，四節四拾，其一節先以聽也」

者，尊卑樂節雖多少不同，四節以盡乘矢則同，其餘外皆以聽，以知樂終始長短也。王九節者，五節先以聽；諸侯七節者，三節先以聽；卿大夫、士五節者，一節先以聽；皆四節拾將乘矢。但尊者先以聽則多，卑者先以聽則少，優

至尊，先知審政也。<sup>②</sup>此節亦取侯道之數，故鄭注《射人》云「九節、七節、五節者，奏樂以爲射節之差。言節者，容侯道之數也」。凡射皆與臣下共爲，若與尊者同耦，自然與尊者同節，若不與尊者同耦，則各自用其節樂，當與《射義》同。上射揖。司射退反位。樂正東面命

大師，曰：「奏《騶虞》，間若一。」東面者，進還鄉

大師也。《騶虞》，《國風·召南》之詩篇也。《射義》曰：

「《騶虞》者，樂官備也。」其詩有「一發五豝、五豨，于嗟騶虞」之言，樂得賢者衆多，嘆思至仁之人以充其官。此天

子之射節也，而用之者，方有樂賢之志，取其宜也。其他

賓客、鄉大夫則歌《采蘋》。間若一者，重節。**疏**「上射」

至「若一」○注「東面」至「重節」○釋曰：云「東面者，進還

鄉大師也」者，以其大師西面，樂正北面，明知進身鄉大師

乃命之。云「此天子之射節也」者，《周禮·射人》而知。<sup>③</sup>

云「取其宜也」者，《騶虞》喻得賢者多，此《鄉射》亦樂賢，

<sup>①</sup>「彼」，曹校云此字衍。

<sup>②</sup>「政」，阮校云《通解》、毛本作「故」，曹校云「故」字似是。

<sup>③</sup>「周」上，曹校云脫「據」字。

故云「取其宜也」。云「其他賓客、鄉大夫則歌《采蘋》」者，《采蘋》是鄉大夫樂節。其他謂賓射與燕射，若州長他賓客自奏《采蘋》。若然，此篇有鄉大夫、州長射法，則同用《騶虞》，以其同有樂賢之志也。云「間若一者，重節」者，間若一謂五節之間長短希數皆如一，則是重樂節也。大

師不興，許諾。樂正退，反位。乃奏《騶虞》以射。三耦卒射，賓、主人、大夫、衆賓繼射。釋獲如初。卒射，降。皆應鼓與歌之節，乃釋筭。降者衆賓。

**疏**「大師」至「射降」○注「皆應」至「衆

賓」○釋曰：云「樂正退，反位」者，反工南北面位也。云「降者衆賓」者，次番射時，賓與主人、大夫卒射皆升堂，此降者衆賓也。釋獲者執餘獲升，告左右卒射，如初。卒，已也。今文曰「告于賓」。司馬升，命取矢。獲者許諾。司馬降，釋弓，反位。弟子委矢，司馬乘之，皆如初。司射釋弓，視筭，如初。筭，獲筭也。今文曰「視數也」。釋獲者以賢獲與鈞告，如初，降，復位。司射命設豐，設豐，實觶如初。遂命勝者執張弓，不勝者執

弛弓，升，飲，如初。司射猶袒、決、遂，左執弓，右執一个，兼諸弦，面鏃，適堂西，以命拾取矢，如初。側持弦矢曰執。面猶尚也，并矢於弦，尚其鏃，將止，變於射也。

**疏**「釋獲」至「如初」○注

「側持」至「射也」○釋曰：言「猶袒」者，亦是有故之辭，以其常袒，恐不袒，故言「猶」以連之也。云「側持弦矢曰執」者，對方持弦矢曰挾。「并矢於弦，尚其鏃，將止，變於射也」者，亦是對將射挾矢而言。司射反位。三耦及

賓、主人、大夫、衆賓皆袒、決、遂，拾取矢，如初。矢不挾，兼諸弦附以退，不反位，遂授有司于堂西。不挾亦謂執之，如司射也。不以反射位，授有司者，射禮畢。

**疏**「司射」至「堂西」○注「不

挾」至「禮畢」○釋曰：云「不挾亦謂執之，如司射也」者，執之如司射，兼諸弦附則與司射異。以其司射直執一个，無三矢兼於附，三耦以下則執一个，并於弦，又以三矢并於附，所以異也。辯拾取矢。揖，皆升，就席。謂賓、大夫及衆賓也。相俟堂西，進立于西階之前。主人以賓揖，升，大夫及衆賓從升，立時少退于大夫，三耦及弟子

自若留下。

**疏**「辯拾」至「就席」○注「謂賓」至「留下」○

釋曰：知「相俟于堂西」者，以經言「辯拾取矢」訖，乃言「揖，皆升，就席」，則知先取矢者皆相待堂西。其主人則在堂東，徧取矢訖，乃揖而升堂就席也。云「主人以賓揖，升，大夫及衆賓從升，立時少退于大夫，三耦及弟子自若留下」者，衆賓則三賓也，皆依上文獻後升及留在下之法。司射乃適堂西，釋弓，去扑，說決、拾、襲，反位。

**疏**「司射」至「反位」○釋曰：司射之扑在階西，今來去扑於堂西之等，以其不復射故也。司馬命弟子說

侯之左下綱而釋之，說，解也。釋之，不復射，奄束

之。**疏**「司馬」至「釋之」○注「說解」至「束之」○釋曰：上

初張侯時，云「乃張侯，下綱不及地武。不繫左下綱，中掩束之」，鄭云「事未至也」。又至將射時，「司馬命張侯，弟

子說束，遂繫左下綱」，鄭注云「事至」。今言「司馬命弟子

說侯之左下綱而釋之」，直言「說侯之左下綱而釋之」，明

未全去，備復射，故鄭下注云「諸所退皆俟於堂西，備復射

也」，故知此釋之爲三番射畢，不復射，若有射則行燕射，

旅酬以後乃爲之，故於此時中掩左下綱，如初張時也。

命獲者以旌退，命弟子退楅。司射命釋獲者退中與筭而俟。諸所退皆俟堂西，備復射也。旌

言以者，旌恒執也。獲者，釋獲者亦退其薦、俎。**疏**「命

獲」至「而俟」○注「諸所」至「薦俎」○釋曰：「獲者，釋獲者

亦退薦、俎」者，上獻時皆有薦、俎，辟之於右，今獲者以旌

退，釋獲者退中，故知亦退薦、俎也。司馬反爲司正，

退，復譚南而立。當監旅酬。**疏**「司馬」至「而立」○

注「當監旅酬」○釋曰：自此盡「司正降，復位」，論射訖行

旅酬之事。故司馬反爲司正，鄭云「當監旅酬」也。樂正

命弟子贊工即位。弟子相工，如其降也，升

自西階，反坐。贊工遷樂也。降時如初人。樂正反

自西階東，北面。**疏**「樂正」至「反坐」○注「贊工」至「北

面」○釋曰：前爲將射，遷工于東方，西面，樂正北面；今

將旅酬作樂，故遷升於堂上也。云「降時如初人」者，以經

直云「如其降也」，降時威儀不見，故取上文降時如初人，

初入則上「工四人」已下是也。云「樂正反自西階東，北

面」者，上初升於西階之東，樂正立于其西，合樂訖，工告

樂正曰「正歌備」，樂正告于賓，乃降，立于西階東，北面。



又將射時，樂正「命弟子贊工遷樂于下，弟子相工，如初人」，降自西階東北面，近其事。知不升者，以正樂畢，上無告請於賓之事，宜與「正歌備」已後同也。賓北面坐取俎西之觶，興，阼階上北面酬主人。主人降席，立于賓東。賓坐奠觶，拜，執觶興。主人荅拜。賓不祭，卒觶，不拜，不洗，實之，進東南面。所不者，酬而禮殺也。賓立飲。

**疏**

「賓北」至「南面」○注「所不」至「立飲」○釋曰：「賓北面坐取俎西之觶」者，謂上一人舉觶于賓，賓奠于薦西者也。云「賓立飲」者，《鄉飲酒》當此賓酬主人時云「賓不祭，立飲是也」。主人阼階上北面拜。賓少退。少退，少逡遁也。主人進，受觶。賓主人之西北面拜送。旅酬而同階，禮殺也。**疏**注「旅酬」至「殺也」○釋曰：對獻酬之時賓主各於其階，故云「同階，禮殺也」。賓揖，就席。主人以觶適西階上酬大夫。大夫降席，立于主人之西，如賓酬主人之禮。其既實觶，進西南面立，鄉所酬。**疏**「賓揖」至「之禮」○注「其既」至「所酬」○釋曰：云「主人以觶適西階上

酬大夫」者，旅酬恒執此觶以相酬，故言「以」。知義然者，上文「命獲者以旌退」，鄭注云「旌言以者，旌恒執也」是也。云「其既實觶，進西南面立，鄉所酬」，知者，以上賓酬主人阼階上實觶，進南面，<sup>①</sup>則知此主人酬大夫，西階上實觶，而亦進西面可知也。<sup>②</sup>主人揖，就席。若無大夫，則長受酬，亦如之。長謂以長幼之次酬衆賓。

**疏**

「主人」至「如之」○釋曰：云「若無大夫」者，鄉人

爲公卿大夫來觀禮者爲遵，或有或無不定，故云若有大夫先酬之，無大夫則酬長。以鄉射無介，直有三賓，以長幼之次受酬，此言「酬衆賓」，則三賓也。司正升自西階，相旅。作受酬者曰：「某酬某子。」某者，字也。某子者，氏也。稱酬者之字，受酬者曰某子，旅酬下爲上，尊之也。《春秋傳》曰：「字不若子。」此言「某酬某子」者，射禮略於飲酒。飲酒言「某子受酬」，以飲酒爲主。**疏**「司正」至「某子」○注「某者」至「爲主」○釋曰：云「旅酬下爲上，尊之也」者，以旅酬者少長以齒，逮下之道，前

①

「南」上，阮校云毛本有「東」字，曹校云毛本是。

②

「西」下，阮校云毛本有「南」字，曹校云毛本是。

人雖卑，其司正命之飲酒，呼之稱謂尊於酬者，故受酬者爲「某子」，酬他爲「某」也。云「《春秋傳》曰」者，案莊十年秋九月經書「荆敗蔡師于莘，以蔡侯獻舞歸」，《公羊傳》曰

「荆者何？州名也。州不若國，國不若氏，氏不若人，人不若名，名不若字，字不若子」，何休云「爵最尊也」。鄭引

之者，證旅酬下爲上之義，酬者稱字，受酬者稱子，子是尊稱。云「此言某酬某子者，射禮略於飲酒。飲酒言「某子

受酬」，以飲酒爲主」者，此《鄉射》主於射，略於飲酒，故稱

酬他者字，又稱受酬飲酒者爲子，是字不若子，飲酒言「某

子受酬」，直以飲酒爲主故也。受酬者降席。司正

退立于西序端，東面。退立，俟後酬者也。始升，

相立階西，北面。疏「受酬」至「東面」○注「退立」至「北

面」○釋曰：云「始升，相立階西，北面」者，《鄉飲酒》注亦

然。知者，以司正升自西階，與西階之酬者立，故知始時

在西階西北面也。衆受酬者拜，興，飲，皆如賓

酬主人之禮。辯，遂酬在下者，皆升受酬于

西階上。在下謂賓黨也，《鄉飲酒·記》曰「主人之贊者

西面北上，不與，無筭爵然後與」，此異於賓。疏「衆受」

至「階上」○注「在下」至「於賓」○釋曰：引《鄉飲酒·記》者，欲見賓黨在西，主黨在東，主黨不與酬之義。卒受者以觶降，奠于筐。

### 儀禮疏卷第十二

江寧府知府陽城張敦仁編校 元和縣

學生員顧廣圻覆校

## 儀禮疏卷第十三

唐朝散大夫行大學博士弘

文館學士臣賈公彥等撰

司正降，復位。

**疏**

「司正降復位」○釋曰：自此盡「唯

賓」，論舉觶於賓與大夫，爲無筭爵之事。云「司正降，復位」者，司正當監旅酬，<sup>①</sup>訖，故降，使二人舉觶于賓與大夫，爲無筭始也。<sup>②</sup>使二人舉觶于賓與大夫。

人，主人之贊者。舉觶者皆洗觶，升，實之，西階上北面，皆坐奠觶，拜，執觶興。賓與大夫皆席末荅拜。舉觶者皆坐祭，遂飲，卒觶，興，坐奠觶，拜，執觶興。賓與大夫皆荅拜。舉觶者逆降，洗，升，實觶，皆立于西階上，北面東上。賓與大夫拜。舉觶者皆進，坐奠于薦右。坐奠之，不敢授。

**疏**「舉觶」至「薦右」○

注「坐奠之不敢授」○釋曰：「賓與大夫皆席末荅拜」者，皆席西南面荅拜。云「皆進，坐奠于薦右」者，以其將飲者於右故也。云「坐奠之，不敢授」者，對獻、酬時親授，主人之贊者卑，不敢親授觶也。賓與大夫辭，坐受觶以興。辭，辭其坐奠觶。

**疏**

「賓與」至「以興」○注「辭辭其

坐奠觶」○釋曰：必辭者，贊者不敢親授，賓與大夫不可自尊，故辭之。不言取而言「受」者，亦是若親受之然。舉

觶者退，反位，皆拜送，乃降。賓與大夫坐，

反奠于其所，興。不舉者，盛禮已崇。古文曰「反

坐」。

**疏**

「舉觶」至「所興」○注「不舉」至「反坐」○釋曰：

崇，重也。凡飲酒，禮成於酬，前已旅酬，所盛禮已重，<sup>③</sup>今主人復舉觶，爲無筭爵，盡歡情，客不盡主人歡，故且奠之，未舉之，<sup>④</sup>故不奠薦左。若無大夫，則唯賓。長

一人舉觶，如《燕禮》「媵爵之爲」。

**疏**「若無大夫則唯賓」○

①「當」，阮校云：陳本、閩本、《通解》作「掌」。

②「始」上，曹校云脫「爵」字。

③「所」，曹校云當爲「斯」。

④「未」，曹校云殿本改作「後」。

注「長一」至「之爲」○釋曰：歸二人舉觶爲賓與大夫，今若無大夫，當闕一人，故云「則唯賓」也。云「長一人舉觶，如《燕禮》賡爵之爲」者，《燕禮》初二大夫賡觶，至旅酬復使二人，君命長賡一爵於君，與此同，故云「如《燕禮》之爲」。彼旅酬，此爲無筭爵不同，但一人是同，故引爲證也。司

正升自西階，阼階上受命于主人，適西階上，北面，請坐于賓。請坐，欲與賓燕，盡殷勤也。

至此盛禮以成，酒清肴乾，强有力者猶倦焉。

**疏**「司正」

至「于賓」○注「請坐」至「倦焉」○釋曰：自此盡「少退，北上」，論請坐徹俎之事。云「酒清肴乾，强有力者猶倦焉」者，此《禮記·聘義》文。案彼云「故强有力者將以行禮也，酒清，人渴而不敢飲也，肉乾，人飢而不敢食也，日莫人倦」，引之者，證此賓須坐之義。賓辭以俎。俎者，肴之貴者也。辭之者，不敢以燕坐褻貴肴。

**疏**「賓辭以

俎」○注「俎者」至「貴肴」○釋曰：俎所盛骨體，<sup>①</sup>骨體是肴之貴者，故辭之也。反命于主人。主人曰：

「請徹俎。」賓許。司正降自西階，階前命弟子俟徹俎。弟子，賓黨也。俎者，主人贊者設之，今賓

辭之，使其黨俟徹，順賓意也。上言「請坐于賓」，此言「主人曰」，互相備耳。

**疏**「反命」至「徹俎」○注「弟子」至「備

耳」○釋曰：知弟子是賓黨者，以其司正降自西階，階前命之，明賓黨弟子，在西階東面也。必使賓黨弟子者，徹俎是賓請之，故鄭云「俎者，主人贊者設之，今賓辭之，使其黨俟徹，順賓意也」。云「上言「請坐于賓」，此言「主人

曰」，互相備耳」者，凡辭，皆司正請于主人，主人有命，司正乃傳告賓。今上文云司正「請坐于賓」，直見司正傳主

人辭，不見主人曰請坐于賓之辭，此經直見「主人曰：「請徹俎」，不見司正傳主人以告賓，<sup>②</sup>是「互相備」也。不言

互文而云「互相備」者，凡言互文者，各舉一事，一事自周，是互文；此據一邊理，<sup>③</sup>一邊理不備，文相續乃備，故云

「互相備」，若云「糗餌粉飧」，鄭注云「餌言糗，飧言粉，互相足」之類也。司正升，立于序端。賓降席，北

面。主人降席自南方，阼階上，北面。大夫

①「所」下，曹校云似脫「以」字。

②「人」下，曹校云脫「辭」字。

③「理」原作「禮」，據重刊單疏本改。下同。

降席，席東南面。俟弟子升受俎。

**疏**「司正」至「南

面」○注「俟弟子升受俎」○釋曰：云「俟弟子升受俎」者，下云「司正以俎出，授從者」，注云「授賓家從來者也」，「所以厚禮之」，則此「弟子升受俎」者，案下文據大夫與主人而言，若賓俎授司正，非弟子也。賓取俎，還授司正。司正以降自西階。賓從之降，遂立于階西，東面。司正以俎出，授從者。授賓家從來者也。古者與人飲食，必歸其盛者，所以厚禮之。

**疏**

注「授賓」至「禮之」○釋曰：云「古者與人飲食，必歸其盛者，所以厚禮之」者，《鄉飲酒》、《燕禮》、《大射》賓客皆有俎，徹歸客之左右。俎是肴之貴，是「歸其盛者」。《公食大夫》既食，有司卷三牲之俎歸于賓館。故摠云「古者與人飲食，必歸其盛者，所以厚禮之」也。主人取俎，還

授弟子。弟子受俎，降自西階以東。主人降自阼階，西面立。以東，授主人侍者。

**疏**「主人」

至「面立」○注「以東」至「侍者」○釋曰：云「以東，授主人侍者」，弟子是賓黨，非主人之贊者，故知徹主人俎，還授主人侍者，歸入於內也。大夫取俎，還授弟子。

弟子以降自西階，遂出，授從者。大夫從之降，立于賓南。凡言還者，明取俎各自鄉其席。衆

賓皆降，立于大夫之南，少退，北上。從降，亦

爲將燕。

**疏**注「從降亦爲將燕」○釋曰：賓、主人、大夫有

俎，從俎而降。此三賓無俎，亦從大夫而降，亦如賓、主

人、大夫將燕，故同降同升也。主人以賓揖，讓，說

屨，乃升。大夫及衆賓皆說屨，升，坐。說屨

者，將坐，空屨褻賤，不宜在堂也。說屨則摳衣，爲其被

地。**疏**「主人」至「升坐」○注「說屨」至「被地」○釋曰：自

此盡「門外再拜」，論升坐行無筭爵賓醉送出之事。云「說

屨則摳衣，爲其被地」者，《曲禮》云「摳衣趨隅」，彼謂升席

時。引之證說屨低身亦然，若不摳衣，恐衣被地履之。但

對文上曰衣，下曰裳，散文衣裳通，此衣即裳也。案《少

儀》云「排闥說屨於戶內，一人而已矣」，鄭注云「雖衆敵，

猶有所尊也」。彼尊卑在室，則尊者說屨在戶內，自餘說

屨於戶外。①若尊卑在堂，則亦尊者一人說屨在堂，自餘

①「自」，阮校云：毛本作「其」。

說屨於堂下。是以《燕禮》、《大射》臣皆說屨於階下，公不見說屨之文，明公烏在堂矣。此乃鄉飲酒臣禮，<sup>①</sup>賓、主人行敵禮，故皆說屨於堂下也。乃羞。羞，進也。所進者狗載醢也。燕設啗具，所以案酒。**疏**「乃羞」○注「羞

進」至「案酒」○釋曰：云「所進者狗載醢也」者，以其牲用狗，故知狗載醢。醢未必狗，以其醢豫造乃成，非臨時之物，故知非狗，連言之也。無筭爵。使二人舉觶。

賓與大夫不興，取奠觶，飲，卒觶，不拜。二人，謂羣者二人也。使之升，立于西階上。賓與大夫將旅，當執觶也。卒觶者固不拜矣，著之者，嫌坐卒爵者拜既爵，此坐于席，禮既殺，不復崇。**疏**「無筭」至「不拜」○

注「二人」至「復崇」○釋曰：經「賓」上有「于」字者誤。以此二觶仍是前二人所舉者，今以二人升者舉發，使行無筭爵，非新觶，以鄭注可知，故誤有也。<sup>②</sup>若然，「舉觶」上屬，「賓」下屬為句也。云「卒觶者固不拜矣，著之者，嫌坐卒爵者拜既爵」者，上正旅酬時，賓酬主人，賓不祭，卒觶不拜，不洗；今此二人舉觶，禮彌殺，故云「卒觶者固不拜矣，嫌坐卒爵者拜既爵」者，以正獻、酬時皆坐卒爵，<sup>③</sup>拜既爵，嫌此無筭爵飲卒觶亦有拜義，故明之。云「坐于席，

禮既殺，不復崇」者，此決正行獻、酬時在於階下，<sup>④</sup>有拜既爵，此說屨就席，禮既殺，不復崇重，故無拜爵也。執

觶者受觶，遂實之。賓觶以之主人，大夫之觶長受，長，衆賓長。而錯，皆不拜。錯者，實主人

之觶以之次賓也，實賓長之觶以之次大夫。其或多者，迭飲於坐而已。皆不拜受，禮又殺也。**疏**注「錯者」至「殺

也」○釋曰：云「其或多者，迭飲於坐而已」者，衆賓之長在賓西者三人，大夫則席於賓東，若大夫亦三人，則與衆賓等，得交錯相酬。言「其或多者」，若有一大夫，則衆賓二人無所酬，直二人迭飲而已；若大夫四人已上，多於三賓，自三人之外亦無所酬，則亦自相酬，迭飲而已。云「皆不拜受，禮殺也」者，<sup>⑤</sup>上二人舉觶於賓與大夫，皆拜受，及飲卒不拜，是其殺，今衆賓與大夫不拜受觶，故言「禮又殺

①「乃」，阮校云：浦鏜改作「及」。

②「故誤有也」，曹校云似當為「故知有者誤也」。

③「正」，阮校云：毛本作「上」。

④「下」，曹校云當為「上」。

⑤「禮」下，阮校引浦鏜云：「禮」下脫「又」字。

也」。辯，卒受者興，以旅在下者于西階上。

衆賓之末飲而酬主人之贊者，大夫之末飲而酬賓黨，亦錯焉。不使執觶者酌，以其將旅酬，不以己尊孤人也。其末若皆衆賓，則先酬主人之贊者；若皆大夫，則先酬賓黨而已。執觶者酌在上辯，降復位。

**疏**「辯卒」至「階上」○注

「衆賓」至「復位」○釋曰：經云「辯」，謂堂上衆賓已上皆飲訖。云「卒受者」，謂最末後飲者。云「衆賓之末飲而酬主人之贊者，大夫之末飲而酬賓黨，亦錯焉」者，此亦若堂上交錯也。云「不使執觶者酌」，謂不使二人執觶者酌。云「以其將旅酬，不以己尊孤人也」者，其堂上皆坐行酒，至此立階上旅在下，解經「興，以旅在下者」。云「其末若皆衆賓，則先酬主人之贊者」，謂大夫或少或無，則衆賓爲末飲也。云「若皆大夫」者，謂大夫多，衆賓徧後，二觶並酬大夫，則大夫爲末飲也。云「執觶者酌在上辯，降復位」者，謂二人舉觶酌堂上衆賓已上辯，其堂下自酌相旅，二人無事，故降復于東階前西面北上位也，故《鄉飲酒·記》云「主人之贊者西面北上，不與，無筭爵然後與」。必知「復位」者，下經云「執觶者皆與旅」是也。長受酬。酬者不拜，乃飲，卒觶，以實之。言酬者不拜者，嫌

酬堂下異位當拜也。古文曰「受酬者不拜」。

**疏**「長受」

至「實之」○注「言酬」至「不拜」○釋曰：謂堂下或賓黨之長，或主人贊者之長，受堂上酬，酬者不拜。鄭云「酬者不拜者，嫌酬堂下異位，當拜也」者，嫌堂下異位，堂上酬堂下當拜，故明之也。受酬者不拜受。禮殺，進受尊者之酬，猶不拜。

**疏**「受酬者不拜受」○注「禮殺」至「不拜」

○釋曰：堂下卑者受堂上尊者酒當拜，由禮殺，雖尊者之酬，猶不拜也。辯旅，皆不拜。主人之贊者於此始

旅，嫌有拜。**疏**「辯旅皆不拜」○注「主人」至「有拜」○釋

曰：以《鄉飲酒·記》云「主人之贊者不與，無筭爵然後與」，故鄭偏言「主人之贊者於此始旅，嫌有拜」，故明之也。執觶者皆與旅。嫌已飲不復飲也。上使之勸人耳，非逮下之惠也，亦自以齒與於旅也。

**疏**「執觶者皆與

旅」○注「嫌已」至「旅也」○釋曰：此即上文「二人舉觶」者，於西階上已卒觶，故鄭云「嫌已飲不復飲也」。卒受

者以虛觶降，奠于筐。執觶者洗，升，實觶，反奠于賓與大夫。復奠之者，燕以飲酒爲歡，醉乃止，主人之意也。今文無「執觶」，及「賓觶」、「大夫之觶」

皆爲「爵」。「賓觶」，「觶」爲「之」。

**疏**「卒受」至「大夫」○注「復奠」至「爲之」○釋曰：今文此經云「執觶者」無此「執觶」，又今文無執觶及「賓觶」，<sup>①</sup>「大夫之觶」皆爲「爵」。不從者，以其皆在無筭爵之科，明不爲爵。云「賓觶，觶爲之」者，亦不從也。無筭樂。合鄉樂，無次數。

**疏**「無

筭樂」○注「合鄉樂，無次數」○釋曰：知合鄉樂二《南》者，約上正歌時，不略其正，已歌鄉樂。但上有次第，先歌《關雎》，次歌《葛覃》、《卷耳》，次歌《鵲巢》、《采蘋》、《采芣》，皆三終，有次數。今無次數，在賓主所好也。賓興，樂

正命奏《陔》。《陔》，《陔夏》，其詩亡。《周禮》賓醉而

出奏《陔夏》。《陔夏》者，天子、諸侯以鍾、鼓、大夫、士鼓而已。

**疏**「賓興」至「奏陔」○注「陔陔」至「而已」○釋曰：

此賓興即命奏，下文賓降乃作樂也。云「《陔》，《陔夏》，其詩亡」者，九《夏》皆《詩》篇，鄭注《鍾師》云「歌之大者，載在樂章，樂崩亦從而亡」。云《周禮》者，《鍾師》云「《陔夏》，杜子春云「客醉而出，奏《陔夏》，雖非正文，亦據《周禮》而言。云「《陔夏》者，天子、諸侯以鍾、鼓」，知者，《鍾師》云「以鍾、鼓奏九《夏》，是天子法。襄公四年，穆叔如晉，<sup>②</sup>「晉侯饗之，金奏《肆夏》之三，不拜」，則《陔夏》

奏用鍾矣。大夫、士尚有鼓，明諸侯亦有鼓，故摠云「天子、諸侯以鍾、鼓」。知「大夫、士用鼓」者，此《鄉射》、《鄉飲酒》皆有鼓，故知以鼓奏《陔》而已也。賓降及階，

《陔》作。賓出，衆賓皆出。主人送于門外，再拜。拜送賓于門東西面。賓不荅拜，禮有終。

**疏**「賓

降」至「再拜」○注「拜送」至「有終」○釋曰：知「拜送賓于門東西面」者，此約迎賓時於此拜也。云「不荅拜，禮有終」者，以行禮有終，故不荅也。明日，賓朝服以拜

賜于門外。拜賜，謝恩惠也。

**疏**「明日」至「門外」○

釋曰：自此盡經末，論息勞司正之事。主人不見，如

賓服，遂從之，拜辱于門外，乃退。不見，不褻

禮也。拜辱，謝其自屈辱。

**疏**「主人」至「乃退」○注「不

見」至「屈辱」○釋曰：「不見，不褻禮」者，禮不欲數，數則瀆，今主人不見，恐相褻，故不見也。主人釋服，乃息

司正。釋服，說朝服，服玄端也。息猶勞也。勞司正，謂

① 「今文無執觶及」，曹校云此六字衍。

② 「叔」原作「公」，今據重刊單疏本改。



賓之與之飲酒，以其昨日尤勞倦也。《月令》曰：「勞農以休息之。」**疏**「主人」至「司正」○注「釋服」至「息之」○釋曰：上文主人「如賓服」，則主人亦朝服矣。今言「釋服」，謂釋去朝服。朝服之下衣則次玄端，故知「釋服，說朝服，服玄端也」。玄端即朝服之下易其裳爲異也。<sup>①</sup>《月令》者，彼是十月農功畢，勞農以休息之，爲息田夫之臘祭。引之者，證息勞來休息之義也。無介。勞禮略，貶於飲酒也。此已下皆記禮之異者。

**疏**「無介」○注「勞禮」至「異者」○釋曰：云「勞禮略，貶於飲酒也」者，謂貶於鄉飲酒。鄉飲酒禮有介，此上司正飲酒及此勞禮皆無介，<sup>②</sup>是貶於鄉飲酒也。云「此以下皆記禮之異者」，謂息司正之禮與上飲酒禮異之事也。不殺。無俎故也。**疏**「不

殺」○注「無俎故也」○釋曰：下文云「無俎」，無俎故不殺，殺即有俎也。使人速。速，召賓。**疏**「使人速」○注

「速召賓」○釋曰：若《公食》使人召之，還司正爲擯也。<sup>③</sup>迎于門外，不拜。人，升，不拜至，不拜洗。薦脯醢，無俎。賓酢主人，主人不崇酒，不拜衆賓。既獻衆賓，一人舉觶，遂無筭爵。

言遂者，明其閒闕也。賓坐奠觶于其所，擯者遂受命于主人，請坐于賓，賓降說屨，升坐矣。不言遂請坐者，請坐主於無筭爵。**疏**「迎于」至「筭爵」○注「言遂」至「筭爵」○釋曰：云「言遂者，明其閒闕也」者，閒闕謂閒一人舉觶，<sup>④</sup>下有工升歌、立司正、旅酬及二人舉觶及徹俎之事，以其闕此數事，故云「遂無筭爵」也。云「賓坐奠觶于其所，擯者遂受命于主人，請坐于賓，賓降說屨，升坐矣」，<sup>⑤</sup>此並依正飲酒禮。「不言遂請坐者」，<sup>⑥</sup>請坐主於無筭爵者，以其請坐主於無筭爵，今言「無筭爵」，自然「請坐」可知，故不須言請坐於賓也。無司正。使擯者而已，不立之。

**疏**「無司正」○注「使擯」至「立之」○釋曰：不立司正，亦是與飲酒禮異。賓不與。昨日至尊，不可褻也。古文「與」作「豫」。**疏**「賓不與」○注「昨日」至「作豫」○釋曰：

- ①「下」，阮校云：一本改作「衣」。
- ②「司」，曹校云此字衍。
- ③「擯」，阮校云毛本作「賓」，曹校云各本作「賓」是。
- ④「下」，曹校云當有「者」字。
- ⑤「矣」下，曹校云當有「云」字。
- ⑥「不」上，曹校云當有「云」字。

賓者，主人所尊敬，不可復召之，復召之亦是褻瀆也。徵

唯所欲，徵，召也，謂所欲請呼。**疏**「徵唯所欲」○注

「徵召」至「請呼」○釋曰：須止則止，須召則召，在主人之意，故云「所欲請呼」也。以告於鄉先生、君子可

也。告，請也。鄉先生，鄉大夫致仕者也。君子，有大德

行不仕者。**疏**「以告」至「可也」○注「告請」至「仕者」○

釋曰：云「鄉大夫致仕者也」者，此即《鄉飲酒》注云「先生

謂老人教學者」。<sup>①</sup>云「君子，有大德行不仕者」，大德行

謂六德六行，可貢而不仕者，此即居士縞帶，亦曰處士。

羞唯所有。用時見物。**疏**「羞唯所有」○注「用時見

物」○釋曰：謂昨日所有之餘見物，鄉樂唯欲。不歌

《雅》、《頌》，取《周》、《召》之詩，在所好。**疏**「鄉樂唯欲」

○注「不歌」至「所好」○釋曰：此即與上「無筭樂同」，而云

「不歌《雅》、《頌》」者，以其上飲酒主於射，略於樂，不用

《小雅》，此非鄉射而亦不歌《雅》、《頌》者，亦不可過于正

飲酒禮，故云「《周》、《召》之詩，在所好」也。

記。大夫與，則公士爲賓。不敢使鄉人加

尊於大夫也。公士，在官之士。鄉賓主用處士。**疏**「記

大」至「爲賓」○注「不敢」至「處士」○釋曰：據此，鄉射使

處士無爵命者爲賓，故有大夫來，不以鄉人加尊於大夫，

故易去之，<sup>②</sup>使公士爲賓。若然，鄉飲酒貢士法，賢者爲

賓，其次爲介，又其次爲衆賓。有大夫來，不易去之，以其

賓擬貢故也。云「鄉賓主用處士」，即君子者也。使能，

不宿戒。能者敏於事，不待宿戒而習之。**疏**「使能不

宿戒」○注「能者」至「習之」○釋曰：解上賓用處士。云

「能者敏於事」者，《孝經》云「參不敏」，鄭云「敏猶達也」，

則此通達於事。其牲狗也，狗取擇人。**疏**「其牲狗

也」○注「狗取擇人」○釋曰：《鄉飲酒》、《鄉射》義取擇賢

士爲賓。天子已下燕亦用狗，亦取擇人可與燕者。亨于

堂東北。《鄉飲酒義》曰：「祖陽氣之所發也。」<sup>③</sup>**疏**「亨

于堂東北」○注「鄉飲」至「發也」○釋曰：陽氣起於東北，

而盛於南方，亨狗于東北，飲酒是陽，故法之。尊綍幕，

<sup>①</sup>「謂老人教學者」，阮校云：毛本作「謂鄉中致仕者」，

《鄉飲酒禮》注作「鄉中致仕」。

<sup>②</sup>「故」，曹校云當爲「則」。

<sup>③</sup>「祖」原誤「俎」，據毛本及《鄉飲酒義》改。

賓至徹之。以綌爲冪，取其堅緊。

**疏**「尊給冪賓至徹

之」○注「以綌」至「堅緊」○釋曰：凡冪者，皆爲塵埃加，故設之。但用冪不用冪不同者：凡用禮皆不見用冪，質故也，即《士冠》禮子，《昏禮》禮賓、贊禮婦，《聘禮》禮賓，此等用禮皆無冪是也。醕用酒亦無冪者，從禮子質也；或以尊厭卑，亦無冪。《燕禮》君尊有冪，方罍壺則無冪。《昏禮》尊於室內有冪，尊於房戶外，爲賤、御賤，故無冪。《鄉飲酒》、《鄉射》有冪者，無所厭故也。若祭祀之冪，《冪人》云「以疏布冪八尊」，鄭云「天地之神尚質」；「以畫布冪六彝」，鄭云「宗廟可以文」；「凡王巾皆黼」，注云「周尚武，其用文德則黻可」。諸侯無文，或與王同。其喪中之冪皆用疏布。《士喪禮》小斂用功布，大斂亦同。《士虞》用絺冪，與吉同，大夫亦當然也。云「賓至徹之」者，巾冪必布執冪，<sup>①</sup>賓未至，恐塵加，賓至徹去，不復用，以其《鄉射》飲酒不見更用之文故也。《燕禮》君命徹冪，則未命之前重用之者，君尊久設，恐塵，故重覆之。蒲筵，緇布純。

筵，席也。純，緣。**疏**「蒲筵緇布純」○注「筵席也純緣」

○釋曰：鄉大夫、州長與鄉人習禮，雖有公卿之尊，無加席，唯一種，<sup>②</sup>故記人記之。云「筵，席」者，鄭注《周禮》

序官云「鋪陳曰筵，藉之曰席」，然其言之，<sup>③</sup>筵、席通，但在地者爲筵，取鋪陳之義；在上曰席，取相承藉之義耳。西序之席北上。衆賓統於賓。**疏**「西序之席北上」

○注「衆賓統於賓」○釋曰：衆賓之席繼賓已西，南面，東上，今云「西序之席北上」者，謂衆賓有東面者則北上，此東面非常，故記之也。若然，此《鄉射》上設席雖不言衆賓之數，上文云「三拜衆賓」，鄭云「三拜，示徧也」，則衆賓亦三人矣。而復有東面者，若公卿、大夫多，尊東不受，則於尊西，賓近於西，則三賓東面北上，統於賓也。獻用爵，其他用觶。爵尊，不可褻也。以爵拜者不徒作。以爵拜，謂拜既爵。徒猶空也。作，起也。不空起，言起必酢主人。薦脯用籩，五臠，祭半臠，橫于上。醢以豆，出自東房。臠長尺二寸。脯用籩，籩宜乾物也。醢以豆，豆宜濡物也。臠猶胾也，爲記者異耳。祭橫于上，殊之也，於人爲縮。臠廣狹未聞也。古文

①「布」，曹校云殿本改作「有」是也。

②「唯」下，阮校云：毛本有「此」字。

③「其」，阮校云：毛本作「共」，義勝。

「臠」爲「載」，今文或作「植」。

**疏**「薦脯」至「二寸」○注

「脯用」至「作植」○釋曰：云「豆宜濡物也」者，案《王制》云「一爲乾豆」，鄭云「謂腊之，以爲祭祀豆實」，與此違者，以其豆實則醢也。鄭注《周禮·醢人》云「作醢及鬻者」，<sup>①</sup>必

先膊乾其肉，乃後細莖之，雜以梁糲及鹽，漬以美酒，塗置甑中，百日則成矣，是乾以爲豆實醢是也。云「臠猶脰也，爲記者異耳」者，《鄉飲酒·記》云「脯五脰」，此云「五臠」，臠與脰不同，非訓之，是記者異名不同，非別有義，故鄭云「臠猶脰也」。云「於人爲縮」者，脯法於人爲縮者，<sup>②</sup>《鄉飲酒·記》引《曲禮》云「以脯脰置者，左胸右末」，鄭注《曲禮》云「屈中曰胸，取左手案之，右手擘之便」，故「於人爲縮」，<sup>③</sup>橫祭半臠橫上，<sup>④</sup>於脯爲橫，於人則爲縱也。俎

由東壁，自西階升。狗既亨，載于東方。

**疏**「俎由

至「階升」○注「狗既」至「東方」○釋曰：云「狗既亨，載于

東方」者，上云「亨于堂東北」，今云「俎由東壁」者，亨在東北，實俎曰載，載則於東方，東方則東壁，故云「俎由東壁」也。云「自西階升」者，既由東壁，恐如祭饌由東階升，故記人明之。若祭饌則東階升，《特牲》、《少牢》是也，尊神，故由阼階升。賓俎脊、脅、肩、肺。主人俎脊、

脅、臂、肺。肺皆離。皆右體也。進腍。以

骨名肉，貴骨也。賓俎用肩，主人用臂，尊賓也。離猶挫也。腍，膚理也，進理謂前其本。<sup>⑤</sup>右體，周所貴也。若有尊者，則俎其餘體也。

**疏**「賓俎」至「進腍」○注「以骨」

至「體也」○釋曰：云「以骨名肉」者，骨爲本，有名，肉爲末，無名，所食即肉，故「以骨名肉」。必知骨有肉者，《特牲》「乃食舉」，注云「舉言食者，明凡解體皆連肉」，是有肉也。云「賓俎用肩，主人用臂，尊賓也」者，此據前三體而言，以其體有肩、臂、腍，《禮記·祭統》云「周人貴肩」，爲其顯，故賓用肩，尊賓也。云「離猶挫也」者，案《禮記·少儀》云「牛羊之肺離而不提心」，鄭云「提猶絕也，剉離之絕中央少者」，中央少者即是心也，此將食舉肺也。云「進理謂前其本」者，此與《公食》「同生人食法」，《少牢》「進下」者，是鬼神食法。云「右體，周所貴也」者，對左殷所貴。云

①「禮」字原無，按阮校據毛本補。

②「縮者」二字，曹校云當爲「橫」。

③「縮」，曹校云當爲「橫」。

④「橫上」，阮校云浦鏜改作「于上」，曹校云浦改是也。

⑤「前」原作「首」，今據重刊嚴州本改。

「若有尊者，則俎其餘體也」者，前三：①肩、臂、臠，以次用之，賓、主已用肩、臂，有一大夫則用臠，二大夫則取後體用膊，若有三大夫已上則用胛，其脊、脅與賓主同，故下文云「獲者之俎，折脊、脅、肺、臠」，注云「臠若膊、胛、臠，穀折之以爲大夫之餘體」是也。②凡舉爵，三作而不得爵。謂獻賓、獻大夫、獻工皆有薦。疏注「謂獻」至

「有薦」○釋曰：知此三人者，以其言「三作」，故知唯此三人而已。凡奠者於左，不飲，不欲其妨。疏凡奠者

於左○釋曰：謂若酬賓奠於右，賓奠之於左。將舉者

於右。便其舉也。疏「將舉者於右」○釋曰：謂若酬一

人二人舉，③奠之於薦右，後舉之者也。衆賓之長一

人辭洗，如賓禮。尊之於其黨。疏「衆賓」至「賓禮」

○注「尊之於其黨」○釋曰：此獻三賓之時，主人唯爲長者一人洗爵，如經文，恐已後更洗，故記人明之也。若有

諸公，則如賓禮，大夫如介禮。無諸公，則

大夫如賓禮。尊卑之差。諸公，大國之孤也。樂

作，大夫不入。後樂賢也。樂正與立者齒。謂

其飲之次也。尊樂正，同於賓黨。《鄉飲酒·記》曰：「與

立者皆薦以齒。」三笙一和而成聲。三人吹笙，一人

吹和，凡四人也。《爾雅》曰：「笙小者謂之和。」疏「三笙」

至「成聲」○注「三人」至「之和」○釋曰：云「《爾雅》曰：

「笙小者謂之和」者，案《爾雅·釋樂》云「大笙謂之巢」，

孫氏注云「巢高大」；又云「小者謂之和」，注云「和，小笙」

是也。獻工與笙，取爵于上筐。既獻，奠于

下筐。其笙則獻諸西階上。奠爵于下筐，不復用

也。今文無「與笙」。疏「獻工」至「階上」○注「奠爵」至

「與笙」○釋曰：云「奠爵于下筐，不復用也」者，謂堂上不

復用，無妨堂下更人用之。知者，獻獲及釋獲者皆取而獻

之是也。《大射》獻服不氏用散，不用爵者，彼君禮，與此

異也。立者東面北上。賓黨。疏「立者東面北上」

○注「賓黨」○釋曰：此謂一命及不命來觀禮者，與堂下衆

賓齒，東面北上而立。司正既舉觶，而薦諸其位。

①「前」下，曹校云脫「體」字。

②「折之以爲」，曹校云「折之」二字倒，「爲」字衍。

③「謂若酬一人二人舉」，曹校云「酬」字衍，「舉」下脫

「觶」字。

薦於顰南。**疏**「司正」至「其位」○注「薦於顰南」○釋曰：

知「薦於顰南」，不薦於顰北者，以司正顰南北面立，若薦顰北，與顰相隔，非位前，故知顰南位北也。三耦者，

使弟子，司射前戒之。弟子，賓黨之少者也。前

戒，謂先射請戒之。**疏**「三耦」至「戒之」○注「弟子」至

「戒之」○釋曰：云「使弟子，司射前戒之」者，謂請射之前戒之，以其經云「三耦俟於堂西」，故鄭云「前戒，謂先射請戒之」也。司射之弓矢與扑倚于西階之西。便

其事也。**疏**「司射」至「之西」○注「便其事也」○釋曰：此

矢謂「挾一个」者。初，司射適堂西，袒、決、遂，取弓矢于階西，兼挾乘矢，則誘射之弓矢亦在階西矣。若然，誘射訖，適堂西，改取一个挾之，遂適階西取扑，此一个實在堂西。至視筭之時，於西階西釋弓矢去扑，獻釋獲者，<sup>①</sup>此

亦在西階西，故鄭云「便其事也」。司射既袒、決、遂

而升，司馬階前命張侯，遂命倚旌。著並行也。

古文曰「遂命獲者倚旌」。**疏**「司射」至「倚旌」○注「著

並」至「倚旌」○釋曰：云「著並行」者，謂司射與司馬有不並行事時。案上文將射「適堂西，袒、決、遂」，取弓矢於西

階上，北面告賓曰「弓矢既具，有司請射」。其時司馬即階前，令倚旌。此皆同時，故鄭云「著並行」事，如上經「納射器」及「比三耦」以前，司射獨行事，後及司正為司馬與司射並行事，<sup>②</sup>故記人記之也。凡侯：天子熊侯，白

質；諸侯麋侯，赤質；大夫布侯，畫以虎、

豹；士布侯，畫以鹿、豕。此所謂獸侯也，燕射則

張之。鄉射及賓射當張采侯二正，而記此者，天子、諸侯之燕射各以其鄉射之禮，而張此侯，由是云焉。白質、赤

質皆謂采其地。其地不采者，白布也。熊、麋、虎、豹、鹿、

豕，皆正面畫其頭象於正鵠之處耳。君畫一，臣畫二，陽

奇陰偶之數也。燕射射熊、虎、豹，不忘上下相犯；射麋、

鹿、豕，志在君臣相養也。其畫之皆毛物之。**疏**「凡侯」

至「鹿豕」○注「此所」至「物之」○釋曰：云「此所謂獸侯

也」者，《周禮·梓人》云：「張獸侯以息燕」，注云「息者，休

農息老物也，燕謂勞使臣，若與群臣飲酒而射」是也。云

<sup>①</sup>「獻釋獲者」，曹校云此下有脫，擬補云「時亦於西階西釋弓矢去撲」。

<sup>②</sup>「及」，曹校云當為「乃」。

「燕射則張之」者，《燕禮》「大射正爲司射，如鄉射之禮」，是諸侯燕用鄉射之禮，故云「燕射則張之」也。天子雖無文，據記天子燕射，記明天子燕射亦用鄉射之法也。<sup>①</sup>云「鄉射及賓射當張采侯二正者，案《周禮》射人掌賓射，大夫、士同二正，是賓射二正。鄉射無文，知亦采侯二正者，《周禮》賓射與賓客爲射，此鄉射雖與鄉人習禮，亦如賓主行射禮，又非私相燕勞，故約與賓射同也。言「采侯」者，《梓人》云「張五采之侯，則遠國屬」，是賓射之侯，故云「采侯」也。云「而記此者，天子、諸侯之燕射各以其鄉射之禮」者，以天子自用鄉射之禮，諸侯自用鄉射之禮，大夫、士亦各隨其君用鄉射之禮也。用鄉射之禮，謂張侯道五十步及三耦一與鄉射同。云「張此侯」，則經獸侯是也。云「由是云焉」者，謂由是用鄉射法，故云「獸侯」，於此《鄉》記也。<sup>②</sup>云「白質、赤質皆謂采其地」者，案《周禮·掌蜃》云「共白盛之蜃」，則此以蜃灰塗之使白爲地；赤質者，亦以赤塗之使赤爲地。云「不采者，白布也」者，謂大夫、士直云「布侯」者也。云「熊、麋、虎、豹、鹿、豕，皆正面畫其頭」者，知皆畫首者，以其言狸首者射不來者之首，明此獸侯等亦正面畫其頭也。云「象於正鵠之處耳」者，案《梓人》云「參分其廣而鵠居一焉」，據大射之侯，若賓射之

侯，則三分其侯，<sup>③</sup>正居一焉；若燕射之侯，則獸居一焉，故云「象其正鵠之處耳」。云「君畫一，臣畫二，陽奇陰偶之數也」者，《禮記·郊特牲》云「君之南鄉，荅陽之義也。臣之北面，荅君也」，是君陽臣陰。又天一生水，地二生火，是一、二陰陽之數，故云「君一臣二，陽奇陰偶之數也」。云「燕射射熊、虎、豹，不忘上下相犯」者，三者皆猛獸，不苟相下，若君臣之道，亦獻可者替否者，不苟相從，輒當犯顏而諫，似獸等，故用之。云「射麋、鹿、豕，志在君臣相養也」者，案《內則》云「麋、鹿、豕皆有軒，並是可食之物，故云「相養也」」。云「其畫之皆毛物之」者，此無正文，但畫五正三正之侯，各以其色，明畫獸侯亦以毛物畫之可知也。<sup>④</sup>凡畫者，丹質。賓射之侯、燕射之侯，皆畫雲氣於側以爲飾，必先以丹采其地，丹淺於赤。**疏**「凡畫者丹質」○注「賓射」至「於赤」○釋曰：云「賓射之侯、燕射之侯」者，此鄉射以采侯二正，是賓射之侯也；此獸侯也又

① 「記」，孫校云：「記」字誤。

② 「鄉」，阮校引浦鏜云：「鄉」下疑脫「射」字。

③ 「三」，阮校云：毛本作「參」。

④ 「明」，阮校云：陳、閩無。

是燕射之侯，<sup>①</sup>故鄭並言之。云「皆畫雲氣於側以爲飾」者，鄭解經凡言畫者皆畫雲氣，故以雲氣解之也，蓋象雲色。若賓射之侯，天子九十步侯朱、白、蒼、黃、玄、五正者，還畫此五色雲氣於其側；七十步侯朱、白、蒼三正者，還畫此三色雲氣於其側；五十步侯朱、綠二正者，還畫此二色雲氣於其側，以爲飾也。云「必先以丹采其地」者，欲畫此五色、三色雲氣時，必先用丹采此地，乃於其上畫雲氣也。天子侯九十步之內更有七十、五十步侯，畿內諸侯七十步侯內更有五十步侯，畿外諸侯者之九十步侯之內更有七十、五十步侯，<sup>②</sup>其畫之采皆如其數也。以侯數非一，尊卑又不同，故云「凡」以廣之，言凡畫雲氣，以丹爲質地者也。云「丹淺於赤」者，案《月令》云「乘朱路，駕赤駟，載赤旂，衣朱衣」，朱與赤互言之，即爲一物；又案《冬官·鍾氏》云「以朱湛丹秫」，四人爲朱，色深而湛，丹秫，故知丹淺於赤。鄭言此者，欲見以丹爲地，丹上得見赤色雲之義，故言此也。射自楹間。物長如筈，其間容弓，距隨長武。自楹間者，謂射於庠也。楹間，中央東西之節也。物謂射時所立處也，謂之物者，物猶事也，君子所有事也。長如筈者，謂從畫之長短也。筈，矢幹

也，長三尺，與跬相應，射者進退之節也。間容弓者，上下射相去六尺也。距隨者，物橫畫也，始前足至東頭爲距，後足來合而南面爲隨。武，跡也，尺二寸。

**疏**

「射自」至

「長武」○注「自楹」至「二寸」○釋曰：云「自楹間者，謂射於庠也」，知者，以其言楹間，則是「庠則物當楣」，故知非射於序者也。云「楹間，中央東西節也」者，<sup>③</sup>以其楹間南北無限，東楹、西楹相當，故知東西之節也。云「長如筈者，謂從畫之長短也」者，其下有距隨爲橫，此言物長，又是從迹之稱，<sup>④</sup>故知南北之長短也。云「筈，矢幹也，長三尺」者，以《矢人職》得知也。<sup>⑤</sup>云「與跬相應」者，《禮記·祭義》云「故君子跬步而弗忘孝也」，一舉足謂之跬，再舉足謂之步，步，射者履物不過一跬，故知以三尺爲限也。云「距隨者，物橫畫也，始前足至東頭爲距，後足來合而南

①「也」，曹校云此字衍。

②「者之」，曹校云此二字衍。

③「西」下，阮校云：毛本有「之」字。

④「又是從迹之稱」，曹校云「又」字衍，「迹」當爲「畫」。

⑤「筈矢」至「知也」，孫校云：《矢人》無「筈長」之文，「三尺」亦見注。



面爲隨」者，謂上射、下射並足處皆然。言「長武」，武，跡也，中人之跡尺二寸，謂橫尺二寸也。序則物當棟，

堂則物當楣。是制五架之屋也。正中曰棟，次曰楣，

前曰庑。**疏**「序則至」當楣「○注」是制「至」曰庑「○釋

曰：云「是制五架之屋也」者，庠序皆然，但有室無室爲異。

命負侯者由其位。於賤者禮略。**疏**「命負」至「其

位」○釋曰：「其位」者，正據司馬自在己位遙命之。遙命者，由負侯者賤，略之故也。對司射比耦，則就其位。經

無司馬命負侯之位，故記之也。凡適堂西，皆出入

于司馬之南。唯賓與大夫降階，遂西取弓

矢。尊者宜逸，由便也。旌，各以其物。旌，總名

也。雜帛爲物，大夫、士之所建也。言各者，鄉射或於庠，

或於謝。**疏**「旌各以其物」○注「旌摠」至「於謝」○釋曰：

「云「旌，摠名也」者，以《周禮·司常》云「九旗」，對文「通帛

爲旌，雜帛爲物，全羽爲旟，析羽爲旌」，各別，今名物爲旌

者，散文通，故云「旌，摠名也」。云「雜帛爲物，大夫、士之

所建也」者，《司常》文。通帛者，通體並是絳帛，周所尚赤

也。雜帛者，中絳緣邊白也，白，殷之正色，故鄭彼注云

「言先王正道佐職也」。云「各者，鄉射或於庠，或於謝」者，諸侯鄉大夫是大夫詢衆庶，射於庠，射於謝於序，<sup>①</sup>是

諸侯州長是士，春秋習射于謝。大夫、士同建物而云「各」

者，雖同建物，仞則大夫五仞，士三仞，不同，故云「各」也。

無物則以白羽與朱羽糒。杠長三仞，以鴻

脰韜上一尋。無物者，謂小國之州長也。其鄉大夫一

命，其州長士不命，不命者無物。此翻旌也，翻亦所以進

退衆者。糒，雜也。杠，撞也。七尺曰仞。鴻，鳥之長脰

者也。八尺曰尋。今文「糒」爲「縮」，<sup>②</sup>「韜」爲「翻」。<sup>③</sup>

**疏**「無物」至「二尋」○注「無物」至「爲翻」○釋曰：云「無

物者，謂小國之州長也」者，案《典命》「子男之卿再命，大

夫一命，士不命」，大夫一命得建物，士不命則無物，是以

不得與上「各以其物」同，別爲此旌。云「此翻旌也」者，據

下文「士鹿中，翻旌」也。下云「君國中射，則皮樹中，以翻

旌獲」，此不命士與國君同者，士卑不嫌，命士以上尊卑自

①「於序」，阮校云陳、閩無，曹校云二字衍。

②「縮」，孫校云：以後記注例之，疑「縮」當爲「緇」。

③「韜」，阮校云：閩、監作「緇」。

異也。云「翻亦所以進退衆」者，此非直用之於獲。案《喪大記》君葬時執翻居前，詔傾虧，亦所以進退衆人也。云「七尺曰仞」者，無正文，鄭案《書傳》云「雉長三丈，高一丈」，則牆高一丈，《禮記·祭義》云「築宮仞有三尺」，牆高一丈，云「仞有三尺」，除三尺之外只有七尺，故知「七尺曰仞」也。王肅則依《小爾雅》「四尺曰仞」，孔君則「八尺曰仞」，所見不同也。云「鴻，鳥之長脰者也」者，脰則項也。云「八尺曰尋」者，亦無正文，《冬官》云車有六等之數，云「爰長尋有四尺」，長丈二而云「尋有四尺」，除四尺，則尋長八尺矣。凡挾矢，於二指之間橫之。二指，謂左右手之第二指，此以食指、將指挾之。

**疏**「凡挾」至「橫

之」○注「二指」至「挾之」○釋曰：云「二指謂左右手之第二指」，知左右手皆挾之者，以云「二指之間橫之」，則知左右手也。云「此以食指、將指挾之」者，以左擘指拓弓，右擘指鉤弦，故知挾矢以第二第三指間。第二指爲食指，《左傳》云「子公之食指動」是也。第三指爲將指，《左傳》云「吳王闔閭傷於將指」是也。故云「食指、將指之間挾之」。知不在無名指間者，以無名指短，與將指不相應，故知不是也。

司射在司馬之北。

**疏**「司射在司馬之

北」○釋曰：經不明言，司射與司馬南北相當，故明之也。司馬無事，不執弓。以不主射故也。始射，獲而未釋獲；復，釋獲；復，用樂行之。君子取人以漸。**疏**「始射」至「行之」○釋曰：「始射，獲而未釋獲」，據三耦射時。云「復，釋獲」者，據第二番射時。「復，用樂行之」，據第三番射時。上射於右。於右物射。楅長如筈，博三寸，厚寸有半，龍首，其中虵交，韋當。博，廣也。兩端爲龍首，中央爲蛇身，相交也。虵、龍，君子之類也。交者，象君子取矢於楅上也。直心、背之衣曰當，以丹韋爲之，司馬左右撫矢而乘之，分委於當。

**疏**「楅長」至「韋當」○注「博廣」至

「於當」○釋曰：云「蛇、龍，君子之類也」者，《易》云「龍戰于野，其血玄黃」，鄭注云「聖人喻龍，君子喻蛇」，是蛇、龍摠爲君子之類也。云「直心、背之衣曰當」者，直通身之言，其楅兩頭爲龍首，於背上通身著當，言當心中央也。知「丹韋爲之」者，周尚赤，上云「凡畫者，丹質」，又《周禮》九旗之帛皆用絳，故知此當亦「以丹韋爲之」。云「司馬左右撫矢而乘之，分委於當」者，若未分時，摠在於

當，今則四四在一邊，不謂分訖乃置於兩當也。楅𩇦，

橫而拳之，<sup>①</sup>南面坐而奠之，南北當洗。髮，

赤黑漆也。**疏**「楅𩇦」至「當洗」○注「髮赤黑漆也」○釋

曰：云「南面坐而奠之」者，取向弟子持矢北面，故南面奠之。云「南北當洗」者，恐南北不知遠近，故記言「南北當

洗」，南北節也。射者有過，則撻之。過謂矢揚中

人。凡射時矢中人當刑之。今鄉會衆賢，以禮樂勸民，而

射者中人，本意在侯，去傷害之心遠，是以輕之，以扑撻於

中庭而已。《書》曰：「扑作教刑。」**疏**「射者」至「撻之」○

注「過謂」至「教刑」○釋曰：云「是以輕之，以扑撻於中庭

而已」，引《書》者，謂《尚書·堯典》之文。彼據教學，故彼

注云「不勤道業則撻之」，引之者，於射時司射撻扑，亦是

教射法，故引證撻犯禮之過者，是以《尚書》亦云「侯以明

之，撻以記之」是也。衆賓不與射者不降。不以無

事亂有事。古文「與」爲「豫」。**疏**「衆賓」至「不降」○注

「不以」至「爲豫」○釋曰：鄉射不得與射者，雖誓「僅有存

焉」。<sup>②</sup>三賓已上容其有文無武者，許其不射，故記者言

之也。取誘射之矢者，既拾取矢，而后兼誘

射之乘矢而取之。謂反位已禮成，乃更進取之，不

相因也。**疏**「取誘」至「取之」○注「謂反」至「因也」○釋

曰：云「不相因」者，既自拾取己之乘矢，反位東西望訖，上

射乃更向前，<sup>③</sup>兼取誘射之矢，禮以變爲敬，故不相因。

賓、主人射，則司射擯升降。卒射即席而反

位，卒事。擯賓、主人升降者，皆尊之也。不使司馬擯

其升降，主於射。**疏**「賓主」至「卒事」○注「擯賓」至「於

射」○釋曰：云「不使司馬擯其升降，主於射」者，必以司射

決之者，以司馬本是司正，不主射事，司射主射事，故使司

射也。鹿中：髮，前足跪，鑿背容八筭。釋獲

者奉之，先首。前足跪者，象教擾之獸受負也。**疏**

注「前足」至「負也」○釋曰：服不氏教擾猛獸，猛獸不堪受

負，其有合負物者，教擾則屈前足以受負，若今馳受負則

四足俱屈之類也。大夫降，立于堂西以俟射。尊

①「拳」，阮校云：《通解》、楊氏、敖氏、毛本俱作「奉」。

②「雖」，曹校云疑當爲「既」。

③「上」，曹校云當爲「下」。

大夫，不使久列於射位。

**疏**「大夫」至「俟射」○注「尊大」

至「射位」○釋曰：謂主人、<sup>①</sup>大夫降時，賓、主先射，大夫則立于堂西，其耦在司馬之西射位，<sup>②</sup>大夫且立於堂西，射至乃取其耦共升射。大夫與士射，袒薰襦。<sup>③</sup>

不肉袒，殊於耦。耦少退于物。下大夫也，既發則

然。司射釋弓矢，視筭，與獻釋獲者釋弓矢。

唯此二事休武主文，釋弓矢耳，然則擯升降不釋。**疏**「司

射」至「弓矢」○注「唯此」至「不釋」○釋曰：此二者經文自

具，記之者，以唯此二事釋，欲顯出賓、主升降時不釋，<sup>④</sup>

故言之，是以鄭云「然則擯升降不釋」也。禮射不主

皮。主皮之射者，勝者又射，不勝者降。禮

射，謂以禮樂射也，大射、賓射、燕射是矣。不主皮者，貴

其容體比於禮，其節比於樂，不待中為備也。<sup>⑤</sup>言不勝者

降，則不復升射也。主皮者無侯，張獸皮而射之，主於獲

也。《尚書傳》曰：「戰鬪不可不習，故於蒐狩以閑之也。

閑之者，貫之也。貫之者，習之也。凡祭取餘獲陳於

澤，<sup>⑥</sup>然後卿大夫相與射也。中者雖不中也取，不中者雖

中也不取。何以然？所以貴揖讓之取也，而賤勇力之

取。嚮之取也，<sup>⑦</sup>於囿中，勇力之取也。今之取也，於澤

宮，揖讓之取也。」澤，習禮之處，非所於行禮，其射又主

中，此主皮之射與？天子大射張皮侯，賓射張五采之侯，

燕射張獸侯。**疏**「禮射」至「者降」○注「禮射」至「獸

侯」<sup>⑧</sup>○釋曰：云「禮射，謂以禮樂射也」者，射時有禮，兼

作樂，故連樂言之。不言鄉射者，鄉射用采侯，賓射中兼

之，故不言也。云「不主皮者，貴其容體比於禮，其節比於

樂」者，此即九節、七節、五節應於樂節是也。云「言不勝

者降，不復升射也」者，據主皮射者也。禮射二番不勝，<sup>⑨</sup>

①「主人」上，曹校云脫「賓」字。

②「西」下，曹校云脫「南」字。

③「薰」，阮校云：毛本作「纁」。阮校據《士冠禮》「纁裳」

注，以「薰」字當為「纁」。

④「賓」上，曹校云脫「擯」字。

⑤「備」，阮校云：毛本作「雋」，按「備」蓋「雋」字之誤。

⑥「凡祭取」，阮校云：《要義》「凡」作「已」，「取」上有

「則」字。

⑦「嚮」，阮校云：《釋文》作「鄉」。

⑧「至」原作「之」，據重刊單疏本改。

⑨「二」原作「三」，據重刊單疏本改。

仍待三番復升射也。<sup>①</sup>《尚書傳》者，濟南伏生爲《尚書》作傳。云「已祭取餘獲陳於澤，然後卿大夫相與射也」者，此則《周禮·山虞》田詒，虞人植旗於中屬禽焉，每禽擇取三十，餘將向國以祭，謂若《大司馬》云仲春祭社，仲夏享杓，仲秋祀方，仲冬享烝，已祭，<sup>②</sup>乃以餘獲陳於澤宮中，卿大夫、士共以主皮之禮射取之。云「雖不中」、「雖中」者，據內田時也。<sup>③</sup>云「非所於禮」者云云，<sup>④</sup>揖讓取即是行禮，而云「非所於行禮」者，揖讓雖是禮，對大射之等「其體比於禮，其節比於樂」爲「非所行禮」也。云「此主皮之射與」者，《書傳》不言「主皮」，以義約同，故云「與」以疑之也。云「天子大射」已下者，案《梓人》云「張皮侯而棲以鵠，則春以功」，即此鄭云「天子大射張皮侯」一也。《梓人》又云「張五采之侯，遠國屬」，即此鄭云「賓射張五采之侯」也。《梓人》又云「張獸侯以息燕」，即此鄭云「燕射張獸侯」也。鄭言此者，證此是禮射，與主皮異也。若然，天子有澤宮，又有射宮，二處皆行射禮者，澤宮之內有班餘獲射，又有試弓習武之射，若西郊學中射者，行大射之禮，張皮侯者是也；澤宮中射將欲向射宮，先向澤宮中試弓習武之射。<sup>⑤</sup>此習武之射無侯，直射甲革楯質，故《司弓矢》職云「王弓、弧弓以授，射甲革楯質」，而注引《圉人職》曰

「射則充楯質」是也。主人亦飲于西階上。就射爵而飲也。己無俊才，不可以辭罰。**疏**「主人」至「階上」○

注「就射」至「辭罰」○釋曰：此謂主人在不勝之黨，受罰爵之時也。云「就射爵而飲也」者，謂西楹西豐上射爵也。

云「己無俊才，不可以辭罰」者，以主人尊，恐不受罰爵，故言此也。獲者之俎，折脊、脅、肺、臠。臠若膊、

胙、軀之折，以大夫之餘體。**疏**「獲者」至「肺臠」○注「臠

若」至「餘體」○釋曰：上賓、主人已用肩、臂、唯有臠及膊、胙、軀。若脊、脅骨多，尊卑皆有，自臠已下，各得其一，今

鄭具言之，欲見科取其一定。以其若無大夫，獲者得

臠，即經所云者，故臠在肺下，欲見無大夫已合得。若大夫一人，大夫得臠，獲者得膊。若大夫二人，獲者即得胙。

① 「三」，阮校云：毛本作「後」。

② 「已」，阮校云：毛本作「凡」。

③ 「內」，曹校云當爲「向」。

④ 「禮者云云」，阮校云：毛本「禮」上有「行」字，「云」字不重。《要義》同。曹校云《要義》、諸本是也。「者」字句，「云」屬下讀。

⑤ 「之射」，曹校云此二字衍。

若大夫三人，獲者即得穀。若大夫、公卿更多，則折之不得整體，<sup>①</sup>或更取餘體也。故鄭又云「折，以大夫之餘體」也。

東方謂之右个。侯以鄉堂爲面也。**疏**「東方謂

之右个」○注「侯以鄉堂爲面也」○釋曰：以其經直云左

右个，不辨東西，故記人明之也。釋獲者之俎，折

脊、脅、肺，皆有祭。皆，皆獲者也。祭，祭肺也，以

言肺，謂判肺不離，嫌無祭肺。**疏**「釋獲」至「有祭」○注

「皆皆」至「祭肺」○釋曰：云「以言肺，謂判肺不離」者，即

經中「脊、脅、肺」是切肺，與祭肺同也。云「嫌無祭肺」者，

此明記人之意，見上已有判肺不離者，即經中「脊、脅、

肺」，是判肺與祭肺同，嫌更不別有祭肺，故言皆有祭肺。

言「皆，皆獲者」，欲見釋獲者與主獲者二者皆別有祭肺，

故云「皆」也。若然，上肺即舉肺。案《公食大夫》有切肺

與祭肺者，優賓，使賓祭此二者。亦以舉肺爲祭肺者，<sup>②</sup>

略賤者之義，是以《有司徹》侑俎羊切肺一，侑俎豕亦切肺

一，<sup>③</sup>鄭云「豕又祭肺，不啻肺，不備禮」，則是略賤之類

也。大夫說矢束，坐說之。明不自尊別也。歌

《騶虞》，若《采蘋》，皆五終，射無筭。謂衆賓

繼射者。衆賓無數也，每一耦射，歌五終也。**疏**「歌騶

至「無筭」○注「謂衆」至「終也」○釋曰：上用《騶虞》以化

民，下用《采蘋》大夫之樂節亦可。皆五終者，大夫、士皆

五節，一節一終，故云「五終」也。鄭言「衆賓無數」者，謂

堂下衆賓繼射者，故無數，若堂上衆賓則三人也。古者

於旅也語。禮成樂備，<sup>④</sup>乃可以言語，先王禮樂之道

也。疾今人慢於禮樂之盛，言語無節，故追道古也。凡

旅不洗。敬殺。不洗者不祭。不盛。既旅，士

不入。後正禮也，<sup>⑤</sup>既旅則將燕矣。士入齒於鄉人。

**疏**注「士入齒於鄉人」○釋曰：以其士立于下，故齒於鄉

人也。大夫後出。下鄉人。不干其賓主之禮。**疏**

①「整」，阮校云：毛本作「正」。

②「亦以舉肺爲祭肺者」，曹校云：「亦」上脫「此」字，

「舉」當爲「切」，「祭」當爲「舉」。

③「俎豕」原本作「豕俎」，據毛本改。

④「禮成樂備」，阮校云：諸本俱作「種成樂億」，唯徐本  
同此。

⑤「後」，阮校云：毛本、《通解》作「從」。

「大夫後出」○注「不干其賓主之禮」○釋曰：賓主及衆賓出後乃出，故云「不干其賓主之禮」。主人送于門外，

再拜。拜送大夫，尊之也。主人送賓還，入門揖，大夫乃出，送拜之。

**疏**「主人」至「再拜」○注「拜送」至「拜之」○

釋曰：上文「大夫後出」，是大夫意不干賓主之禮，此經主人意，故鄭云「拜送大夫，尊之也」。知「主人送賓還，入門揖，大夫乃出，送拜之」者，以其上經云「賓出，主人送于門外，再拜」，此記又云「大夫後出，主人送于門外，再拜」，故知「主人送賓還，入門揖，大夫乃出，送再拜之」也。鄉

侯，上个五尋，上个，謂最上幅也。八尺曰尋，上幅用

布四丈。

**疏**「鄉侯上个五尋」○注「上个」至「四丈」○釋

曰：以五尋，尋八尺，五八四十，故四丈也。中十尺。

方者也。用布五丈，今官布幅廣二尺二寸，旁削一寸。

《考工記》曰「梓人爲侯，廣與崇方」，謂中也。

**疏**「中十

尺」○注「方者」至「中也」○釋曰：云「方者也」者，謂侯中

正方十尺。云「用布五丈，今官布幅廣二尺二寸，旁削一寸」者，鄭意此言十尺，用布五幅，幅廣二尺二寸，兩畔各削一寸爲縫，幅各二尺在，故五幅爲一丈也。漢法幅二尺

二寸，亦古制存焉，故舉以爲況。若然，《周禮》鄭志「純三只，只八寸，二尺四寸」者，據繒幅也。《士喪禮》云「亡則以緇，長半幅」，注云「半幅一尺，終幅二尺」，亦謂繒而幅二尺者。幅有二種，喪禮略，用其狹者，故《周禮》鄭云「凡爲神之衣物，<sup>①</sup>必沽而小」是也。引《梓人》者，彼摠據三侯侯中皆廣與崇方，引之證經十尺是方也。侯道五十

弓，弓二寸以爲侯中。言侯中所取數也。量侯道

以狸步，而云弓者，侯之所取數，宜於射器也。<sup>②</sup>正二寸，

較中之博也。今文改「弓」爲「肱」也。

**疏**「侯道」至「侯

中」○注「言侯」至「肱也」○釋曰：云「言侯中所取數也」

者，謂侯中大小取數于侯道。云「量侯道以狸步」者，《大

射》文，故彼云以狸步張三侯，是用步耳，而云弓者，六

尺爲步，弓之下制六尺，與步相應，而云弓者，侯之所取

數，宜於射器也，故此經云「弓」也。云「正二寸者，較中

之博也」者，案《周禮·弓人》云「較解中有變焉」，謂弓附

①「鄭」下，曹校云脫「注」字。

②「於躬」，阮校云：毛本作「用射」，聶氏、《通解》、楊氏俱作「於射」。

把中側骨之處博二寸，故於此處取數焉。倍中以爲

躬。躬，身也，謂中之上下幅也，用布各二丈。**疏**「倍中

以爲躬」○注「躬身」至「二丈」○釋曰：身謂中，上、中、下

各橫接一幅布者，<sup>①</sup>故鄭云「中之上下幅，用布各二丈」

也。倍躬以爲左右舌。謂上个也。居兩旁謂之个，

左右出謂之舌。**疏**「倍躬以爲左右舌」○注「謂上」至「之

舌」○釋曰：言「謂上个」者，對下个不得倍躬，故謂上个

也。云「兩旁謂之个」，在躬之兩傍則謂之个。云「左右出

謂之舌」，謂躬外兩相各出一丈，若人舒舌，故下云「下舌

半上舌」，據出者而言也。下舌半上舌。半者，半其

出於射者也，<sup>②</sup>用布三丈。所以半上舌者，侯，人之形類

也。上个象臂，下个象足。中人張臂八尺，張足六尺，五

八四十，五六三十，以此爲衰也。凡鄉侯用布十六丈，數

起侯道五十弓以計。道七十弓之侯用布二十五丈二尺，

道九十弓之侯用布三十六丈。**疏**注「半者」至「六丈」○

釋曰：「半者，半其出於躬者也」者，以其言舌，故知半其出

者也。云「用布三丈」者，上舌兩相各一丈，今下舌兩相各

五尺，通躬二丈，故云「用布三丈也」。云「侯，人之形類

也」者，人形上廣下狹故也。云「五八四十」，據上个四丈，

「五六三十」，據下个三丈，以此上下爲衰差也。云「凡鄉

侯用布十六丈，數起侯道五十弓以計」者，用布十六丈者，

中五幅，幅一丈，用布五丈，上下躬各二丈，摠四丈，上个

四丈，下个三丈，是摠十六丈也。云「道七十弓之侯用布

二十五丈二尺」者，道七十弓，弓取二寸，二十七十四，侯中

丈四尺，七幅，幅有丈四尺，中用布九丈八尺，上下躬各用

布二丈八尺，上下摠用布五丈六尺，上个倍躬爲五丈六

尺，下舌半上舌，上舌出者兩相各出丈四尺，下舌半之，兩

相各出七尺，下舌用布一丈四尺，通躬二丈八尺，摠計用

布四丈二尺也，通計用布二十五丈二尺。云「道九十弓之

侯用布三十六丈」者，弓取二寸，九十弓侯中丈八尺，侯中

用布九幅，幅別丈八尺，中用布十六丈二尺，倍中以爲躬，

上下躬各用布三丈六尺，上下摠七丈二尺，倍躬以爲左右

舌，上舌用布亦七丈二尺，下舌亦半上舌，上舌出者丈八

尺，下舌半之，則下舌摠用布五丈四尺，以此計之，摠用布

三十六丈也。箭籌八十。箭，篠也。籌，筭也。筭八

① 「中下」，阮校云：「陳、閩俱作「下中」。

② 「射」，阮校云：「毛本作「躬」。



十者，略以十耦爲正，貴全數，其時衆寡從賓。

**疏**「箭籌

八十」○注「箭篠」至「從賓」○釋曰：云「箭，篠也」者，謂以箭爲籌。射之耦隨賓多少，今言八十，舉成數，以十耦爲文。但一者數之始，十者數之終，以十耦爲成數也。長

尺，有握，握素。握，本所持處也。素，謂刊之也。刊

本一膚。**疏**「長尺有握握素」○注「握本」至「一膚」○釋

曰：云「長尺」，復云「有握」，則握在一尺之外，則此籌尺四寸矣。云「刊本一膚」者，《公羊傳》僖三十一年云「觸石而出，膚寸而合，不崇朝而徧雨乎天下者，唯泰山爾」，何休云「側手爲膚」，又《投壺》云「室中五扶」，注云「鋪四指曰扶，一指案寸」，皆謂布四指，一指一寸，四指則四寸。引之者，證握膚爲一，謂刊四寸也。楚扑長如筈，刊本

尺。刊其可持處。<sup>①</sup>君射，則爲下射。上射退

于物一筈，既發，則荅君而俟。荅，對也。此以

下雜記也。今文「君射則爲下」。君樂作而后就物。

君袒朱襦以射。君尊。小臣以巾執矢以授。

君尊，不搢矢，不挾矢，授之稍屬。若飲君，如燕，則

夾爵。謂君在不勝之黨也。賓飲君如燕賓媵觚于公之

禮。則夾爵，夾爵者，君既卒爵，復自酌。君國中射，

則皮樹中，以翻旌獲，白羽與朱羽糴。國中，

城中也，謂燕射也。皮樹，獸名。以翻旌獲，尚文德也。

今文「皮樹繁豎」，<sup>②</sup>「糴」爲「紹」。古文無「以」。

**疏**「以

翻旌獲」○注「國中」至「無以」○釋曰：知城中是燕射者，

以其下有賓射，大射不在國，<sup>③</sup>故國中是燕射，以其燕在

寢故也。云「以翻旌獲，尚文德也」者，以其燕主歡心，故

旌從不命之士，亦取尚文德之義。必知取「尚文德」者，以

其以文德者舞文舞、羽舞也，以武德者舞武舞、干舞也，此

既用羽，知取「尚文德」也。於郊，則間中，以旌獲。

於郊，謂大射也。大射於大學。《王制》曰：「小學在公宮

之左，大學在郊。」間，獸名，如驢，<sup>④</sup>一角，或曰如驢，歧

蹄。《周書》曰：「北唐以間。」析羽爲旌。**疏**「於郊」至「旌

獲」○注「於郊」至「爲旌」○釋曰：知「於郊，謂大射也」者，

<sup>①</sup>「可」，阮校云：《通典》作「所」。

<sup>②</sup>「樹」下，阮校云：毛本有「爲」字。

<sup>③</sup>「國」下，阮校云：毛本、聶氏、《要義》有「中」字。

<sup>④</sup>「如」，阮校云：《通典》作「大於」。

案《大射》云「公入驚」，從外來入，此既言「於郊」，故知大射在郊也。云「大射於大學」者，據諸侯而言也。天子大射在虞庠小學，<sup>①</sup>以其天子大學在國中，小學在郊，諸侯不得立大學在國，立大學在郊。故鄭引《王制》「小學在公宮之左，大學在郊」，是殷法，諸侯用焉，故引爲證。必知諸侯立大學在郊者，見《詩·魯頌》有《泮宮》，《禮記》云「故魯人將有事於上帝，必先有事於頻宮」，鄭云「頻宮，郊之學也」，則《詩》「泮宮」，此「郊學」是也。云「間，獸名，如驢，一角，或曰如驢，歧蹄」。《周書》曰：「北唐以間」者，「歧蹄」已上《山海經》文，《周書》見於《國語》也。於竟，則虎中，<sup>②</sup>龍旛。於竟，謂與鄰國君射也。畫龍於旛，尚文章也。通帛爲旛。**疏**「於竟則虎中龍旛」○注

「於竟」至「爲旛」○釋曰：「與鄰國君射」，則賓射也。以其君有送賓之事，因送則射。云「尚文章也」者，亦若翻旌也。云「通帛爲旛」，《司常》文，鄭注云「凡九旗之帛皆用絳」，則通帛者，正幅爲絳。長尋曰旛，繫旛曰旆，通體皆用絳帛爲之，名旛。大夫兕中，各以其物獲。兕，獸名，似牛，一角。

**疏**「大夫」至「物獲」○注「兕獸名似牛一角」○釋曰：下有士，則此專據大夫爲文，而云「各以其

物」者，公、侯、伯大夫再命，子、男之大夫一命，爲卿大夫刃數雖同，<sup>③</sup>旒依命數不同，<sup>④</sup>故云「各」。又下云「士翻旌以獲」，唯小國之州長不命者，則公、侯之州長一命有旌，亦人物中，則各內兼之矣，故云「各」。「兕，似牛，一角」，案《爾雅》及《山海經》知之。士鹿中，翻旌以獲。謂小國之州長也。用翻爲旌，以獲無物也。古文無「以獲」。唯君有射于國中，其餘否。臣不習武事於君側也。古文「有」作「又」。今文無「其餘否」。

**疏**「唯君」至「其餘否」○注「臣不」至「其餘否」○釋曰：天子、諸侯皆燕射在國，又天子賓射在朝，亦在國。大夫、士燕射，賓射不在國，大夫又得行大射，雖無郊學，亦不得在國，是以孔子爲鄉射，射於甕相之圃，是其一隅。<sup>⑤</sup>若然，此鄉射亦不在國射，<sup>⑥</sup>亦宜在國外，故記人於此見之也。君在，大夫

①「小學」，阮校云：陳、閩俱無。

②「中」下，阮校云：《通典》有「以」字。

③「刃」，阮校云：毛本作「其」。

④「旒」，阮校云：毛本作「旒」。

⑤「隅」，阮校云：毛本作「耦」。

⑥下「射」字，阮校云：毛本作「中」。

射則肉袒。不袒薰禴，厭於君也。今文無「射」。

**疏**

「君在」至「肉袒」○注「不袒」至「於君」○釋曰：上云「大夫與士射，袒纁禴」，今與君射，爲厭與士同，故肉袒也。

儀禮卷第五 經六千六百四十五 注六千九百十五

儀禮疏卷第十三

江寧府知府陽城張敦仁編校 元和縣

學生員顧廣圻覆校

## 儀禮疏卷第十四 儀禮卷第六

唐朝散大夫行大學博士弘

文館學士臣賈公彥等撰

**燕禮第六疏**「燕禮第六」○《鄭目錄》云：「諸侯無事，

若卿大夫有勤勞之功，與群臣燕飲以樂之。燕禮於五禮

屬嘉。<sup>①</sup>大戴第十二，小戴及《別錄》皆第六。」○釋曰：案

上下經注，燕有四等。《目錄》云：諸侯無事而燕，一也；卿

大夫有王事之勞，二也；卿大夫又有聘而來還與之燕，三

也；四方聘客與之燕，四也。若然，《目錄》云：「卿大夫有勤

勞之功」，聘使之勞兼王事之勞二者也。<sup>②</sup>知臣子親聘，

還與之燕者，《四牡》勞使臣是也。知有王事之勞燕者，

下記云：「若以樂納賓，則賓及庭，奏《肆夏》」，鄭注云：「卿大

夫有王事之勞，則奏此樂焉」是也。知君臣無事有燕者，

案《魯頌》云：「夙夜在公，在公明明。振振鸞，鸞于下。鼓

咽咽，醉言舞。于胥樂兮」，鄭箋云：「君臣無事則相與明義

明德而已。絮白之士群集於君之朝，君以禮樂與之飲酒，燕樂以盡其歡」，是其無事而燕也。又知「賓及庭，奏《肆夏》」是己之臣子有王事之勞者，案《郊特牲》云：「賓入大門而奏《肆夏》」，鄭注云：「賓，朝聘者」，是異國聘賓入大門奏《肆夏》，故知記云「賓及庭，奏《肆夏》」者是己之臣子也。又知異國聘賓有燕者，《聘禮》所云「燕與時賜」者是也。

### 儀禮 鄭氏注

**燕禮。小臣戒與者。**小臣相君燕飲之法。

與者，謂留群臣也。君以燕禮勞使臣，若臣有功，故與群臣樂之。小臣則警戒告語焉。飲酒以合會為歡也。

**疏**

「燕禮小臣戒與者」○釋曰：自此已下盡「射人告具」，論告戒群臣及陳饌之事。必使小臣戒與者，以其燕為聘使者為主，兼與舊在者歡樂之，故今戒可與之人，使依期而至。

○注「小臣至歡也」○釋曰：云「小臣相君燕飲之法」者，案《周禮·大僕職》云：「王燕飲則相其法」，又案《小臣職》

<sup>①</sup>「嘉」下，阮校云：毛本有「禮」字。

<sup>②</sup>「兼」，曹校云當在「聘」上。

云「凡大事佐大僕」，則王燕飲，大僕相，小臣佐之。此諸侯禮，降於天子，故宜使小臣相。是以下云「小臣師一人，在東堂下」，注云：「師，長也。小臣之長一人，猶天子大僕，正君之服位者也。」是諸侯小臣當大僕之事。云「與者，謂留群臣也」者，謂群臣留在國不行者也。云「君以燕禮勞使臣，若臣有功」者，此即《目錄》「卿大夫有勤勞之功」。「勞使臣」即《四牡》「勞使臣」也。「若臣有功」，即「王事之勞」也。故鄭摠云「卿大夫勤勞之功」。若然，鄭不言與群臣無事燕者，以其經云「戒與者」，功勞之外與及之，為有事之臣燕，不得云無事燕者，故不言之。案《大射》云「君有命戒射」者，以其大射辨尊卑，故云「君有命」，明政教由尊者出。燕禮主歡心，不辨尊卑，故不言「君有命」。膳宰具官饌于寢東。膳宰，天子曰膳夫，掌君飲食膳羞者也。具官饌，具其官之所饌，謂酒也、牲也、脯醢也。寢，露寢。<sup>①</sup>**疏**「膳宰」至「寢東」○注「膳宰」至「路寢」○釋曰：以其燕在寢，故膳宰具官饌于寢東，擬燕時設之。云「膳宰，天子曰膳夫，掌君飲食膳羞者也」者，以其天子有宰夫，兼有膳夫，掌君飲食，諸侯亦有宰夫，復有膳宰，掌君飲食，與天子膳夫同，故引天子膳夫並之。

云「具官饌，具官之所饌」者，謂卿大夫士之饌摠饌之。《大射》亦用燕禮，直云「官饌」，不言「膳宰」，與此同，不言者，文不具。云「謂酒也、牲也、脯醢也」，知者，案下所設亦有此三者，牲即「其牲狗也」。云「寢，路寢」者，以其饗在廟，服朝服，下記云「燕，朝服於寢」，<sup>②</sup>正處在路寢，不在燕寢可知，故云「路寢」也。案《公食大夫》云「凡宰夫之具饌于東房」，不使膳宰者，彼食異國之大夫，敬之，故使宰夫具饌，此燕已臣子，故使膳宰卑者具饌。必知膳宰卑於宰夫者，案天子宰夫下大夫，膳夫上士，天子膳夫卑於宰夫，則知諸侯膳宰亦卑於宰夫者也。樂人縣。縣鍾聲也。國君無故不徹縣，言縣者，為燕新之。**疏**「樂人縣」○注「縣鍾」至「新之」○釋曰：案《大射》「樂人宿縣」在射前一日，又具辨樂縣之位者，以其大射在學宮，學宮不常縣樂，射乃設之，故射前一日縣之，又辨樂縣之位。此燕在路寢，有常縣之樂，今言「樂人縣」者，為燕新之而已，故不在燕前一日，又不辨樂縣之處。又直云「樂人」，未知

①「露」，阮校云：毛本作「路」。據下疏文當是。

②「於寢」，阮校引朱子云：「於寢」下疑脫「既朝服則宜於」六字。

樂人意是何官。<sup>①</sup>案《周禮·春官·大司樂》云「凡樂事宿縣」，又案《樂師》云「凡樂成則告備」，是天子有大司樂，并有樂師之官。案《序官》「樂師：下大夫四人，上士八人，下士十有六人」，以此知天子有大司樂、樂師。諸侯無大司樂，直有大樂正、小樂正，以其諸侯兼官，此二者皆當天子樂師大夫及士。則諸侯樂師不用大夫，大樂正當上士，小樂正當下士爲之。故鄭下注云「樂正，于天子樂師也」，《大射》注亦云「小樂正，於天子樂師」。若然，縣樂之法，案《周禮·眡瞭職》云「掌大師之縣」，鄭注云「大師當縣則爲之」。案下「僕人相大師」，則諸侯無眡瞭，則使僕人縣樂，大師以聲展之，樂師又監之。云「縣鍾磬也」者，案《小胥》「天子宫縣，諸侯軒縣」，面皆鍾、磬、鈞各一虞；「大夫判縣，士特縣」，不得有鈞，故云「鍾磬」。案下唯有磬而無鍾，而云「鍾磬」者，鄭汎解樂縣法，故兼言鍾，其實諸侯之士特縣磬而已。云「國君無故不徹縣」者，案《曲禮》「唯有大夫無故不徹縣，士無故不去琴瑟」，不言國君，但大夫無故不徹縣，則國君無故亦不徹縣可知，鄭以燕禮爲國君法，故以義約之也。<sup>②</sup>云「言縣者，爲燕新之」者，更整理樂縣之法，爲新之也。設洗、篚于阼階東南，當東

雷，疊水在東，篚在洗西，南肆。設膳篚在其北，西面。設此不言其官，賤也。當東雷者，人君爲殿屋也，亦南北以堂深。肆，陳也。膳篚者，君象觚所饌也。亦南陳，言西面，尊之，異其文。

**疏**「設洗」至「西面」

○注「設此」至「其文」○釋曰：云「設此不言其官，賤也」者，決膳宰具官饌、樂人縣、司宮設尊皆言其官，獨此不言官，故知賤也。案《少牢》「司宮設疊水」，大夫兼官，此國君禮，或可別人爲之，但無文，故鄭不細辨。云「當東雷者，人君爲殿屋也」者，漢時殿屋四向流水，故舉漢以況周。言東雷，明亦有西雷，對大夫、士言東榮兩下屋故也。云「亦南北以堂深」者，亦《士冠禮》、《鄉飲酒》等也。云「膳篚者，君象觚所饌也」者，案下文「洗象觚，升，實之，東北面獻于公」是也，但君尊，不可與臣同篚，故別釋之也。<sup>③</sup>云「亦南陳」者，亦臣之南肆者也。<sup>④</sup>「言西面，尊之，異其文」者，欲見膳篚西面，南肆者亦西面，此不可言

①「意」，阮校云：毛本作「竟」。

②「釋」，曹校云當爲「設」。

③「釋」，曹校云當爲「設」。

④「臣」，阮本作「陳」。

「南肆」而言「西面」，<sup>①</sup>是尊君之簠，故異其文也。司宮尊于東楹之西，兩方壺，左玄酒，南上。公尊瓦大兩，有豐，冪用綌若錫，在尊南，南上。尊士旅食于門西，兩圓壺。司宮，天子曰小宰，聽酒人之成要者也。尊方壺，為卿大夫、士也，臣道直方。於東楹之西，予君專此酒也。《玉藻》曰「唯君面尊」，玄酒在南，順君之面也。瓦大，有虞氏之尊也。《禮器》曰：「君尊瓦甒。」豐形似豆，卑而大。冪用綌若錫，冬夏異也。在尊南，在方壺之南也。尊士旅食者用圓壺，變於卿大夫也。旅，衆也。士衆食，謂未得正祿，所謂「庶人在官」者也。今文「錫」為「綌」。

**疏**

「司宮」至「圓壺」○注

「司宮」至「為綌」○釋曰：云「司宮，天子曰小宰，聽酒人之成要者也」者，案《天官·小宰》職「掌建邦之宮刑，以治王宮之政令」，是小宰掌宮事，此諸侯無小宰，有司宮，明司宮亦當掌宮刑，治宮之政令可知，是司宮掌宮事，與小宰同。又案《酒正》云「酒正之出，日入其成，月入其要，小宰聽之」，此司宮亦設酒尊，當掌酒事，與小宰同。是以知此諸侯司宮當天子小宰者也。若然，案《酒正》云：「酒正之出，日入其成，月入其要，小宰聽之。」案彼文則是小宰聽

酒正之成要，此注云「聽酒人成要者」，案彼注云「出謂授酒材及用酒之多少也。受用酒者日言其計於酒正，酒正月盡言於小宰」。云「日言其計於酒正」者，是酒人也。「酒正月盡摠言於小宰」，則是小宰所聽者，並是酒人所言，故鄭之此注據酒人而言也。云「尊方壺，為卿大夫、士也」者，以其燕摠有卿大夫、士，又別有公尊瓦大兩，故知方尊為此人也。云「於東楹之西，予君專此酒也」者，此決《鄉飲酒》、《鄉射》皆於房戶之間，賓主共之，此於東楹之西，向君設之，人君尊，專大惠，故云「予君專此酒也」。引《玉藻》者，欲見尊面向君，順君面，非賓主共之意。案《少儀》云「尊壺者面其鼻」，鄭注云「鼻在面中，言鄉人也」，鄉人者，據此燕禮尊面向君而言。《少儀》又云「尊者以酌者之左為上尊」，《鄉飲酒》云「尊兩壺于房戶之間，玄酒在西」，又《鄉射》云「尊於賓席之東，兩壺斯禁，左玄酒」，鄭注云「設尊者北面，西曰左」，此等皆據酌者北面而言，玄酒在左，若據設尊之人及尊面而言，<sup>②</sup>即南面，以右為尊。

① 「可」，阮校云毛本無，曹校云當為「同」。

② 「設尊之人及」，曹校云此五字當在上句「此等皆據」四字下。

此《燕禮》尊面向君，據君面以左爲尊，玄酒在南。若據酌者，不得背君而西面，當尊西東面，則酌者之右爲上尊，是以下文媵爵于公者，交於東楹北也。云「瓦大，有虞氏之尊也」者，《明堂位》文。引《禮器》「君尊瓦甒」，《大射》亦云「膳尊兩甒」，不引《大射》而引《禮器》者，鄭欲同此三者之文皆是一物故也。云「豐形似豆卑而大」者，據漢法而知，但豆徑尺，柄亦長尺，此承尊之物，不可同於常豆，故知「卑而大」，取其安穩也。云「夏夏綌冬錫」，「冬夏異也」者，夏宜用綌，冬宜用錫，葛之粗者曰綌。按《喪服傳》云「錫者何也？麻之有錫者也。錫者十五升，抽其半，無事其縷，有事其布，曰錫」，鄭注云「治其布使之滑易」是也。云「在尊南，在方壺之南也」者，其冪本爲瓦大設，今未用，陳在方壺之南者，不可在方壺、瓦大之間相雜故也。瓦大不言玄酒者，以其言「瓦大兩」，又言「南上」，有玄酒在南可知。凡無玄酒者，直陳之而已，不言上下，是以此「尊士旅食」直云「兩圜壺」，《大射》亦云「兩圜壺」，《特性》「尊兩圜壺於阼階西方，亦如之」，皆是無玄酒不言上下也。又凡用醴者無玄酒，《土冠禮》醴子，《昏禮》醴婦，《聘禮》醴賓，醴皆無玄酒，質故也。《昏禮》「房外之尊」，無玄酒，鄭云「略之」。此及《大射》「尊士旅食」，無玄酒，鄭云「賤

也」。《特牲》、《少牢》「陽厭納一尊」，無玄酒，鄭注云「禮殺也」。《士喪》、《既夕》、《士虞》皆有酒醴無玄酒者，以凶變於吉故也。《特牲》「東西階兩壺」，無玄酒者，注云「優之」。云「士衆食謂未得正祿」者，以其士大夫已上得正祿，《王制》云「下士九人祿，中士倍下士，上士倍中士，下大夫倍上士，卿四大夫祿」，皆正祿，此則未得正祿。云「所謂庶人在官者也」者，所謂《王制》文。故《王制》云「庶人在官者，其祿以是爲差」，謂府、史、胥、徒，謂府八人祿，史七人祿，胥六人，<sup>①</sup>徒五人，皆非正祿，號爲「士旅食」者也。司宮筵賓于戶西，東上，無加席也。筵，席也。席用蒲筵，緇布純。無加席，燕私禮，臣屈也。諸侯之官無司几筵也。

**疏**「司宮」至「席也」○注「筵席」至

「筵也」○釋曰：云「筵，席也」者，案《周禮·序官》「司几筵」，鄭注云「鋪陳曰筵，藉之曰席，然其言之，<sup>②</sup>筵、席通」。若然，「鋪陳曰筵」者，先鋪一席在地者，「藉之曰席」，據重已上相承藉者。筵席一也，故鄭云「筵、席通」。

①「人」下，阮校云：聶氏有「祿」字，下同。

②「其」，阮校云：毛本作「具」。



云「席用蒲筵緇布純」者，案《公食大夫·記》云「蒲筵常，緇布純，加萑席尋，玄帛純」，彼有加席，故有萑在上，此無加席，故言「席用蒲」。云「無加席，燕私禮臣屈也」者，對《公食大夫禮》異國之賓有加席，禮得申。云「諸侯之官無司几筵也」者，對天子有司几筵布席，諸侯兼官，使司宮設尊并設席。射人告具。告事具於君。射人主此禮，以其或射也。

**疏**「射人告具」○注「告事」至「射也」○釋曰：云

「射人主此禮，以其或射也」者，案《公食大夫禮》「贊者負東房，告具」，以其無射，故使贊者。此乃「射人告具」，與《大射》同。案下文「若射，則不獻庶子」，言「若」者，或射或不，故此鄭注云「以其或射」，言「或」亦是不定之義。<sup>①</sup>案《大射》「告具」之上有「養定」，此不言「養定」者，文不具也。小臣設公席于阼階上，西鄉，設加席。公升即位于席，西鄉。《周禮》：「諸侯昨席，<sup>②</sup>筵紛純，加纁席畫純。」後設公席者，凡禮，卑者先即事，尊者後也。

**疏**「小臣」至「西鄉」○注「周禮」至「後也」○釋曰：

自此下盡「諸公卿者」，論君臣位次及命羞者之事。注引《周禮》者，《司几筵》之文也。彼諸侯祭祀神席及受酢之席，此乃燕飲之席，引之者，欲見燕飲與受酢席同。若饗

諸侯來朝，則《郊特牲》云「大饗，君三重席而酢焉」是也。燕他國之臣，即《郊特牲》云「三獻之介，君專席而酢焉」，此降尊以就卑也，故君單席受酢也。云「後設公席者，凡禮，卑者先即事，尊者後也」者，此燕私禮，故賤者先即事，《大射》辨尊卑，故先設公席，後設賓席也。小臣納卿

大夫。卿大夫皆入門右，北面，東上。士立于西方，東面，北上。祝史立于門東，北面，東上。小臣師一人，在東堂下，南面。士旅食者立于門西，東上。納者，以公命引而人也，自士以下從而人即位耳。師，長也。小臣之長一人，猶天子大僕，正君之服位者也。凡入門而右由闕東，左則由闕西。**疏**「小臣」至「東上」○注「納者」至「闕西」○釋曰：云「卿大夫皆入門右，北面，東上」者，此是擬君揖位，故下經君始爾之就庭位。<sup>③</sup>云「士立于西方，東面，北上」者，此是士之定位。士賤，故不待君揖，入門即就定位。云「祝

①「亦」上，阮校云：《要義》有「以」字。

②「昨」，阮校云：毛本作「酢」。阮本作「胙」。

③「始爾之」，阮校云：毛本、《通解》作「爾之始」。

史立於門東，北面，東上」者，案《大射》：「大史在豸侯之東北，北面」，不言「祝」，此言「祝史」，不言「大史」者，《大射》及下文云「大史俟於所設中之西」，<sup>①</sup>東面以聽政，嫌其位初在此，不在豸侯之東北，故著大史以明之。其餘祝史彼不言者，以其《大射》先行燕禮，此《燕禮》有祝史，故於彼不言，省文也。云「納者，以公命引而人也」者，雖無正文，進止由君，故知「以公命」者也。云「自士已下從而人即位耳」者，對大夫以上小臣引之就門東揖位，未就庭位，自士已下不須引，從大夫而入，徑即庭位。云「師，長也。小臣之長一人，猶天子大僕，正君之服位者也」者，案《夏官·大僕》職云「掌正王之服位，出入王之大命」，彼下文有小臣之官上士四人，其職云「掌王之小命，詔相王之小法儀」，諸侯兼官，無大僕，唯有小臣出入君之教命，正君之服位。但諸侯小臣之官有上下，是以《大射》云「小臣師從者在東堂下，南面，西上」，又云「小臣正贊祖」，若然，諸侯小臣正次有小臣師，《大射禮》小臣正相君，小臣師佐之，常在君左右，不在堂下之位，故唯云「小臣師從者在堂下，南面」。此燕輕，宜有小臣師及從者相君燕飲，小臣正一人無事得在堂下，此言小臣師即大僕，小臣正，一也，故鄭以爲當天子大僕。云「凡入門而右由闕東，左則由闕西」

者，鄭云「凡入門」者，廣解賓、主人入門之義。案《曲禮》云「大夫，士出入君門由闕右」，又《玉藻》云「公事自闕西，私事自闕東」。言私事即「大夫，士出入君門」，一也，又與此經卿大夫、士入君門亦由闕右同。「公事自闕西」者，即《聘禮》聘賓「入由闕西」是也。若然，此注云「入門而右由闕東」者，是臣朝君之法也，左即由闕西者，是聘賓入門之法。公降立于阼階之東南，南鄉。爾卿，卿西面，北上，爾大夫，大夫皆少進。爾，近也，移也。揖而移之，近之也。大夫猶北面，少前。

**疏**「公降」

至「少進」○注「爾近」至「少前」○釋曰：《曲禮》云：「揖人必違其位。」是以公將揖卿大夫，降立於阼階之東南，南面揖之。變揖言「爾」者，爾訓近也，移也，卿大夫得揖，移近中庭也，是以鄭云「揖而移之，近之也」。云「大夫猶北面，少前」者，三卿五大夫初入門右，同北面，三卿得揖東相西面，五大夫得揖中庭，少進，北面不改，故云「大夫猶北面，少前」。射人請賓。命當由君出也。

**疏**「射人請賓」

○注「命當由君出也」○釋曰：案《大射》云「大射正擯，擯

①「及」，曹校云此字衍。

者請賓」，此直云「射人請賓」，不云爲賓者，但射人有大小，大者爲大射正，其次爲射正，<sup>①</sup>又其次爲司正，悉監射事，見於《大射禮》。大辨尊卑，<sup>②</sup>故云大射正爲賓。此燕禮或因燕而射，<sup>③</sup>以其禮輕，或大射正爲賓，或小射正爲賓，此二者皆是射人，故直云「射人請賓」，不定尊卑也。既當請君，不辨射人面位者，以其君南面，射人北面可知，故不言。公曰：「命某爲賓。」某，大夫也。

**疏**「公

曰命某爲賓」○注「某大夫也」○釋曰：知大夫非卿者，以其賓主相對，宰夫爲主人，<sup>④</sup>是大夫，明賓亦是大夫。<sup>⑤</sup>

《燕義》云「不以公卿爲賓，而以大夫爲賓，爲疑也」，故知是大夫。射人命賓，賓少進，禮辭。命賓者，東

面，南顧。禮辭，辭不敏也。

**疏**「射人」至「禮辭」○注「命

賓」至「敏也」○釋曰：鄭知「命賓者，東面，南顧」者，《少儀》云「詔辭自右」，明知在君之右，東面者向君，南顧者向賓便也。知「禮辭，辭不敏」者，取《孝經》曾子云「參不敏」爲義。反命。射人以賓之辭告於君。又命之，賓

再拜稽首，許諾。又，復。射人反命。告賓許。

賓出，立于門外，東面。當更以賓禮人。

**疏**「賓

出」至「東面」○注「當更以賓禮人」○釋曰：前卿大夫從臣

禮，相從而人，故出更以賓禮人，是以下經「賓人及庭，公

降一等揖之」。公揖卿大夫，乃升就席。揖之，人

之也。**疏**「公揖」至「就席」○注「揖之人之也」○釋曰：言

「人之」者，公將及升堂，故以人意相存偶，是以揖之乃升。

小臣自阼階下，北面，請執冪者與羞膳者。

執冪者，執瓦大之冪也。方、圓壺無冪。羞膳，羞於公，謂

庶羞。**疏**「小臣」至「膳者」○注「執冪」至「庶羞」○釋曰：

云「執冪者，執瓦大之冪也。方、圓壺無冪」，鄭知者，以其

上文「冪用綌」文承「瓦大」之下，方、圓壺不言冪，故知義

然。云「羞於公謂庶羞」者，知羞於公者，以其言「羞膳」據

君而言，又與「執冪者」連文，冪據君，明羞膳據公可知。

又知是「庶羞」者，以其脯醢稱薦，明羞是庶羞。乃命執

冪者。執冪者升自西階，立於尊南，北面，

①「爲」下，阮校云毛本有「小」字，曹校云毛本是。

②「大」下，曹校云脫「射」字。

③「或」，阮校云：毛本作「以」。

④「宰」上，阮校云：毛本、《通解》有「既以」二字。

⑤「亦是大夫」，阮校云：陳、閩俱作「亦當用大夫也」。

東上。以公命於西階前命之也。東上，玄酒之冪爲上也。羞膳者從而東，由堂東升自北階，房中西面，南上。不言之者，不升堂，略之也。

**疏**「乃命」至「東上」○注「以公」至「略之也」<sup>①</sup>○釋曰：鄭知「西階前命之」者，案下記云「羞膳者與執冪者皆士也」，士位在西方東面，故知西階前以君命命之。云「東上，玄酒之冪爲上也」者，以其唯瓦

大兩有冪，玄酒尊於正酒，經云「東上」，故知玄酒之冪爲上。「羞膳者」以下盡「略之」，鄭知義然者，以經直云「執冪者升自西階」，羞膳者無升文，又且東面階、西面階婦人之階非男子之所升，<sup>②</sup>則羞者升自北階。知「由堂東」者，以羞在房，又《大射》云「工人士與梓人升自北階」。<sup>③</sup>知

「房中西面，南上」者，約《士冠禮》「脯醢在房中服北」，「贊者盥于洗西，升，立于房中，西面，南上」，下注云「近其事也」。言「略之」者，解不由前堂升。執冪與羞膳臨時請

者，以其諸侯兼官，有常職先定，亦有臨時命之者，是以經與記直云士，不言其官。不請羞賓者，下記約與君同，亦

用士也。膳宰請羞于諸公卿者。小臣不請而使膳

宰，於卑者彌略也。禮以異爲敬。

**疏**「膳宰」至「卿者」○注「小臣」至「爲敬」○釋曰：言「彌略」者，上請賓使射人，

請執冪使小臣，已是其略，今羞諸公卿乃使膳宰，膳宰卑於小臣，故云「彌略」也。知膳宰卑於士者，《周禮》膳夫是上士，此諸侯膳宰明非上士，且禮之大例，薦羞者尊於設俎者，公士爲薦羞，膳宰設俎，故知膳宰卑也。射人納賓。射人爲擯者也。今文曰「擯者」。

**疏**「射人納賓」○注「射人」至「擯者」○釋曰：自此至「賓以虛爵降」，論賓升堂，主人獻賓之事。案《大射》大射正擯，此云射人爲擯，與上「射人請賓」義同，還是小射正也。賓人及庭，公降一等揖之。及，至也。至庭，謂既入而左北面時。

**疏**「賓人」至「揖之」○注「及至」至「面時」○釋曰：鄭知「至庭，謂既入而左北面時」者，以其云「賓人及庭」，「賓人」謂入門時，「及庭」謂賓入門而出堂塗北面，是其當公降揖之節，故知北面時也。公升就席。以其將與主人爲禮，不參之也。

**疏**「公升就席」○注「以其」至「之也」○釋曰：鄭知「將與主人爲禮，不參之」者，下經云「賓升」，

① 「略」，阮校云：毛本無。

② 「且」，阮校云：陳、閩俱作「是」。

③ 「云」，阮校云：毛本、《通解》無。

「主人亦升」，是其賓與主人爲禮，不得相參之也。賓升自西階。主人亦升自西階，賓右北面至再拜。賓荅再拜。主人，宰夫也。宰夫，大宰之屬，掌賓客之獻飲食者也，其位在洗北，西面。君於其臣，雖爲賓，不親獻，以其尊，莫敢伉禮也。至再拜者，拜賓來至也。天子膳夫爲獻主。

**疏**「賓升」至「再拜」○注「主人」至「獻主」○釋曰：知主人是宰夫者，案《禮記·燕義》云「使宰夫爲獻主」是也。云「宰夫，大宰之屬」者，案《天官》云「大宰卿一人，小宰中大夫二人，宰夫下大夫四人」，宰夫屬大宰，故云「大宰之屬」。云「掌賓客之獻飲食者也」者，案《宰夫職》云「凡朝覲會同賓客，掌其牢禮、委積、膳獻、飲食」，引之者，證宰夫爲主人之義。云「其位在洗北，西面」者，案下文「獻大夫」下，「胥薦主人于洗北，西面」是也。云「君於其臣，雖爲賓，不親獻，以其尊，莫敢伉禮也」者，此略取《燕義》文：「設賓主，飲酒之禮。使宰夫爲獻主，臣莫敢與君伉禮也。不以公卿爲賓，而以大夫爲賓，爲疑，明嫌之義也。」是君不親爲主人之事也。云「天子膳夫爲獻主」者，案《膳夫職》云「王燕飲酒，則爲獻主」是也。案《燕義》注云：「天子使膳宰爲主人。」則是膳宰、膳夫一

人也。上文注云「膳宰，天子曰膳夫」者，欲見天子、諸侯之臣名異，其實同也。主人降洗，洗南，西北面。賓將從降，鄉之。

**疏**「主人」至「北面」○釋曰：此宰夫代君爲獻主，升降不由阼階，與賓同由西階升降，故降自西階。當洗南北面，今「西北面」者，鄭云「賓將從降，鄉之」，當辭賓降故也。案《鄉飲酒》、《鄉射》主人降洗爵，在階下辭賓降者，彼賓主異階，故在階下，不在洗南也。賓降

階西，東面。主人辭降，賓對。對，荅。主人

北面盥，坐取觚洗。賓少進，辭洗。主人坐

奠觚于筐，興，對。賓反位。賓少進者，又辭，宜

違其位也。獻不以爵，辟正主也。古文「觚」皆爲「觶」。

**疏**「主人」至「反位」○注「賓少」至「爲觶」○釋曰：「賓少

進者，又辭，宜違其位也」者，言「又辭」，對前「主人辭降」，

今又賓「辭洗」。言「少進」者，前賓降，賓在階下，《曲禮》

云「揖人必違其位」，以其賓又「辭洗」，宜違本位也。云

「獻不以爵，避正主也」者，此宰夫爲主人，非正主，故用

觚，對《鄉飲酒》、《鄉射》是正主，皆用爵。主人卒洗，

賓揖乃升。賓每先升，尊也。**疏**「主人」至「乃升」○

注「賓每先升尊也」○釋曰：「每先升」者，前賓初升時，先云「賓升自西階」，後云「主人亦升自西階」，此「賓揖乃升」，下云「主人升」，故云「賓每先升」。賓先升者，尊賓故也。主人升，賓拜洗。主人賓右奠觚，荅拜，降盥。主人復盥，爲拜手盥也。**疏**「主人」至「降盥」

○注「主人」至「塵也」○釋曰：言「復盥」者，前盥爲洗爵，此盥爲汙手。賓降，主人辭，賓對。卒盥，賓揖，升。主人升，坐取觚。取觚，將就瓦大酌膳。執冪者舉冪，主人酌膳，執冪者反冪。君物曰膳，膳之言善也。酌君尊者，尊賓也。**疏**注「君物」至「賓

也」○釋曰：言「君物曰膳，膳之言善也」者，言「君物」，摠衆物之名，上云「設膳筐」、「設膳尊」，膳之言善，所以別於臣子之尊、筐也。云「酌君尊者，尊賓也」者，大夫爲賓，賓亦臣子，而酌膳尊，尊賓故也。必尊之者，立賓以對君故也。主人筵前獻賓。賓西階上拜，筵前受爵，反位。主人賓右拜送爵。賓既拜，前受觚，退復位。膳宰薦脯醢。賓升筵。膳宰設折俎。折俎，牲體骨也。《鄉飲酒·記》曰：「賓俎：脊、脅、

肩、肺。**疏**「膳宰」至「折俎」○注「折俎」至「肩、肺」○釋曰：引《鄉飲酒·記》者，《燕禮》不言賓之牲體之數，此燕禮既與鄉飲酒同用狗，則與此賓之牲體數同，<sup>①</sup>故引以爲證也。賓坐，左執爵，右祭脯醢，奠爵于薦右，興，取肺，坐，絕祭，齊之，興，加于俎，坐挽手，執爵，遂祭酒，興，席末坐，啐酒，降席，坐奠爵，拜，告旨，執爵，興。主人荅拜。降席，席西也。旨，美也。**疏**「賓坐」至「荅拜」○注「降

席」至「美也」○釋曰：云「降席，坐奠爵，拜」，鄭云「降席，席西」，不言面，案前體例，降席席西拜者皆南面，拜訖則告旨。賓西階上北面坐卒爵，興，坐奠爵，遂拜。主人荅拜。遂拜，拜既爵也。**疏**「賓西」至「荅拜」○注「遂拜拜既爵也」○釋曰：經云「坐卒爵」，又云「興，坐奠爵，遂拜」，「遂拜」之文隔「坐奠」辭，嫌遂拜不爲拜既爵，故鄭明之云「遂拜，拜既爵也」。賓以虛爵降。將酢主人。**疏**「賓以虛爵降」○注「將酢主人」○釋

①「與」，阮校云：毛本作「於」。

曰：自此已下盡「序內，東面」，論賓酢主人之事。鄭知「將酢主人」者，下經論酢主人之事，故知也。主人降。賓洗南坐奠觚，少進，辭降。主人東面對。上既言爵矣，復言觚者，嫌易之也。《大射禮》曰：「主人西階西，東面，少進，對。」今文從此以下「觚」皆爲「爵」。

**疏**

「主人」至「面對」○注「上既」至「爲爵」○釋曰：云「上既言爵矣，復言觚者，嫌易之也」者，上文主人洗觚獻賓，云「賓以虛爵降」，此經又云「坐奠觚」，中間言「爵」者，欲見對文一升曰爵，二升曰觚，散文即通，觚亦稱爵。以此言之，此觚即前爵，周公作經嫌易之，故復言觚也。引《大射禮》者，此經直有「主人降」，又云「主人東面對」，不辨主人立處，又無「少進」之文，大射先行燕禮，與此同，故引以爲證。賓坐取觚，奠于篚下，盥洗。篚下，篚南。主人辭洗。謙也。今文無「洗」。賓坐奠觚于篚，興，對。卒洗，及階揖，升。主人升，拜洗，如賓禮。賓降盥，主人降，賓辭降。卒盥，揖，升，酌膳，執冪如初。以酢主人于西階上。主人北面拜受爵。賓主人之左拜送

爵。賓既南面授爵，乃之左。

**疏**

「賓坐」至「送爵」○注

「賓既」至「之左」○釋曰：鄭云「賓既南面授爵，乃之左」，鄭知「南面授爵」與主人者，以經言「主人北面拜受爵」，明賓於東楹之西，東面酌膳訖，向西階南面授主人可知。授爵訖，乃之主人之左，北面拜送爵，故鄭云「南面授爵，乃之左」也。主人坐祭，不啐酒，辟正主也。未薦者，

臣也。

**疏**

「主人坐祭不啐酒」○注「辟正」至「臣也」○釋

曰：案《鄉飲酒》、《鄉射》皆是正主，經直云「祭如賓禮」，亦不見有啐酒之事，未知正主有啐不。此云「不啐，辟正主」者，案文可知。以《燕禮》、《大射》啐酒、告旨並不爲者，經云「不啐酒」、「不告旨」，並言「不」，《鄉飲酒》、《鄉射》直云「不告旨」，不言「不啐酒」，明主人啐矣。《有司徹》饋尸之禮，尸酢主人，云「席末坐啐酒」，《特性》、《少牢》尸酢主人，主人皆有啐酒，是其雖不告旨，唯有啐酒之事。①云「未薦者，臣也」者，對賓禮獻訖則薦脯醢，此主人是臣，故獻訖不薦，至「獻大夫」下「胥薦主人于洗北」是也。不拜酒，不告旨。主人之義。

**疏**

「不拜酒不告旨」○注「主

①「唯」，曹校云似當爲「亦」。

人之義」○釋曰：拜酒主人爲告旨，<sup>①</sup>但告旨者，賓拜訖，主人告酒美。<sup>②</sup>《鄉飲酒》、《鄉射》正主人不拜酒，不告旨。主人無自告美，故此主人代君爲主，不得直云主人，故云「主人之義」。遂卒爵，興，坐奠爵，拜。執爵興。賓荅拜。主人不崇酒，以虛爵降，奠于篚。崇，充也，不以酒惡謝賓，甘美君物也。賓降，立于西階西。既受獻矣，不敢安盛。射人升賓。賓升，立于序內，東面。東西牆謂之序。《大射禮》曰：「擯者以命升賓。」**疏**「射人」至「東面」○注「東西」至「升賓」○釋曰：「東西牆謂之序」者，《爾雅》文。引《大射禮》者，證此經云「射人升賓」之時，亦得君命。主人盥，洗象觚，升，實之，東北面獻于公。象觚，觚有象骨飾也。取象觚者東面。**疏**「主人」至「于公」○注「象觚」至「東面」○釋曰：自此下盡「奠于膳篚」，論主人獻公之事。云「取象觚者東面」者，以膳篚南有臣之篚，不得北面取，又不得南面背君取，從西階來，不得篚東西面取，以是知「取象觚者東面」也。公拜受爵。主人降自西階，阼階下北面拜送爵。士薦脯醢，膳宰

設折俎，升自西階。薦，進也。《大射禮》曰：「宰胥薦脯醢，由左房。」**疏**「公拜」至「西階」○注「薦進」至「左房」○釋曰：凡此篇內公應先拜者皆後拜之，尊公故也。是以下舉旅行酬，皆受酬者先拜，公乃荅拜。此公先拜受爵者，受獻禮重故也。是以下云主人受公酢，得酌膳，燕上歡故也。<sup>③</sup>《大射》主人受公酢者，<sup>④</sup>辨尊卑故也。云「士薦脯醢，膳宰設折俎」者，案前獻賓薦脯醢及設折俎皆使膳宰者，賓卑故也。今於公，<sup>⑤</sup>「士薦脯醢，膳宰設折俎」，異人，以其士尊於膳宰，君尊，故使士薦。必知士尊於膳宰者，以其諸侯膳宰當天子膳夫，上士二人，諸侯降等，膳宰則卑。故下記云「羞膳者與執冪者皆士也」，鄭注云「尊君也」。膳宰卑於士，是其士尊也。大射主於射，略於飲酒，故公及賓同使宰胥薦脯醢，庶子設折俎。此燕禮

①「人」，曹校云此字衍。

②「主人告酒美」，曹校云「告」字當在「主人」上，殿本

「主」上增「向」字。

③「上」，阮校云：毛本作「主」。

④「者」上，曹校云脫「酌散」二字。

⑤「於」，阮校云：《要義》作「以」。



燕私，主於羞，故賓之薦俎庶羞同使膳宰，君之脯醢庶羞同使士尊官爲之。大射必使庶子設折俎者，案《周禮》庶子下大夫，大射序尊卑，變於燕禮，故尊官爲之。引《大射禮》者，證此經脯醢從左房而來。天子、諸侯有左右房，故得言左房，大夫、士無右房，故言東房而已。公祭如賓禮。膳宰贊授肺。不拜酒，立卒爵，坐奠爵，拜，執爵興。凡異者，君尊，變於賓也。

**疏**「公祭」至「爵興」○注「凡異」至「賓也」○釋曰：云「凡異者，君尊，變於賓也」者，云「凡」非一，謂「膳宰贊授肺」、「立卒爵」，又上文「士薦脯醢」，皆是異於賓，故言「凡」以廣之。

主人荅拜，升，受爵以降，奠于膳筐。更爵，洗，升，酌膳酒以降，酢于阼階下，北面，坐奠爵，再拜稽首。公荅再拜。更爵者，不敢襲至尊也。古文「更」爲「受」。**疏**「更爵」至「再拜」○釋曰：自此已下盡「主人奠爵于筐」，論主人受公酢之事。主人受公酢而自酌者，不敢煩公，尊君之義。○注「更爵」至「爲受」○釋曰：獻君、自酢同用觚，必更之者，襲，因也，不敢因君之爵。《喪服傳》云：「君，至尊也。」故以君爲至尊也。

主人坐祭，遂卒爵，再拜稽首。公荅再拜。主人奠爵于筐。主人盥洗，升，媵觚于賓，酌散，西階上坐奠爵，拜賓。<sup>①</sup>賓降筵，北面荅拜。媵，送也，讀或爲揚，揚，舉也。酌散者，酌方壺酒也，於膳爲散。今文「媵」皆作「騰」。**疏**「主人」至「荅拜」

○釋曰：自此盡「東南面立」，論主人酬賓之事。案前受獻訖，「立于序內」以來，未有升筵之事。案《鄉飲酒》、《大射》酬時，皆主人西階上坐奠爵拜，賓西階上北面荅拜，酬前賓皆無逆在席者，又下文賓「奠于薦東」「賓降筵西，東南面立」，以此約之，則此無升筵之事，或言降筵者蓋誤。○注「媵送」至「作騰」○釋曰：云「媵，送也，讀或爲揚，揚，舉也」者，案《禮記·檀弓下》云「知悼子卒，未葬。平公飲酒，師曠、李調侍，鼓鍾。杜蕢自外來，升，酌，曰：『曠飲斯。』又酌，曰：『調飲斯。』」注云「皆罰」。「平公曰：『寡人亦有過焉，酌而飲寡人。』杜蕢洗而揚觶」，注云「舉爵於君也」。《禮》「揚」作「媵」，揚，舉也，媵，送也。揚近得

① 「賓」，武威漢簡甲本不重，阮校云：唐石經、敕氏俱不重。

之」。若然，此注「今文『騰』作『騰』」，騰與賡皆是送義，讀從《檀弓》「杜賁揚觶」之揚，揚訓爲舉，義勝於賡送，<sup>①</sup>故讀從之也。主人坐祭，遂飲，賓辭。卒爵，拜，

賓荅拜。辭者，辭其代君行酒，不立飲也。此降於正主

酬也。**疏**「主人」至「荅拜」○注「辭者」至「酬也」○釋曰：

案《鄉飲酒》、《鄉射》主人酬賓皆坐卒觶，此主人酬賓亦坐飲，賓辭之者，上獻君，君立卒爵，此主人代君酬賓，亦宜立飲，今主人「坐祭，遂飲」，故鄭云「辭者，辭其代君行酒，不立飲」。云「此降於正主酬也」者，正主謂《鄉射》、

《飲酒》正主酬處。主人降洗，賓降，主人辭降，

賓辭洗。卒洗，揖，升，不拜洗。不拜洗，酬而禮

殺。主人酌膳。賓西階上拜，拜者，拜其酌已。

受爵于筵前，反位。主人拜送爵。賓升席，

坐祭酒，遂奠于薦東。遂者，因坐而奠，不北面也。

奠之者，酬不舉也。**疏**「主人酌膳」○釋曰：自此至「薦

東」，此爲酬賓。若然，案《鄉飲酒》、《鄉射》主人酬賓，皆

主人實觶，席前北面，賓始西階上拜，此及《大射》主人始

酌膳時，賓已西階上拜者，以其燕禮、大射皆是主人代君

勸酒，其賓是臣，急承君勸，不敢安暇，故先拜也。主人又不坐奠於薦西，賓祭訖，遂南面奠於薦東，不北面奠也。

主人降，復位。賓降筵西，東南面立。賓不立

於序內，位彌尊也。位彌尊者，其禮彌卑，記所謂「一張一

弛」者，是之類與？**疏**「主人」至「面立」○注「賓不」至

「類與」○釋曰：云「賓不立于序內，位彌尊也。位彌尊者，

其禮彌卑」者，案上初賓得獻降，升之時序內立，是不敢近

賓席，是禮尊而賓卑，至此酬訖，立於席西，是賓位彌尊，

禮漸殺，故云「彌卑」也。云「記所謂「一張一弛」者，《禮

記·雜記》文。案彼孔子謂子貢黨正飲酒，「百日之蜡，一

日之澤」，以弓弩喻是「一張一弛」之法。此獻時爲盛，是

一張也；酬時爲殺，是一弛也。無正文，故云「是之類與」，

言「與」以疑之。小臣自阼階下請賡爵者，公命

長。命長，使選卿大夫之中長幼可使者。**疏**「小臣」至

「命長」○注「命長」至「使者」○釋曰：自此盡「公荅再拜」，

論使下大夫賡爵於公之事。此旅酬從公而起，故須大夫

<sup>①</sup>「義勝於賡送」，阮校云：毛本作「義騰與賡決」，《通

解》作「義勝於送」，陳本「騰」作「勝」。

之中長幼可使者。知非卿大夫最長而云「長幼可使者」，案下文「大夫長升受旅」，是長幼次第非專最長，則此「命長」非最長，是長幼之中可使者也。小臣作下大夫

二人媵爵。作，使也。卿爲上大夫，不使之者，爲其

尊。疏「小臣」至「媵爵」○注「作使」至「其尊」○釋曰：案

《王制》「上大夫卿」，是卿爲上大夫。云「不使之者，爲其

尊」者，謂若主人與賓使下大夫，不使卿之類也。媵爵

者阼階下皆北面，再拜稽首。公荅再拜。再

拜稽首，拜君命也。媵爵者立于洗南，西面，北

上，序進盥，洗角觶，升自西階，序進酌散，

交于楹北。降，阼階下皆奠觶，再拜稽首，

執觶興。公荅再拜。序，次第也，猶代也。楹北，西

楹之北也，交而相待於西階上。既酌，右還而反，往來以

右爲上。疏「媵爵」至「再拜」○釋曰：「西面，北上」者，是

未盥相待之位，序進盥則北面向洗。○注「序次」至「爲

上」○釋曰：云「楹北，西楹之北也」者，二大夫盥手洗爵

訖，先者升西階，由西楹之北向東楹之西，東面，酌酒訖，

右還，由西楹北向西階上，北面。後者升西階，亦由西楹

之北向東楹之西，酌酒訖，亦由西楹之北，西階上北面相

待，<sup>①</sup>乃次第而降。故云「交而相待於西階之上。既酌，

右還而反，往來以右爲上」。云「以右爲上」者，謂在洗南

西面及階上北面時，先者在右，地道尊右故也。媵爵者

皆坐祭，遂卒觶，興，坐奠觶，再拜稽首，執

觶興。公荅再拜。媵爵者執觶待于洗南。

待君命也。疏「媵爵」至「洗南」○注「待君命也」○釋曰：

云「執觶待于洗南」，「待君命」者，以其君尊臣卑，雖自飲

訖，故執觶待于洗南，<sup>②</sup>以待君命也。小臣請致者。

請使一人與？二人與？優君也。疏「小臣請致者」○

注「請使」至「君也」○釋曰：案下二人俱致，禮法當然，是

以不敢必君舉也，故云「一人與？二人與」，取君進止，是

優君也。若君命皆致，則序進，奠觶于筐，阼

階下皆再拜稽首。公荅再拜。媵爵者洗象

觶，升，實之。序進，坐奠于薦南，北上，降，

① 「西」上，段玉裁校本有「向」字。

② 「故」，曹校云當爲「猶」。

阼階下皆再拜稽首送觶。公荅再拜。序進，

往來由尊北，交于東楹之北。奠于薦南，不敢必君舉也。

《大射禮》曰：「賡爵者皆退，反位。」**疏**「若君」至「再拜」○

注「序進」至「反位」○釋曰：云「序進，進往來由尊北，<sup>①</sup>交

于東楹之北」者，前二人酌酒，降自西階，故交于西楹之

北，此酌酒奠于君所，故交于東楹之北。「交于東楹北」

者，以其酒尊所陳在東楹之西，西向而陳，<sup>②</sup>其尊有四，并

執冪者在南，不得南頭以之君所，又唯君面尊，尊東西面

酌酒以背君，故先酌者東面酌訖，由尊北又楹北往君

所，<sup>③</sup>奠訖，右還而反。後酌者亦於尊北，又於楹北與反

者而交，先者於南西過，後者於北東行，奠訖，亦右還而

反，相隨降自西階。云「奠于薦南，不敢必君舉也」者，案

《鄉飲酒》、《鄉射》皆云「奠者於左，<sup>④</sup>將舉者於右」，是《鄉

飲酒》一人舉觶及二人舉觶皆奠于薦右，今言賡爵於公，

是將舉旅，當奠於薦右而奠於薦左，故云「不敢必君舉

也」。引《大射禮》者，此經二人「階下再拜稽首送觶」，無

反位之文，故引《大射》賡爵者皆退，反門右北面位。公

坐取大夫所賡觶，興，以酬賓。賓降，西階

下再拜稽首。公命小臣辭。賓升，成拜。興

以酬賓，就其階而酬之也。升成拜，復再拜稽首也。先時

君辭之，於禮若未成然。**疏**「公坐」至「成拜」○注「興以」

至「成然」○釋曰：自此至「奠于筐」，論公爲賓舉旅之節。

「公坐取大夫所賡觶」者，取上「楹北」觶。云「興以酬賓，

就其階而酬之也」者，經但云「興以酬賓」，鄭知公就西階

者，以其賓降拜不於阼階下而言「西階下」，故知公在賓西

階上也。不言西階者，以公尊，空其文也。云「升成拜，復

再拜稽首也。先時君辭之，於禮若未成然」者，凡臣於君，

雖爲賓，與君相酬受爵，不敢拜於堂上，皆拜於堂下，若君

辭之，聞命即升，若堂下拜訖，君辭之，即升堂復再拜稽

首。所以然者，以堂下再拜而君辭之，若未成然，故復升

堂再拜稽首以成之。升則不云「再拜稽首」，直云「成拜」，

以堂下既有「再拜稽首」，則此文是也。若堂下未拜之間，

聞命則升，升乃再拜稽首，則不得言「升，成拜」。以其堂

下未拜，即下經云「小臣辭，賓升，再拜稽首」，鄭注「不言

①「進」，阮校云《要義》、毛本不重，曹校云下「進」字衍。

②「西」，曹校云當爲「東」。

③「又」，阮校云：陳、閩俱作「及」。

④「鄉飲酒」三字原無，據阮校補。

成拜者，爲拜故下，實未拜」是也。凡臣拜於君有三等：初受獻拜於堂下，或親辭，或遣小臣辭，成與不成如上說，至於酬酒，雖下堂拜，未即拜，待君辭，即此下經云「公坐奠觶，荅再拜，執觶興，立卒觶。賓下拜，小臣辭。賓升，再拜稽首」，注云「不言成拜者，爲拜故下，實未拜也。下不輒拜，禮殺也」；此篇末無筭爵，受公賜爵者，皆下席堂上拜稽首，不堂下拜者，禮末又輕於酬時。公坐奠觶，

荅再拜，執觶興，立卒觶。賓下拜，小臣辭。

賓升，再拜稽首。不言成拜者，爲拜故下，實未拜也。

下不輒拜，禮殺也。此賓拜于君之左，不言之者，不敢敵偶于君。**疏**「公坐」至「稽首」○注「不言」至「於君」○釋

曰：云「此賓拜于君之左，不言之者，不敢敵偶于君」者，上云公酬賓于西階上，則此賓升再拜者，拜于君之左可知。經不言拜于君之左者，若言再拜于君之左，則臣與君敵偶，故鄭云「不言之者，不敢敵耦于君」，闕其文也。公坐

奠觶，荅再拜，執觶興。賓進，受虛爵。降，

奠于筐，易觶洗。君尊，不酌故也。凡爵不相襲者

也，於尊者言更，自敵以下言易，更作新，易有故之辭。進

受虛爵，尊君也。不言公酬賓於西階上及公反位者，亦尊君，空其文也。**疏**「公坐」至「觶洗」○注「君尊」至「文也」

○釋曰：云「君尊，不酌故也」者，以其君酬賓，當親酌以授賓，今賓爵自酌者，君尊，不酌與臣故也。云「凡爵不相襲者也，於尊者言更，自敵以下言易」者，「於尊者言更」，謂受尊者之爵及與尊者爵皆言更。上文主人獻公訖，「受爵以降，奠于膳筐，更爵，洗」，酌膳以自酢，是受尊者之爵言更也。下文云賓酬卿「若膳觶也，則降更觶」，鄭注云「言更觶，卿尊也」，是與尊者之爵言更。云「自敵以下言易者」，謂與卑者之爵及受卑者之爵皆云易。此文公酬賓云「賓進，受虛爵。降，奠于筐，易觶洗」，言易者，賓尊，<sup>①</sup>以公舉觶酬賓，是與卑者，故言易也。上文大夫二人媵爵于公者，卒觶，「執觶待于洗南。小臣請致者。若君命皆致，則序進，奠觶于筐，阼階下再拜稽首。媵爵者洗象觶，升，實之。序進，坐奠于薦南」，是受卑者之爵合言易，而不言者，理自明。若不言易者，「莫散觶」、「洗象觶」隔「再拜稽首」，故不復言易也。若然，主人受公酢，賓受公酬，二者

①「尊」，曹校云當爲「卑」。

之爵皆從尊者來。所以受酢爲受尊者之爵言更，受酬爲與卑者之爵言易者，以其主人受酢由己獻公，公報己，己所當得，是以爲受尊者之爵言更也；賓受公酬，以公舉媿觶就西階上以酬賓，特爲賓舉旅，故以爲尊者與卑者之爵言易。案下士舉旅，「公坐取賓所媿觶，唯公所賜。受者如初受酬之禮，降，更爵，洗，升，酌膳」，彼亦是尊者與卑者之爵，不言易而言更者，旅酬下爲上，尊前人，故不言易而言更也。云「更作新」者，欲見此爵前人已用，今不復用，更新用一爵，故云「更作新」也。云「易有故之辭」者，言此爵我先嘗用，今由前人後用，已不用，亦以爲爵，<sup>①</sup>故云「易有故之辭」也。案《特牲》賓長致爵于主人，主婦言「更爵酢」者，欲得嘉賓美客以事其先，故言更。《少牢》不饋尸，云致爵于主人，主婦，賓「易爵」酢者，大夫禮尊于賓，有君道，故言易。若然，又案《少牢》不饋尸，主婦致爵于主人，主婦更爵酢，注云「更猶易也」。若然，更與易似不別者，但更、易不殊，以尊卑不同，設文有異。云「不言公酬賓於西階及公反位者，亦尊君，空其文也」者，以其公就西階，是降尊就卑，敬公，不言降尊，故空文不言。公

有命，則不易不洗。反，升，酌膳觶，下拜。

小臣辭。賓升，再拜稽首。下拜，下亦未拜。凡下未拜有二：或禮殺，或君親辭。君親辭則聞命即升，升乃拜，是亦不言成拜。<sup>②</sup>

**疏**「公有」至「稽首」○注「下拜」

至「成拜」○釋曰：云「凡下未拜有二：或禮殺，或君親辭」，云「禮殺」者，謂若酬時下爲拜，實未拜，辭之即升，再拜稽首是也；云「或君親辭」者，謂若《公食大夫》云公拜至，賓降，「西階東北面荅拜」，「公降一等辭」，「賓不拜」，<sup>③</sup>直言「階上北面再拜稽首」，是階下未拜，不得言「升成拜」，直言「再拜稽首」而已。公荅再拜。拜於阼

階上也。於是賓請旅侍臣。

**疏**注「拜於」至「侍臣」○釋

曰：云「於是賓請旅侍臣」者，案下記云「凡公所酬，既拜，請旅侍臣」，鄭注云「既拜，謂自酌升拜時也。賓者阼階下告於公，還西階下告公許旅行也，請行酒於群臣。必請者，不專君惠也」，《大射》於此時賓請旅於諸臣，<sup>④</sup>此不言

①「亦以爲爵」，曹校云殿本作「易以他爵」是也。

②「亦」，阮校云：毛本作「以」。

③「賓」下，阮校云：《通解》、《要義》、毛本有「升」字。按《公食大夫禮》有「升」字。

④「諸」，阮校云：《要義》作「群」。

者，文不具，故記人辨之。賓以旅酬於西階上。旅，序也，以次序勸卿大夫飲酒。

**疏**「賓以」至「階上」○

注「旅序」至「飲酒」○釋曰：此經論旅酬先尊後卑之法，仍未行旅，下經「射人作大夫長」乃始旅酬。射人作大夫

長升受旅。言作大夫，則卿存矣。長者，尊先而卑後。

**疏**「射人」至「受旅」○注「言作」至「卑後」○釋曰：遣人作

大夫者，<sup>①</sup>燕或射，故使之。云「言作大夫，則卿存矣」者，

以其卿稱上大夫，言「大夫長」，故知卿亦存在作中矣。云

「長者，尊先而卑後」者，賓則旅三卿，三卿偏，次第至五大夫，大夫偏，<sup>②</sup>不及士。賓大夫之右坐奠觶，拜，

執觶興。大夫荅拜。賓在右者，相飲之位。

**疏**「賓

大」至「荅拜」○注「賓在」至「之位」○釋曰：言「賓在右

者」，賓在西階上酬卿，賓與卿並北面，賓在東，卿在西，是賓在大夫之右。賓位合在西，今在東，故云「賓在右者，相

飲之位」也。賓坐祭，立飲，卒觶，不拜。酬而禮

殺。

**疏**「賓坐」至「不拜」○注「酬而禮殺」○釋曰：此對酢

之時，<sup>③</sup>坐卒爵，拜既爵，是禮盛也。今旅酬，立卒觶，不

拜既爵，故云「禮殺」也。若膳觶也，則降更觶，

洗，升，實散。大夫拜受。賓拜送。言更觶，卿

尊也。

**疏**「若膳」至「拜送」○注「言更觶卿尊也」○釋曰：

案上文體例，與卑者之爵稱易，與尊者之爵稱更，雖立為賓，仍是大夫為之，是賓卑於卿，故言「更觶者，卿尊也」。

大夫辯受酬，如受賓酬之禮，不祭。卒受者

以虛觶降，奠于筐。卒猶後也。《大射禮》曰：「奠

于筐，復位。」今文「辯」皆作「偏」。

**疏**「大夫」至「于筐」○

注「卒猶」至「作偏」○釋曰：言「不祭」者，亦是酬禮殺也。

引《大射禮》者，此經云「降，奠于筐」，不言反位，故引《大射》奠爵於筐訖，當復門右北面位。主人洗，升，實

散，獻卿于西階上。酬而後獻卿，別尊卑也。飲酒

成於酬也。

**疏**「主人」至「階上」○釋曰：自此盡「無加

席」，論主人獻孤卿之節。○注「酬而」至「酬也」○釋曰：

此酬非謂尋常獻酬，乃是君為賓舉旅行酬。以其主人獻

<sup>①</sup>「遣」下，阮校云：《要義》、毛本有「射」字。

<sup>②</sup>「大夫」，阮校云：《要義》不重。

<sup>③</sup>「酢」上，曹校云脫「獻」字。

君，君酢主人，主人不敢酬君，故使二大夫媵爵于公，<sup>①</sup>以當酬處，所以覆獻也。但君恩既大，爲賓舉旅，飲酒之禮成於酬，故酬辨乃獻卿。以君尊卿卑，是以君禮成，卿乃得獻，故云「別尊卑也」。

儀禮疏卷第十四

江寧府知府陽城張敦仁編校 元和縣

學生員顧廣圻覆校

① 「二大夫」，阮校云：陳、閩俱作「二人」。



## 儀禮疏卷第十五

唐朝散大夫行大學博士弘

文館學士臣賈公彥等撰

司宮兼卷重席，設于賓左，東上。言兼卷，則每卿異席也。重席，重蒲筵，緇布純也。卿坐東上，統於君也。席自房來。

**疏**「司宮」至「東上」○注「言兼」至「房

來」○釋曰：此經設三卿之席在於賓東。「言兼卷，則每卿異席也」者，若三卿同席，則直云卷重席，不須言「兼」，今云「兼卷」，則兼三卿重席皆卷之，故知每卿皆異席也。云「重席，重蒲筵」者，案《公食大夫·記》云「司宮具几與蒲筵常，緇布純。加萑席尋，玄帛純」，彼為異國之賓，有蒲筵、萑席兩種席，故稱「加」。上小臣設公席與《公食大夫》席及賓皆稱「加」，亦是兩種席，兩種而稱「加」。此燕已臣子，一種席重設之，故不稱「加」。若然，案《鄉飲酒》云「席于賓東，公三重，大夫再重。公升如賓禮，大夫則如介禮。」

有諸公，則辭加席，《鄉射》亦云「大夫辭加席」。案彼二文雖稱「加」，上文云「三重」、「再重」，則無異席，故彼記直云「蒲筵」。彼云「加」者，以上席加於下席，故鄭彼云「加席，上席也」，故此下注云「重席雖非加，猶為其重累去之」，是其一種席也。云「卿坐東上，統於君也」者，決《鄉飲酒》、《鄉射》諸公大夫「席于尊東，西上」，彼遵尊於主人，<sup>①</sup>故鄭注云「統於尊」，此為君尊，故統於君而東上也。云「席自房來」者，案《公食·記》云「宰夫筵，出自東房」，故知也。卿升，拜受觚。主人拜送觚。卿辭重席，司宮徹之。徹猶去也。重席雖非加，猶為其重累去之，辟君也。

**疏**「卿升」至「徹之」○注「徹猶」至「君

也」○釋曰：云「重席雖非加，猶為其重累去之，辟君也」者，案《鄉射》云「大夫辭加席」之等，皆是異席而辭之，此重席重蒲筵不合辭，以君有加席兩重，故辭之以辟君。乃薦脯醢。卿升席，坐，左執爵，右祭脯醢，遂祭酒，不啐酒。降席，西階上北面坐卒爵，興，坐奠爵，拜，執爵興。主人荅拜，受

①「遵」，阮校云：毛本作「尊」。

爵。卿降，復位。不酢，辟君也。卿無俎者，燕主於

羞。**疏**「乃薦」至「復位」○釋曰：此云卿薦脯醢，<sup>①</sup>不言

其人，略之。故下記辨之云「羞卿者，小膳宰」是也。○注

「不酢」至「於羞」○釋曰：案上主人獻公，主人酢于阼階

下，此即不酢，故決之。云「卿無俎者，燕主於羞」者，決

《大射》庶子設俎，辨尊卑，故與此異。辯獻卿，主人

以虛爵降，奠于筐。今文無「奠于筐」。射人乃

升卿，卿皆升就席。若有諸公，則先卿獻

之，如獻卿之禮。諸公者，謂大國之孤也。孤一人，

言諸者，容牧有三監。**疏**「射人」至「之禮」○注「諸公」至

「三監」○釋曰：云「諸公者，謂大國之孤也」，知者，《周

禮·典命》云「公之孤四命」，侯伯已下不言孤，故據大國

而言。云「孤一人」者，鄭司農注《典命》云「上公得置孤，

卿一人」，後鄭從之，故此亦云「孤一人」，與司農義同。云

「言諸者，容牧有三監」者，以其言「諸」，非一人，案《王制》

云「天子使其大夫為三監，監於方伯之國，國三人」，彼是

殷法同之。周制使伯佐牧，不置監。周公制禮因殷不改

者，若《士冠》「醺用酒」之類，故鄭云「容」，言容有異代之

法，據《周禮》天子大夫四命與孤等，故同稱「公」。席于

阼階西，北面，東上。無加席。席孤北面，為其

大尊，屈之也。亦因阼階西位近君，近君則屈。親寵苟敬

私昵之坐。**疏**「席于」至「加席」○注「席孤」至「之坐」○

釋曰：案上文卿初設重席，辭之乃徹，此孤北面初無加席

者，<sup>②</sup>皆是為大尊，屈之也。云「親寵苟敬私昵之坐」者，<sup>③</sup>

案下記云「賓為苟敬，席于阼階之西」以為敬，此孤亦席於

阼階之西，故為「苟敬私昵之坐」也。小臣又請媵爵

者，二大夫媵爵如初。又，復。**疏**「小臣」至「如

初」○釋曰：自此至「送觶，公荅再拜」，論一人致爵于公之

事。云「二大夫媵爵如初」者，亦上「二人媵爵。媵爵者阼

階下，皆北面再拜稽首。公荅再拜。媵爵者立于洗南，西

面北上，序進盥，洗角觶，升自西階，序進酌散，交于楹北。

降，阼階下皆奠觶，再拜稽首，執觶興。公荅再拜。媵爵

①「云」，曹校云當作「為」。

②「初」，阮校云：《要義》無。

③「云」下，阮校云：《要義》有「亦為阼階西位近君則

屈」十一字。

者皆坐祭，遂卒觶，興，坐奠觶，再拜稽首，執觶興。公荅再拜。媵爵者執觶待于洗南，相似也，故言「二大夫媵爵如初」也。請致者。若命長致，則媵爵者奠觶于筐，一人待于洗南。長致，致者阼階下再拜稽首。公荅再拜。命長致者，公或時未能舉，自優暇也。古文云「阼階下北面再拜」。

**疏**「請致」至「再

拜」○注「命長」至「暇也」○釋曰：上文小臣請媵爵，則此請致者亦小臣也。云「命長致者，公或時未能舉，自優暇也」者，脫屢升坐以前，公爲賓、爲卿、爲大夫三舉旅也。《燕禮》之正不得損益，而云「公或時未能舉，自優暇」者，正謂周公作經以優之，非實也，故云「若命長致」，言「若」者，不定之辭，優君之義，故唯命長致。不然，似言皆致，<sup>①</sup>以其三舉旅，唯有此三觶故也。洗象觶，升，實

之，坐奠于薦南。降，與立于洗南者二人皆再拜稽首送觶。公荅再拜。奠于薦南者，於公所用酬賓觶之處。二人俱拜，以其共勸君。

**疏**「洗象」至

「再拜」○注「奠于」至「勸君」○釋曰：云「奠于薦南者，於公所用酬賓觶之處」者，案前大夫二人媵觶，奠于公薦南，

北上，其上觶已取爲賓舉旅，下觶仍在，今大夫又媵一觶而云「奠于薦南」，明知是「所用酬賓觶之處」。云「二人俱拜，以其共勸君」者，上云「媵爵者，二大夫媵爵如初」，是共勸君酒，今始「命長致」，故俱拜，以其共勸君故也。公又行一爵，若賓若長，唯公所酬。一爵，先媵者之下觶也。若賓若長，則賓禮殺矣。長，公卿之尊者也。賓則以酬長，長則以酬賓。

**疏**「公又」至「所酬」○釋曰：

自此至「奠于筐」，論爲卿舉旅之事。○注「一爵」至「酬賓」○釋曰：知一爵是「先媵者之下觶」者，以其前大夫二人媵爵皆奠于薦南，以其上觶者已爲賓舉旅，今又行一爵，故知先媵者之下觶也。其後媵一觶者，留之後爲大夫舉旅也。云「若賓若長，則賓禮殺矣」者，前爲賓舉旅，不云「若賓若長」，專爲賓禮盛，至此爲卿舉旅，不專爲賓舉旅，科從其一，是賓禮殺也。云「長，公卿之尊者也」者，有諸公，公爲尊，若無諸公，三卿爲尊，長中可以兼此二者。云「賓則以酬長，長則以酬賓」者，釋經「若賓若長」，言若不定，或先或後，故兩言之。以旅于西階上，如初。

①「似」下，曹校云殿本增「當」字。

大夫卒受者以虛觶降，奠于筐。**疏**「以旅」至

「于筐」○釋曰：言「如初」者，一如上為賓舉旅之節。主

人洗，升，獻大夫于西階上。大夫升，拜受

觶。主人拜送觶。大夫坐祭，立卒爵，不拜

既爵。主人受爵。大夫降，復位。既，盡也。

不拜之者，禮又殺。**疏**「主人」至「復位」○釋曰：自此盡

「皆升，就席」，論獻大夫之節。○注「既盡」至「又殺」○釋

曰：云「不拜之者，禮又殺」者，前卿受獻不酢辟君，已是禮

殺，今大夫受獻，不但不酢主人，又不拜既爵，故云「禮又

殺」。胥薦主人于洗北，西面，脯醢，無胥。

胥，膳宰之吏也。主人，大夫之下，先大夫薦之，尊之也。

不於上者，上無其位也。胥，俎實。**疏**「胥薦」至「無胥」

○注「胥膳」至「俎實」○釋曰：云「胥，膳宰之吏也」者，案

《周禮》有府、史、胥、徒，鄭注《天官》「胥讀如謂」。謂其有

才知為什長，是庶人在官者，所差薦者皆膳宰，胥是膳宰

之吏。云「主人，大夫之下，先大夫薦之，尊之也」者，案

《大射》注直云「主人，大夫」，不云「下」，此云「大夫之下」

者，謂大夫之中位次在下。下經云「辯獻大夫」乃薦，此薦

文在上，是先大夫薦之，尊之也。云「不於上者，上無其位

也」者，案此燕禮大夫堂上，士在下，獨此宰夫言堂上無位

者，以其主人位在阼階，君已在阼，故主人辟之，位在下，

是以《大射》注云「不薦於上，辟正主也」。云「胥，俎實」

者，胥者，升也，謂升特牲體於俎，<sup>①</sup>故云「俎實」也。辯

獻大夫，遂薦之，繼賓以西，東上。偏獻之乃

薦，略賤也。亦獻而後布席也。**疏**「辯獻」至「東上」○注

「偏獻」至「席也」○釋曰：凡大夫升堂受獻，得獻訖即降，

獻偏，不待大夫升，遂薦於其位，大夫始升，故言「遂」也。

云「偏獻之乃薦，略賤也」者，決上卿與賓得獻即薦，貴故

也。云「亦獻而後布席也」者，亦上獻卿之時，司宮兼卷重

席，設於賓左，此大夫不言設席，明亦得獻後即布席也。

若然，案《大射》「席小卿賓西，東上」，注云「席於賓西，射

禮辨貴賤也」。以此言之，燕禮主獻，不辨貴賤，小卿與大

卿皆在賓東，故此賓西無小卿位。卒，射人乃升大

夫，大夫皆升就席。席工于西階上，少東。

樂正先升，北面立于其西。工，瞽矇，歌諷誦《詩》

①「特」，曹校云此字衍。

者也。凡執技藝者稱工。《少牢饋食禮》曰：「皇尸命工祝。」《樂記》師乙曰：「乙賤工也。」樂正，于天子樂師也，凡樂掌其序事，樂成則告備。

**疏**「席工」至「其西」○釋曰：

自此至「降，復位」，論作樂之事。此上下作樂之中有四節：升歌一、笙二、間三、合樂四。○注「工瞽」至「告備」○釋曰：「工，瞽矇，歌諷誦《詩》者也」者，案《周禮·瞽矇》「掌播鼗，諷誦《詩》」，鄭云「諷誦《詩》，謂闇讀之，不依詠也」。彼不依琴瑟闇讀之，即《爾雅》「徒歌曰謠」。此作樂之時依於瑟，即《詩》注云「曲合樂曰歌」一也，故下云「工歌《鹿鳴》」之類是也。云「凡執技藝者稱工」者，「執技藝」文出於《王制》，但能其事者皆稱工，是以引《少牢饋食》祝稱工，《樂記》師乙為大師樂官亦稱工，至於《冬官》巧作者皆稱工。云「樂正，於天子樂師也」，知樂正與樂師相當者，案《周禮·樂師》職云「凡樂成則告備」，此樂正告樂備，故知樂正當天子樂師。樂師下大夫四人，上士八人，下士十有六人，樂師大小多矣。此諸侯樂正，亦有大小之名也。故《大射》云「小樂正從之」，鄭注云「小樂正，於天子樂師也」，是其諸侯樂正，雖有大小，當天子樂師。知大樂正不當天子大司樂者，以其天子大司樂不告樂備，故不得以大樂正當之。但大射主於射，略於樂，故小樂正告樂

備，此燕主歡心，故大樂正告樂備，故不同。小臣納

工。工四人，二瑟。小臣左何瑟，面鼓，執越，內弦，右手相。人，升自西階，北面東上坐。小臣坐授瑟，乃降。工四人者，燕禮輕，從大夫制也。面鼓者，燕尚樂，可鼓者在前也。越，瑟下孔也。

內弦，弦為主也。相，扶工也。後二人徒相。天子大僕二人也，小臣四人，祭僕六人，御僕十二人，皆同官。

**疏**「小

臣」至「乃降」○注「工四」至「同官」○釋曰：「工四人者，燕禮輕，從大夫制也」者，鄭言此者，決《大射》禮重，工六人，從諸侯制。案《公羊傳》：「諸公六，諸侯四。」若然，知非大射是諸公制，此燕禮是諸侯制者，案鄉射皆工四人，是大夫制，則諸侯不得有工四人，五等諸侯同六人。彼《公羊》六人四人不同者，自是舞人之數，不得以彼決此也。云「面鼓者，燕尚樂，可鼓者在前也」者，此決《鄉飲酒》「左何瑟，後首」，臣降於君故也。引「天子大僕二人也」者，《周禮·序官》文。引之者，此經小臣相工，《大射》云「僕人正徒相大師，僕人師相少師，僕人士相上工」，僕人以下同官既多，遞換相工。但大射辨尊卑，故僕人正等相工；此燕禮輕，故小臣相工，是以別《周禮》同

官人多，<sup>①</sup>得相參之意。<sup>②</sup>工歌《鹿鳴》、《四牡》、《皇皇者華》。三者皆《小雅》篇也。《鹿鳴》，君與臣下及四方之賓宴，講道脩政之樂歌也。此采其已有旨酒，以召嘉賓，嘉賓既來，示我以善道，又樂嘉賓有孔昭之明德，可則倣也。《四牡》，君勞使臣之來樂歌也。此采其勤苦王事，念將父母，懷歸傷悲，忠孝之至以勞賓也。《皇皇者華》，君遣使臣之樂歌也。此采其更是勞苦，<sup>③</sup>自以為不及，欲諮謀於賢知而以自光明也。

**疏**「工歌」至「者華」○

注「三者」至「明也」○釋曰：此經歌《詩》之類，鄭於《鄉飲酒》已注，此注與彼同。但此燕禮歌《小雅》，亦合鄉樂，下就卑也。鄉飲酒升歌《鹿鳴》之等，饗或上取，故彼此詩同，注亦不異也。卒歌。主人洗，升，獻工。工不興，左瑟，一人拜受爵。主人西階上拜送爵。工歌乃獻之，賤者先就事也。左瑟，使其右。一人，工之長者也。工拜於席。

**疏**「卒歌」至「送爵」○注「工

歌」至「於席」○釋曰：云「工歌乃獻之，賤者先就事也」者，歌《詩》是其事，先施功勞，乃始獻之，是賤者先就事，對工以上不就事而得獻也，故《大射》注云「工歌而獻之，以事

報之」是也。云「左瑟，使其右」者，工北面，以西為左，空其右，受獻便者，酒從東楹之西來，故以右為便。案《大射》云「獻工，工左瑟」，鄭注云「大師無瑟，於是言左瑟者，節也」。以其經云「僕人正徒相」，大師無瑟，言大師左瑟者，為飲酒之節。此與鄉飲酒同，無所分別，大師或瑟或歌，是以不得言節之。<sup>④</sup>案《鄉飲酒》「大師則為之洗」，則衆工不洗也。此經主人「洗，升，獻工」，不辨大師與衆工，則皆為之洗爵。又案《鄉飲酒·記》「不洗者，不祭」，此篇與《大射》群工與衆笙皆言「祭」，故知皆為之洗。云「工拜於席」者，以經云「工與左瑟」，<sup>⑤</sup>即云「一人拜受爵」，不見有降席之文，明工拜於席可知。薦脯醢。輒薦之，變於大夫也。

**疏**「薦脯醢」○注「輒薦」至「夫也」○釋曰：案上

<sup>①</sup>「別同禮同官人多」，曹校云「別」當為「引」，「同」上似脫「明」字。

<sup>②</sup>「意」，阮校云：《要義》作「禮」。

<sup>③</sup>「是」，阮校云：徐本作「自」。

<sup>④</sup>「之」，曹校云當為「也」。

<sup>⑤</sup>「與」，據重刊單疏本當作「興」，曹校云「興」上脫「不」字。

獻大夫之時，云「辨獻大夫，遂薦之」，鄭注云「徧獻之乃薦，略賤也」，此獻工之長一人，即薦脯醢，非謂貴工即獻之，正是禮尚異，變於大夫也。使人相祭。使扶工者

相其祭薦、祭酒。

**疏**「使人相祭」○注「使扶」至「祭酒」○

釋曰：上云小臣相工，則此扶工相祭是小臣也。此據相長

一人，文承「受爵」、「薦脯醢」之下，故知祭薦脯醢及祭酒二事，對下衆工祭酒不祭脯醢也。卒爵不拜。賤不備

禮。主人受爵。將復獻衆工也。衆工不拜受

爵，坐祭，遂卒爵，辯有脯醢，不祭。主人受

爵，降，奠于筐。遂猶因也。古文曰「卒爵不拜」。

公又舉奠觶，唯公所賜，以旅于西階上，如

初。言賜者，君又彌尊，賓長彌卑。**疏**「公又」至「如初」

○注「言賜」至「彌卑」○釋曰：此燕尚飲酒，故工歌之後，

笙奏之前，而爲大夫舉旅。大射雖行燕禮，主於射，故笙

之間至射乃爲大夫舉旅。①云「言賜者，君又彌尊，賓長

彌卑」者，案上爲賓舉旅，直云「公興，以酬賓」，爲卿舉旅

而云「若賓若長」，言若不定，科酬其一，不專爲賓。是君

禮漸尊，賓禮漸殺，雖然，猶言酬，至此言「唯公所賜」者，

以上下言之，是「君又彌尊，賓長彌卑」也。卒。旅畢也。

**疏**「卒」○注「旅畢也」○釋曰：言「旅畢」者，謂爲大夫舉

旅酬，行於西階之上，或從賓，或從卿，次第盡大夫，故云

「旅畢也」。笙入，立于縣中，奏《南陔》、《白

華》、《華黍》。以笙播此三篇之詩。縣中，縣中央也。

《鄉飲酒禮》曰：「磬南，北面。」奏《南陔》、《白華》、《華黍》，

皆《小雅》篇也，今亡，其義未聞。昔周之興也，周公制禮

作樂，采時世之詩，以爲樂歌，所以通情相風切也，其有此

篇明矣。後世衰微，幽、厲尤甚，禮樂之書稍稍廢棄。孔

子曰：「吾自衛反魯，然後樂正，《雅》、《頌》各得其所。」謂

當時在者而復重雜亂者也，惡能存其亡者乎？且正考父

校商之名《頌》十二篇于周大師，歸以祀其先王，至孔子二

百年之間，五篇而已，此其信也。**疏**「笙入」至「華黍」○

注「以笙」至「信也」○釋曰：此笙奏《南陔》、《白華》、《華

黍》三篇等，經注與《鄉射》同，亦不復重釋。但此云「笙

入，立于縣中」，以其諸侯軒縣，闕南面而已，故得言「縣

①「故笙之間至射」，曹校云：「笙之間」三字涉上而衍，

「射」下脫「畢」字。

中」，《鄉飲酒》唯有一磬縣而已，不得言「縣中」而云「磬南」。注引《鄉飲酒》者，欲見此雖軒縣，近北面縣之南也。主人洗，升，獻筮于西階上。一人拜，盡階不升堂，受爵，降。主人拜送爵。階前坐祭，立卒爵，不拜既爵，升，授主人。一人，筮之長者也。《鄉射禮》曰：「筮一人拜于下。」**疏**「主人」至「主人」○注「一人」至「于下」○釋曰：引《鄉射禮》者，證筮一人拜。此與《鄉飲酒》皆直云「一人拜」，不言拜于下，故《鄉飲酒》與此注皆引《鄉射》以爲證，欲見拜者拜於階下。衆筮不拜受爵，降，坐祭，立卒爵，辯有脯醢，不祭。**疏**「衆筮」至「不祭」○釋曰：言「不拜受爵，降」者，於階下受爵者，亦盡階不升堂。云「辯有脯醢」者，亦獻訖薦于位之前。乃閒：歌《魚麗》，筮《由庚》；歌《南有嘉魚》，筮《崇丘》；歌《南山有臺》，筮《由儀》。閒，代也，謂一歌則一吹也。六者皆《小雅》篇也。《魚麗》言「大平年豐物多」也，此采其物多酒旨，所以優賓也。《南有嘉魚》言「大平君子有酒，樂與賢者共之」也，此采其能以禮下賢者，賢者纍蔓而歸之，與

之宴樂也。《南山有臺》言「大平之治以賢者爲本」也，此采其愛友賢者，爲邦家之基，民之父母，既欲其身之壽考，又欲其名德之長也。《由庚》、《崇丘》、《由儀》今亡，其義未聞。**疏**「乃閒」至「由儀」○注「閒代」至「未聞」○釋曰：此經注一與《鄉飲酒》同，彼已釋訖，不復重解。遂歌鄉樂，《周南》：《關雎》、《葛覃》、《卷耳》；《召南》：《鵲巢》、《采芣》、《采蘋》。《周南》、《召南》、《國風》篇也，王后、國君夫人房中之樂歌也。《關雎》言「后妃之德」，《葛覃》言「后妃之職」，《卷耳》言「后妃之志」，《鵲巢》言「國君夫人之德」，《采芣》言「國君夫人不失職」也，《采蘋》言「卿大夫之妻能脩其法度」也。昔大王、王季居于岐山之陽，躬行《召南》之教以興王業，及文王而行《周南》之教以受命，《大雅》云「刑于寡妻，至于兄弟，以御于家邦」，謂此也。其始一國爾，文王作邑于豐，以故地爲卿士之采地，乃分爲二國：周，周公所食也；召，召公所食也。於時文王三分天下有其二，德化被於南土，是以其詩有仁賢之風者屬之《召南》焉，有聖人之風者屬之《周南》焉。夫婦之道者，生民之本，王政之端。此六篇者，其教之原也，故國君與其臣下及四方之賓燕，用之合樂也。



鄉樂者，《風》也。《小雅》爲諸侯之樂，《大雅》、《頌》爲天子之樂。鄉飲酒升歌《小雅》，禮盛者可以進取；燕合鄉樂者，禮輕者可以逮下也。《春秋傳》曰：「《肆夏》、《繁遏》、《渠》，天子所以享元侯也；《文王》、《大明》、《緜》，兩君相見之樂也。」然則諸侯之相與燕，升歌《大雅》，合《小雅》也。天子與次國、小國之君燕亦如之，與大國之君燕，升歌《頌》，合《大雅》。其笙閒之篇未聞。

**疏**

「遂歌」至「采

蘋」○注「周南」至「未聞」○釋曰：云「遂歌鄉樂」者，《鄉飲酒》云「乃合樂」，與此文不同者，以其二《南》是大夫、士樂，大夫、士或作鄉大夫，或作州長，故名鄉大夫樂。飲酒不言鄉樂者以其是己之樂，<sup>①</sup>不須言鄉，故直言合樂。此燕禮是諸侯禮，下歌大夫、士樂，故以「鄉樂」言之。又《鄉飲酒》注云「合樂，謂歌與衆聲俱作」，彼經有「合樂」之字故也。此經無「合樂」之字，故闕而不言，其實此歌鄉樂，亦與衆聲俱作，是以彼處解「合」爲「歌與衆聲俱作」耳，此歌而解合，明同也。自《周南》以下，所注亦與《鄉飲酒》同，亦不復重釋。

大師告于樂正曰：「正歌備。」

大師，上工也，掌合陰陽之聲，教六詩，以六律爲之音者也。子貢問師乙曰：「吾聞聲歌各有宜也，如賜者宜何歌

也？」是明其掌而知之也。正歌者，升歌及笙各三終，閒歌三終，合樂三終爲一備，備亦成也。

**疏**

「大師」至「歌

備」○注「大師」至「成也」○釋曰：云「大師，上工也」者，案《春官》「大師下大夫二人，小師上士四人」，又云「上瞽四十人，中瞽百人，下瞽百有六十人」，注云「凡樂之歌，必使瞽矇爲焉。命其賢知者以爲大師」，對小師已下二百人爲上士也。<sup>②</sup>云「掌合陰陽之聲，教六詩，以六律爲之音者也」者，並《大師職》文。案彼云「掌六律六同，以合陰陽之聲」，注云「陽聲：黃鍾、大簇、姑洗、蕤賓、夷則、無射，陰聲：大呂、應鍾、南呂、林鍾、中呂、夾鍾」。又云：「皆文之以五聲：宮、商、角、徵、羽。皆播之以八音：金、石、土、革、絲、木、匏、竹。」又云：「教六詩：曰風、曰賦、曰比、曰興、曰雅、曰頌。以六德爲之本，以六律爲之音。」云「子貢問師乙」以下至「何歌也」，並《樂記》文。師乙，魯之大師，以掌樂事，故子貢問焉。引之者，證大師知樂節，故告歌備，故鄭云「是明其掌而知之也」。知升歌以下四節皆三

① 「飲」上，阮校云：毛本有「鄉」字。

② 「二百人爲上士也」，周學健依《春官·大師小師職》文改「二百」爲「三百」，改「上士」爲「上工」。

終者，案《禮記·鄉飲酒義》云「工入升歌三終，主人獻之。笙入三終，主人獻之。閒歌三終，合樂三終，工告樂備」，故知皆三終。彼與此經閒歌、合樂不獻之者，但閒歌、合樂還是始升歌，笙奏之前已得獻，故不復重獻。云「備亦成也」者，案《周禮·樂師職》云「凡樂成則告備」，故云「亦成也」。樂正由楹內東楹之東告于公，乃降，復位。言由楹內者，以其立於堂廉也。復位，位在東縣之北。

**疏**

樂正「至」復位「○注」言由「至」之北「○釋曰」：

言「由楹內」者，以其樂正與工俱在堂廉，則楹南無過處，故由楹內適東楹之東告于公。云「復位，位在東縣之北」者，案《大射》略於樂，小樂正升堂，經有左右正，則知亦有大樂正。至席工於西階上少東東面時，<sup>①</sup>小樂正亦降，立於其南北面。卒管，工向「東」之東南，西面北上，坐時，鄭注云「於是時，大樂正還北面，立於其南」。臣位尊東，明工升堂時，小樂正升，大樂正東方西面。工來「東」之東南，西面時，大樂正東縣之北，北面，其小樂正則立於西階下，東面。此燕禮主於樂，故大樂正升堂，今降，明復於東縣之北，北面也。射人自阼階下請立司正，公許，射人遂為司正。君許其請，因命用為司正。

君三舉爵，樂備作矣。將留賓飲酒，更立司正以監之，察儀法也。射人俱相禮，其事同。

**疏**

「射人」至「司正」○注

「君許」至「事同」○釋曰：自此盡「皆反坐」，論立司正，遂行所監之事。云「君三舉爵」者，為賓、為卿、為大夫舉旅。

云「樂備作矣」者，歌、笙、閒、合四者備作，各三終矣。案《鄉飲酒》、《鄉射》立司正後始行旅酬者，彼是士饗禮，饗禮之法，莫問尊卑，偏獻之後乃行旅酬，故立司正之後乃行旅酬。此燕禮，國君燕其臣子，雖一獻，以辨尊卑，故主人獻君而受酬，<sup>②</sup>主人卑不敢酬公。獻之禮成於酬，故使大夫媵觶於公。當酬公，君行大惠，即舉之為賓，賓得觶，請旅諸臣，偏卿大夫，乃成一獻之禮。復獻卿大夫，皆為之舉旅行酬，皆成其獻。但卿大夫皆堂上有位，近君不敢失禮，故雖舉旅行酬，而未立司正。作樂後將獻群士，士職卑，位在堂下，將為士舉旅，恐失禮，故未獻之前即立司正監之，故不同也。司正洗角觶，南面，坐奠于

①「至席工於西階上少東東面時」，曹校云當為「至大師等降立於鼓北東面時」。

②「酬」，曹校云殿本作「酢」。

中庭。升，東楹之東受命，西階上北面命卿大夫：「君曰：以我安。」卿大夫皆對曰：

「諾，敢不安。」洗，奠角觶于中庭，明其事以自表威儀多也。君意殷勤，欲留賓飲酒，命卿大夫以我故安，或亦其實不主意於賓。

**疏**「司正」至「不安」○注「洗奠」至「於

賓」○釋曰：云「洗、奠角觶于中庭，明其事以自表威儀多也」者，此奠觶于中庭，威儀多，決《鄉飲酒》不奠，是以《鄉飲酒》「作相爲司正，洗觶，執以升自西階」，是不奠威儀少也。云「君意殷勤，欲留賓飲酒，命卿大夫以我故安」者，以主人安，客乃安，故欲安賓，先語卿大夫以我意故須安也。云「或亦其實不主意於賓」者，鄭意兩解，前解主意爲賓，故使卿大夫爲賓安；或亦其實不專主爲賓，兼群臣共安也。司正降自西階，南面，坐取觶，升，酌散，降，南面，坐奠觶，右還，北面少立，坐取觶，興，坐，不祭，卒觶，奠之，興，再拜稽首。右還，將適觶南，先西面也。必從觶西，爲君之在東也。少立者，自嚴正慎其位。

**疏**「司正」至「稽首」○注「右還」

至「其位」○釋曰：「右還，將適觶南，先西面也」者，右還謂

奠時南面，乃以右手向外而西面，乃從觶西南行而右還北面。云「必從觶西，爲君之在東也」者，若從觶東而左還北面則背君，以其君在阼故也。云「自嚴正慎其位」者，以司正監察，主爲使人嚴正謹慎，故先自嚴正謹慎也。左還，南面坐取觶，洗，南面反奠于其所。反奠

虛觶，不空位也。**疏**「左還」至「其所」○注「反奠」至「位

也」○釋曰：必使不空者，亦欲使衆人覩知司正嚴正之處。

升自西階，東楹之東請徹俎，降。①公許。

告于賓。賓北面取俎以出。膳宰徹公俎，

降自阼階以東。膳宰降自阼階，以賓親徹，若君親徹

然。**疏**「升自」至「以東」○注「膳宰」至「徹然」○釋曰：云

「降自阼階，以賓親徹，若君親徹然」者，臣之升降當西階，

今見賓親徹，膳宰代君徹，不降西階而降自阼階，當君降

處，故云「若君親徹」，降自阼然也。卿大夫皆降，東

面，北上。以將坐降，待賓反也。**疏**「卿大」至「北上」

○注「以將」至「反也」○釋曰：案《大射》云「大夫降復位」，

①「降」，武威漢簡甲本無此字，沈文倬云今本誤衍。

注云「門東北面位」，不與卿同東面位者，彼卿有俎，卿取俎以出，故大夫不敢獨在西階下，故復位，復門東北面位。此燕卿無俎，故大夫與卿同降西階下，東面北上位也。云「以將坐降，待賓反」者，上文賓以俎出，當反入升坐，故卿大夫待賓反，亦升坐也。賓反，入，及卿大夫皆說屨，升，就席。公以賓及卿大夫皆坐，乃安。凡燕坐必說屨。屨賤，不在堂也。禮者尚敬，敬多則不親，燕安坐，相親之心。

**疏**「賓反」至「乃安」○注「凡燕」

至「之心」○釋曰：凡在堂立行禮不說屨，安坐則說屨，故鄭云「凡燕坐必說屨」，以其屨在足，賤，不宜在堂陳於尊者之側也。云「禮者尚敬，敬多則不親，燕安坐，相親之心」者，《左氏傳》云「饗以訓恭儉」，「設几而不倚，爵盈而不飲」，「燕以示慈惠」。饗在廟，立行禮，是「敬多則不親」者也；燕在寢，以醉爲度，是「相親之心」者也。若然，直云賓及卿大夫說屨，不云君降說屨，則君說屨之在堂上席側，<sup>①</sup>是以《禮記·少儀》云「排闥說屨於戶內者，一人而已矣」。彼據尊者坐在室，則尊者一人說屨在戶內。今此燕在堂上，則君尊，說屨於席側可知也。羞庶羞。謂腍肝腎、狗臠醢也。骨體所以致敬也，庶羞所以盡愛也，敬

之愛之，厚賢之道。

**疏**「羞庶羞」○注「謂腍」至「之道」○

釋曰：案《大射》云「羞庶羞」，注云「所進衆羞，謂腍肝腎、狗臠醢也。或有炮鼈、膾鯉、雉兔、鶉鴛」。大射先行燕禮，明與彼同。此注不言「炮鼈」已下，注文不具。鄭知有此物者，以經云「庶羞」，不唯二豆而已。案《內則》爲肝腎：「取狗肝一，蒙之以其腎，<sup>②</sup>濡炙之，舉燠其腎，不夢」，注云「腎，腸間脂」，此及《大射》其性皆用狗，故知有肝腎、狗臠。知有炮鼈、膾鯉者，《詩》云「吉甫燕喜，飲御諸友，炮鼈膾鯉」，又《內則》及《公食大夫》上大夫二十豆有雉兔、鶉鴛，《禮記·王制》云「庶羞不踰牲」，此燕用狗，必有此物而已。<sup>③</sup>《鄉飲酒》、《鄉射》亦有狗，但經直云「羞」，不云「庶」，是以鄭注云「臠醢」，明二豆，無餘物也。云「骨體所以致敬也」者，據未坐以前，「庶羞所以盡愛」，據說屨已後也。大夫祭薦。燕乃祭薦，不敢於盛成禮

①「說屨之」，浦鏜云「之」字當衍文，阮校云或「之」下有脫字，孫校云「屨之」二字疑當乙，曹校云「說屨」二字當倒。

②「蒙」，阮校云：《內則》作「幪」，此本非也。

③「必」，曹校云似當爲「亦」。

也。**疏**「大夫祭薦」○注「燕乃」至「禮也」○釋曰：「不敢

於盛成禮」，謂未立司正之前，立行禮受獻之時，不祭脯醢，祭先是成禮，不敢成禮於盛時。司正升受命，皆

命：「君曰：無不醉。」賓及卿大夫皆興，對

曰：「諾，敢不醉。」皆反坐。皆命者，命賓、命卿

大夫也。起對必降席。司正退立西序端。**疏**「司正」至

「反坐」○注「皆命」至「序端」○釋曰：云「起對必降席」者，

經云「反坐」，不云降，明起對必降席，既對乃反坐也。是

以《孝經》云「曾子避席曰：參不敏」，亦是起對也。知「司

正退立西序端」者，此無降文，見《鄉飲酒》云「司正升，相

旅，退，立于序端，東面」，故知此亦然也。主人洗，升，

獻士于西階上。士長升，拜受觶。主人拜

送觶。獻士用觶，士賤也。今文「觶」作「觚」。**疏**「主

人」至「送觶」○注「獻士」至「作觚」○釋曰：自此盡「立

飲」，論獻士之事。云「獻士用觶，士賤也」者，對上大夫已

上獻用觚，旅酬乃用觶，此獻士即用觶，故云「士賤也」。

不從今文「觚」者，若從「觚」，與大夫已上何異？故不從。

士坐祭，立飲，不拜既爵。其他不拜，坐祭，

立飲。他謂衆士也。亦升受爵，不拜。**疏**「士坐」至「立

飲」○注「他謂」至「不拜」○釋曰：云「他謂衆士也」者，上

云「士長」，明此士長之外皆衆士也。知「亦升受爵」者，以

其士尊於笙之長，笙之長尚受爵於階上，明士得升堂受爵

也。言「不拜」者，以其士長得拜，明衆士不拜也。乃薦

司正與射人一人，司士一人，執冪二人，立

于觶南，東上。天子射人，司士皆下大夫二人，諸侯

則上士，其人數亦如之，司正爲上。**疏**「乃薦」至「東上」

○注「天子」至「爲上」○釋曰：此等皆士而先薦者，以其皆

有事，故先得薦。司士亦先薦者，案《周禮》司士掌群士爵

祿廢置之事，士中之尊，故亦先得薦也。鄭引《周禮》序

官《射人，司士下大夫二人，約出此「諸侯則上士」者，天子

官尊，諸侯宜降一等，以是諸侯射人，司士得在士位中。

云「其人數亦如之」者，案《周禮》序官《射人下大夫二

人，上士四人，下士八人」，皆名射人，則諸侯雖使士爲之，

人數亦等。以其畿外諸侯張三侯，與天子同，故知射人之

數亦同也。言此者，欲見射時射人有事非一，故下文注云

「大射正，射人之長」，是以《大射禮》大射正及小射正皆有

事也。云「司正爲上」者，雖同是士，以其爲庭長，故設在

上，先薦之。此經三者當官雖多，皆取長先薦，其餘在於衆位，依齒也。又士位在西，有事者別在顰南，北面東上也。辯獻士。士既獻者立于東方，西面，北上。乃薦士。每已獻而即位于東方，蓋尊之。畢獻，薦于其位。**疏**「辯獻」至「薦士」○注「每已」至「其位」○釋曰：「云「即位于東方，蓋尊之者，以其庭中之位，卿東方西面，大夫北面，士西方東面，是東方尊。今卿大夫得獻升堂，位空，故士得獻即東方卿位，是尊之。以無正文，故云「蓋」以疑之也。知畢獻薦之者，以其經云「辯獻士」，「乃薦士」，故知當畢獻後乃薦也。祝史、小臣師，亦就其位而薦之。次士獻之，已不變位，位自在東方。**疏**「祝史」至「薦之」○注「次士」至「東方」○釋曰：云「次士獻之，已不變位」者，對先獻士，士即變位，鄉東方也。云「位自在東方」者，案上設位之時，祝史在門東，小臣在東堂下，是先在東方也。主人就旅食之尊而獻之，旅食不拜，受爵，坐祭，立飲。北面酌，南鄉獻之於尊南。不洗者，以其賤，略之也。亦畢獻乃薦之。主人執虛爵，奠于篚，復位。**疏**「主人」至「立飲」○注「北

面」至「復位」○釋曰：云「北面酌，南鄉獻之於尊南」者，案《大射》旅食尊在西鑄之南北面，則此主人在南亦北面。以陳尊向君，若東楹之西東向設尊，亦是向君爲正。彼酌者尊後東面酌，此亦尊後北面酌，南面獻之於尊南也。云「不洗者，以其賤」者，此乃庶人在官，府、史、胥、徒之輩，故云「賤，略之也」。云「亦畢獻乃薦之」者，亦上文士，此畢獻乃薦可知。云「主人執虛爵，奠于篚，復位」者，此約《大射》獻旅食訖，云「執虛爵奠于篚，復位」，故知也。若射，則大射正爲司射，如鄉射之禮。大射正，射人之長者也。如鄉射之禮者，燕爲樂卿大夫，宜從其禮也。如者，如其「告弓矢既具」至「退中與筭」也。納射器而張侯，其告請先于君，乃以命賓及卿大夫。其爲司正者，亦爲司馬。君與賓爲耦。《鄉射·記》曰自「君射」至「龍旆」，<sup>①</sup>亦其異者也。薦旅食乃射者，是燕射主於飲酒。**疏**「若射」至「之禮」○注「大射」至「飲酒」○釋曰：此一經論燕未行射之節。云「大射正爲司射」者，燕禮輕，又

①「曰」，阮校云：《集釋》作「云」。戴氏以「云」字爲衍文。

不主爲射，故射人爲擯，又爲司正，至射時，大射正爲司射，大射之時略於燕，主於射，故大射正爲擯，又爲司正，至射又親其職，故不同爲司射也。云宜從之者，鄉射是卿大夫禮，故樂之還從之也。云「如者，如其『告弓矢既具』至『退中與筭』也」者，經云「如鄉射之禮」，明從始至末皆如之。案《鄉射》初司射「告弓矢既具」，至三番射訖，而「退中與筭」，故如之也。云「納射器而張侯」者，欲見此與鄉射因納射器後即張侯，大射納射器之後無張侯之事，是以特言此也。①云「告請先於君，乃以命賓及卿大夫」者，此燕禮與大射皆國君之禮，此燕禮每事皆先請於君，大射亦先請於君。故故大射初，②司射自阼階前請於公，公許，乃命賓及卿大夫，鄉射西階上告賓曰「弓矢既具」，乃告於主人，遂告大夫，是先後異也。云「其爲司正者，亦爲司馬」者，《鄉射》將射云「司正爲司馬」，此亦於將射司正爲司馬，故「亦」之也。若然，則上文射人告具，射人請賓，又云「射人請立司正，公許，射人遂爲司正」，皆一人也。必云「司正爲司馬」者，諸侯有常官，嫌與鄉射異，故言此也，若士射則司正不爲司馬。③云「君與賓爲耦」者，欲見鄉射賓與主人爲耦，此君與賓爲耦，亦是異於鄉射也。引《鄉射·記》「君射」至「龍旌」，「亦其異者也」者，謂旌與中

異。何者？彼因記國君三處射，旌與中各不同，云「君國中射，則皮樹中，以翻旌獲，白羽與朱羽糝」，言「國中」，則此燕射也。又云「於郊則間中，以旌獲」，謂諸侯大射在郊。又云「於竟則虎中龍旌」，謂諸侯賓射在竟。此皆諸侯禮射，雖記在《鄉射》，皆與鄉射異也。云「薦旅食乃射者，是燕射主於飲酒」者，此獻士旅食後乃射，是燕射主於飲酒，④決《大射》未爲大夫舉旅之前則射，是彼大射主於射故也。賓降，洗，升，媵觚于公，酌散，下拜。

公降一等，小臣辭。賓升，再拜稽首。公荅再拜。此當言媵觚，酬之禮皆用觚，言觚者，字之誤也。

古者「觶」字或作「角」旁「氏」，由此誤爾。疏「賓降」至

「再拜」○注「此當」至「誤爾」○釋曰：自此盡「賓反位」，論賓媵爵於公之節。云「古者「觶」字或作「角」旁「氏」，由此誤爾」者，案《冬官》「梓人爲飲器，勺一升，爵一升，觚三

①「此」，阮校云：毛本作「之」。

②「故故大射初」，阮校云毛本作「故曰大射初」，《通解》作「故大射初」。曹校云下「故」衍字。

③「士」，曹校云當爲「大」。

④「主」字，原無，阮校云：「射」下脫「主」字。據補。



升。獻以爵而酬以觚，一獻而三酬，則一豆矣」，鄭引南郡大守馬季長云「觚當爲觶，豆當爲斗」，鄭康成云「古者觶角傍氏，似觚，故誤爲觚。時人又多聞觚，寡聞觶，是以誤爲觚」，此注與彼同也。賓坐祭，卒爵，再拜稽首。

公荅再拜。賓降，洗象觶，升，酌膳，坐，奠于薦南，降拜，小臣辭，賓升，成拜。公荅再拜。賓反位。反位，反席也。今文曰「洗象觚」。疏

「賓坐祭」至「反位」○注「反位」至「象觚」○釋曰：知「反位」是「反席」者，以其堂下無席，堂上乃有之，而云「賓升，成拜」，不云「降」，明上「反位」者，「反席」可知也。公坐

取賓所媵觶，興，唯公所賜。至此又言興者，明公崇禮不倦也。今文「觶」又爲「觚」。疏「公坐」至「所賜」

○注「至此」至「爲觚」○釋曰：自此盡「士旅酌，卒」，論君爲士舉旅之事。云「唯公所賜」者，辭與爲大夫舉旅同也。云「至此又言興者，明公崇禮不倦也」者，以其說屢升坐之後，理當倦，今言「興」，明不倦矣。受者如初受酬之

禮，降，更爵洗，升，酌膳，下拜，小臣辭，升成拜。公荅拜。乃就席，坐行之。坐行之，若

今坐相勸酒。有執爵者。士有盥、升主酌授之者。

疏「有執爵者」○注「士有」至「之者」○釋曰：無筭坐勸

酒，有執爵行之者。今此爲士舉旅，亦有執爵行之，若無筭爵然，後「士有盥、升主酌授之者」。<sup>①</sup>若然，前三舉旅皆酬者自酌授人也。唯受于公者拜。公所賜者也。

其餘則否。司正命執爵者爵辯，卒受者興以

酬士。欲令惠均。疏「司正」至「酬士」○注「欲令惠均」

○釋曰：此所命者，命大夫也。以前三舉旅，辯大夫則止，今此爲士舉旅，故及之。云「欲令惠均」者，惠均於室及均於庭也。<sup>②</sup>士《特性》爵止，欲得神惠均於室及均於庭，此

據人君之惠均於庭也。大夫卒受者以爵興，西階

上酬士。士升。大夫奠爵，拜。士荅拜。興

酬士者，士立堂下，無坐位。疏「大夫」至「荅拜」○注「興

酬」至「坐位」○釋曰：此即上文司正所命者也。云「興酬

士者，士立堂下，無坐位」者，凡禮，堂上有席者坐，堂下無

① 「後」，曹校云當爲「故」。

② 「室」，曹校云當爲「堂」。



席者立，是以《禮記·檀弓》「工尹商陽是士而云『朝不坐』，堂下無坐位者也。大夫立卒爵，不拜，實之。士拜受。大夫拜送。士旅于西階上，辯。祝史、小臣、旅食皆及焉。」

**疏**「大夫」至「上辯」○注「祝史」至

「及焉」○釋曰：知「旅食皆及」者，以士未得獻時旅酬不及，得獻之後旅則及之，<sup>①</sup>旅食亦次士得獻，故知亦酬及之。其庶子以下未得獻者，至獻後無筭爵及焉。士旅

酌，旅，序也。士以次序自酌相酬，無執爵者。卒。主

人洗，升自西階，獻庶子于阼階上，如獻士之禮。辯，降洗，遂獻左右正與內小臣，皆於阼階上，如獻庶子之禮。庶子掌正六牲之體及

舞位，使國子脩德學道，世子之官也。而與膳宰、樂正聯事，樂正亦學國子以舞。左右正，謂樂正、僕人正也。小

樂正立于西縣之北，僕人正、僕人師、僕人士立于其北，北上。大樂正立于東縣之北。若射，則僕人正、僕人士陪于

工後。內小臣奄人，掌君陰事陰令，后夫人之官也。皆獻于阼階上，別於外內臣也。獻正下及內小臣，則磬人、鍾人、鐃人、鼓人、僕人之屬盡獻可知也。<sup>②</sup>凡獻皆薦也。

**疏**「卒主」至「之禮」○注「庶子」至「薦也」○釋曰：此一經

獻庶子以下之節。云「庶子掌正六牲之體及舞位，使國子脩德學道，世子之官也」者，案《周禮·諸子職》云「大祭祀，正六牲之體，凡樂事正舞位。國子存遊倅，使之脩德學道」，彼天子諸子之官屬大子，若據諸侯，為世子之官。引之者，以天子謂之諸子，諸侯謂之庶子，掌公、卿、大夫、士之適子，掌事寔同，<sup>③</sup>故取《諸子職》解此庶子之事。云「而與膳宰、樂正聯事」者，以掌「正六牲之體」，得與膳宰聯事，掌「國子脩德學道」，得與樂正聯事，以其樂正亦掌教國子故也。言此者，欲見膳宰得獻，此庶子亦得獻之意。云「樂正亦教國子以舞」者，欲見庶子掌國子，得與樂正聯事。云「左右正謂樂正、僕人正也」，「僕人正」以下至「北上」，鄭知義然者，見《大射禮》而知。云「左右正」者，據中庭為左右。《大射禮》「工遷於東，僕人正亦與樂正同處，名曰左正，復云右正，明是小樂正在西，為一也。若小

①「則」，阮校云：毛本作「酬」。

②「鐃」，阮校引陸氏曰：本又作「鐃」，下同。諸本「鐃」、「鐃」錯出，不悉出校。

③「寔」，阮校云：《要義》作「是」。

樂正不在西，《大射》之禮不得有「左右正」之文。又兩面俱縣，明大小樂正各監一縣。又知僕人正以下在小樂正之北北上者，以《鄉射》弟子相工皆在西，今僕人正以下亦是相工之人，故知亦在西方也。又工堂上西階之東，相工者宜近其事，故在西方樂正之北也。又知「北上」者，以《大射》、《鄉射》工遷在下之時，皆北上，統於樂正，<sup>①</sup>今相者以工為主，明在堂下，則宜北統於堂上矣。下又知大樂正在東縣北者，約《鄉射》云「縣于洗東北」，至射時遷樂於「阼階下之東南，堂前三筭，西面北上坐，樂正北面立于其南」，是得爲一證也。云「若射」以下至「工後」者，案《大射》將射之時，工遷於下「東坫之東南，西面北上坐」，相者以工爲主，故知相工陪於東，即在工後也。云「內小臣奄人，掌君陰事陰令，后夫人之官也」者，案《天官·小臣》序官云「內小臣奄，上士四人」，其職云「掌王之陰事陰令」，鄭注云「陰事，群妃御見之事；陰令，王所求爲於北宮」。彼后之官，兼云「夫人」者，欲見諸侯夫人內小臣亦與后之內小臣職同，故雙言之。云「皆獻於阼階上，別於外內臣也」者，臣云外內者，案《周禮》有「外內命夫」，鄭注云「外命夫六鄉以出」。案內命夫朝廷卿大夫，則諸侯臣在鄉遂及采地者爲外臣，在朝廷者爲內臣。但外內臣皆獻於西

階上，此獻於阼階，故云「別於外內臣也」。云「則磬人」以下至「盡獻可知也」者，此據《周禮》天子有此官，諸侯並以下士爲之，則諸侯亦有此官，以其庭中之樂軒縣，別有鍾、磬、鐃、鼓，故知也。兼言「僕人」者，此經直見僕人正，不見僕人師、僕人士，《大射》見之。內小臣奄人之賤者，尚得獻，明此等皆得獻可知也。知「凡獻皆薦」者，以經云「如獻士」，獻士有薦，凡此等獻訖，明皆有薦也。無筭爵。筭，數也。爵行無次無數，唯意所勸，醉而止。疏

「無筭爵」○注「筭數」至「而止」○釋曰：自此盡「無筭樂」，論酒行樂作，無次數之節。云「爵行無次無數」者，此對四舉旅以前皆有次有數，此則無次數也。士也，有執膳爵者，有執散爵者。執膳爵者酌以進公，公不拜受。執散爵者酌以之公，命所賜。所賜者興，受爵，降席下，奠爵，再拜稽首。公荅拜。席下，席西也。古文曰「公荅再拜」。疏「士也」至「荅拜」○注「席下」至「再拜」○釋曰：自旅酬已前，受公

①「樂正」，曹校云當爲「堂上」。

爵皆降拜，升成拜，至此不復降拜者，禮殺故也。二云「席下，席西也」者，賓與卿大夫席皆南面統於君，皆以東爲上，故知「席下」爲「席西」也。受賜爵者以爵就席坐，公卒爵然後飲。不敢先虛爵，明此勸惠從尊者來也。

**疏**「受賜」至「後飲」○注「不敢」至「來也」○釋曰：上已言君「命所賜」，至此經云「受賜」，自然惠從尊者來，但先君受爵，<sup>①</sup>似惠不由君來，故後飲然後授虛爵，是由尊者來，故後飲之也。此執爵者皆酌行之以偏，唯卒爵者與以酬士，<sup>②</sup>自酌與之，是以《鄉飲酒》、《鄉射》皆云「辯，卒受者興，以旅在下者」，注云「不使執觶者酌，以其將旅」，<sup>③</sup>不以己尊孤人也。執膳爵者受公爵，酌，反奠之。宴歡在於飲酒，成其意。

**疏**「執膳」至「奠之」

○注「宴歡」至「其意」○釋曰：云「成其意」者，君意欲得皆醉，今執膳者酌，反奠於君前，望當君心，故云「宴歡在於飲酒，成其意」也。受賜爵者興，授執散爵。執散爵者乃酌行之。予其所勸者。唯受爵於公者拜。卒受爵者興，以酬士于西階上。士升，大夫不拜，乃飲，實爵。乃猶而也。

**疏**注「乃

猶而也」○釋曰：轉「乃」爲「而」者，「乃」是緩辭，此將勸士，士已升階，大夫即飲不可爲「乃」，故從「而」解之也。士不拜，受爵。大夫就席。士旅酌，亦如之。公有命徹幕，則卿大夫皆降，西階下北面，東上，再拜稽首。公命小臣辭。公荅再拜，大夫皆辟。命徹幕者，公意殷勤，必盡酒也。小臣辭，不升成拜，明雖醉正臣禮也。不言賓，賓彌臣也。君荅拜於上，示不虛受也。

**疏**「士不」至「皆辟」○注「命

徹」至「受也」○釋曰：云「士旅酌亦如之」者，亦如大夫相酌之法。云「公有命徹幕」者，此君尊在東楹之西，專大惠，故待無筭爵乃徹幕。《鄉飲酒》尊在房戶之間，賓主共之，故賓至則徹之，與此異也。云「小臣辭，不升成拜，明雖醉正臣禮也」者，臣之禮當下拜爲正，今不言「升成拜」者，於下已拜，是雖無筭爵，已醉而不倦行臣禮，禮之正

①「受」，阮校引顧廣圻云：「『受』當作『虛』。宋單疏本已誤。」

②「卒」下，曹校云脫「受」字。

③「旅」下，阮校云：毛本有「酬」字。

也。云「不言賓，賓彌臣也」者，經直言「卿大夫皆降」，不別言賓，是燕末賓同於臣。言「彌」者，上旅酬云「若賓若長」，猶言賓，但言賜不言酬，已是賓卑，今乃設賓，<sup>①</sup>不言賓，是賓彌臣，故同臣例也。云「君荅拜於上，示不虛受也」者，案《燕義》云「禮無不荅，言上之不虛取於下也」，彼釋此言也。<sup>②</sup>但彼言「不虛取於下」者，摠申此燕禮君荅拜之事，不獨爲此言也。遂升，反坐。士終旅於上，如初。卿大夫降而爵止，於其反席卒之。

**疏**「遂

升」至「如初」○注「卿大」至「卒之」○釋曰：云「卿大夫降而爵止」者，上文已云「大夫不拜，乃飲，實爵。士不拜，受爵」，是大夫飲訖爵止也。云「於其反席卒之」者，謂上士受得大夫爵，此經云「士終旅於上，如初」，是於大夫反席，士卒之也。無筭樂。升歌、間、合無數也，取歡而已，其樂章亦然。**疏**「無筭樂」○注「升歌」至「亦然」○釋曰：此

「無筭」對上升歌、笙、間、合各依次第而三終，有次有數，此則任君之情，無次無數，其詩樂章亦然，亦無次無數。宵，則庶子執燭於阼階上，司宮執燭於西階上，甸人執大燭於庭，閽人爲大燭於門外。宵，夜也。燭，燋也。甸人，掌共薪蒸者。庭大燭，爲位廣

也。閽人，門人也。爲，作也。作大燭，以俟賓客出。

**疏**

「宵則」至「門外」○注「宵夜」至「客出」○釋曰：凡燕法設燭者，或射之後終燕則至宵也，或冬之日不射亦宵，夏之日不射未必至宵也。云「燭，燋也」者，古者無麻燭而用荆燊，故《少儀》云「主人執燭抱燊」，鄭云「未爇曰燊」。但在地曰燎，執之曰燭，於地廣設之則曰大燭，其燎亦名大燭，故《詩》云「庭燎之光」，毛云「庭燎，大燭也」，鄭云「夜未央而於庭設大燭」，毛、鄭並指此「甸人執大燭」之文也。《司烜氏》云「凡邦之大事，共墳燭庭燎」，玄謂「墳，大也。樹於門外曰大燭，於門內曰庭燎」，言樹則大燭亦在地，廣設之而已。此「閽人爲大燭於門外」者，亦是大燭在地者。案《郊特牲》云「庭燎之百，由齊桓公始也」，注云「僭天子也。庭燎之差，公蓋五十，侯、伯、子、男皆三十」，文出《大戴禮》也。此亦諸侯禮，以燕禮輕，故不言庭燎，設大燭而已。云「甸人掌共薪蒸」者，《天官·甸師氏》職文。引之者，以其內有燊燊，故使之在門爲大燭也。云「閽人，門人

①「設」，阮校云：陳、閽俱作「沒」。

②「言」，阮校云：陳、閽無。

也」者，案《天官·閹人》「掌守王中門之禁」，諸侯亦當然。賓醉，北面坐取其薦脯以降。取脯，重得君賜。奏《陔》。《陔》，《陔夏》，樂章也。賓出奏《陔夏》，以爲行節也。凡《夏》以鍾鼓奏之。

**疏**「奏陔」○注「陔陔」至「奏之」<sup>①</sup>○釋曰：云「《陔》，《陔夏》」者，案《鍾師》九《夏》之中有《陔夏》，九《夏》皆是《詩》，《詩》爲樂章，故知「樂章」也。云「賓出奏《陔夏》，以爲行節也」者，此及《鄉飲酒》皆於賓出奏《陔夏》，明此爲行節，戒之使不失禮。云「凡《夏》以鍾鼓奏之」者，案《周禮·鍾師》云「以鍾、鼓奏九《夏》」，鄭注云「先奏鍾，次擊鼓」，是凡《夏》皆以鍾、鼓奏之。賓所執脯以賜鍾人于門內雷，遂出。必賜鍾人，鍾人掌以鍾、鼓奏九《夏》，今奏《陔》以節己，用賜脯以報之，明雖醉不忘禮。古文「賜」作「錫」。卿大夫皆出。隨賓出也。公不送。賓禮訖，是臣也。公與客燕。謂四方之使者。**疏**「公與客燕」○注「謂四方之使者」○釋曰：自此盡「敢拜賜命」，論與異國臣將燕，使卿大夫就館戒客之辭事。但燕異國卿大夫與臣子同，唯戒賓爲異，故於禮末特見之也。云「謂四方之使

者」，以其云「客」，以「寡君」對之，故知四方使卿大夫來聘，主君將燕之也。曰：「寡君有不腆之酒，以請吾子之與寡君須臾焉，使某也以請。」君使人戒客辭也。禮，使人各以其爵。寡，鮮也，猶言少德，謙也。腆，善也。上介出請入告。古文「腆」皆作「殄」。今文皆曰「不腆酒」，無「之」。

**疏**「曰寡」至「以請」○注「君使」至「無之」○釋曰：云「禮，使人各以其爵」者，案《公食大夫》云「使大夫戒，各以其爵」，以其大聘使卿，小聘使大夫，爵不同，故主君亦以其爵戒之也。云「上介出請入告」者，亦約《公食》使者至館門外，客使者上介出請事，入告賓。<sup>②</sup>但彼食禮重，故三辭，此燕禮輕，故再辭爲異耳。又彼見「賓出拜辱，大夫不荅拜」，此不言者，文不具。對曰：「寡君，君之私也。君無所辱賜于使臣，臣敢辭。」上介出荅主國使者辭也。私謂獨有恩厚也。<sup>③</sup>君無所爲辱賜於使臣，謙不敢當也。敢者，怖懼，

① 「陔陔」原作「陔夏」，據阮校改。

② 「者」，曹校以爲衍字。

③ 「有」，阮校云：《集釋》、《通解》、毛本作「受」。

用勢決之辭。**疏**「對曰」至「敢辭」○注「上介」至「之辭」

○釋曰：云「敢者，怖懼，用勢決之辭也」者，謂若怖懼之事，不避危難，用勢往決之，故云「用勢決之辭」也。「寡

君固曰不腆，使某固以請。」「寡君，君之私也。君無所辱賜于使臣，臣敢固辭。」重傳命。

固，如故。「寡君固曰不腆，使某固以請。」「某固辭不得命，敢不從。」許之也。於是出見主國使者。辭以見許為得命。今文無「使某」。致命曰：「寡

君使某，有不腆之酒，以請吾子之與寡君須臾焉。」親相見，致君命辭也。「君貺寡君多矣，又辱賜于使臣，臣敢拜賜命。」貺，賜也，猶愛也。敢

拜賜命，從使者拜君之賜命，猶謙不必辭也。**疏**注「敢拜」至「辭也」○釋曰：主君使大夫往戒，只為燕事，今客從

之者來就燕，而云拜主君賜燕之命者，謙不必有燕事。

**記。燕，朝服於寢。**朝服者，諸侯與其群臣日

視朝之服也，謂冠玄端，緇帶，素鞞，白屨也。燕於路寢，相親昵也。今辟雍十月行此燕禮，玄冠而衣皮弁服，與

《禮》異也。**疏**「記燕朝服於寢」○注「朝服」至「異也」○

釋曰：凡記，皆記經不具者。<sup>①</sup>以經不言燕服及燕處，故記人言之也。云「謂冠玄端，緇帶，素鞞，白屨」者，皆《士

冠禮》文。案《屨人》注「天子、諸侯吉事皆為」，諸侯朝服素裳素鞞，應白為而云「白屨」者，引《士冠禮》成文，其實

諸侯當白為，其臣則白屨也。鄭注《周禮·屨人》云「複下曰為，鞞下曰屨」，下謂底，以此為異也。云「燕於路寢，相

親昵也」，知燕於寢者，以其饗在廟，明燕在寢私處可知也。引漢法欲見與古異者，周時玄冠服則緇布衣，今衣皮

弁服，是其異也。其牲，狗也，狗，取擇人也。明非其人不與為禮也。亨于門外東方。亨於門外，臣所掌

也。**疏**「亨于門外東方」○注「亨于」至「掌也」○釋曰：此

君禮，故云「臣所掌」。案《公食·記》云「亨于門外東方」，注云「必於門外者，大夫之事也」。注不同者，以其饗食在

廟嚴凝，宜親監視，不得言「臣所掌」，故注云「大夫之事也」。《鄉飲酒》「亨狗于堂東北」者，非君禮，是臣於堂東

北，不在外者，宜主人親供，又法陽氣之所始。故三者注

①「具」，阮校云：陳、閩俱作「言」。

皆不同也。若與四方之賓燕，則公迎之于大門內，揖讓，升。四方之賓，謂來聘者也。自戒至於拜至，皆如《公食》。亦告饌具而後公即席，小臣請執冪請羞者，乃迎賓也。

**疏**「若與」至「讓升」○注「四方」至「賓

也」○釋曰：云「自戒至於拜至，皆如《公食》」者，此燕用狗，彼用大牢，此戒賓再辭，彼三辭，至於卿大夫立位皆不同，而云「如《公食》」者，謂除此之外如之。若然，依《公食》從首「使大夫戒，各以其爵。上介出請人告」已下至「北面，再拜稽首」，皆如之，饌具之等不如之也。云「亦告饌具而後公即席，小臣請執冪請羞者，乃迎賓也」者，言此者，欲見燕四方賓，此等依上文，與燕己臣子同，亦不如《公食》。以其《公食》公無席，又無人廟之事，又《公食》無請執冪、羞膳，故別言此也。賓為苟敬，席于阼階

之西，北面。有胥，不濟肺，不啐酒。其介為賓。苟，且也，假也。主國君鄉時，<sup>①</sup>親進醴于賓，今

燕又宜獻焉，<sup>②</sup>人臣不敢褻煩尊者，至此升堂而辭讓，欲以臣禮燕，為恭敬也。於是席之如獻諸公之位。言苟敬者，賓實主國所宜敬也。胥，折俎也。不濟，啐，似若尊者然也。介門西，北面，西上。公降，迎上介以為賓，揖讓，

升，如初禮。主人獻賓，獻公，既獻苟敬，乃媵觚。群臣即位，如燕也。

**疏**「賓為」至「為賓」○注「苟且」至「燕也」○

釋曰：云「主國君饗時，親進醴于賓」者，謂行聘享禮，禮賓之時，君親酌醴，進于賓。若然，前有饗食，不言之者，饗禮亡，無以可言，<sup>③</sup>食禮又無酒醴所獻之事，故不言而云「饗時」也。云「今燕又宜獻焉」者，案上燕己臣子，使宰夫為主人，知此親獻者，若不親獻即同己臣子，賓何須辭之而為「苟敬」？故知君當親獻焉。云「至此升堂而辭讓」者，若此時升堂不辭，即行燕賓之禮，故知辭之在初升堂時。云「欲以臣禮燕，為恭敬也」者，此謂在阼西，<sup>④</sup>北面，故云「席之如諸公之位」也。<sup>⑤</sup>云「言苟敬者，賓實主國所宜敬也」者，賓實主國所宜敬，但為辭讓，故以命介為賓，不得敬之，今雖以介為賓，不可全不敬，於是席之於阼階

①「鄉」，阮校云：《釋文》、《集釋》、《通解》、楊氏俱作「饗」。

②「宜」，阮校云：毛本作「且」。

③「可言」，阮校云：毛本作「引證」。

④「此」，阮校云：《要義》作「正」。

⑤「如」下，阮校云：毛本有「獻」字。

西，且敬也，故云「苟敬」也。云「不嘯、啐，似若尊者然也」者，案此燕禮與大射、鄉射皆不嘯、啐，是諸公如鄉禮，<sup>①</sup>今聘卿在諸公之坐，亦不嘯、不啐，是爲「似若諸公尊者然也」。云「介門西，北面，西上」者，約《聘禮》而知也。云「公降，迎上介以爲賓，揖讓，升，如初禮」者，此如上文燕己臣子以大夫爲賓者同，故云「如初禮」也。云「主人獻賓，獻公，既獻苟敬，乃媵觚」者，若上燕己臣子之時，獻賓、獻公既，即媵觚以酬賓。但「苟敬」之前宜有薦有俎，實與君同，明知獻公後即獻苟敬，乃可酬賓也。云「群臣即位，如燕」者，如上燕己臣子同。若然，群臣不待迎賓入，乃從君入者，以其皆蒙獻酬，故因其先至寢門，故小臣引之即入，<sup>②</sup>不待賓入後也。無膳尊，無膳爵。降尊以就卑也。**疏**「無膳尊無膳爵」○注「降尊以就卑」○釋曰：《郊特牲》云：「三獻之介，君專席而酢焉。此降尊以就卑也。」注云：「三獻，卿大夫來聘，主君饗燕之，以介爲賓。賓爲苟敬，則徹重席而受酢也。專猶單也。」彼與此事同，故鄭引彼經以證此。燕己臣子，不見有君親受賓酢。若燕異國臣子，得有專席受酢者，獻卿大夫之後，依次各爲此三人舉旅。獻士之後，賓乃媵觚於公，賓取所媵

觚爲士舉旅，應以爲酢君，君專席而受之也。與卿燕，

則大夫爲賓。與大夫燕，亦大夫爲賓。不以

所與燕者爲賓者，燕爲序歡心，賓主敬也。「公父文伯飲

南宮敬叔酒，以路堵父爲客」，此之謂也。君恒以大夫爲

賓者，大夫卑，雖尊之，猶遠于君。今文無「則」，下無

「燕」。**疏**「與卿至爲賓」○注「不以至無燕」○釋曰：

此謂與己臣子燕法。若與異國賓燕，皆用上介爲賓，如上

說也。云「公父文伯」已下，是《魯語》文。此三人皆魯大

夫自相燕法。云「此之謂也」者，此謂不使所爲燕者爲賓

之義。云「君恒以大夫爲賓者，大夫卑，雖尊之，猶遠於

君」者，案《禮記·燕義》云「不以公卿爲賓而以大夫爲賓，

爲疑也，明嫌之義也」，注云「公卿尊矣，復以爲賓，則尊與

君大相近」，是不用公卿爲賓，恐逼君。用大夫爲賓，雖尊

之，猶遠於君，不畏逼君也。羞膳者與執冪者皆士

也。尊君也，膳宰卑於士。**疏**「羞膳至士也」○注「尊

君至於士」○釋曰：經直云「請執冪與羞膳」，不辨其人，

① 「鄉」，曹校云當爲「卿」。

② 「故」，曹校云此字衍。



故記人言之。云「尊君也，膳宰卑於士」者，言膳宰，別小膳宰也。以其下云「羞卿者小膳宰」，明於君者士也，士尊於小膳宰也。若然，士則膳宰之長者，故下注「小膳宰」云「膳宰之佐也」。羞卿者小膳宰也。膳宰之佐也。

若以樂納賓，則賓及庭，奏《肆夏》，賓拜酒，主人荅拜而樂闋。公拜受爵而奏《肆夏》，公卒爵，主人升受爵以下而樂闋。《肆夏》，樂章也，今亡，以鍾、鐃播之，鼓、磬應之，所謂金奏也。《記》曰「入門而縣興」，「示易以敬也」。卿大夫有王事之勞，則奏此樂焉。

**疏**「若以」至「樂闋」○注「肆夏」至「樂焉」○釋曰：自此盡「若舞，則勺」，論臣子有王事之勞與之燕之事。云「若」者，不定之辭，以其常燕已臣子無樂，王事之勞或有或無，故言「若」也。云「《肆夏》，樂章也，今亡」者，鄭注《鍾師》云「九《夏》皆《詩》篇名，《頌》之族類也。此歌之大者，載在樂章，樂崩亦從而亡，是以《頌》不能具」也。云「以鍾、鐃播之，鼓、磬應之」者，《鍾師》云「掌金奏」，鄭注云「擊金以爲奏樂之節，金謂鍾及鐃」；又云「凡樂事以鍾鼓奏九《夏》」，鄭注云「先擊鍾，次擊鼓」。是奏《肆夏》時有鍾、鐃、鼓、磬。彼經注雖不言磬，但縣內有此四者，

故鄭兼言磬也。言「所謂金奏也」者，所謂「鍾師掌金奏」也。云「《記》曰」者，此鄭引二《記》之文。何者？云「入門而縣興」，是仲尼之文，<sup>①</sup>《仲尼燕居》云：「兩君相見，揖讓而入門，入門而縣興，揖讓而升堂，升堂而樂闋。」《郊特牲》云：「賓入大門而奏《肆夏》，示易以敬也。」必引二《記》文者，以燕在寢，賓及庭及寢庭，與《仲尼燕居》「入門而縣興」事相類，故引之證賓及庭樂作之義也；此《肆夏》以金奏之，故引《郊特牲》「示易以敬」，證用《肆夏》之義也。不取「賓入大門」者，大門非寢門故也。云「卿大夫有王事之勞，則奏此樂焉」，知者，以發首陳君與臣子常燕及聘使之臣燕，次論四方賓燕。今此言賓及庭奏《肆夏》，則非尋常大夫爲賓，與宰夫爲主人相對者，謂若「賓爲苟敬」四方賓之類，特奏《肆夏》。其事既重，若非有王事之勞，何以致此？故知是臣有王事之勞者乃奏此樂也。升歌《鹿鳴》，下管《新宮》，笙入三成，《新宮》，《小雅》逸篇也。管之人三成，謂三終也。

**疏**「升歌」至「三成」○注「新宮」至「終也」○釋曰：《鹿鳴》不言「工歌」，《新宮》不言

①「之」上，曹校云脫「燕居」二字。

「笙奏」，而言「升歌」、「下管」者，欲明笙奏異於常燕。常燕即上所陳四節是也。今工歌《鹿鳴》三終，與笙奏全別，<sup>①</sup>故特言「下管《新宮》」，乃始「笙入三成」者，止謂笙奏《新宮》三終，申說下管之義。云「《新宮》、《小雅》逸篇也」，知在《小雅》者，以配《鹿鳴》而言，《鹿鳴》是《小雅》，明《新宮》小雅可知。遂合鄉樂。鄉樂，《周南》、《召南》六篇。言遂者，不間也。若舞，則《勺》。《勺》，《頌》篇，告成大武之樂歌也。其詩曰「於鑠王師，遵養時晦」，又曰「實維爾公允師」。既合鄉樂，萬舞而奏之，所以美王侯，勸有功也。

**疏**「若舞則勺」○注「勺頌」至「功也」

○釋曰：言「若」者，或爲之舞，或不爲之舞，在於君意，故以不定而言。云「舞，則《勺》」者，謂爲之舞，則歌《勺》詩以爲曲。云「《勺》、《頌》篇，告成大武之樂歌也」者，《勺》詩序文。云「其詩曰「於鑠王師，遵養時晦」」者，鑠，美也，言於呼，美武王之師；遵，循也，循養晦昧之紂，三分天下，猶服事於殷。又曰「實維爾公允師」者，公事允信也，言武王伐紂，實維汝武王之事，信得用師之道。云「既合鄉樂」者，以文承「合鄉樂」之下，故知「既合鄉樂」也。云「萬舞而奏之」者，釋經舞時作周萬舞之舞而奏《勺》詩。宣八年

《公羊傳》云「壬午猶繹，《萬》人去籥」，傳曰「《萬》者何？干舞也」，謂秉干舞以奏《勺》詩也。云「所以美王侯，勸有功也」者，天子、諸侯作之。是美王侯，亦所以勸有功也。唯公與賓有俎。主於燕，其餘可以無俎。

**疏**「唯公與賓有俎」○注「主於燕，其餘可以無俎」○釋曰：「主於燕，其餘可以無俎」者，對《大射》辨尊卑，公、卿皆有俎。其牲用狗則同也。獻公曰：「臣敢奏爵以聽命。」授公釋此辭，不敢必受之。

**疏**「獻公」至「聽命」○注「授公」至「受之」○釋曰：謂若主人獻公。賓媵觶於公雖非獻，亦釋此辭也。凡公所辭，皆栗階。栗，蹙也，謂越等急趨君命也。凡栗階，不過二等。其始升，猶聚足連步，越二等，左右足各一發而升堂。

**疏**「凡栗階不過二等」○注「其始」至「升堂」○釋曰：凡堂及階，尊者高而多，卑者庫而少。案《禮器》云「天子之堂九尺，諸侯七尺，大夫五尺，士三尺」，《士冠禮》降三等，受爵弁，鄭注云「降三等，下

①「與」，曹校云當爲「其」。

至地」，則士三等階。以此推之，則一尺爲一階，大夫五尺五等階，諸侯七尺七等階，天子九尺九等階可知。今云「凡栗階，不過二等」，言「凡」，則天子九等已下至士三等皆有栗階之法。栗階不過二等，據上等而言。故鄭云「其始升，猶聚足連步」，一也。<sup>①</sup>故《曲禮》云「涉級聚足，連步以上」，鄭注云「涉等聚足，謂前足躡一等，後足從之併連步謂足相隨，不相過也」，此即聚足一也。<sup>②</sup>天子已下皆留上等爲栗階，左右足各一發而升堂，其下無問多少皆連步。《雜記》云「主人之升降散等」，鄭注云「散等，栗階」，則栗階亦名散等。凡升階之法有四等：連步，一也；栗階，二也；歷階，三也；歷階謂從下至上皆越等，無連步，若《禮記·檀弓》云「杜蕢人寢，歷階而升」是也；越階，四也，越階謂左右足越三等，若《公羊傳》云「趙盾避靈公，「蹻階而走」是也。凡公所酬，既拜，請旅侍臣。既拜，謂自酌升拜時也。擯者阼階下告于公，還西階下告公許旅行也，請行酒于群臣。必請者，不專惠也。**疏**「凡公」至「侍臣」○注「既拜」至「惠也」○釋曰：云「既拜，謂自酌升拜時也」者，此即上賓得君酬酒，飲訖，自酌降拜，升時請旅侍臣。云「擯者阼階下告于公，還西階下告公許旅

行」者，此約《大射》而知也。凡薦與羞者，小膳宰

也。謂於卿大夫以下也。上特言羞卿者小膳宰者，欲絕

於賓，羞賓者亦士。**疏**「凡薦」至「宰也」○注「謂於」至

「亦士」○釋曰：云「謂於卿大夫以下」者，以其執冪與羞膳

於君是士，則知此「凡」者，於卿大夫也。云「上特言羞卿

者小膳宰者，欲絕於賓，羞賓者亦士」者，鄭意於此言

「凡」，摠卿大夫，於文足矣。上文君下特言「羞卿者小膳

宰」者，欲見直言君不須言賓，以其賓之薦俎與君同，明羞

膳亦與君同，不使小膳宰，故云「欲絕於賓」，爲「羞賓者亦

士」也。有內羞。謂羞豆之實，醢食、糝食。羞籩之實，

糗餌、粉糝。**疏**「有內羞」○注「謂羞」至「粉糝」○釋曰：

云「謂羞豆之實，醢食、糝食」者，《天官·醢人》云「羞豆之

實，醢食、糝食」，鄭注云「醢，饗也」。《內則》曰「取稻米，舉

搔搜之，小切狼臠膏，以與稻米爲糝」，又曰「糝取牛羊豕

之肉，三如一，小切之，與稻米，稻米二，肉一，合以爲餌煎

① 「一」，阮校云：毛本、《通解》無。

② 「一」，阮校云：毛本無。

之」是也。云「羞籩之實，糗餌、粉資」者，《籩人職》云「羞籩之實，糗餌、粉資」，鄭注云「此二物皆粉稻米、黍米所爲也。合蒸曰餌，餅之曰資。糗者，擣粉熬大豆爲之，爲餌、資之黏著以粉之耳。餌言糗，資言粉，互相足」是也。糗熬之亦粉之，其粉擣之亦糗之，是互相足也。君與射，則爲下射，袒朱襦，樂作而后就物。君尊。小臣以巾授矢，稍屬，君尊不搯矢。不以樂志。辟不敏也。既發，則小臣受弓，以授弓人。俟復發也。不使大射正，燕射輕。上射退于物一筭。既發，則荅君而俟。荅，對。若飲君，燕則夾爵。謂君在不勝之黨，賓飲之，如燕媵觚，則又夾爵。

**疏**「若飲君燕則夾爵」○釋曰：「夾爵」者，將飲君，先自飲，及君飲訖，又自飲，爲夾爵。君在，大夫射則肉袒。不纁襦，厭於君。

**疏**注「不纁襦厭於君」○釋曰：《鄉射·記》大夫對士射袒纁襦，此對君肉袒，故云「厭於君」也。若與四方之賓燕，媵爵，曰：「臣受賜矣，臣請贊執爵者。」受賜，謂公鄉者酬之。至燕，主

人事賓之禮殺。賓降，洗，升，媵觶于公，荅恩惠也。

**疏**

「若與」至「爵者」○注「受賜」至「惠也」○釋曰：謂公取二大夫所媵觶上者以酬賓是也。云「賓降，洗，升，媵觶于公」者，謂上獻士訖，賓「媵觶于公」，是荅恩惠也。相者

對曰：「吾子無自辱焉。」辭之也。對，荅也。亦告

公，以公命荅之也。有房中之樂。弦歌《周南》、《召

南》之詩，而不用鍾磬之節也。謂之「房中」者，后、夫人之所諷誦，以事其君子。

**疏**「有房中之樂」○注「弦歌」至

「君子」○釋曰：云「弦歌《周南》、《召南》之詩，而不用鍾磬之節」者，此文承「四方之賓燕」下而云「有」，明四方之賓

而有之。①知不用鍾磬者，以其此二《南》本后、夫人侍御于君子用樂節，是本無鍾磬。今若改之而用鍾磬，當云

「有房中之奏樂」，今直云「有房中之樂」，明依本無鍾磬

也。②若然，案《磬師》云「教縵樂、燕樂之鍾磬」，注云「燕樂，房中之樂，所謂陰聲也。二樂皆教其鍾磬」。房中樂

得有鍾磬者，彼據教房中樂，待祭祀而用之，故有鍾磬也，

①「明」，阮校引浦鏜云：「明」下疑脫「爲」字。

②「依」，阮校云：毛本作「彼」，閩、監本俱誤作「衣」。

房中及燕則無鍾磬也。

儀禮卷第六 經三千三百二十三 注四千六百二十

儀禮疏卷第十五

江寧府知府陽城張敦仁編校 元和縣

學生員顧廣圻覆校

## 儀禮疏卷第十六 儀禮卷第七

唐朝散大夫行大學博士弘

文館學士臣賈公彥等撰

**大射第七**<sup>①</sup>**疏**「大射第七」○鄭《目錄》云：「名曰大射

者，諸侯將有祭祀之事，與其群臣射，以觀其禮。數中者得與於祭，不數中者不得與於祭。射義於五禮屬嘉禮，<sup>②</sup>大戴此第十三，小戴及《別錄》皆第七。」○釋曰：云「諸侯將有祭祀之事」以下，文出於《射義》。 儀禮 鄭

氏注

**大射之儀。君有命戒射。**將有祭祀之事，

當射。宰告於君，君乃命之。言「君有命」，政教宜由尊者。**疏**「大射」至「戒射」○注「將有」至「尊者」○釋曰：自

此盡「西紘」，論射前預戒諸官及張侯設樂懸之事。不言

「禮」言「儀」者，以射禮盛，威儀多，故以「儀」言之。是以

《射義》云：「孔子曰『射者何以射？何以聽？循聲而發，

發不失正鵠者，<sup>③</sup>其唯賢者乎！若夫不肖之人，則彼將

安能以中。』是其射容難，故稱「儀」也。云「將有祭祀之

事，當射」者，按《射義》云「天子將祭，必先習射於澤。澤

者，所以擇士也。已射於澤而后射於射宮。射中者得與

於祭，不中者不得與於祭」，是其將祭必射也。云「宰告於

君，君乃命之」者，鄭意不云「宰戒百官」者，<sup>④</sup>宰先告君，

君之使戒乃戒，即云「戒百官」是也。云「言『君有命』，政

教宜由尊者」，其經云「戒射」，此戒亦政教之類，故以「政

教」言之也。 **宰戒百官有事於射者。**宰，於天子豕

宰，治官卿也，作大事則掌以君命戒於百官。**疏**「宰戒」

至「射者」○注「宰於」至「百官」○釋曰：按《周禮·大宰》

① 「射」下，阮校云：毛本、《釋文》、唐石經、徐本俱有「儀」字。

② 「義」，阮校云：浦鏜校改爲「儀」。

③ 「發」下，阮校云：毛本有「而」字。按《射義》有「而」字。

④ 「不」，阮校云毛本作「下」，曹校云「下」字是。

職云「掌百官之誓戒」，此言「宰戒百官」，其事同，故鄭以「天子冢宰」言之也。其實諸侯兼官，無冢宰，立地官司徒以兼之。故《聘禮》云「宰命司馬」，注云「宰，上卿貳君事者也」。諸侯謂司徒爲宰，是諸侯立司徒兼冢宰之事也。言「大事則掌以君命戒於百官」者，《周禮·大宰》職云「作大事，則戒于百官，贊王命」，是鄭之所引以證「宰戒」之事也。射人戒諸公、卿大夫射。司士戒士射與贊者。射人掌以射法治射儀，司士掌國中之士治，凡其戒命，<sup>①</sup>皆司馬之屬也。殊戒公、卿大夫與士，辨貴賤也。贊，佐也，謂士佐執事不射者。

**疏**「射人」至「贊者」○注

「射人」至「射者」○釋曰：上文宰官尊，摠戒，此射人、司士色別重戒之，謂若《天官·冢宰》戒百官，宗伯、大司寇之等重戒也。云「射人掌以射法治射儀」者，《夏官·射人》文。云「司士掌國中之士治，凡其戒令」者，此《司士》職文。云「國中之士」，彼士摠公、卿大夫士而言，此射人已戒公、卿大夫，則司士戒士贊者唯有士，<sup>②</sup>不兼大夫已上。不同者，斷章取義，故與本職不同也。云「皆司馬之屬也」者，射人、司士皆屬司馬，故云「司馬屬」也。此上下文所云「戒」者，皆謂祭前旬有一日。知者，《祭統》云：「先期旬

有一日，宮宰宿夫人。夫人亦散齋七日，致齋三日。」若然，卜及戒皆在旬有一日，是《大宰》云「前期十日，帥執事而卜日，遂戒」，注云「前期，前所諏之日也。十日容散齋七日，致齋三日」。其天子又有天地及山川、社稷、宗廟，諸侯直有境內山川、社稷、宗廟，卜日及戒皆同也。按《郊特牲》云「卜郊受命于祖廟，作龜于禰宮。卜之日，王立于澤，親聽誓命」，又云「獻命庫門之內，戒百官也。大廟之命，戒百姓也」，注云「王自澤宮而還，以誓命重相申勅也。王自此還齋路寢之室」。若然，卜日在澤宮，又至射宮，皆同在旬有一日，空十日，故後日乃齋也。前射三日，

宰夫戒宰及司馬、射人，宿視滌。宰夫，冢宰之屬，掌百官之徵令者。司馬，於天子政官之卿，凡大射，則合其六耦。滌，謂溉器，埽除射宮。

**疏**「前射」至「視滌」○

注「宰夫」至「射宮」○釋曰：此「宰夫戒」是再戒之宿，不云「宿」者，辟下「宿視滌」。何者？「宰夫戒」是申戒，下

<sup>①</sup>「命」，阮校云：閩、監本作「令」，與疏合。按《周禮》原文亦作「令」。

<sup>②</sup>「贊」上，曹校云脫「射與」二字。

「宿」是夕宿，是以《宗伯》云「凡祀大神、享大鬼、祭大示，帥執事而卜日，宿視滌濯」，注云「宿，申戒也」，此前有「射人戒」，是七日前期，此「宰夫」戒是申戒。又知「宿」是夕宿者，以戒、宿同文，明不同日。以其上云「前射三日」戒，明此非三日，是前一日矣。云「宰夫，冢宰之屬」者，按《大宰》云「小宰中大夫二人，宰夫下大夫四人」，屬冢宰，故云「冢宰之屬」。云「掌百官之徵令」者，《宰夫職》文。云「司馬，於天子政官之卿」者，《小宰》職云「四曰司馬，其屬六十，掌邦政」是也。云「凡大射，則合其六耦」者，《大司馬職》云「若大射，合諸侯之六耦」，是將祭而射，故使諸侯爲耦。若其餘射，則卿大夫以下爲耦也。云「滌謂溉器，埽除」者，以其諸侯射，先行燕禮，不視滌器，明滌器是射器及「埽除射宮」也。司馬命量人量侯道與所設乏以狸步。大侯九十，參七十，干五十。設乏，各去其侯西十，北十。量人，司馬之屬，掌量道巷塗數者。侯謂所射布也。尊者射之以威不寧侯，卑者射之以求爲侯。量侯道，謂去堂遠近也。容謂之乏，所以爲獲者之禦矢。狸之伺物，每舉足者，止視遠近，<sup>①</sup>爲發必中也，是以量侯道取象焉。《鄉射·記》曰「侯道五十

弓」，《考工記》曰「弓之下制六尺」，則此狸步六尺明矣。大侯，熊侯，謂之大者，與天子熊侯同。參讀爲穆，穆，雜也。雜侯者，豹鵠而麋飾，下天子大夫也。干讀爲豳，豳侯者，豳鵠豳飾也。大夫將祭於己，射麋侯。士無臣，祭不射。

**疏**「司馬」至「北十」○注「量人」至「不射」○釋曰：

云「量人，司馬之屬，掌量道巷塗數」者，《量人職》文，量人屬司馬，故云「司馬之屬」也。云「侯謂所射布也」者，以其三侯皆以布，<sup>②</sup>以皮爲鵠，旁又飾以皮也。云「尊者射之以威不寧侯」者，即《梓人》云「毋或若汝不寧侯，不屬於王所，故抗而射汝」是也。云「卑者射之以求爲諸侯」者，<sup>③</sup>《射義》云「故天子之大射，謂之射侯。射侯者，射爲諸侯也。射中則得爲諸侯，射不中則不得爲諸侯」是也。「容謂之乏」，<sup>④</sup>所以爲獲者之禦矢者，此云「乏」，《周禮·射人》云「容所以爲獲者之禦矢」。解容、乏之義，以其容身，故得禦矢，言乏，矢於此乏置不去也。云「則此狸步六尺

①「止」，阮校云：徐本、聶氏、毛本俱作「正」。

②「布」下，阮校云：毛本、《通解》有「爲之而」三字。

③「諸」，注文無此字。

④「容」上，阮校云：毛本有「云」字。



明矣」，<sup>①</sup>鄭云此者，陰破先鄭，故先鄭注《射人》「狸步謂一舉足爲步，於今爲半步」，故鄭注彼，亦引「弓之下制六尺」以非之也。云「大侯，熊侯，謂之大者，與天子熊侯同」者，《司裘》職云「王大射則共虎侯、熊侯、豹侯，設其鵠。諸侯則共熊侯、豹侯」，彼畿內諸侯二侯，以熊侯爲首；此畿外諸侯三侯，與天子同，不得與天子同。<sup>②</sup>其大射時所用物，宜與畿內諸侯同用熊，又與天子熊侯同，故云「大侯」也。云「參讀爲糝，糝，雜也。雜侯者，豹鵠而麋飾，下天子大夫也」者，《司裘》云「卿大夫則共麋侯」，此則以豹皮爲鵠，以麋飾其側，不用純麋，是「下天子大夫也」。必知以豹爲鵠，以麋爲飾者，天子卿大夫用麋侯，諸侯卿大夫亦用麋侯，並據己家用之。若助祭，亦射君之第二侯，明君之第二侯用麋飾其側，侯以飾得名。又畿內諸侯第二侯用豹爲鵠，故知畿外諸侯亦以豹皮爲鵠可知。云「干讀爲豢，豢侯者，豢鵠豢飾也」者，亦取捷點意。「大夫將祭於己，射麋侯」者，《司裘》云「卿大夫共麋侯」，是天子卿大夫，以《孝經》云「大夫有爭臣三人」，以有臣故將祭得大射擇士。鄭言此者，以己射用麋侯，又見助君祭，亦射君之麋侯。云「士無臣，祭不射」者，《孝經》云「士有爭友」，不言臣，以僕隸爲友。《司裘》「卿大夫」下不言士，故祭不

言士大射。若然，士有賓射、燕射，不得大射。雖不得大射，得與君賓射，故《射人》注：「不言士者，此與諸侯之賓射，士不與也。」若然，諸侯之士亦然也。遂命量人、

巾車張三侯。大侯之崇見鵠於參，參見鵠於干，干不及地武，不繫左下綱。設乏，西十，北十，凡乏用革。巾車，於天子宗伯之屬，掌裝

衣車者，亦使張侯，侯，巾類。崇，高也，高必見鵠，鵠所射之主。《射義》曰：「爲人君者以爲君鵠，爲人臣者以爲臣鵠，爲人父者以爲父鵠，爲人子者以爲子鵠。」言射中此乃能任己位也。鵠之言較，較，直也，射者所以直己志。或曰鵠鳥名，射之難中，中之爲俊，是以所射於侯取名也。《淮南子》曰：「鵠鵠知來。」然則所云正者，正也。亦鳥名，

<sup>①</sup>「則此狸步」至「以非之也」五十一字，阮校云：《要義》少「鄭云此故先故注彼亦也」十字，餘與毛本同。陳、閩、《通解》俱作：「則此狸步六尺明矣者，先鄭注射人狸步謂一舉足爲步，於今爲半步。後鄭注引鄉射，考工爲證者，所以明步爲六尺，而非三尺也。」

<sup>②</sup>「不得與天子同」，曹校云此六字當在上「彼畿內諸侯二侯」句下。

齊、魯之間名題肩爲正，正、鵠皆鳥之捷黠者。《考工記》曰「梓人爲侯，廣與崇方，參分其廣，而鵠居一焉」，則大侯之鵠方六尺，穆侯之鵠方四尺六寸大半寸，豢侯之鵠方三尺三寸少半寸。及，至也。武，迹也。中人之足長尺二寸。以豢侯計之，穆侯去地一丈五寸少半寸，大侯去地二丈二尺五寸少半寸。凡侯北面，西方謂之左。前射三日，張侯設乏，欲使有事者豫志焉。

**疏**「遂命」至「用革」○注

「巾車」至「志焉」○釋曰：上文直命量人量侯道及乏遠近之處，此經論張侯高下之法也。云「設乏，西十，北十」者，《鄉射》云「乏參侯道，居侯黨之一，西五步」，注云「此乏去侯北十丈，西三丈」。云「西十，北十」，則西與北皆六丈，不得爲三分居侯黨之一者，以其三侯入堂深故也。<sup>①</sup>若然，此三侯之下總云「西十，北十」，則三侯之乏皆西十北十矣。西亦六丈者，以三侯恐矢揚傷人，與一侯亦異也。云「巾車，於天子宗伯之屬」者，《周禮》巾車屬宗伯，故云「宗伯之屬」也。云「掌裝衣車」者，天子五路，木路無革鞅，革路有革無異飾，玉路、金路、象路有革鞅，又有玉、金、象爲飾，「孤乘夏篆，卿乘夏縵」，皆以物爲飾，故云「裝衣車者」也。云「侯，巾類」者，侯亦有飾，故《鄉射·記》云「凡畫者，丹質」，及正鵠之飾，故云「巾類」也。引《射義》

者，欲證射以鵠爲主也。云「鵠之言較，較，直也，射者所以直己志」，并下注云「然則所云正者，正也」，此取《射義》解之。故《射義》云「射者內志正，外體直，然後持弓矢審固」，注云「內正外直。正鵠之名，出自此」是也。云「或曰鵠鳥名，射之難中，中之爲俊，是以所射於侯取名也」，并下云「亦鳥名，齊、魯之間名題肩爲正，正、鵠皆鳥之捷黠者」，鄭以正、鵠之名有此二義，故兩解之也。云「《考工記》梓人爲侯，廣與崇方，參分其廣，而鵠居一焉」者，三等皆高廣等。引之者，鄭欲解經「見鵠」之義，故先知侯鵠廣狹尺寸也。云「則大侯之鵠方六尺」者，以侯道九十弓，弓取二寸，二九十八，侯中丈八尺，三分其侯而鵠居一，故知鵠方六尺也。云「穆侯之鵠方四尺六寸大半寸」者，以侯道七十弓，弓取二寸，則侯中丈四尺，三分其侯鵠居其一。丈四取丈二，三分得四尺；又於二尺之內取尺八寸，又得六寸；又二寸一寸爲三分，總六分，取二分，二分於三分爲三分寸之二，三分寸之二即是大半寸。故云「穆侯之鵠方四尺六寸大半寸」也。云「豢侯之鵠方三尺三寸少半寸」者，豢侯侯道五十弓，弓取二寸，則侯中方一丈，三分

①「堂」，曹校云當爲「庭」。

其侯鵠居一焉，一丈且取九尺，得三尺；一尺取九寸，得三寸；一寸分爲三分，得一分，則是三分寸之一，三分寸之一則是少半寸，故云「豺侯之鵠方三尺三寸少半寸」也。云「中人之足長尺二寸」者，無正文，以目驗而知。云「以豺侯計之」者，以大侯、穆侯高下無文，豺侯云「下綱不及地武」，則豺侯下綱去地尺二寸，以是從豺侯計之也。豺侯中一丈，上下躬及上下舌各二尺，合八尺，是丈八尺矣。又下不及地尺二寸，則豺侯上綱去地丈九尺二寸也。穆侯侯中丈四尺，中上中下各四尺，得八尺，并之二丈二尺也。鵠居侯中三分之一，則鵠下亦有四尺六寸大半寸，通躬身四尺爲八尺六寸三分寸之二矣。<sup>①</sup>張法，穆侯鵠下畔與豺侯之上綱齊，<sup>②</sup>所謂「見鵠於豺」，自餘穆侯鵠下畔八尺六寸大半寸在掩。豺侯亦如之。豺侯上綱本去地丈九尺二寸，直掩八尺，上有一丈一尺二寸在，復掩六寸，上有一丈六寸在，復掩三分寸二，唯有一丈五寸三分寸一在。「少半寸」者，即三分寸一也；言「大半寸」者，即三分寸二也，故知穆侯下綱去地一丈五寸少半寸也。大侯中丈八尺，中之上下各四尺，即八尺矣。中方丈八尺，更加八尺，二丈六尺也。穆侯去地丈五寸少半寸。本上綱、下綱相去二丈二尺，其舉也，上綱去地三丈二尺五寸少半寸

也。大侯鵠下畔與穆侯上綱齊，所謂「見鵠於穆」也。侯中丈八尺，三分之則鵠下亦有六尺，下躬身四尺，一丈矣，則大侯自鵠以下掩穆侯一丈也。自一丈以下猶有二丈二尺五寸少半寸在，是大侯下綱去地亦然，故注依此數也。云「前射三日，張侯設乏」，知三日者，前文云「前射三日」，下云「樂人宿縣」，下云「厥明」，自前射三日以後論事不著異日，故知張侯與設乏同是射前三日矣。樂人宿縣于阼階東，笙磬西面，其南笙鍾，其南鐻，皆南陳。笙猶生也，東爲陽中，萬物以生。《春秋傳》曰：「大族所以金奏，贊陽出滯。沽洗所以脩絜百物，<sup>③</sup>考神納賓。」是以東方鍾磬謂之笙，皆編而縣之。《周禮》曰：「凡縣鍾磬，半爲堵，全爲肆。」有鍾有磬爲全。鐻如鍾而大，奏樂以鼓鐻爲節。**疏**「樂人」至「南陳」○注「笙猶」至「爲節」○釋曰：云「東爲陽中，萬物以生」者，陽氣起於子，盛

①「身」，阮校云：毛本、《通解》作「與舌」二字。

②上「侯」原無，阮校云：毛本重「鵠」字。按上「鵠」字當作「侯」。孫校云：「鵠」不必重。據補。

③「沽」，阮校云：毛本作「姑」。

於午，故東方爲陽中也。萬物以生，以其正月三陽生，大族用事，故萬物生焉。云《春秋傳》者，是《外傳》伶州鳩對周景王辭。引之者，證鍾磬爲笙之事。大族者，寅上候氣之管，度律均鍾，金即鍾也，故奏之所以「贊陽出滯」。云「姑洗所以脩絜百物，考神納賓」者，亦據度律均鍾，姑洗在辰三月，百物脩絜而出。「考神納賓」，謂祭祀而有助祭之賓客。但東方陽管唯有此二律，故據此二律言之，是以名東方鍾磬爲笙也。云「皆編而縣之」者，言「皆」者，欲解磬非應律之物，與鍾同言之者，以其鑄與鼓雖同西面，與鍾同，不編之。而磬與鍾同十六枚而在一虞，與鍾同編，又同宮，故兼言磬。是以《磬師職》云「掌教擊磬，擊編鍾」，注云「磬亦編，於鍾言之者，鍾有不編，不編者鍾師擊之」，是其磬與鍾編之。此東方云笙而西方言頌者，以其夷則，無射主西方成功收藏，故稱頌。頌者，美盛德之形容，故云頌也。但天有十二次，地有十二辰。按《書傳》云：「天子出，撞黃鍾之鍾，右五鍾皆應。入則撞蕤賓之鍾，左五鍾皆應。」左右云「五」，則除黃鍾、蕤賓並爲陽，而應鍾、林鍾已西爲「右五」也，大呂、中呂已東爲「左五」也。云《周禮》曰：「凡縣鍾磬，半爲堵，全爲肆」者，《周禮·小胥職》文。鼓鑄亦縣，而直言鍾磬者，據編縣者爲文。

鼓鑄筭虞之上各縣一而已，不編之。鄭彼注云：「半之者，謂諸侯之卿大夫、士也。諸侯之卿大夫半天子之卿大夫。」天子之卿大夫判縣，東西各有鍾磬，是全之爲肆。諸侯卿大夫雖同判縣，半天子卿大夫，取一相鍾磬分爲兩相，西縣鍾，東縣磬。而天子之士特縣，直東有鍾磬，且是全之爲肆。<sup>①</sup>諸侯之士直特縣，半天子之士，縣磬而已，或於階間，或於東方。又天子宮縣，四面皆有。諸侯軒縣，闕南面。面皆有鍾、磬，鑄及鼓具有也。卿大夫、士皆無鑄者，若有鑄，則諸侯臣半天子臣，不得具，是以闕之。云「鑄如鍾而大」者，《特性》注亦云「鑄如鍾而大」，並據《國語》而注之，以言鑄形如鍾而復大，以大故特一縣，不編之也。云「奏樂以鼓鑄爲節」者，按《周禮·鑄師》云「掌金奏之鼓」，注云「謂主擊晉鼓，以奏其鍾鑄也」，以此言之，則先擊鼓後擊鍾鑄，皆是與樂爲節，故鄭注以鼓鑄爲節，不言鍾磬，已注解，故不言也。建鼓在阼階西，南鼓。應鼗在其東，南鼓。建猶樹也，以木貫而

① 「且是」，阮校云：「毛本『且』作『亦』，《通解》『且是』作『是亦』。」

載之，樹之跗也。南鼓，謂所伐面也。應鼗，應朔鼗也，先擊朔鼗應之。<sup>①</sup>鼗，小鼓也。在東，便其先擊小，後擊大也。鼓不在東縣南，爲君也。

**疏**「建鼓」至「南鼓」○注

「建猶」至「君也」○釋曰：下西面、北面建鼓皆言一，此建鼓不言一者，彼在本方故須言一，見無他鼓，此鼓本東方，以爲君，故移來在北方，故異其文，不言一也。云「建猶樹也，以木貫而載之，樹之跗也」者，按《明堂位》云「殷楹鼓，周縣鼓」，注云「楹，爲之柱，貫中上出也。縣，縣之於簣虞也」，此云「以木貫而載之」，則「爲之柱，貫中上出」一也。周人縣鼓，今言建鼓，則殷法也，若醺用酒之類，主於射，略於樂，故用先代鼓。云「鼓不在東縣南，爲君」者，決下「一建鼓在其南，東鼓」者爲賓，復不在東縣北者，取順君面故也。西階之西頌磬，東面，其南鍾，其南鑄，皆南陳。一建鼓在其南，東鼓，朔鼗在其北。言成功曰頌，西爲陰中，萬物之所成。《春秋傳》曰：「夷則所以詠歌九則，平民無忒。無射所以宣布哲人之令德，示民軌義。」是以西方鍾磬謂之頌。朔，始也。奏樂先擊西鼗，樂爲賓所由來也。鍾不言頌，鼗不言東鼓，義同省文也。古文「頌」爲「庸」。

**疏**「西階」至「其北」○

注「言成」至「爲庸」○釋曰：言《春秋傳》者，亦是《外傳》文。云「詠歌九則」者，謂六府三事，九功之德是也，以此九則平民，使無差慝。云「無射所以宣布哲人之令德」者，哲人謂后稷，后稷以稼穡之功成於季秋，先王之業，以農爲本，故云「示民軌義」，謂軌法義理也。云「先擊西鼗，樂爲賓所由來也」者，解先擊朔鼗之意。<sup>②</sup>賓向外來，位在西，其樂主爲樂賓，故先擊朔鼗，應鼗應之也。云「鍾不言頌，鼗不言東鼓，義同省文也」者，決上東方言「笙鍾」，應鼗言「南鼓」，此當言頌鍾，東鼓，義與上文同，亦合有而不言者，省文也。云「古文頌爲庸」者，此雖疊古文不從，亦通義是。《尚書》云「笙庸以閒」，笙東方，鍾磬西方，是庸亦功也，亦有成功之義也。一建鼓在西階之東，南面。言面者，國君於其群臣備三面爾，無鍾磬，有鼓而已。其爲諸侯則軒縣。

**疏**「一建」至「南面」○注「言面」

至「軒縣」○釋曰：云「言面者，國君於其群臣備三面爾」

<sup>①</sup>「應」上，阮校云：毛本有「應鼗」二字，《通解》、楊氏、敖氏同。

<sup>②</sup>「意」，阮校云：毛本作「義」。

者，言國君合有三面，爲辟射位，又與群臣射，闕北面，無鍾、磬、搏，直有一建鼓而已，故不言「南鼓」，而言「南面」也。云「其爲諸侯則軒縣」者，若與諸侯饗燕之類，則依諸侯軒縣，三面皆有鼓與鍾、磬、搏。

### 蕩在建鼓之間。

蕩，竹也，謂笙、簫之屬。倚於堂。

### 疏「蕩在建鼓之間」

注「蕩竹」至「於堂」○釋曰：按《禹貢》云「篠簫既敷」，注云「簫，竹」，故知此蕩亦竹也。其器則管也，是以下云「乃管《新宮》」，注云「管謂吹蕩」，故知竹管也。按《小師職》注云「管如篴而小，併兩而吹之，今大予樂官有焉」。《爾雅》云：「大笙謂之巢，小者謂之和。」簫大者二十三管，長尺四寸；小者十六管，長尺二寸。大笙十九簧，小者十三簧。若然，笙、簫與管器異，以其皆用竹，故云「笙、簫之屬」也。云「倚於堂」者，管擬吹之，不倚在兩建鼓間者，<sup>①</sup>以不得倚於鼓，故知倚於堂也。

### 鼓倚于頌磬西紃。

鼓而小，有柄，賓至搖之以奏樂也。紃，編磬繩也。設鼓於磬西，倚于紃也。《王制》曰：「天子賜諸侯樂，則以祝將之。賜伯子男樂，則以鼗將之。」

### 疏「鼗倚」至「西紃」

注「鼗如」至「將之」○釋曰：知「鼗，如鼓而小」者，按《那》詩云「猗與那與，置我鼗鼓」，傳云「猗，歎辭。那，多也」。鄭

讀置爲植，「植鼗鼓者，爲楹貫而樹之。美湯受命伐桀，定天下而作護樂，<sup>②</sup>故歎之，多其改夏之制，乃始植我殷家之樂鼗與鼓也。鼗雖不植，貫而搖之，亦植之類」。以其殷人植鼓，以木貫之，而下有拊，鼗亦以木爲柄而貫之，但手執而不植爲異，故云「亦植之類」。鼗與鼓同文，是「鼗，如鼓而小」也。知「有柄，賓至搖之以奏樂」者，按《睪瞭職》云「掌凡樂事：播鼗、擊頌磬、笙磬」，磬言擊，鼗言播，播爲「搖之」可知。鼗所以節樂，賓至乃樂作，故至賓至搖之以奏樂也。<sup>③</sup>云「紃，編磬繩也」者，紃若天子、諸侯「冕而朱紃，用組」之類，磬又編縣之用紃，故知「紃，編磬繩也」。知「設鼗於磬西，倚於紃」者，以其鍾磬皆面向東，人居其前，西面，故知鼗在磬西，倚之於紃也。引《王制》者，證鼗爲節樂之器。祝狀如漆笛，中有椎，所以節樂。鼗亦節樂，祝大於鼗，故賜公侯樂則以祝將命，賜伯子男樂則以鼗將命。自餘樂器陳於外也。

### 厥明，司宮尊于東

①「不」，曹校云此字似衍。

②「護」，阮校云：毛本作「護」。

③上「至」，阮校云：《通解》、毛本作「於」。孫校云：「至」疑「云」。

楹之西，兩方壺，膳尊兩甔在南，有豐。冪用錫若絺，綴諸箭。蓋冪，加勺，又反之。皆玄尊，酒在北。膳尊，君尊也。後陳之，尊之也。豐以承尊也，說者以爲若井鹿盧。其爲字從豆曲聲，近似豆，大而卑矣。冪，覆尊巾也。錫，細布也。絺，細葛也。箭，篠也。爲冪蓋卷辟，綴於篠橫之也。又反之，爲覆勺也。皆玄尊，二者皆有玄酒之尊，重本也。酒在北，尊統於君，南爲上也。唯君面尊，言專惠也。今文「錫」或作「絺」，「絺」或作「綌」。古文「箭」作「晉」。

**疏**「厥明」至

「在北」○注「膳尊」至「作晉」○釋曰：自此盡「羹定」，論豫設尊、洗、具饌之事。案《禮記·燕義》諸侯射先行燕禮，此以下至「東陳」，<sup>①</sup>皆陳設器物，與《燕禮》同，但文有詳略耳。云「說者以爲若井鹿盧」者，鹿盧之形即葬下棺碑間重鹿盧之輩，<sup>②</sup>今見井上豎柱，夾之以索，繞而挽之是也。云「其爲字從豆曲聲」者，此謂上聲下形之字。年和，穀豆多有，故從豆爲形也。豐者承尊之器，象形也，是以豐年之字曲下著豆。今諸經皆以承尊爵之曲，不用本字之曲而用豐年之豐，故鄭還依豐字解之，故云「其爲字從豆」爲形，以曲爲聲也。云「近似豆大而卑矣」者，既用豆

爲形，還近似籩豆之豆，舉漢法而知。但豆口徑尺，柄亦長尺，口徑小而又高，此承尊之物，口、足、徑各宜差寬，中央亦大，共高尺，比常豆而下，<sup>③</sup>故云「近似豆而卑」，但斲一大木爲之，取其安穩。此豐若在宗廟，或兩君燕，亦謂之沽，致爵在於上，故《論語》云「邦君爲兩君之好，有反沽」，鄭注云「反沽，反爵之沽」是也。必用豐年之豐爲沽者，以其時和年豐，萬物成熟，粢盛豐備，以共郊廟，神歆其祀，祝嘏其福。至鄉飲酒、鄉射、燕禮、大射或君與臣下及四方之賓燕，家富民足，人情優暇，旨酒嘉肴，盈尊滿俎，於以講道論政，既獻酬侑酢，至無筭爵行，禮交樂和，上下相歡，勸飲爲樂故也。云「錫，細布也」者，《喪服·記》曰「錫者，十五升抽其半，無事其纓，有事其布，曰錫」，故知錫是細布也。謂之錫者，治其布使之滑易也。云「唯君面尊」者，《玉藻》文，注云「面，嚮也」。彼謂人君燕臣子，專其恩惠，此《大射》亦謂人君燕臣下，與彼是同專惠

① 「此以下」，阮校云：毛本作「自此」。

② 「輩」，阮校云：陳、閩、《通解》作「類」。

③ 「常」，阮校云：陳、閩、《通解》作「於」。「下」，阮校云：毛本、《通解》作「差短」。



之道，故皆尊鼻嚮君。云「言專惠」者，決《鄉飲酒》「尊于房戶之間」，賓主夾之，不得專惠故也。尊士旅食于西鑄之南，北面，兩圜壺。旅，衆也。士衆食未得正祿，謂庶人在官者。圜壺，變於方也。賤，無玄酒。

**疏**

「尊士」至「圜壺」○注「旅衆」至「玄酒」○釋曰：前設縣時，鑄南更有一建鼓，今設尊不應在鼓北，而云「鑄南」者，其實在鼓南，門西北面，與燕禮同，而云「鑄南」者，遙繼鑄而言。必繼鑄者，樂以縣爲主故也。又尊于大侯之乏

東北，兩壺獻酒。爲隸、僕人、巾車、穆侯、豸侯之獲

者。獻讀爲沙，沙酒濁，特沛之，必摩沙者也。兩壺皆沙

酒。《郊特牲》曰：「汁獻說于醑酒。」服不之尊俟時而陳於

南，統於侯，皆東面。**疏**「又尊」至「獻酒」○注「爲隸」至

「東面」○釋曰：知「爲隸、僕人、巾車、穆侯、豸侯之獲者」，

以其此人皆有功，又下文以此尊獻之，故知也。知「沙酒

濁」者，以五齊從下向上差之，醖、沈清於泛、醴，鬯鬱又在

五齊之上，<sup>①</sup>故知沙酒濁也。云「特沛之，必摩沙者也」

者，此解名沙酒之意。云「《郊特牲》曰：『汁獻說于醑酒』」

者，此以五齊中取醑酒盥齊沛鬱鬯之事。獻，沙也。沛鬱

鬯之時，和盥齊以手摩沙，出其香汁。說，清也，沛之使清

也。此爲隸僕以下卑賤之人而獻鬱鬯者，此所得獻皆因

祭侯，謂侯之神，<sup>②</sup>故用鬱鬯也。云「服不之尊俟時而陳

於南，統於侯，皆東面」，知此不爲大侯服不設者，案下文

云「服不之尊東面，南上」，故鄭云「俟時而陳於南，統於

侯，皆東面」也。設洗于阼階東南，疊水在東，

筐在洗西，南陳。設膳筐在其北，西面。或

言「南陳」，或言「西面」，異其文也。**疏**「設洗」至「西面」

○注「或言」至「文也」○釋曰：云「異其文也」者，洗筐言南

陳，亦西面，膳筐言西面，亦南陳，其實所從言異，<sup>③</sup>尊君

故也。又設洗于獲者之尊西北，水在洗北，

筐在南，東陳。亦統於侯也。無爵，因服不也。有

筐，爲莫虛爵也。服不之洗亦俟時而陳於其南。**疏**「又

設」至「東陳」○注「亦統」至「其南」○釋曰：云「亦統於侯

也」者，前設尊兩獻酒亦云「服不之尊俟時而陳於南，統於

侯」，今此設筐在南，後設服不之洗在南，亦統於侯。小

侯

①「鬯鬱」，阮校云：毛本、《通解》作「鬱鬯」。

②「謂」，曹校云當作「爲」。

③「實」下，曹校云殿本增「同」字是。



臣設公席于阼階上，西鄉。司宮設賓席于戶西，南面，有加席。卿席賓東，東上。小卿賓西，東上。大夫繼而東上。若有東面者，則北上。席工于西階之東，東上。諸公阼階西，北面，東上。唯賓及公席布之也，其餘樹之於位後耳。小卿，命於其君者也，席於賓西，射禮辨貴賤也。諸公，大國有孤卿一人，與君論道，亦不典職，如公矣。

**疏**「小臣」至「東上」○注「唯賓」至「公矣」○釋曰：知

「賓及公席布之，其餘樹之於位後」者，下文更有孤卿大夫席文，故知也。此實未布而言布之者，欲辨尊卑，故先言也。孤尊而後言之者，言「若」是有無不定，故後言也。云「小卿，命於其君者也」者，按《王制》云「大國三卿，皆命於天子；次國三卿，二卿命於天子，一卿命於其君；小國亦三卿，一卿命於天子，二卿命於其君。若言「小卿」，據次國已下有之。云「射禮辨貴賤也」者，決《燕禮》大、小卿皆在尊東，<sup>①</sup>西無小卿位，彼主於燕，不辨貴賤故也。云「與君論道，亦不典職，如公矣」者，成王《周官》云「立大師、大傅、大保，茲惟三公，論道經邦，燮理陰陽」，是三公論道無職。此大國立孤一人，論道與公同，亦無職，故云「不典

職，如公」也。縱鄭不見《周官》，於《周禮》三公亦無職，《考工記》云「或坐而論道」，亦通及三公矣。官饌。百官各饌其所當共之物。

**疏**「官饌」○釋曰：《燕禮》宰饌，

此不言宰而言「官」者，欲見非獨宰，故鄭云「百官各饌」。羹定。亨肉孰也。《射義》曰：「諸侯之射也，必先行燕禮。」燕禮性用狗。射人告具于公。公升，即位

于席，西鄉。小臣師納諸公、卿、大夫，諸公、卿、大夫皆入門右，北面，東上。士西方，東面，北上。大史在干侯之東北，北面，東上。士旅食者在士南，北面，東上。小臣師從者在東堂下，南面，西上。大史在干侯東北，士旅食者在士南，為有侯，人庭深也。小臣師，正之佐也。正相君，出入君之大命。

**疏**「射人」至「西上」○注

「大史」至「大命」○釋曰：自此盡「少進」，論群臣立位之事。云「大史在干侯東北，士旅食者在士南，為有侯，人庭深也」者，決《燕禮》「士旅食者立于門西，東上」。此不繼

①「尊」，據文義似當為「賓」。

門而在土南繼士者，爲有侯，故人庭深也。云「小臣師，正之佐也」者，下有小臣正，正，長也，故以師爲佐。云「正相君，出入君之大命」者，小臣正，小臣中尊，如天子大僕，故引《大僕職》解之也。公降，立于阼階之東南，南鄉。小臣師詔揖諸公、卿、大夫，諸公、卿、大夫西面，北上。揖大夫，大夫皆少進。詔，告也。變爾言揖，亦以其人庭深也。上言大夫，誤衍耳。

**疏**注「詔告」至「衍耳」○釋曰：《燕禮》言「爾」，以其近門去君遠而言「爾」，爾，近也，移也，揖之使移近。此人庭深，故不言「爾」而言「揖」，揖之而已，不須移近之也。云「上言大夫，誤衍」者，以其大夫與公卿面有異，<sup>①</sup>故下別言「大夫少進」，明上有大夫，誤衍「大夫」、「大夫」四字也。

**大射正擯。**大射正，射人之長。**疏**「大射正擯」○注

「大射正射人之長」○釋曰：自此盡「門外，北面」，論請立賓之事。大射正對射人爲長，若小臣正對小臣師亦爲長。擯者請賓。公曰：「命某爲賓。」某，大夫名。擯者命賓，賓少進，禮辭。命賓者，東面，南顧。辭，辭以不敏。反命。以賓之辭告於君。又命之。

賓再拜稽首，受命。又，復。擯者反命。賓出，立于門外，北面。公揖卿大夫，升，就席。小臣自阼階下北面請執冪者與羞膳者。請士可使執君兩甌之冪及羞脯醢，庶羞於君者。方、圓壺，獻無冪。

**疏**「公揖」至「膳者」○注「請士」至「無冪」○釋曰：自此盡「公卿者」，論卿大夫定位及請執冪之事。<sup>②</sup>云「請士可使」者，鄭知請士者，據《燕禮》而知。云「方、圓壺，獻無冪」者，方、圓壺，臣尊；獻，獲者尊，皆無冪。乃命執冪者。執冪者升自西階，立于尊南，北面，東上。命者於西階前以公命命之。東上，執玄尊之冪爲上。羞膳者從而東，由堂東升自北階，立于房中，西面，南上。不言命者，不升堂，略之。**疏**「乃命」至「東上」○注「命者」至「略之」○釋曰：知命之在「西階前」者，以其小臣位在東堂下，於阼階請公命，乃就西階請

<sup>①</sup>「面」，阮校云：毛本作「而」。

<sup>②</sup>「定」，阮校云：毛本作「庭」。

執冪者，<sup>①</sup>以其執冪者士位在西故也。云「羞膳者從而東」者，已於《燕禮》釋訖。云「不升堂」者，但不由南方升，略之，升自北堂，是亦升堂矣。膳宰請羞于諸公卿者。膳宰請者，異於君也。

**疏**「膳宰」至「卿者」○釋曰：不言命者，對君言命，於臣略之。擯者納賓。賓及

庭，公降一等揖賓。賓辟。及，至也。辟，遂遁不敢當盛。**疏**「擯者」至「賓辟」○注「及至」至「當盛」○釋

曰：自此盡「賓荅再拜」，論主人迎賓拜至及獻賓之事。云「公降一等揖賓」，不言請賓至位就席者，亦是以賓與主人為禮，禮不參，故不請也。此言「賓辟」，《燕禮》不言，文略也。公升，即席。以賓將與主人為禮，不參之。奏

《肆夏》。《肆夏》，樂章名，今亡。呂叔玉云：「《肆夏》，

《時邁》也。」《時邁》者，大平巡守祭山川之樂歌，其詩曰「明昭有周，式序在位」，又曰「我求懿德，肆于時夏」。奏此以延賓，其著宣王德，勸賢與？《周禮》曰：「賓出入，奏

《肆夏》。」**疏**「奏肆夏」○注「肆夏」至「肆夏」○釋曰：云

「《肆夏》，樂章名，今亡」者，案《周禮·鍾師》云「以鍾鼓奏九《夏》，杜子春引呂叔玉，以為「《肆夏》，《時邁》也；《繁

遏》，《執僇》也；《渠》，《思文》也」，後鄭云「以《文王》、《鹿

鳴》言之，則九《夏》皆《詩》篇名，《頌》之族類也。此歌之大者，載在樂章，樂崩亦從而亡，是以《頌》不能具」。鄭彼

注破呂叔玉，此注亦云「《肆夏》，樂章名，今亡」，與彼注亦同。今此又引呂叔玉於下者，以無正文，叔玉或為一義，

故鄭於此兩解之也。云「祭山川之樂歌」者，以其《時邁》序云「巡守告祭柴望也」，謂巡守祭當方山川，則《王制》及

《尚書》云「望秩於山川」是也。云「明昭有周」者，美武王有明明於周。<sup>②</sup>云「式序在位」者，式，用也，任賢用能，序

之使在官位。云「我求懿德」者，懿，美也，我求取美德之人也。云「肆于時夏」，肆，遂也，夏，大也，能如此遂於王

道之大。云「奏此以延賓，其著宣王德，勸賢與」者，今國君歌此詩延賓人者，其欲著明諸侯宣布王之德，以勸賢

人，使有德。言「與」者，鄭以義解之，無正文，故云「與」以疑之也。云「《周禮》曰：「賓出入，奏《肆夏》」者，按《大司

樂》云「王出入則令奏《王夏》，尸出入則令奏《肆夏》，牲出人則令奏《昭夏》，下云「大饗不人牲，其他皆如祭祀」，鄭

<sup>①</sup>「請」，曹校云當為「命」。

<sup>②</sup>下「明」，阮校云：監本作「昭」。

注云「大饗，饗賓客也，彼賓客謂諸侯來朝者也。不入牲，牲不入，亦不奏《昭夏》也。其他，謂王出入，賓客出入，亦奏《王夏》、《肆夏》，以此言之，王用《肆夏》以饗諸侯來朝。今引之者，證燕時納賓亦奏之。按《燕禮·記》云「若以樂納賓，則賓及庭，奏《肆夏》，鄭云「卿大夫有王事之勞，則奏此樂焉」，此亦同彼注也。若臣無王事之勞，則如常燕，無以樂納賓法也。又此納賓樂，故諸侯亦得用，若升歌則不可。若賓醉而出，奏《陔夏》，與此異也。賓升自西階。主人從之，賓右北面至再拜。賓荅再拜。主人，宰夫也，又掌賓客之獻飲食。君於臣，雖爲賓，不親獻，以其莫敢亢禮。主人降洗，洗南西北面。賓將從降，鄉之。不於洗北，辟正主。**疏**「主人」至「北面」○注「賓將」至「正主」○釋曰：自此至「虛爵降」，論主人獻賓之事也。云「不於洗北，辟正主」者，按《鄉飲酒》、《鄉射》主人降洗，「洗北，南面」，是正主，此宰夫代君爲主，故不於洗北南面也。賓降階西，東面。主人辭降。賓對。對，荅。主人北面盥，坐取觚，洗。賓少進，辭洗。主人坐奠觚于篚，

興，對。賓反位。賓少進者，所辭異，宜違其位也。獻不用爵，辟正主。主人卒洗，賓揖，<sup>①</sup>升。賓每先升，尊也。<sup>②</sup>主人升。賓拜洗。主人賓右奠觚荅拜，降，盥。賓降，主人辭降，賓對。卒盥。賓揖，升。主人升，坐取觚。取觚，將就瓦甒酌膳。執甒者舉甒。主人酌膳。執甒者蓋甒。酌者加勺，又反之，反之，覆勺。筵前獻賓。賓西階上拜，受爵于筵前，反位。主人賓右拜送爵。賓既拜，於筵前受爵，退復位。**疏**注「賓既」至「復位」○釋曰：云「賓既拜，於筵前受爵」者，鄭恐讀者以「拜」下讀爲句。宰胥薦脯醢。宰胥，宰官之吏也。不使膳宰薦，不主於飲酒，變於燕。**疏**注「宰胥」至「於燕」○釋曰：云「不使膳宰薦者，不主飲酒，變於

① 「揖」下，阮校云：毛本有「乃」字。  
② 「尊也」，阮校云：毛本作「揖之」。

燕」者，決《燕禮》使膳宰薦，主於飲酒故也。賓升筵。

庶子設折俎。庶子，司馬之屬，掌正六牲之體者也。

《鄉射·記》曰：「賓俎脊、脅、肩、肺。」不使膳宰設俎，爲

射變於燕。賓坐，左執觚，右祭脯醢，奠爵于

薦右，興，取肺，坐，絕祭，啐之，興，加于

俎，坐，挹手，執爵，遂祭酒，興，席末坐，啐

酒，降席，坐奠爵，拜，告旨，執爵興。主人

荅拜。降席，席西也。旨，美也。樂闋。闋，止也。

樂止者，尊賓之禮盛於上也。疏「樂闋」○注「闋止」至

「上也」○釋曰：此上經云「奠爵，拜，告旨」，下經云賓

「卒爵」，則此經者，是賓啐酒節，即樂闋。《燕禮·記》亦

云「賓及庭，奏《肆夏》。賓拜酒。主人荅拜而樂闋」，亦

據啐酒時。按《郊特牲》「賓人大門而奏《肆夏》」，又曰

「卒爵而樂闋」，與此啐酒樂闋不同者，彼注謂朝聘者，故

卒爵而樂闋，此燕已臣子法，故啐酒而樂闋也。云「尊賓

之禮盛於上也」者，賓及庭，奏《肆夏》，乃至升堂飲酒，<sup>①</sup>

乃樂止，是尊賓之禮盛於堂上者也。賓西階上北面

坐，卒爵，興，坐奠爵，拜，執爵興。主人

荅拜。

### 儀禮疏卷第十六

江寧府知府陽城張敦仁編校 元和縣

學生員顧廣圻覆校

①「乃」，阮校云：毛本、《通解》無。

# 儀禮疏卷第十七

唐朝散大夫行大學博士弘

文館學士臣賈公彥等撰

賓以虛爵降。既卒爵，將酢也。**疏**「賓以虛爵降」○

釋曰：自此盡「西序東面」，論賓酢主人之事。主人降。

賓洗南，西北面，坐奠觚，少進，辭降。主人

西階西，東面，少進，對。賓坐取觚，奠于筐

下，盥洗。筐下，筐南。主人辭洗。賓坐奠觚

于筐，興，對。卒洗，及階揖，升。主人升，

拜洗如賓禮。賓降盥，主人降，賓辭降。卒

盥，揖，升，酌膳，執冪如初，以酢主人于西

階上。主人北面拜受爵。賓主人之左拜送

爵。賓南面授爵，乃於左拜。凡授爵，鄉所受者。**疏**注

「賓南」至「受者」○釋曰：知者，以經云「主人北面」，明「凡

授爵，鄉所受者」。《鄉飲酒》、《鄉射》獻、酬、酢皆然，故云

「凡」，謂南面授與所受者也。主人坐祭，不啐酒，辟

正主也。未薦者，臣也。不拜酒，主人之義。《燕禮》

曰：「不拜酒，不告旨。」遂卒爵，興，坐奠爵，拜，

執爵興。賓荅拜。主人不崇酒，以虛爵降，

奠于筐。不崇酒，辟正主也。崇，充也，謂謝酒惡相充

實。賓降，立于西階西，東面。既受獻矣，不敢安

盛。**疏**「賓降」至「東面」○注「既受」至「安盛」○釋曰：以

堂上為盛，故降下。下文於酬賓「降筵西，東南面立」，注

云「不立於序內，位彌尊」，《燕禮》注云「位彌尊，禮彌卑」，

是未酬已前禮盛者也。擯者以命升賓。賓升，立

于西序，東面。命，公命也。東西牆謂之序。**疏**注

「命公」至「之序」○釋曰：知公命者，命由尊者出故也。云

「東西牆謂之序」者，《爾雅·釋宮》文。主人盥，洗象

觚，升，酌膳，東北面獻于公。象觚，觚有象骨飾

者也。取象觚東面。不言實之，變於燕。**疏**「主人」至

「于公」○注「象觚」至「于燕」○釋曰：自此盡「于筐」，論主

人獻公之事。云「取象觚東面」者，鄉公爲敬故也。云「不言實之，變於燕」者，《燕禮》云「實之」，主於飲酒，此云「酌」，不云「實之」，主於射，略於飲酒故也。公拜受爵，乃奏《肆夏》。言乃者，其節異於賓。

**疏**「公拜」

至「肆夏」○注「言乃」至「於賓」○釋曰：言「異」者，賓及庭奏，此君受爵乃奏，是其節異故也。云「乃」者，緩辭也。

主人降自西階，阼階下北面拜送爵。宰胥薦脯醢，由左房。庶子設折俎，升自西階。

自，由也。左房，東房也，人君左右房。《鄉射·記》曰：「主人俎脊、脅、臂、肺也。」

**疏**注「人君左右房」○釋曰：以「人

君左右房」，故云「左房」。對大夫士東房而已，故云「東房」，不言「左」，以無右所對故也。①公祭，如賓禮。

庶子贊授肺。不拜酒，立卒爵，坐奠爵，拜，執爵興。凡異者，君尊，變於賓。

**疏**注「凡異」至「於

賓」○釋曰：言「異」者，使庶子授肺，「不拜酒，立卒爵」之等，皆異於賓也。主人荅拜。樂闋。升，受爵，

降，奠于筐。更爵，洗，升，酌散以降，酢于阼階下，北面坐奠爵，再拜稽首。公荅拜。

更，易也。易爵，不敢襲至尊。古文「更」爲「受」。

**疏**「更

爵」至「荅拜」○注「更易」至「爲受」○釋曰：自此盡「于筐」，論主人受公酢之事。主人坐祭，遂卒爵，興，

坐奠爵，再拜稽首。公荅拜。主人奠爵于筐。主人盥洗，升，媵觚于賓，酌散，西階上坐奠爵，拜。賓西階上北面荅拜。媵，送也。

散，方壺之酒也。古文「媵」皆作「騰」。

**疏**「主人」至「荅

拜」○注「媵送」至「作騰」○釋曰：自此盡「南面立」，論主人受賓爵之事。②主人坐祭，遂飲。賓辭。卒

爵，興，坐奠爵，拜，執爵興。賓荅拜。辭者，

辭其代君行酒，不立飲也，比於正主酬也。

**疏**注「辭者」

至「酬也」○釋曰：上文公飲「立卒爵」，此則坐飲，故以公決之。云「比於正主酬也」者，謂於《鄉飲酒》、《鄉射》，是正主酬賓之節也。主人降洗。賓降，主人辭降，

賓辭洗。卒洗，賓揖，升，不拜洗。不拜洗，酬

①「所」上，曹校云脫「無」字。

②「受賓爵」，曹校云「受」當爲「酬」，「爵」字衍。

而禮殺也。主人酌膳。賓西階上拜，受爵于筵前，反位。主人拜送爵。賓升席，坐祭酒，遂奠于薦東。遂者，因坐而奠之，不北面也。奠之者，酬不舉也。

**疏**「主人」至「薦東」○注「遂者」至「舉也」○釋曰：云「不北面也」者，此決《鄉飲酒》、《鄉射》「賓北面坐，奠觶于薦東」，注皆云「酬酒不舉」，引《曲禮》「君子不盡人之歡，不竭人之忠，以全交也」。主人降，復位。賓降筵西，東南面立。賓不立於序內，位彌尊。

**疏**注「賓不」至「彌尊」○釋曰：案《鄉飲酒》注云「位彌尊，禮彌卑」，引《雜記》「一張一弛」，此對酬時立于西序之時，不降于下，禮稍卑，位稍尊，此在席西東面，位彌尊，禮彌卑也。小臣自阼階下請媵爵者。公命長。命之，使選於長幼之中也。卿則尊，士則卑。

**疏**「小臣」至「命長」○注「命之」至「則卑」○釋曰：自此盡「反位」，論將為賓舉旅，使二大夫媵爵之事。<sup>①</sup>云「命之，使選於長幼之中」，知不取卿大夫之年長者，以其下作大夫，<sup>②</sup>不取年長。又知不取臣中位長者，以其不取卿，故鄭云「卿則尊，士則卑」，故不取之，而取下大夫尊卑處中

者。小臣作下大夫二人媵爵。作，使。媵爵者阼階下皆北面再拜稽首。公荅拜。再拜稽首，拜君命。媵爵者立于洗南，西面，北上，序進，盥，洗角觶，升自西階，序進，酌散，交于楹北，降，適阼階下，皆奠觶，再拜稽首，執觶興。公荅拜。序，次第也，猶代也。先者既酌，右還而反，與後酌者交於西楹北，相左，俟於西階上乃降，往來以右為上。古文曰「降造阼階下」。媵爵者皆坐祭，遂卒觶，興，坐奠觶，再拜稽首，執觶興。公荅再拜。媵爵者執觶待于洗南。待，待君命。小臣請致者。請，君使一人與？二人與？不必君命。若命皆致，則序進，奠觶于筐，阼階下皆北面再拜稽首。公荅拜。媵爵者洗象觶，升，實之，序進，坐奠于薦南，北上，降，適阼階

<sup>①</sup>「大夫」，阮校云：毛本作「人」。  
<sup>②</sup>「下作」，阮校云毛本作「作下」。



下，皆再拜稽首送觶。公荅拜。既酌而代進，往

來由尊北，交於東楹北，亦相左。奠於薦南，不敢必君舉。

**疏**注「既酌」至「君舉」○釋曰：言「亦」者，亦前斟酌自飲

時，①相左於西楹之北，時後者南相東向，先者北相西向，

向西階右旋，北面，待後至降也。②今此二人先者於尊西

東面酌訖，於東楹之北東向向公前奠之，右旋，于東楹之

北北畔西過，後者亦於罇西東面酌訖，於東楹之北南過，

東向，於公前奠之，是亦交於楹北相左也。云「奠於薦南，

不敢必君舉」者，凡舉者於右，不舉者於左，今奠於薦左，

是不舉之處，故云「不敢必君舉」也。媵爵者皆退，反

位。反門右北面位。**疏**注「反門右北面位」○釋曰：但

大夫初與卿在門右北面，得揖少進中庭北面，今當反庭中

位而立。云「門右北面位」者，大夫雖得揖少進，仍是門右

北面位，少進而已，故鄭還以「門右北面」言之。公坐取

大夫所媵觶，興，以酬賓。賓降，西階下再

拜稽首。小臣正辭。賓升，成拜。公起酬賓於

西階，降尊以就卑也。正，長也。小臣長辭，變於燕。升

成拜，復再拜稽首，先時君辭之，於禮若未成然。

**疏**「公

坐」至「成拜」○注「公起」至「成然」○釋曰：自此盡「復

位」，論爲賓舉旅，下及大夫之事。云「小臣長辭，變於燕」

者，《燕禮》直使小臣辭，亦是燕主歡，此射禮辨尊卑，故使

小臣長辭，異於飲酒禮，故云「變於燕」也。公坐奠觶，

荅拜，執觶興，公卒觶。賓下拜。小臣正

辭。賓升，再拜稽首。不言成拜者，爲拜故下，實

未拜也。下不輒拜，禮殺也。下亦降也，發端言降拜，因

上事言下拜。**疏**「公坐」至「稽首」○注「不言」至「下拜」

○釋曰：自此已下皆云「公荅拜」，不言「再拜」，《燕禮》皆

言「公荅再拜」。不同者，燕主歡，不用尊卑，故公拜皆再

拜；此射禮主辨尊卑，故直云「荅拜」，荅一拜。此一拜者，

正禮也。故《周禮·大祝》「辨九拜」：一曰稽首，首至地，

臣拜君法；二曰頓首，頓首平敵相拜法；三曰空首，君荅

臣下拜，復不爲再拜，③即「七曰奇拜」是也。云「下亦降

①「酬」，曹校云此字衍。

②「後」下，曹校云脫「者」字。

③「復」，阮校云：毛本作「後」。

也」者，此非訓下爲降，故以「發端言降拜，<sup>①</sup>因上事言下拜」，直因降有上文，即云下也。經云「公卒觶，賓下拜」者，公尊，不拜既爵，賓降拜，若爲君拜既爵也。公坐奠觶，荅拜，執觶興。賓進受虛觶，降，奠于筐，易觶，興，洗。賓進以臣道，就君受虛爵，君不親酌。凡爵不相襲者，於尊者言更，自敵以下言易，更作新，易有故之辭也。不言公酬賓於西階上及公反位者，尊君空其文也。公有命，則不易不洗。反升，酌膳，下拜。小臣正辭。賓升，再拜稽首。公荅拜。不易，君義也。不洗，臣禮也。賓告于擯者，請旅諸臣。擯者告于公，公許。旅，序也。賓欲以次序勸諸臣酒。賓以旅大夫于西階上。擯者作大夫長升受旅。作，使也。使之以長幼之次，先孤、卿，後大夫。賓大夫之右坐奠觶，拜，執觶興。大夫荅拜。賓在右，相飲之位。**疏**注「賓在右相飲之位」○釋曰：賓位在左，而在大夫之右者，是「相飲之位」，非賓主之位也。賓坐祭，立卒觶，不拜。酬

而禮殺。若膳觶也，則降更觶，洗，升，實散。大夫拜受。賓拜送，遂就席。言更觶，尊卿，尊卿則賓禮殺。**疏**注「言更」至「禮殺」○釋曰：上注云「不相襲者，於尊言更，自敵以下言易」，此賓於卿是自敵以下，當言「易」，今言「更」者，尊卿，尊則卑賓，禮殺也。<sup>②</sup>大夫辯受酬，如受賓酬之禮，不祭酒。卒受者以虛觶降，奠于筐，復位。卒猶已也。今文「辯」作「偏」。**疏**「大夫」至「復位」○釋曰：言「復位」者，亦如上復「門右北面位」，即中庭北面位也。主人洗觶，升，實散，獻卿于西階上。酬賓而後獻卿，飲酒禮成於酬。**疏**「主人」至「階上」○注「酬賓」至「於酬」○釋曰：自此盡「無加席」，論獻公卿之事。司宮兼卷重席，設于賓左，東上。言兼卷，則每卿異席。重席，蒲筵緇布純席。卿言東上，統於君。席自房來。**疏**

<sup>①</sup> 「以」，阮校云：毛本作「云」。

<sup>②</sup> 「於尊言更」至「禮殺也」，阮校云：《通解》「於尊言更」作「於尊者言更尊」，則「尊卿尊」下有「卿」字。

「司宮」至「東上」○注「言兼」至「房來」○釋曰：上文「設席」之下注謂「唯賓及公席布之也，其餘樹之於位後耳」者，以至獻卿乃布之。<sup>①</sup>若然，<sup>②</sup>此云「兼卷」者，不謂始卷之，<sup>③</sup>直是鋪設之時兼卷而設之也。卿升，拜受觚。

主人拜送觚。卿辭重席。司宮徹之。徹猶去也。重席雖非加，猶爲其重累，辭之辟君。乃薦脯醢。

卿升席。庶子設折俎。卿折俎未聞，蓋用脊、脅、臠折、肺。卿有俎者，射禮尊。

**疏**「乃薦」至「折俎」○注

「卿折」至「禮尊」○釋曰：云「卿折俎未聞」者，以《燕禮》卿無俎，故云「未聞」。又云「蓋用脊、脅、臠折、肺」者，案《鄉射·記》云「賓俎脊、脅、肩、肺，主人俎脊、脅、臂、肺」，<sup>④</sup>又「獲者之俎，折脊、脅、肺、臠」，<sup>⑤</sup>彼注云「臠若膊、胙、鬴之折，以大夫之餘體」，以此言之，則此賓俎亦用脊、脅、肩、肺，君俎亦脊、脅、臂、肺，前體有肩、臂、臠，後體有膊、胙、鬴，尊卑以次用之，故卿宜用臠，若有公，公用臠，卿宜用膊也。云「卿有俎者，射禮尊」者，對燕禮不辨尊卑，故公卿等皆無俎也。卿坐，左執爵，右祭脯醢，奠爵于薦右，興，取肺，坐，絕祭，不啖肺，興，

加于俎，坐，挽手，取爵，遂祭酒，執爵興，降席，西階上北面坐，卒爵，興，坐奠爵，拜，執爵興。陳酒肴，君之惠也。不啖，啐，事在射，臣之意。

**疏**注「陳酒」至「之意」○釋曰：案燕禮不在射亦不啐者，彼爲臣有功，君與之燕，恩及於卿，故卿不敢啐也。卿有無俎者，自然不啖也。主人荅拜，受爵。卿降，復位。復西面位。不酢，辟君。辯獻卿，主人以虛爵降，奠于筐。擯者升卿。卿皆升，就席。若有諸公，則先卿獻之，如獻卿之禮。席于阼階西，北面，東上，無加席。公，孤也。席之北面，爲大尊，屈之也。亦因阼階上近君，近君則親寵苟敬私昵之坐。小臣又請媵爵者。二大夫媵爵如

①「耳者以」，阮校云：毛本無此三字。

②「若然」，阮校云：毛本作「則」。

③「謂」下，阮校云：毛本有「至是」二字。

④「脊」字原無，按阮校據毛本補。

⑤「折」字原無，按阮校據毛本補。

初。請致者。若命長致，則媵爵者奠觶于筐。命長致者，使長者一人致也。公或時未能舉，自優暇。**疏**「小臣」至「于筐」○注「命長」至「優暇」○釋曰：自

此盡「奠于筐」，論舉旅之事。一人待于洗南。不致

者。長致者阼階下再拜稽首。公荅拜。再拜

稽首，拜君命。洗象觶，升，實之，坐奠于薦南，

降，與立于洗南者二人皆再拜稽首送觶。

公荅拜。奠於薦南，先媵者上觶之處也。二人皆拜如

初，共勸君飲之。公又行一爵，若賓若長，唯公

所賜。一爵，先媵者之下觶也。若賓若長，禮殺也。長，

孤卿之尊者也。於是言賜，射禮明尊卑。**疏**注「於是言」

至「尊卑」○釋曰：案《燕禮》爲卿舉旅，言「若賓若長，唯公

所酬」，燕禮主於飲酒，此言「所賜」，是以決之也。以旅

于西階上，如初。賜賓則以酬長，賜長則以酬賓，大

夫升受旅以辯。大夫卒受者以虛觶降，奠于

筐。主人洗觶，升，獻大夫于西階上。大夫

升，拜受觶。主人拜送觶。大夫坐祭，立卒

爵，不拜既爵。主人受爵。大夫降，復位。既，盡也。大夫卒爵不拜，賤不備禮。**疏**「主人」至「復

位」○釋曰：自此盡「就席」，論獻大夫之事。○注「大夫」

至「備禮」○釋曰：此注云「大夫卒爵不拜，賤不備禮」，《燕

禮》注云「禮殺」者，兩注相兼乃足。<sup>①</sup>對公卿拜既爵，此

不拜，此獻卿後，是禮殺，亦是賤不備禮也。胥薦主人

于洗北，西面，脯醢，無胥。胥，宰官之吏。主人，

下大夫也。先大夫薦之，尊之也。不薦于上，辟正主。

胥，俎實。辯獻大夫，遂薦之。繼賓以西，東

上。若有東面者，則北上。卒，擯者升大

夫。大夫皆升，就席。辯獻乃薦，略賤也。亦獻後

布席也。**疏**「辯獻」至「就席」○注「辯獻」至「席也」○釋

曰：既言「辯獻大夫，遂薦之」，後乃云「繼賓以西，東上」以

下云云者，上摠言獻大夫辯，乃一時薦之，下文更明布席

位次，就席之儀，故云「辯獻乃薦，略賤也」。略賤則是獻

訖降階，獻辯擯者乃摠升之就席，就席訖乃薦之。乃席

①「乃」上，阮校云：毛本、《通解》有「其義」二字。

工于西階上，少東。小臣納工。工六人，四瑟。工謂瞽矇，善歌諷誦《詩》者也。六人，大師、少師各一人，上工四人。四瑟者，禮大樂衆也。

**疏**「乃席」至「四

瑟」○注「工謂」至「衆也」○釋曰：自此盡「西面，北上，坐」，論作樂及獻工之事。云「六人者，大師、少師各一人，上工四人」，皆據文而言也。云「禮大樂衆也」者，對《燕禮》「工四人而言也。僕人正徒相大師，僕人師相

少師，僕人士相上工。徒，空手也。僕人正，僕人

之長，師其佐也，士其吏也。天子視瞭相工，諸侯兼官，是以僕人掌之。大師、少師，工之長也，凡國之瞽矇正焉。杜蒧曰：「曠也，大師也。」於是分別工及相者，射禮明貴賤。

**疏**「僕人正」至「上工」○注「徒空」至「貴賤」○釋曰：

云「僕人正，僕人之長，師其佐也」者，以正爲長，師爲衆，故僕人正爲長，<sup>①</sup>僕人師爲佐也。云「士其吏也」者，以其在僕人之下，故知僕人之吏，吏則府、史之類。云「天子視瞭相工」者，見於《眡瞭職》文。云「大師、少師，工之長也」者，《周禮·春官》「大師下大夫二人，小師上士四人」，鄭注云「凡樂之歌必使瞽矇爲焉。命其賢知者以爲大師、小師」，是樂工之長也。云「杜蒧曰：『曠也，大師也』」者，《禮

記·檀弓》文。引之者，證大師爲樂工之長也。云「於是分別工及相者，射禮明貴賤」者，對燕禮主歡，不明貴賤，故不分別工貴及相賤。<sup>②</sup>元空一字。

相者皆左何瑟，

後首，內弦，跨越，右手相。謂相上工者。後首，

主於射，略於此樂。內弦、跨越，以右手相工，由便也。越，瑟下孔，所以發越其聲者也。古文「後首」爲「後手」。

後者徒相，入。謂相大師、少師者也。上列官之尊卑，此言先後之位，亦所以明貴賤。凡相者以工出入。

**疏**「後者徒相入」○注「謂相」至「出入」○釋曰：「上列官

之尊卑，此陳先後之位，亦是以明貴賤」者，<sup>③</sup>上列官之尊卑，謂先言僕人正與大師，後言僕人士與上工，是列官尊卑也；此陳先後，則上工與瑟在前，大師、少師在後，是先後之位，既據人時行位，亦據升堂坐之先後，<sup>④</sup>亦依此也。

①「故」下，阮校云：毛本、《通解》有「云」字。

②「工貴及相賤」，曹校云當爲「工及相貴賤」。

③「是以」，據注文當爲「所以」。

④「亦據升堂坐之先後」，阮校云：「亦據」，陳、閻、《通解》俱作「既然則與坐先後之位」，毛本作「亦據升堂與坐之先後之位」，《通解》作「與坐之位」。

云「凡相者以工出入」者，欲見人時如此，出時亦然。小樂正從之。從大師也。後升者，變於燕也。小樂正，於天子樂師也。

**疏**「小樂正從之」○注「從大」至「師也」

○釋曰：云「從大師也」。後升者，變於燕也」者，《燕禮》樂正先升，又不使小樂正者，彼主於樂，此則略於樂故也。升自西階，北面，東上，工六人。坐授瑟，乃降。相者也。降立于西縣之北。

**疏**「坐授瑟乃降」○注

「相者」至「之北」○釋曰：《鄉飲酒》注云「降立于西方，近其事」，以取近其事，故在西縣之北也。小樂正立于

西階東。不統於工，明工雖衆，位猶在此。

**疏**「小樂」

至「階東」○注「不統」至「在此」○釋曰：云「不統於工，明工雖衆，位猶在此」者，決《燕禮》工四人，樂正升立于工之西，在西階東，不統於工。此雖六人，衆於彼，猶統于階而云「西階東」不變，若使小樂正通之於工，恐工位移近西，故猶統于階也。乃歌《鹿鳴》三終。《鹿鳴》、《小雅》

篇也。人君與臣下及四方之賓燕，講道脩政之樂歌也。言已有旨酒，以召嘉賓，與之飲者，樂嘉賓之來，示我以善道，又樂嘉賓有孔昭之明德，可則效也。歌《鹿鳴》三終而

不歌《四牡》、《皇皇者華》，主於講道，略於勞苦與諮事。

**疏**「乃歌鹿鳴三終」○注「鹿鳴」至「諮事」○釋曰：云「主

於講道，略於勞苦」者，據《四牡》勞使臣，此不用之。云

「與諮事」者，謂《皇皇者華》有諮謀、諮度、諮詢之事，亦略之也。主人洗，升，實爵，獻工。工不興，左

瑟。工歌而獻之，以事報之也。洗爵獻工，辟正主也。

獻不用觚，工賤，異之也。工不興，不能備禮。左瑟，便其右。大師無瑟，於是言左瑟者，節也。

**疏**「主人」至「左

瑟」○注「工歌」至「節也」○釋曰：云「洗爵獻工，辟正主也」者，案《鄉飲酒》、《鄉射》云「大師則爲之洗」，謂君賜之樂者，其餘工不爲之洗，是正主法；今此工六人皆爲之洗，故云「辟正主」也。必知同洗者，以其更無別獻之文，故知同洗也。云「獻不用觚，工賤，異之也」者，《燕禮》、《大射》獻賓、獻卿大夫皆用觚，而獻工用爵，故云「異之」。《鄉飲酒》、《鄉射》獻同用爵者，變於君故也。云「大師無瑟，於是言左瑟者，節也」者，上言「獻工」，下云「一人拜受爵」，則六人皆在工內，而云「工不興，左瑟」，於是明大師亦入左瑟中，故須云「大師無瑟」。於是言「左瑟」者，以其六人摠當獻酒之節，故摠入「左瑟」文，不謂有瑟也。一人拜

受爵。謂大師也。言一人者，工賤，同之也。工拜於席。

**疏**「二人拜受爵」○注「謂大」至「於席」○釋曰：云「謂大

師也。言一人者，工賤，同之也」者，《鄉飲酒》、《鄉射》云

「大師則爲之洗」，則知此「一人」謂大師，不言大師，對君工賤，不異其文，故同之而云「一人」也。主人西階上

拜送爵。薦脯醢。輒薦之，變於大夫。**疏**「主人」

至「脯醢」○注「輒薦之變於大夫」○釋曰：案上文云「辯獻

大夫，遂薦之」，此工得獻，不待辯輒薦之，故云「變於大夫」也。使人相祭。使人相者，相其祭薦、祭酒。**疏**

「使人相祭」○注「使人」至「祭酒」○釋曰：知「祭薦、祭酒」

者，此文承一人受爵、薦脯醢之下，明二者皆祭也。若下文衆工直祭酒，不祭脯醢也。卒爵不拜。主人受

虛爵。衆工不拜受爵，坐祭，遂卒爵，辯有

脯醢，不祭。相者相其祭酒而已。主人受爵，降，

奠于筐，復位。大師及少師、上工皆降，立

于鼓北。群工陪于後。鼓北，西縣之北也。言鼓

北者，與鼓齊面，餘長在後也。群工陪于後，三人爲列也。

於是時小樂正亦降，立於其南，北面。工立，僕人立於其

側，坐則在後。《考工記》曰：「鼓人爲皋陶，長六尺有六寸。」**疏**「大師」至「于後」○注「鼓北」至「六寸」○釋曰：知

「鼓北」是「西縣之北」者，以其下文大師、少師始遷向東，

明此降者降在西縣之北可知。云「言鼓北者，與鼓齊面，

餘長在後也」者，案前列樂縣之時，鼓在罇南，今不言在鍾

磬之北，遙據鼓而言之者，欲取形大，又面向東，工亦面向

東，故遙取鼓面也。言「餘長在後」者，欲見鼓長六尺六

寸，工面與鼓面齊，鼓有餘長在人後矣。言此者，工與鼓

前面齊，<sup>①</sup>後面不齊之意也。云「群工陪于後，三人爲列

也」者，大師、少師二人，上工四人，今若立時三人爲列，大

師後有工二人，少師後亦有工二人，故云「三人爲列」也。

云「於是時小樂正亦降，立於其南，北面」者，亦約遷樂於

東方，工西面，樂正北面。言「亦」者，亦東方也。云「工

立，僕人立于其側，坐則在後」者，亦約遷樂東方時面位得

知也。云《考工記》曰：「鼓人爲皋陶，長六尺有六寸」

者，彼云「鞀人爲皋陶」，先鄭云「鞀，《書》或爲鞀」，玄謂「

鞀者以皋陶名官，鞀即陶，字從革」。今云「鼓人」者，誤，

① 「工」上，曹校云脫「明」字。

當作鞀人，鞀人掌鼓，後人誤言鼓，鼓人自在《地官》「掌教六鼓」矣。云「爲阜陶」者，鼓木之名，其穹隆二十板，謂鼓木長六尺六寸，賈侍中彼解爲晉鼓。引之者，證鼓東西長，工齊前面，於後有餘之義也。乃管《新宮》三終。

管，謂吹簫以播《新宮》之樂，其篇亡，其義未聞。笙從工而入，既管不獻，略下樂也。立于東縣之中。

**疏**「乃管新

宮三終」○注「管謂至之中」○釋曰：云「管，謂吹簫」者，此云「管」，上云「簫」，故鄭合爲一事解之。云「其篇亡，其義未聞」者，以其堂下《詩》，故與《由庚》之等同亡。<sup>①</sup>但

上《由庚》、《由儀》之等，有序無詩，同云「有其義而亡其辭」，此則辭義皆亡，故云「其義未聞」。云「笙從工而入」

者，案《燕禮》云「笙人，立于縣中」，有「笙人」之文，此上下不見笙人之文，故知「笙從工而入」也。上云「簫解爲竹，謂

笙簫之屬，竹即管也。今此經云「管」，已解簫爲管，復云

「笙從工而入」者，《燕禮·記》云「下管《新宮》，笙人三成」，則吹管者亦吹笙，故兼言笙，欲見笙、管相將也。云

「立于東縣之中」者，《燕禮》「笙人立于縣中」，則於此縣而言，此辟射位，故知立于東縣之中也。卒管，大師及

少師、上工皆東牀之東南，西面，北上坐。不

言縣北，統於堂也。於是時大樂正還，北面，立于其南。

**疏**「卒管至」上坐」○注「不言至」其南」○釋曰：工人前

不即遷于東者，爲管笙所作，不以無事亂有事，故待卒管，

大師乃東牀西面北上坐。不言去堂遠近，當如《鄉射》遷

工「阼階下之東南，堂前三筓，西面，北上」。云「不言縣

北，統於堂也」者，上云「鼓北」，不統於堂者，彼權立，非正

位故也。擯者自阼階下請立司正。三爵既備，上

下樂作，君將留群臣而射，宜更立司正以監之，察儀法也。

**疏**「擯者至」司正」○注「三爵至」法也」○釋曰：自此盡

「北面立」，論將射立司正察儀安賓之事。公許。擯者

遂爲司正。君許其請，因命用之。不易之者，俱相禮，

其事同也。司正適洗，洗角觶，南面，坐奠于

中庭。奠觶者，著其位以顯其事，威儀多也。**疏**注「奠

觶至」多也」○釋曰：《燕禮》及此《射禮》司正不以觶升而

奠之於地，比《鄉飲酒》及《鄉射》爲顯，其威儀多。自此已

<sup>①</sup>「由庚之等同亡」，阮校云：毛本「庚」下有「由儀」二字，「亡」作「云」。



後，還與「鄉」同也。升東楹之東，受命于公，西

階上北面命賓、諸公、卿、大夫：「公曰：『以我安賓。』」諸公、卿、大夫皆對曰：「諾，敢不安。」以我安者，君意殷勤，欲留之，以我故安也。司

正降自西階，南面，坐取觶，升，酌散，降，南面，坐奠觶，奠於中庭故處。興，右還，北面，少

立，坐取觶，興，坐，不祭，卒觶，奠之，興，再拜稽首，左還，南面，坐取觶，洗，南面反奠于其所，北面立。皆所以自昭明於衆也。將於觶南

北面，則右還；於觶北南面，則左還：如是得從觶西往來也。必從觶西往來者，爲君在阼，不背之也。司射適

次，袒、決、遂，執弓，挾乘矢於弓外，見鏃於弣，右巨指鉤弦。司射，射人也。次，若今時更衣處，

張幃席爲之。耦次在洗東南。袒，左免衣也。決猶闔也，以象骨爲之，著右巨指，所以鉤弦而闔之。遂，射韞也，以朱韋爲之，著左臂，所以遂弦也。方持弦矢曰挾。乘矢，四矢。弣，弓把也。①見鏃焉，順其射也。右巨指，右手

大擘，以鉤弦，弦在旁，挾由便也。古文「挾」皆作「接」。

**疏**「司射」至「鉤弦」○注「司射」至「作接」○釋曰：自此至

「于次」，論射事將至，誓射者及比三耦之事。云「司射，射人也」者，案《燕禮》「射人告具」，注云「射人主此禮，以其或射」，又云「射人納賓」，又云「射人請立司正。公許。射人遂爲司正」，則射人、司正一人也。又云「乃薦司正與射人一人」，注「天子射人，司士皆下大夫二人，諸侯則上士，其人數亦如之」。又曰「若射則大射正爲司射」，注「大射正，射人之長」。此篇云「射人告具」，又曰「大射正擯」，自此以後皆止云「擯」，「擯者自阼階下請立司正，公許，遂爲司正」，則此篇司正與大射正爲一人也。下云「公就物，小射正奉決、拾以筭，大射正執弓」，注云「大射正舍司正，親其職」。「乃薦司正」，注云「司正，大射正」是也。云「耦次在洗東南」者，此無正文，案《鄉射·記》云「設楅，橫奉之，南面坐奠之，南北當洗」，此下云三耦出次西行，拾取矢，又當北行向楅，則次在洗東南矣。云「方持弦矢曰挾」者，以矢橫爲方，《鄉射·記》云「凡挾矢，於二指間橫之」是

①「把」，阮校云：《釋文》、楊氏俱作「把」。

也。自阼階前曰：「爲政請射。」爲政，謂司馬也。

司馬，政官，主射禮。

**疏**「自阼」至「請射」○注「爲政」至

「射禮」○釋曰：云「爲政，謂司馬也」者，案《大宰》云「四

曰夏官，其屬六十，掌邦政」，是爲政謂司馬也。云「司

馬，政官，主射禮」者，其屬有射人，主射事，故「司馬，政

官，主射禮」也。遂告曰：「大夫與大夫，士御

於大夫。」因告選三耦於君。御猶侍也。大夫與大夫

爲耦，不足則士侍於大夫，與爲耦也。今文「於」爲「于」。

**疏**「遂告」至「大夫」○注「因告」至「爲于」○釋曰：云

「不足則士侍於大夫，與爲耦也」者，是以《曲禮》云「君使

士射」，注謂「以備耦」是也。遂適西階前，東面，

右顧，命有司納射器。納，內也。**疏**「遂適」至

「射器」○釋曰：命，謂司射命之也。言「有司」，則前文

「司士戒士射與贊者」，注云「謂士佐執事不射者」是也。

《鄉射》「西階前西面，命弟子納射器」，此言「東面」者，君

在阼，宜向之，故東面。「右顧」者，以其有司是士，士在

西階南，東面，是以右顧向之。射器皆入。君之

弓矢適東堂，賓之弓矢與中、籌、豐皆止于

西堂下。衆弓矢不挾，總衆弓矢、楅，皆適次而俟。中，間中，筭器也。籌，筭也。豐，可莫射爵

者。衆弓矢，三耦及卿大夫以下弓矢也。司射矢亦止西

堂下。「衆弓矢不挾」，則納公與賓弓矢者挾之。楅，承

矢器。今文「俟」作「待」。

**疏**「射器」至「而俟」○注「中

間」至「作待」○釋曰：云「中，間中，筭器也」者，《鄉射

記》云「於郊，則間中」，據此大射，故知間中。中所以盛

筭，故云「筭器也」。云「司射矢亦止西堂下」者，下文云

司射卒誘射，遂適堂西，改取一个挾之」是也。若然，司

射有矢無弓，在堂西有弓者誤。或則據司射將獻釋獲

者，適阼階西去朴，適堂西釋弓，脫決、拾，是時弓在西堂

下也。工人士與梓人升自北階，兩楹之間，

疏數容弓，若丹若墨，度尺而午，射正莅

之。工人士、梓人皆司空之屬，能正方圓者。一從一橫

曰午，謂畫物也。射正，司射之長。

**疏**「工人」至「莅之」

○注「工人」至「之長」○釋曰：知「工人士與梓人皆司空

之屬，能正方圓者」，《冬官》雖亡，不知官屬之號，見今

《考工記》有三十官，有梓人之官。此工人士又與梓人同

事，故知《冬官》未亡時屬司空也。云「能正方圓」者，以工巧之能知也。<sup>①</sup>《續人職》云「火以圓，土以黃，其象方」，《梓人職》「張五采之侯」之類，是知方圓也。云「一從一橫曰午，謂畫物也」者，則上文「橫與距隨」是也。<sup>②</sup>但未知從者、橫者若爲用丹，若爲用墨，或科用其一。云午十字謂之，<sup>③</sup>先以左足履物，右足隨而並立也。云「度尺」者，即《鄉射·記》從「如筭」三尺，橫「如武」尺二寸是也。卒畫，自北階下。司宮埽所畫物，自北階下。埽物，重射事也。工人士、梓人、司宮位在北堂下。

**疏**「卒畫」至「階下」○注「埽物」至「堂下」○釋曰：知「工人、梓人、司宮位在北堂下」，<sup>④</sup>雖無正文，南方不見有位，其人升降自北階，明位在北堂下。大史俟于所設中之西，東面以聽政。中未設也，大史俟焉，將有事也。《鄉射禮》曰：「設中南當楅，西當西序，東面。」**疏**「大史」至「聽政」○注「中未」至「東面」○釋曰：注引《鄉射》者，欲見大史位之所在在此也。司射西面誓之曰：「公射大侯，大夫射參，士射干。射者非其侯中之不獲。卑者與尊者爲耦，不異侯。」

大史許諾。誓猶告也。古文「異」作「辭」。**疏**「司射」

至「許諾」○注「誓猶」至「作辭」○釋曰：卑者、尊者射不異侯。<sup>⑤</sup>言此者，以其誓云君射大侯，大夫射參侯，士射干侯，恐與尊爲耦，亦各射己侯，故覆言此賓與君爲耦同射大侯，士與大夫爲耦同射參侯。以其既與尊者爲耦，不可使之別侯，別侯者則非耦類故也。遂比三耦。比，選

次之也。不言面者，大夫在門右，北面；士西方，東面。

**疏**「遂比三耦」○注「比選」至「東面」○釋曰：云「不言面」者，以下云面，故決之。云「大夫在門右，北面；士西方，東面」者，仍依朝位。以其設朝之班位以來其位未改，明知司射命誓及比次，須還依舊位，司射面皆向之而比次也。若耦及侯數，天子大射、賓射六耦三侯，畿內諸侯則二侯四耦，畿外諸侯大射、賓射皆三侯三耦。但諸侯畿外畿內

①「之」，曹校云此字似衍。

②「上文」，曹校云當爲「鄉射記」。

③「謂」，曹校云疑當作「爲」。

④「工人」下，毛本有「士」字。

⑤「卑者尊者射」，阮校云：毛本、《要義》「卑者」下有「與」字，《要義》「射」作「爲耦」。

各有一申一屈，故畿外三侯，遠尊得申，與天子同，三耦則屈，畿內二侯，近尊則屈，四耦則申。若燕射則天子、諸侯例同，三耦一侯而已，以其燕私屈也。若卿大夫、士例同一侯三耦。略言之，數備《禮記·射義》也。三耦俟于

次北，西面，北上。未知其耦。今文「俟」爲「立」。

**疏**「三耦」至「北上」○注「未知」至「爲立」○釋曰：云「未知其耦」者，下經始命之，故云「未知其耦」。若然，此經已言面位者，三耦雖未知與誰爲耦，要知爲三耦，故立於此。

司射命上射曰：「某御於子。」命下射曰：

「子與某子射。」卒，遂命三耦取弓矢于次。

取弓矢，不拾者，次中隱蔽處。

**疏**「司射」至「于次」○注

「取弓」至「蔽處」○釋曰：云「取弓矢，不拾者，次中隱蔽處」者，對《鄉射》堂西顯露之處拾取矢也。司射入于

次，搯三挾一个，出于次，西面揖，當階北面揖，及階揖，升堂揖，當物北面揖，及物揖，由下物少退，誘射。搯，扱也。挾一个，挾於弦也。

个猶枚也。由下物而少退，謙也。誘猶教也，「夫子循循然善誘人」。

**疏**「司射」至「誘射」○注「搯扱」至「誘人」○

釋曰：自此至「東面」，論司射誘射之事。此射人誘射與

《鄉射》同，但《鄉射》往階西取弓矢，此則入次取弓矢爲異。然此云人次，「搯三挾一个」，則已前皆挾乘矢不改，

《鄉射》亦然。引《論語》者，彼夫子教弟子學問事，司射教人射事，雖不同，同是教法，故引爲證也。射三侯，將

乘矢，始射干，又射參，大侯再發。將，行也。

行四矢，象有事於四方。《詩》云：「四矢反兮，以御亂兮。」

卒射，北面揖，揖於當物之處。不南面者，爲不背卿。

**疏**注「不南」至「背卿」○釋曰：案《鄉射》誘射射卒南面揖

者，彼尊東或公或卿大夫，位同不別，故司射不特尊之。

此大射辨尊卑，尊東唯有天子命卿，其餘小卿及大夫皆賓

西，故特尊之，不背之也。及階揖，降，如升射之

儀。遂適堂西，改取一个挾之。改，更也。不射

而挾矢，示有事也。遂取扑，搯之，以立于所設

中之西南，東面。扑，所以撻犯教者也。於是言立，

著其位也。《鄉射·記》曰：「司射之弓矢與扑，倚于西階

之西。」**疏**注「扑所」至「之西」○釋曰：云「於是言立，著其

位」者，案《鄉射》司射先立所設中之西南，三耦從之，立於

西南，司射却就之，搯三挾一个，乃誘射。此則誘射卒，乃始來就位者，由此有次，就次取弓矢，射訖無事，乃於此立，故云「於是言立，著其位也」。引《鄉射·記》者，此不言司射倚弓矢之處，引之證此與彼記文同也。司馬師命負侯者執旌以負侯。司馬師，正之佐也。欲令

射者見侯與旌，深志於侯中也。負侯，獲者也。天子「服不氏下士一人，徒四人」，掌「以旌居乏待獲」。析羽爲旌。

**疏**「司馬」至「負侯」○注「司馬」至「爲旌」○釋曰：自此盡

「而侯」，論司馬師命服不負侯之事也。引天子「服不氏下士一人，徒四人」者，欲見諸侯亦三侯，亦使服不氏與徒爲獲者也。云「析羽爲旌」，《周禮·司常》文。負侯者皆

適侯，執旌負侯而侯。司射適次，作上耦射。作，使也。司射反位。**疏**「司射反位」○釋曰：

此不言先反位者，爲三耦始出次，未有次前位，無所先，故不言先也。上耦出次，西面揖，進。上射在

左，並行。當階，北面揖。及階，揖。上射

先升三等，下射從之中等。上射在左，便射位也。

中猶閒也。**疏**注「上射」至「閒也」○釋曰：云「上射在左，

便射位也」者，《鄉射》亦云「上射在左」，不云「便射位」者，彼東面位，上射在北，故在左，不取便射位之義。此次北西面位，亦上射在北居右，故上射須在左，以其發位並行，及升北面就物位，皆言居左，履物南面，上射乃在右，故云「上射在左，便射位也」。上射升堂，少左。下射升。上射揖，並行。並，併也，併東行。皆當其

物北面揖，及物揖，皆左足履物，還，視侯中，合足而侯。視侯中，各視其侯之中。大夫耦則視

參中，參中十四尺。士耦則視干中，干中十尺。

**疏**注「視

侯」至「十尺」○釋曰：弓二寸以爲侯中，參侯七十弓，故侯中十四尺；干侯五十弓，故侯中十尺。司馬正適

次，袒、決、遂，執弓，右挾之，出。升自西

階，適下物，立于物閒，左執弣，右執簫，南

揚弓，命去侯。司馬正，政官之屬。簫，弓末。揚弓

者，執下末。揚猶舉也。適下物，由上射後東過也。命

去侯者，將射當獲也。《鄉射禮》曰：「西南面立于物

閒。」**疏**「司馬」至「去侯」○注「司馬」至「物閒」○釋曰：云

「司馬正，政官之屬」者，非大司馬，大司馬之下屬大司馬，

故云司馬屬。<sup>①</sup>案天子有大司馬卿一人，小司馬中大夫二人，此雖諸侯禮，亦應有小司馬，號爲司馬正也。知「適下物，由上射後東過也」者，案《鄉射》司馬命去侯時，由上射後過，至下射西，西南面，揚弓命去侯，故引《鄉射》，證此亦在物間西南面也。負侯皆許諾，以宮趨，直西，及乏南，又諾以商，至乏聲止。宮爲君，商爲臣，其聲和相生也。《鄉射禮》曰：「獲者執旌許諾。」古文「聲」爲「磬」。**疏**「負侯」至「聲止」○注「宮爲」至「爲磬」○釋曰：云「宮爲君，商爲臣」，《樂記》文。云「聲和相生」者，宮生徵，徵生商，而云「相生」者，雖隔徵，亦是相生之義也。云「聲和」者，宮數八十一，商數七十二，彈宮則商應，故云「聲和」也。引《鄉射》者，彼臣禮，下云「諾聲不絕」，不言宮商，引之證與此不同之意。授獲者，退，立于西方。獲者興，共而俟。大侯，服不氏負侯，徒一人居乏，相代而獲。參侯，干侯徒負侯，居乏，不相代。《鄉射禮》曰：「獲者執旌許諾，聲不絕，以至于乏，坐，東面，偃旌，興而俟。」古文「獲」皆作「護」，非也。**疏**

「授獲」至「而俟」○注「大侯」至「非也」○釋曰：云「大侯，服不氏負侯，徒一人居乏，相代而獲」者，上注引《周禮》

「服不氏下士一人，徒四人」，是以鄭分之於三侯之上。大侯尊，故使服不氏與一徒居乏，自餘徒三人分之於二侯，徒以少一人，不得相代也。引《鄉射》者，此文不具，宜與彼同。司馬正出于下射之南，還其後，降自西階，遂適次，釋弓，說決、拾、襲，反位。拾，遂也。《鄉射禮》曰：「司馬反位，立于司射之南。」**疏**「司馬」至「反位」○注「拾遂」至「之南」○釋曰：引《鄉射》者，於此司馬不言位，宜與《鄉射》同，故引爲證。司射進，與司馬正交于階前，相左。由堂下西階之東，北面視上射，命曰：「毋射獲，毋獵獲。」上射揖。司射退，反位。射獲，矢中乏也。從旁爲獵。乃射。上射既發，挾矢。而后下射射，拾發以將乘矢。拾，更也。將，行也。獲者坐而獲。坐言獲也。舉旌以宮，偃旌以商。再言獲也。<sup>②</sup>獲而未釋獲。但言獲，未釋筭。古文「釋」爲

① 「屬」上，曹校云脫「之」字。

② 「再」，阮校云：毛本、《通解》作「等」。

「舍」。**疏**「獲而未釋獲」○注「但言」至「爲舍」○釋曰：云

「但言獲，未釋獲」者，鄭注《鄉射》云「但大言獲」，此注不言「大」，省文也。卒射，右挾之，北面揖，揖如升

射。右挾之，右手挾弦。上射降三等，下射少右

從之，中等，並行，上射於左，與升射者相

左，交于階前，相揖，適次，釋弓，說決、拾、

襲，反位。上射於左，由下射階上少右，乃降待之。言

襲者，凡射皆袒。**疏**「上射」至「反位」○注「上射」至「皆

袒」○釋曰：云「上射降三等」者，諸侯階有七等，言三等

者，欲明下射中等，是降一等之上下，下射過向西畔，由

右，故上射至地待之，乃得二人並行，上射於左也。云「與

升射者相左，交于階前」者，降射者仍南行，故得階前交往

來也。云「上射於左，由下射階上少右，乃降待之」者，此

鄭解在階下而上射得在左之意。由下射階上少右，向西

畔乃降，上射於地待之，故並行時得上射在左也。云「凡

射皆袒」者，案《鄉射》命三耦，各與其耦讓取弓矢，拾，三

耦取弓遂，<sup>①</sup>至卒射，云「脫決、拾、襲」，而俟于堂西南面，

此則前「遂命三耦取弓矢于次」，不言袒，至此亦言「襲」，

故須言「凡射皆袒」，決在此不見袒，亦袒可知也。三耦

卒射，亦如之。司射去扑，倚于階西，適阼

階下，北面告于公曰：「三耦卒射。」反，搢

扑，反位。**疏**「三耦」至「反位」○釋曰：云「司射去扑，

倚于西階西，適阼階下，北面告于公」者，案《鄉射》「司射

去扑，倚于西階之西，升堂，北面告于賓曰：「三耦卒射」，

注云「去扑乃升，不敢佩刑器即尊者之側」，此不升堂而在

阼階下，而亦去扑者，尊公故也。司馬正袒、決、遂，

執弓，右挾之，出，與司射交于階前，相左。

出，出於次也，袒時亦適次。**疏**「司馬」至「相左」○注「出

出」至「適次」○釋曰：自此至「興，反位」，論取矢設楅。<sup>②</sup>

云「出于次也，袒時亦適次」者，以此而言，則袒時入次，今

更出次。知不在位上袒而入次取弓者，凡袒、襲皆隱

處，<sup>③</sup>鄉射無次，司馬適堂西袒，執弓矢，不在位。此大射

有次，明人次袒，不在位可知。升自西階，自右物

①「取弓」，曹校云當爲「皆袒決」。

②「楅」下，阮校云：毛本有「之事」二字。

③「皆」下，阮校云：毛本、《通解》有「於」字。

之後立于物閒，西南面，揖弓，命取矢。揖，推之。負侯許諾，如初去侯，皆執旌以負其侯而俟。俟小臣取矢，以旌指教之。司馬正降自西階，北面命設楅。此出于下射之南，還其後而降之。

**疏**注「此出」至「降之」○釋曰：「此出于下射之南，還其後而降之」者，《鄉射》文。此亦然，故引爲證也。小臣師

設楅。司馬正東面，以弓爲畢。畢，所以教助執

事者。《鄉射·記》曰：「乃設楅于中庭南，當洗，東肆。」

**疏**「小臣」至「爲畢」○注「畢所」至「東肆」○釋曰：云「畢，

所以教助執事者」，以畢是助載鼎實之物，故司馬執弓爲畢以指授，若《周禮》執殳以爲鞭度然。引《鄉射禮》文者，證經設楅故亦當洗。<sup>①</sup>既設楅，司馬正適次，釋

弓，說決、拾、襲，反位。小臣坐委矢于楅，北括。司馬師坐乘之，乘，四四數之。卒。若

矢不備，則司馬正又袒，執弓升，命取矢如初，曰：「取矢不索。」乃復求矢，加于楅，卒。司馬正進坐，左右撫之，興，反位。左右

撫，分上下射。此坐皆北面。司射適西階西，倚扑，升自西階，東面，請射于公。倚扑者，將即君前，不敢佩刑器也。升堂者，欲諸公、卿、大夫辯聞也。

**疏**「司射」至「于公」○注「倚扑」至「聞之」○釋曰：自此盡

「未降」，請君行第二番射并命耦之事。云「倚扑者，將即君前，不敢佩刑器也」者，上去扑告君不注，至此乃注者，彼告在阼階下，遠君，故不注，至此升堂乃注，義與彼同也。上不升者，以告以三耦射，<sup>②</sup>射卒事緩，<sup>③</sup>故在下。

此告欲諸公、卿、大夫徧聞也，故升。但升者是其正，故《鄉射》升堂。《大射》告公，故前在堂下，此升者，欲公卿聞之故也。公許。遂適西階上，命賓御于公，

諸公卿則以耦告于上，大夫則降，即位而后告。告諸公卿於堂上，尊之也。司射自西階上，北

面，告于大夫曰：「請降。」司射先降，搢扑，反位。大夫從之降，適次，立于三耦之南，

<sup>①</sup>「故」，曹校云此衍字。

<sup>②</sup>「射」上，曹校云當有「卒」字。

<sup>③</sup>「射卒」，阮校云：毛本、《通解》作「卒射」。



西面，北上。適次，由次前而北，西面立。

**疏**「司射」

至「北上」○注「適次」至「面立」○釋曰：云「告于大夫曰：

「請降」者，以諸公卿在上，故請大夫降。《鄉射》降告「主

人與賓爲耦，<sup>①</sup>遂告于大夫」。又曰「賓、主人與大夫皆未

降」，注云「言未降者，見其志在射」。大夫未降者，彼臣

禮，主人與賓皆卑，故大夫未降，與此異也。云「適次，由

次前而北，西面立」者，上云司射等適次，謂入次中；此適

次者，大夫降自西階，東行適次所，過向堂東，西面立，因

過次爲適次，非人次也。司射東面于大夫之西，

比耦大夫與大夫。命上射曰：「某御於

子。」命下射曰：「子與某子射。」卒，遂比衆

耦。衆耦，士也。衆耦立于大夫之南，西面，北

上。若有士與大夫爲耦，則以大夫之耦爲

上。爲上，居群士之上。**疏**「司射」至「爲上」○注「爲

上」至「之上」○釋曰：云「爲上，居群士之上」者，若是士與

大夫之尊者爲耦，故居群士之上也。鄭云「群士之上」者，

既爲上射，恐在大夫之上，故云「群士之上」。是以下注云

「士雖爲上射，其辭猶尊大夫」也。若然，國皆有三卿五大

夫，三耦六人而已，而云使士爲耦者，卿大夫或有故，或出使，容其不足，使士備耦之法也。命大夫之耦曰：

「子與某子射。」告於大夫曰：「某御於子。」

士雖爲上射，其辭猶尊大夫。命衆耦，如命三耦之

辭。諸公卿皆未降。言未降者，見其志在射。**疏**

注「言未」至「在射」○釋曰：言「未」者，後當降，故云「未」

也。若終不射，不得言「未」。是以《鄉射》記云「衆賓不

與射者不降」，注「不以無事亂有事」，是不射不得云「未」

也。遂命三耦各與其耦拾取矢，皆袒、決、

遂，執弓，右挾之。此命人次之事也。司射既命而

反位，不言之者，上射出當作取矢，事未訖。**疏**「遂命」至

「挾之」○注「此命」至「未訖」○釋曰：自此盡「襲，反位」，

論命拾取矢之事。鄭知此是「命人次之事」者，上來未有

三耦人次袒、決、遂之事，又下文乃云「一耦出」，明此是

「命人次之事」。若然，司射命訖，當反位，不言者，以其三

耦入次，出，乃當作取矢，待作取矢，即是「事未訖」，故不

①「降」，曹校云此字衍。

言反位也。仍未知令入次之後，未出之間，且在西方位，且在階下位？二者雖無文，以事緩急言之，三耦入次出則作之，宜在階下位，於義可也。又《鄉射》云「司射反位」者，司射反位，則有三耦位，得言「反位」。此曰射位在西方去次遠，①又曰射位若階下去次亦遠，不得言反，故不言也。一耦出，西面揖，當楅，北面揖，及楅，揖。三耦同入次。其出也，一一上射出，②西面立，司射作之，乃揖行也。當楅，楅正南之東西。上射東面，下射西面。上射揖，進，坐橫弓，卻手自弓下取一个，兼諸弣，興，順羽，且左還，毋周，反面揖。橫弓者，南路弓也。卻手自弓下取矢者，以左手在弓表，右手從裏取之便也。兼，并也，并矢於弣，當順羽，既又當執弦。順羽者，手放而下，備不整理也。左還，反其位。毋周，右還而反東面也。君在阼，還周則下射將背之。古文「且」爲「阻」。

**疏**「上射」至「面揖」○注「橫弓」至「爲阻」○釋曰：云「左還，反其位」。毋周，右還而反東面也者，毋周者，左還行至位，即位，右還而反東面，是還不周也。云「君在阼，還周則下射將背之」者，上射左

還，已還背君，而據下射而言者，上射去君遠，故據下射而言。以其下射若右還周爲背君，若左還向東，覆即右還西面，是不背君，周即背故也。下射進，坐橫弓，覆手自弓上取一个，兼諸弣，興，順羽，且左還，毋周，反面揖。橫弓，亦南路弓也。人東西鄉，以南北爲橫。覆手自弓上取矢，以左手在弓裏，右手從表取之，便也。

**疏**「下射」至「面揖」○注「橫弓」至「便也」○釋曰：云「橫弓，亦南路弓也」者，謂南路弓，以左手仰執弓裏，以覆右手於弓表向下取矢，亦便也。上射、下射俱南路弓者，取背君，③向南爲順故也。既拾取矢，梱之，梱，齊等之也。古文「梱」作「魁」。兼挾乘矢，皆內還，南面揖。內還者，上射左，下射右。不皆右還，④亦以君在阼，嫌下射故左還而背之也。上以陽爲內，下以陰爲內，因其宜可也。

**疏**「兼挾」至「面揖」○注

①「曰」，曹校云當爲「司」，下句「曰」字同。

②「一」，阮校云：毛本、《通解》不重。

③「取」下，曹校云脫「不」字。

④「右」，曹校云：當爲「左」，詳《鄉射》。

「內還」至「可也」○釋曰：云「不皆右還，亦以君在阼，嫌下射故左還而背之」者，若上下俱向內，是相向爲順。若上射左還，是不故背君。若下射右還背君少，亦左還，初時面向君，轉身南向背君多，似故背君，故不左還也。云「上以陽爲內，下以陰爲內，因其宜可也」者，上射東面，左還時以左手還，取東相陽方爲內；下射西面，右還時以右手還，取西相陰方爲內，隨其陰陽，得左右相向，是因其宜也。適楅南，皆左還，北面揖，搯三挾一个。楅南，鄉當楅之位也。揖，以耦左還，上射於左。以猶與也。言以者，耦之事成於此，意相人耦也。上射轉居左，使其反位也。上射少北，乃東面。疏「揖以」至「於左」○注「以猶」至「東面」○釋曰：云「言以者，耦之事成於此，意相人耦也」者，揖不須言「以」，今云「以」者，必有義意，故鄭云「言以者，耦之事成於此」，謂成於此拾取矢，以其取矢後一番了，更無事，故云「成於此」，人意相存耦也。云「上射轉居左，使其反位也」者，位在次北西面，是以上射居左，至次北右還，西面便也。云「上射少北，乃東面」，知不少南者，以其次在楅東南，北面揖時已在次西面，<sup>①</sup>故知「上射少北，乃東面」，得東當次也。退者與進者

相左，相揖。退，釋弓矢于次，說決、拾、襲，反位。二耦拾取矢，亦如之。後者遂取誘射之矢，兼乘矢而取之，以授有司于次中，皆襲，反位。有司納射器，因留主授受之。司射作射，如初。一耦揖，升，如初。司馬命去侯，負侯許諾，如初。司馬降，釋弓，反位。司射猶挾一个，去扑，與司馬交于階前，適阼階下，北面，請釋獲于公。猶，守故之辭。於此言之者，司射既誘射，恒執弓、挾矢，以掌射事，備尚未知，當教之也。今三耦卒射，衆足以知之矣，猶挾之者，君子不必也。公許。反，搯扑，遂命釋獲者設中，以弓爲畢，北面。北面，立于所設中之南，當視之也。《鄉射禮》曰：「設中南當楅，西當西序。」大史釋獲。小臣師執中，先首，坐設之，東面，退。大史實八筭于中，橫委其餘于中西，興，共而俟。

① 「已在次西面」，曹校云「面」字衍。

先猶前也。命大史而小臣師設之，國君官多也。小臣師退，反東堂下位。《鄉射禮》曰：「橫委其餘于中西，南末。」

**疏**「大史」至「而俟」○注「先猶」至「南末」○釋曰：此不見

執筭之人。案《鄉射》命釋獲者，「釋獲者執鹿中，一人執筭以從之」，彼臣禮，官少，釋獲者自執中設之，尚使人執筭，況國君官臣多，<sup>①</sup>大史不自執中，豈得自執筭？明亦使人執之。云「小臣師退，反東堂下位」者，其位已見篇首也。引《鄉射》者，證筭以「南末」為順也。司射西面命

曰：「中離維綱，揚觸梱復，公則釋獲，衆則不與。」離猶過也，獵也。侯有上下綱，其邪制躬舌之角

者為維。或曰維當為絹，絹，綱耳。<sup>②</sup>揚觸者，謂矢中他物，揚而觸侯也。梱復，謂矢至侯不著而還復，復，反也。公則釋獲，優君也。衆當中鵠而著。古文「梱」作「魁」。

**疏**「司射」至「不與」○注「離猶」至「作魁」○釋曰：中謂中

侯，注不言可知。云「離猶過也，獵也」者，謂矢過獵，因著維與綱二者。云「侯有上下綱，其邪制躬舌之角者為維」者，案《梓人》云「上綱與下綱出舌尋，緝寸焉」，<sup>③</sup>注「綱」，所以繫侯於植者也。上下皆出舌一尋者，亦人張手之節也。鄭司農云：緝，籠綱者；維，持侯者」。若然，則綱與

維皆用繩為之，<sup>④</sup>又以布為緝籠綱，然後以上个、下个邊，綴著緝兩頭，以綱繫著植。維者，於上个、下个、上下躬兩

頭皆有角，又以小繩綴角，繫著植。故矢或離綱，或離維

也。云「或曰維當為絹，絹，綱耳」者，鄭更為一解，絹則維

也。云「絹，綱耳」者，以絹為綱耳，離著絹也。云「衆當中

鵠者，大射鵠則《梓人》云「張皮侯而棲鵠」是也。唯公

所中，中三侯皆獲。」值中一侯，則釋獲。**疏**「唯公」

至「皆獲」○注「值中」至「釋獲」○釋曰：云中三侯皆釋獲，

則「離維綱」及「揚觸梱復」亦釋之。不言者，以中為主也。

釋獲者命小史。小史命獲者。傳告服不，使知

①「臣」，曹校云此字衍。

②「絹」，阮校引敖氏說，以為是「緝」字之誤。「綱」上，

阮校云：《通解》有「為」字。

③「緝」，阮校云：毛本作「絹」，下「云緝」、「為緝」、「著

緝」並同。陳本「著緝」作「絹」。

④「鄭司農云」至「用繩為之」，孫校云：《梓人》先鄭注云

「舌，維持侯者」，乃釋侯舌，與此經「維」無涉，賈引有脫誤。

此司射所命。

**疏**注「傳告」至「所命」<sup>①</sup>○釋曰：據在大侯

而言，告服不，則參侯、干侯告可知，舉遠見近。

司射遂

進由堂下，北面視上射，命曰：「不貫不

釋。」上射揖。司射退，反位。貫猶中也。射不

中鵠不釋筭。古文「貫」作「關」。

**疏**「司射」至「反位」○

注「貫猶」至「作關」○釋曰：案上文「離維綱」、「公則釋獲」

言之，則此云不中不釋筭者，據除君而言也。釋獲者

坐取中之八筭，改實八筭，興，執而俟。執所

取筭。乃射，若中，則釋獲者每一個釋一筭，

上射於右，下射於左。若有餘筭，則反委

之。委餘筭，禮貴異。又取中之八筭，改實八筭

于中，興，執而俟。

## 儀禮疏卷第十七

江寧府知府陽城張敦仁編校 元和縣

學生員顧廣圻覆校

① 「至所命」原作「服不」，按阮校據毛本改。

# 儀禮疏卷第十八

唐朝散大夫行大學博士弘

文館學士臣賈公彥等撰

三耦卒射。賓降，取弓矢于堂西。不敢與君並俟告。取之以升，俟君事畢。

**疏**「三耦」至「堂西」○注

「不敢」至「事畢」○釋曰：自此盡「共而俟」，論第二番射三耦訖，次公卿大夫之事。但此賓先降取弓矢即升堂者，以其不敢與君並待告，故下云司射「告射于公」，小射正「取公之決，拾」，并「授弓拂弓」，是君得告乃取弓矢，是「不敢與君並俟告」也。云「取之以升，俟君事畢」者，案下文云「公將射，則賓降，適堂西，袒，決，遂，執弓，搯三挾一个，升自西階」，是君事畢。君事畢，賓降袒，決，遂，乃更升。若然，賓於此不即袒，決，遂者，去射時遠，故不可即袒也。諸公、卿則適次，繼三耦以南。言繼三耦，明在大夫北。

**疏**「諸公」至「以南」○注「言繼」至「夫北」○釋

曰：言「適次」者，但射位在堂東，次在洗東南，今諸公卿東南適次前，北至三耦之南，<sup>①</sup>以次西面立。云「繼三耦，明在大夫北」者，以其三耦在北，大夫在南，而言「繼三耦」，明在大夫之北也。公將射，則司馬師命負侯，皆執其旌以負其侯而俟。君尊，若始焉。

**疏**「公將」

至「而俟」○注「君尊若始焉」○釋曰：云「君尊，若始焉」者，案上始時，司馬命負侯；三耦將射，司馬命去侯；今三耦卒射，君將射，司馬使更命負侯，<sup>②</sup>是「君尊，若始焉」。司馬師反位。隸僕人埽侯道。新之。司射去扑，適阼階下，告射于公。公許。適西階東，告于賓，告當射也。今文曰「阼階下」，無「適」。遂搯扑，反位。小射正一人，取公之決，拾于東玷上，一小射正授弓、拂弓，皆以俟于東堂。授弓，當授大射正。拂弓，去塵。

**疏**「小射」至

「東堂」○注「授弓」至「去塵」○釋曰：據此經上下，或云大

①「至」下，阮校云：毛本有「其」字。

②「使」，曹校云當為「師」。

射正，或云司射，或云小射正，不同者，今行射禮，大射正一人爲上，司射次之，或云小射正。若然，大射正與司射各一人。據其行事，小射正不止一人而已，此云「小射正一人，取公之決，拾於東坫上」，下云「小射正奉決，拾以筭」，與此一人此，<sup>①</sup>又云「小射正授弓」，與取決、拾別，則小射正二人也。云「授弓，當授大射正」者，下云「大射正執弓，以決」，以授公，明此小射正授弓者，當授大射正也。公將射，則賓降，適堂西，袒、決、遂，執弓，搯三挾一个，升自西階，先待于物北，<sup>②</sup>北一筭，東面立。不敢與君併。筭，矢幹。東面立，鄉君也。

**疏**「公將」至「面立」○注「不敢」至「君也」○釋曰：云「公將射，則賓降」者，案前文賓降適堂西取弓矢，無賓升堂之文，但文不具，其實即升矣，是以此文云「賓降」。云「筭，矢幹」者，案《周禮·矢人》「矢幹長三尺」，則此賓立於物北三尺矣。司馬升，命去侯，如初。還右，乃降，釋弓，反位。還右，還君之右也，猶出下射之南，還其後也。今文曰「右還」。

**疏**注「還右」至「右還」○釋曰：云「還右，還君之右也」者，君爲下射，賓爲上射，司

馬在君之西南揚弓命去侯訖，還君之右，東而南，西向，降自西階。「猶出下射之南，還其後也」者，由如上文初將射時，司馬立於物間，南揚弓命去侯訖，出於下射之南，還其後，降自西階，前後是同，故取彼解此。云「今文曰右還」，不從「右還」者，若右還則右還於上射，不得還君，故不從也。公就物。小射正奉決，拾以筭，大射正執弓，皆以從於物。筭，萑葦器。大射正舍司正，親其職。

**疏**「公就」至「於物」○注「筭萑」至「其職」○釋曰：前解大射正與司射別人。案此注「大射正舍司正，親其職」，則大射正與司正爲一人。又案上文司射請立司正，遂立司射爲司正，則司射又與大射正爲一人。與上解似相違者，以大射正與射人俱掌射事，相當，則大射正與司射別，若通而言之，射人不對大射正，射人亦名大射正，故此以射人爲大射正也。小射正坐奠筭于物南，遂拂以巾，取決，興。贊設決，朱極三。極猶放也，所以輟指利放弦也，以朱韋爲之。三者，食指、將指、

<sup>①</sup> 下「此」字，曹校云當爲「別」。

<sup>②</sup> 「北」，阮刻本不重「北」字。

無名指。無極放弦，契於此指，多則痛。小指短，不用。小臣正贊袒。公袒朱襦。卒袒，小臣正退，俟于東堂。小射正又坐取拾，興，贊設拾。以筥退，奠于坵上，復位。既袒乃設拾，拾當以韞襦上。

**疏**注「既袒」至「襦上」○釋曰：案上文設決訖，乃云「公袒朱襦」，始云小臣正「贊設拾」，①拾當拾斂膚體，宜在朱襦之上，故鄭云「既袒乃設拾，拾當以韞襦上」。《鄉射》云袒、決、遂，以其無襦，故遂與決得俱時設，若大夫對士射，袒纁襦，設遂亦當在袒後。大射正執弓，以袂順左右隈，上再，下壹，左執弣，右執簫，以授公。公親揉之。順，放之也。隈，弓淵也。揉，宛之，觀其安危也。今文「順」爲「循」。古文「揉」爲「紐」。

**疏**「大射」至「揉之」○注「順放」至「爲紐」○釋曰：云「順放之也」者，以袂向下，於弓隈順放之。云「觀其安危也」者，案《考工記·弓人》云「其弓安」、「其弓危」者，以弓弱者爲危，其弓強者爲安，則此云觀安危者，謂試弓之強弱。小臣師以巾內拂矢，而授矢于公，稍屬。內拂，恐塵及君也。稍屬，不搯矢。大射正立

于公後，以矢行告于公。若不中，使君當知而改其度。下曰留，上曰揚，左右曰方。留，不至也。揚，過去也。方，出旁也。公既發，大射正受弓而俟，拾發以將乘矢。公下射也，而先發不留，尊也。

**疏**「公既」至「乘矢」○注「公下」至「尊也」○釋曰：案上三耦射者，上射射訖，乃次下射。此公爲下射，當後射，今君射前於賓，故鄭云「先發不留，尊也」。公卒射，小臣師以巾退，反位。大射正受弓。受弓，以授有司於東堂。小射正以筥受決、拾、退，奠于坵上，復位。大射正退，反司正之位。小臣正贊襲。公還而后賓降，釋弓于堂西，反位于階西，東面。階西，東面，賓降位。

**疏**注「階西」至「降位」○釋曰：案上文賓受獻訖，降立於階西，東面，此云「反位於階西，東面」，故云「反位」也。②公即席。司正以

①「臣」，曹校云當爲「射」。  
②「反」，曹校云當爲「降」。



命升賓。賓升，復筵。**疏**「公即」至「復筵」○釋

曰：此公與賓復升即位者，公卿以下當繼射，公與賓當觀之，故升就位也。而后卿大夫繼射。諸公卿取

弓矢于次中，袒，決，遂，執弓，搯三挾一个，出，西面揖，揖如三耦，升射。卒射，降如三

耦。適次，釋弓，說決，拾，襲，反位。衆皆繼射，釋獲皆如初。諸公卿言取弓矢，衆言釋獲，互

言也。卒射，釋獲者遂以所執餘獲適阼階下，北面告于公曰：「左右卒射。」司射不告

者，**①**釋獲者於是有事，宜終之也。餘獲，餘筭也。無餘筭則無所執。古文曰「餘筭」。反位，坐委餘獲于

中西，興，共而俟。司馬袒，執弓，升，命取矢，如初。負侯許諾，以旌負侯，如初。司

馬降，釋弓，如初。小臣委矢于楅，如初。司馬，司馬正。於是司馬師亦坐乘矢。**疏**「司馬」至「如初」

○釋曰：自此盡「就席」，論射訖取矢委於楅之事。○注

「司馬」至「乘矢」○釋曰：知司馬是司馬正，「司馬師亦坐

乘矢」者，此經皆言「如初」，案上番射，司馬正與司馬師乘矢，故知也。賓、諸公、卿、大夫之矢皆異束之

以茅，卒，正坐，左右撫之，進束，反位。異束，

大夫矢尊，殊之也。正，司馬正也。進，前也。又言束，整

結之，示親也。**疏**注「異束」至「殊之也」○釋曰：公卿皆

異束，但言大夫者，公卿自相對，其矢俱束之，及其脫之亦拾取。但三耦之內，大夫以士耦之，士矢不束，大夫束之，

故曰「尊，殊之」。下注云「不言君矢，小臣以授矢人於東

堂下可知」，知者，以其小臣取矢，明取之以授矢人。賓

之矢則以授矢人于西堂下。是言矢人，則納射器

之有司，各以其器名官職。不言君矢，小臣以授矢人于東

堂下可知。司馬釋弓，反位，而后卿大夫升就

席。此言其升前，小臣委矢於楅。**疏**注「此言」至「於

楅」○釋曰：云「此言其升前，小臣委矢於楅」者，案上文

「司馬降，釋弓，如初」，在「小臣委矢」之上，其「司馬降，釋

弓」之時，卿大夫即升就席，委矢，當依司馬「命取矢」之

**①** 「不」下，阮校云：毛本有「言」字。

下，不失其次，故不即見卿大夫升事，是以於此特言「司馬降，釋弓」，與「卿大夫升」爲節耳，故鄭亦言其次第也。司射適階西，釋弓，去扑，襲，進，由中東，立于中南，北面，視筭。釋弓，去扑，射事已也。

**疏**

「司射」至「去扑」○釋曰：自此盡「共而俟」，論數筭之事。直言「去扑」，不言去矢，矢亦去之，是以下文司射「執弓，挾一个，搯扑」，明此時去矢，後更挾之。釋獲者東面

于中西坐。先數右獲。固東面矣，復言之者，少南，就右獲。二筭爲純，純猶全也。耦陰陽也。一

純以取，實于左手，十純則縮而委之，縮，從也，於數者東西爲從。古文「縮」皆作「蹙」。每委異

之，易校數。有餘純則橫諸下。又異之也。自近

爲下。一筭爲奇，奇則又縮諸純下。又從之。

興，自前適左，從中前北也。更端，故起。東面坐，

少北於故。坐兼斂筭，實于左手，一純以委，

十則異之。變於右也。其餘如右獲。謂所縮，所

橫者。司射復位。釋獲者遂進取賢獲執之，

由阼階下北面告于公。賢獲，勝黨之筭也。執之者，齊而取其餘。若右勝，則曰「右賢於左」。若左勝，則曰「左賢於右」。以純數告。若有奇者，亦曰奇。告曰：某賢於某若干純、若干奇。若

左右鈞，則左右各執一筭以告，曰「左右鈞」。還，復位，坐兼斂筭，實八筭于中，委其餘于中西，興，共而俟。司射命設豐。當

飲不勝者射爵。

**疏**「司射命設豐」○釋曰：自此盡「徹豐

與觶」，論二番射訖，行射爵之事。司宮士奉豐，由

西階升，北面坐設于西楹西，降，復位。勝

者之弟子洗觶，升，酌散，南面坐奠于豐上，

降，反位。弟子，其少者也。不授者，射爵猶罰爵，略

之。**疏**注「弟子」至「略之」○釋曰：自此以上，其疏見於

《鄉射》，於此不復言。云「不授者，射爵猶罰爵，略之」者，

案《詩》云「兕觥其觶，旨酒思柔」，注云「觶，陳設貌。觥，

罰爵，不手授」，此飲射爵，亦不手授，故云「猶罰爵」也。

案獻、酬之爵皆手授之，此不手授，故云「略之」也。若然，

士以下飲罰爵者取於豐，大夫已上皆手授，尊之，故下注云「授爵而不奠豐，尊大夫也」。其三耦之內，雖大夫亦取於豐者，以其作三耦，與衆耦同事，故不復殊之。司射遂袒，執弓，挾一个，搯扑，東面于三耦之西，命三耦及衆射者。勝者皆袒，決、遂，執張弓。執張弓，言能用之也。右手挾弦。不勝者皆襲，說決、拾，卻左手，右加弛弓于其上，遂以執弣。固襲，說決、拾矣，復言之者，起勝者也。不勝者執弛弓，言不能用之也。兩手執弣，無所挾也。

**疏**注

「固襲」至「挾也」○釋曰：云「固襲，說決、拾矣，復言之者，起勝者也」者，起勝者，<sup>①</sup>射畢之時降堂，皆就次襲，說決、拾矣，故云「固襲」，今復言之者，以其勝者更袒、決、遂，故復言不勝襲，說決、拾，欲與勝者相起復發，<sup>②</sup>故復言之也。司射先反位。居前，俟所命人次而來飲。三耦及衆射者皆升，飲射爵于西階上。不勝之黨無不飲。**疏**注「不勝之黨無不飲」○釋曰：以其經云「三耦及衆射者皆升」，飲射爵者言升之，<sup>③</sup>明知「不勝之黨無不飲」。但大射者，所以擇士以助祭，今若罰爵在於不勝之

黨，雖數中亦受罰。及其助祭，雖飲射爵，亦得助祭。但在勝黨，雖不飲爵，<sup>④</sup>若不數中，亦不得助祭。以其飲罰據一黨而言，取其助祭取一身之藝，<sup>⑤</sup>義故不同也。小

射正作升飲射爵者，如作射。一耦出，揖，如升射。及階，勝者先升，升堂，少右。先升，尊賢也。少右，辟飲者，亦因相飲之禮然。**疏**注「先升」

至「禮然」○釋曰：云「亦因相飲之禮然」者，案《鄉飲酒》、《鄉射》獻酬之禮，獻者在右，酬者在左，<sup>⑥</sup>故云「亦」也。

不勝者進，北面坐取豐上之觶，興，少退，立卒觶，進，坐奠于豐下，興，揖。立卒觶，不祭不拜，受罰不備禮也。右手執觶，左手執弓。**疏**注「立卒」

<sup>①</sup>「起勝者」，曹校云此三字衍。

<sup>②</sup>「欲」，阮校云：毛本「欲」上有「却」字，閩、葛、監俱作「卻」。曹校云「復」字衍。

<sup>③</sup>「升之」，曹校云當爲「皆升」。

<sup>④</sup>「飲」下，阮校云：毛本有「罰」字。

<sup>⑤</sup>上「取」字，曹校云此字衍。

<sup>⑥</sup>「酬」，曹校云當爲「受」。

至「執弓」○釋曰：案《鄉飲酒》皆祭，坐卒爵，拜既爵，故此決之，受罰不備禮也。云「右手執觶，左手執弓」者，以其執弛弓，不釋於地，明知未飲時兩手執弓，今受罰爵，右手執爵爲便，左手執弓可知。不勝者先降，後升先降，略之不由次也。降而少右，復並行。

**疏**「不勝者先降」○

注「後升」至「並行」○釋曰：云「後升先降，略之不由次也」者，案上文勝者先升，此文不勝者先降，故云「略之不由次」。云「降而少右，復並行」者，見下文「與升飲者相左」，明降至堂下，此二人少右，復並行，以其辟升者在左故也。

與升飲者相左，交于階前，相揖，適次，釋弓，襲，反位。僕人師繼酌射爵，取觶，實之，反奠于豐上，退，俟于序端。僕人師酌者，君使之代弟子也。自此以下辯爲之酌。升飲者如初。

三耦卒飲。若賓、諸公、卿、大夫不勝，則不降，不執弓，耦不升。此耦謂士也。諸公、卿或闕，

士爲之耦者，不升。其諸公、卿、大夫相爲耦者不降席，重恥尊也。

**疏**「若賓」至「不升」○注「此耦」至「尊也」○釋

曰：知「此耦謂士」者，以大夫坐於上，士立於下，經云「耦

不升」，故云「此耦謂士也」。是以鄭解其意云「諸公、卿或闕，士爲之耦者，不升。其諸公、卿、大夫相爲耦者，不降席」，以其大夫在堂上，故云「不降席」。云「重恥尊也」者，解士不升，大夫已上不降席意，以其卑者對飲尊者是可恥之事，不對飲，是重恥尊者也。僕人師洗，升，實觶

以授。賓、諸公、卿、大夫受觶于席，以降，適西階上北面，立飲，卒觶，授執爵者，反，就席。雖尊，亦西階上立飲，不可以己尊枉正罰也。授

爵而不奠豐，尊大夫也。

**疏**注「雖尊」至「夫也」○釋曰：

云「不可以己尊枉正罰也」者，正罰謂上文飲者在左，勝者在右，於西階之上北面跪取豐上之觶飲之是也。今雖不取於豐，亦於西階北面，是「不可以己尊枉正罰」也。若

飲公，則侍射者降，洗角觶，升，酌散，降拜。

侍射，賓也。飲君則不敢以爲罰，從致爵之禮也。

**疏**「若

飲」至「降拜」○注「侍射」至「禮也」○釋曰：云「侍射，賓也」者，以其賓與君對射耦，自相飲，故知侍射者賓也。云「飲君則不敢以爲罰，從致爵之禮也」者，罰爵如上文，罰

者飲之而已，今則從燕臣致爵於君之禮，下文所謂「夾爵」

者是也。但此經云「角觶」，與上文觶皆是「三升曰觶」，觶與角連，故謂之「角觶」。或單言「角」，或單言「觶」。是以《禮記·少儀》云「侍射則約矢，侍投則擁矢。勝則洗爵而請，不角」，注云「角謂觥，罰爵也。於尊長與客，如獻酬之爵」。又詩云「我姑酌彼兕觥」，毛傳云「兕觥，角爵」，箋云「兕觥，罰爵」，是其角觶、兕觥皆罰爵，此角觶以兕角爲之，非謂「四升曰角」者也。若然，此「角觶」對下文飲君云「象觶」，故云「角觶」，謂賓酌如兕自飲君，<sup>①</sup>即下文「賓降，洗象觶」，亦從獻酬之爵，不敢用罰爵也。公降一等。

小臣正辭。賓升，再拜稽首。公荅再拜。賓坐祭，卒爵，再拜稽首。公荅再拜。賓降，洗象觶，升，酌膳以致，下拜。小臣正辭。升，再拜稽首。公荅再拜。公卒觶。賓進受觶，降，洗散觶，升，實散，下拜。小臣正辭。升，再拜稽首。公荅再拜。賓復酌自飲者，夾爵也。但如致爵，則無以異於燕也。夾爵，亦所以恥公也，所謂「若飲君燕則夾爵」。**疏**注「賓復」至「夾爵」○釋曰：云「所謂「若飲君燕則夾爵」」者，言「所

謂」，《鄉射》文。彼云「燕」者，則此經「夾爵」也。賓坐，

不祭，卒觶，降奠于筐，階西東面立。不祭，象射爵。**疏**注「不祭象射爵」○釋曰：案上文受罰者取罰於

豐，飲之不祭，此云君爵不祭，是以賓飲夾爵亦不祭，皆與射同，故云「象」。擯者以命升賓。賓升，就席。

擯者，司正也。今文「席」爲「筵」。若諸公、卿、大夫之耦不勝，則亦執弛弓，特升飲。此耦亦謂士

也。特猶獨也，以尊與卑爲耦，<sup>②</sup>而又不勝，使之獨飲，若無倫匹，孤賤也。衆皆繼飲射爵，如三耦。射爵

辯，乃徹豐與觶。徹，除也。司宮尊侯于服不之東北，兩獻酒，東面，南上，皆加勺。設洗

于尊西北。筐在南，東肆，實一散于筐。爲大侯獲者設尊也。言尊侯者，獲者之功由侯也。不於初

設之者，不敢必君射也，君不射則不獻大侯之獲者。散，

<sup>①</sup>「謂賓酌如兕自飲君」，曹校云當爲「謂賓酌兕自飲如飲君」。

<sup>②</sup>「與卑」，阮校云：《通解》、毛本無此二字。

爵名，容五升。**疏**「司宮」至「於篚」○注「爲大」至「五升」

○釋曰：自此盡「侯而俟」，論設尊獻服不之事。云「不於初設之者，不敢必君射也，君不射則不獻大侯之獲者」，若然，此設大侯之獲者，<sup>①</sup>君不射則不設之，不豫設者，不敢必君射。案上張侯，先設大侯，君射大侯，張之必君射者，但聖人設法，一與一奪，以大射者爲祭擇士，所以助祭，人君不可不親，故奪其尊，使之必射，故豫張大侯。至此設大侯之尊，君射訖乃設之者，許其自優暇，容有不射之理，是以不射則不設，射乃設之。云「散，爵名，容五升」者，案《韓詩傳》云「一升曰爵，二升曰觚，三升曰觶，四升曰角，五升曰散」，是其散「容五升」也。司馬正洗散，遂實爵，獻服不。言服不者，著其官，尊大侯也。服不，司馬之屬，掌養猛獸而教擾之者。洗酌皆西面。**疏**「司馬」

至「服不」○注「言服」至「西面」○釋曰：云「服不者，著其官，尊大侯也」者，自此已前皆以事名之，於此而言服不，著其官，言尊大侯故也。云「服不，司馬之屬」者，以其服不在大司馬下，六十官之屬者。云「掌養猛獸而教擾之」者，猛獸熊、羆之屬，教之使擾馴人意，象王者服不服諸侯，使歸服王者。云「洗酌皆西面」者，以其設尊設洗皆東

面，故知洗爵酌酒皆西面向之也。若然，獻旅食尊後酌者，爲背君，此西面不嫌背君，以其南統於侯故也。服不侯西北三步北面拜受爵。近其所爲獻。**疏**「服

不」至「受爵」○注「近其所爲獻」○釋曰：云「近其所爲獻」者，以其服不得獻，由侯所爲，故不近之而近侯獻之，故云「近其所爲獻」也。司馬正西面拜送爵，反位。不侯卒爵，略賤也。此終言之，獻服不之徒，乃反位。**疏**

「司馬」至「反位」○注「不侯」至「反位」○釋曰：云「不侯卒爵，略賤也」者，案上文獻服不訖，又案下文「卒祭，左个之西北三步，東面，設薦俎，立卒爵」，若然，卒爵禮祭侯訖，<sup>②</sup>今司馬反位在未祭侯之前，故略賤也。云「此終言之，獻服不之徒，乃反位」者，但大侯尊，服不與其徒二人共在獲所，獻服不亦兼獻徒。<sup>③</sup>此經唯見獻服不，不見獻其徒，即云「司馬反位」，明獻徒移始反位。<sup>④</sup>是以知反位

①「設」下，曹校云脫「爲」字。

②「禮」，曹校云當爲「在」。

③下「獻」下，阮校云毛本有「其」字。

④「移」，曹校云各本作「後」是。

者終言之，其實獻徒後乃反位，故下注云「司馬正皆獻之」是也。宰夫有司薦，庶子設折俎。宰夫有司，宰夫之吏也。《鄉射·記》曰：「獲者之俎，折脊、脅、肺。」**疏**

「宰夫」至「折俎」○注「宰夫」至「脅肺」元空一字。○釋曰：

云「宰夫有司，宰夫之吏也」者，諸侯宰夫是士，而宰夫有司明是宰夫之吏，府史也。引《鄉射·記》者，此俎實無文，故引之爲證。卒錯，獲者適右个，薦俎從之。

不言服不，言獲者，國君大侯服不負侯，其徒居乏待獲，變其文，容二人也。司馬正皆獻之。薦俎已錯，乃適右个，明此獻已，已歸功於侯也。適右个，由侯內。《鄉射·記》曰：「東方謂之右个。」**疏**「卒錯」至「從之」○注「不言」至

「右个」○釋曰：云「國君大侯服不負侯，其徒居乏待獲，變其文，容二人也」者，案上注云「天子服不氏下士一人，徒四人，掌以旌居乏待獲」。鄭言「容二人」者，欲見服不與徒二人皆得獻，故鄭云「司馬正皆獻之」。云「適右个，由侯內」者，以其既祭左个，次祭右个，<sup>①</sup>乃祭於中，故云「適右个，由侯內」。獲者左執爵，右祭薦俎，二手

祭酒。祭俎不奠爵，不備禮也。「二手祭酒」者，獲者南面於俎北，當爲侯祭於豆間，爵反注，爲一手不能正也。

此薦俎之設，如於北面人焉。天子祝侯曰：「唯若寧侯，無或若女不寧侯。不屬於王所，故抗而射女。強飲強食，貽女曾孫諸侯百福。」諸侯以下，祝辭未聞。**疏**「獲者」至

「祭酒」○注「祭俎」至「未聞」○釋曰：云「祭俎不奠爵，不備禮也」者，言祭俎者，謂祭俎上肺，但肺有二種，此云祭是祭肺也，非是離肺。知者，案《鄉射·記》云「獲者之俎，折脊、脅、肺、臠」，又曰「釋獲者之俎，折脊、脅、肺，皆有祭」，則此俎祭肺亦離肺。<sup>②</sup>若然，凡祭祭肺，皆不奠爵，是其常。云「此不奠爵，不備禮」者，但祭肺、離肺兩有，祭肺不奠爵。若空有祭肺，亦不奠爵。今祭俎不奠，故云「不備禮」。云「天子祝侯曰」以下，《周禮·梓人》文。云「諸侯以下，祝辭未聞」，知諸侯不與天子祝辭同，而云未聞者，以本所射侯，天子中之則能服諸侯，諸侯中之則得爲諸侯。若天子云「抗而射女」，諸侯則不得云「抗而射女」，是以知祝辭有異，但未聞耳。適左个，祭如右

① 「以其既祭左个次祭右个」，曹校云「左」「右」二字當互易。

② 「亦」，曹校云當爲「非」。

个，中亦如之。先祭个後中者，以外即之至中，若神

在中。《鄉射禮》曰：「獻獲者俎與薦皆三祭。」**疏**注「鄉

射」至「三祭」○釋曰：以其左右及中，故三者皆三祭，非謂

一處有三祭。卒祭，左个之西北三步，東面。此

鄉受獻之位也。不北面者，嫌爲侯卒爵。**疏**「卒祭」至

「東面」○注「此鄉」至「卒爵」○釋曰：云「不北面者，嫌爲

侯卒爵」者，前服不受獻之時，侯西北面者，<sup>①</sup>欲歸功於侯

故也。今卒爵雖同舊處而東面者，以其前受獻爲己，今卒

爵還爲己，卒爵故東面，是以云「不北面者，嫌爲侯卒爵」

也。設薦俎，立卒爵。不言不拜既爵，司馬正已反

位，不拜可知也。《鄉射禮》曰：「獲者薦右東面立飲。」**疏**

「設薦」至「卒爵」○注「不言」至「立飲」○釋曰：云「不言不

拜既爵，司馬正已反位，不拜可知也」者，決《鄉射》「獲者

薦右東面立飲，不拜既爵」，此則不言之，以其司馬在，對

司馬不拜既爵，司馬已反位，不拜既爵可知，故不言。引

《鄉射禮》者，此不言立位之處，當同鄉射薦者東面立。<sup>②</sup>

司馬師受虛爵，洗，獻隸僕人與巾車、獲者，

皆如大侯之禮。隸僕人埽侯道。巾車張大侯。及參

侯，干侯之獲者。其受獻之禮如服不也。隸僕人、巾車於

服不之位受之，功成於大侯也。不言量人者，此自後以及

先，可知。**疏**「司馬」至「之禮」○注「隸僕」至「可知」○釋

曰：云「隸僕人埽侯道」者，謂君射時，初埽之時，亦是隸僕

人也。云「巾車張大侯」者，舉尊者而言，其參侯、干侯亦

張之，是以上文司馬「遂命量人、巾車張三侯」，此直云「大

侯」，舉尊而言也。云「及參侯、干侯之獲者」，以其上文以

獻大侯服不獲者，<sup>③</sup>明此經獲者是參侯、干侯可知。<sup>④</sup>云

「隸僕人、巾車於服不之位受之」，知者，以其隸僕人、巾車

素無其位，而經云「如大侯之禮」，明就大侯之位受獻，是

以鄭云「功成於大侯也」。云「不言量人者，此自後以及

先，可知」者，案上張侯之時，先言量人，後言巾車，君射之

時，乃有隸僕人埽侯道，受獻先言隸僕人，後言巾車，是自

①「北」，曹校云此字當重。

②「者」，曹校云當爲「右」。

③「以」，阮校云：《通解》作「已」。

④「明此經獲者是參侯干侯可知」，阮校云：《通解》作

「明此是參侯干侯之獲者可知」，毛本「此」作「知」，餘

與《通解》同。



後以及先，隸僕尚得獻，明量人在巾車之先，得獻可知。卒，司馬師受虛爵，奠于筐。獲者之筐。獲者皆執其薦，庶子執俎從之，設于乏，少南。少南，爲復射妨旌也。隸僕人、巾車、量人自服不而南。

**疏**

注「隸僕」至「而南」○釋曰：知「自服不而南」者，雖無正文，以其受獻於服不之位，明繼服不而南可知。服不復

負侯而俟。司射適階西，去扑，適堂西，釋弓，說決、拾、襲，適洗，洗觚，升，實之，降，獻釋獲者于其位少南。獻釋獲者與獲者異，文武不同也。去扑者，扑不升堂也。少南，辟中。

**疏**「司射」

至「少南」○釋曰：自此盡「反位」，論獻釋獲者之事。○注「文武不同」○釋曰：言「文武不同」者，以其獻獲者於侯西，北面受獻，歸功於侯，是其武；獻釋獲者升堂酌酒，東面獻之，就釋筭之所，是其文，故云「文武不同」。薦脯醢、折俎，皆有祭。俎與服不同，唯祭一爲異。

**疏**

注「俎與」至「爲異」○釋曰：云「俎與服不同」者，以其俱用一俎。云「唯祭一爲異」者，上祭侯之俎引《鄉射》獲者俎與薦皆三祭，鄭《鄉射》注云「祭侯三處」，至此獻釋獲者，

不主祭侯，正唯一祭俎耳，故云「唯祭一爲異」。釋獲者薦右東面拜，受爵。司射北面拜送爵。釋獲者就其薦坐，左執爵，右祭脯醢，興，取肺，坐祭，遂祭酒，祭俎不奠爵，亦賤不備禮。

**疏**注

「祭俎」至「備禮」○釋曰：上祭侯之時，祭俎不奠爵，不備禮，至此祭俎亦祭肺，不奠爵，賤亦不備禮。興，司射

之西北面立卒爵，不拜既爵。司射受虛爵，奠于筐。釋獲者少西辟薦，反位。辟薦，少西之者，爲復射妨司射視筭，亦辟俎也。

**疏**注「亦辟俎也」

○釋曰：以其薦俎相將，薦既辟，俎亦辟可知。司射適堂西，袒、決、遂，取弓，挾一个，適階西，搯扑以反位。爲將復射。

**疏**「司射」至「反位」○注「爲

將復射」○釋曰：自此盡「于公，如初」，論司射請公爲三番射事。司射倚扑于階西，適阼階下，北面，請射于公，如初。不升堂，賓、諸公、卿、大夫既射矣，聞之可知。

**疏**注云「不升堂，賓、諸公、卿、大夫既射矣，聞

之可知」者，決前司射升堂請射于公，升，今不升者，諸公、

卿、大夫前已射，聞之矣。反，搯扑，適次，命三耦

皆袒、決、遂，執弓，序出取矢。臯言拾，是言序，

互言耳。**疏**「反搯」至「取矢」○注「臯言」至「言耳」○釋

曰：自此盡「襲，反位」，論三耦與卿大夫取矢之事。云「臯

言拾」者，謂第一射時，**①**三耦云「拾取矢」。云「是言序」

者，謂序出次時，一耦先後。「互」者，皆次序出次，至庭拾

取矢。司射先反位。言先，先三耦也。司射既命三

耦以入次之事，即反位。三耦入次，袒、決、遂，執弓，挾

矢，**②**乃出，反次外西面位。臯不言司射先反位，三耦未

有次位，**③**無所先也。**疏**「司射先反位」○注「言先」至

「先也」○釋曰：云「臯不言司射先反位，三耦未有次外位，

無所先也」者，凡言反位者，謂前已有位，今乃反之，是今

禮反於舊位，舊位第一番之時，**④**三耦次外舊無位，司射

雖先有位，不得言「先反位」，是以決之。三耦拾取

矢，如初。小射正作取矢，如初。小射正，司射

之佐。作取矢，禮殺代之。**疏**「三耦」至「如初」○注「小

射」至「代之」○釋曰：云「禮殺代之」者，決第一番不言小

射正作取矢。三耦既拾取矢，諸公、卿、大夫皆

降如初位，與耦入於次，皆袒、決、遂，執弓，

皆進當楅，進，坐，說矢束。上射東面，下射

西面，拾取矢如三耦。皆進當楅，進三耦揖之位

也。凡繼射，命耦而已，不作射，不作取矢，從初。**疏**「三

耦」至「三耦」○注「皆進」至「從初」○釋曰：云「凡繼射，命

耦而已，不作射，不作取矢，從初」者，言「凡繼射，命耦」

者，前三耦卒射後，大夫降至「三耦之南，西面，北上，司射

東面于大夫西，比耦大夫與大夫，**⑤**命上射曰：「某御於

子。」命下射曰：「子與某子射。」卒，遂比衆耦」云云。至公

即席後，賓升階復位還筵，「而後卿大夫繼射」，後「衆皆繼

射，釋獲皆如初」，注云「諸公卿言取弓矢，衆言釋獲，互言

**①** 「一」下，阮校云：毛本有「番」字。

**②** 「挾矢」，汪文臺《識語》云：「案經下云「三耦拾取矢」，

則此入次時，矢尚未取，不得先言「挾矢」也。張爾岐

曰：注「挾矢」字衍。是也」。

**③** 「次」下，阮校云：《通解》、毛本有「外」字，與疏合。

**④** 「舊位」，曹校云此二字衍。

**⑤** 「比」，阮校云：毛本作「北」。

也」，既司射注「司射所作唯上耦」。<sup>①</sup>是此文小射正但作三耦拾取矢，公以下亦無作拾文，<sup>②</sup>故曰「不作取矢，從初」，從三耦法也。若士與大夫爲耦，士東面，大夫西面。大夫進，坐，說矢束，退，反位。說矢束，自同於三耦，謙也。

**疏**注「說矢」至「謙也」○釋曰：

云「自同於三耦，謙也」者，以其三耦是士之束，既是大夫，<sup>③</sup>若束，則異於三耦，故云「說矢束，自同於三耦，謙也」。《鄉射》「坐說矢束」，注云「說矢束者，下耦以將拾取」，彼不言同三耦者，彼三耦非大夫故也。耦揖，進，

坐，兼取乘矢，興，順羽，且左還，毋周，反面揖。兼取乘矢，不敢與大夫拾。大夫進坐，亦兼取

乘矢，如其耦。北面，搢三挾一个，揖，進。

大夫與其耦皆適次，釋弓，說決、拾、襲，反位。諸公卿升，就席。大夫反位，諸公卿乃升就

席，大夫與己上下位。

**疏**注「大夫」至「下位」○釋曰：諸

公、卿、大夫自爲耦者，拾取矢在前；大夫與士耦者，說矢束、拾取矢在後。今待大夫反位，公卿乃升就席者，以其上大夫與下大夫同是大夫爵，但上下有異耳，故上大夫待

下大夫反位，乃後升就席。衆射者繼拾取矢，皆如

三耦。遂入于次，釋弓矢，說決、拾、襲，反位。司射猶挾一个以作射，如初。一耦揖，升，如初。司馬升，命去侯，負侯許諾。司馬降，釋弓，反位。司射與司馬交于階前，倚扑于階西，適阼階下北面，請以樂于公。公許。請奏樂以爲節也。始射獲而未釋獲，復釋獲，復

用樂行之。君子之於事也，始取苟能，中課有功，終用成法，教化之漸也。射用應樂爲難。孔子曰：「射者何以聽？循聲而發，發而不失正鵠者，其唯賢者乎！」**疏**注

「請奏」至「者乎」○釋曰：云「請奏樂以爲節也」者，謂若天子《騶虞》九節，諸侯《貍首》七節，大夫《采蘋》、士《采芣》皆五節。云「始射獲而未釋獲」者，謂第一番三耦射中時，

①「既司射注」，曹校云當爲「按鄉射經」。

②「公」上，曹校云脫「諸」字。

③「以其三耦是士之束既是大夫」，此兩句當有訛脫，疑「之」當爲「不」。曹校云當爲「以其三耦是士與大夫爲耦，不束，已是大夫」。

雖唱獲，未釋筭。云「復釋獲」者，謂第二番衆耦皆射，釋筭，未作樂。云「復用樂行之」者，謂第三番射，非直釋筭，復用樂焉。云「射用應樂爲難」者，但禮射其容體比於禮，其節奏比於樂，又須中於侯，名爲應樂節。云「孔子曰」者，《禮記·射義》文。引之者，證射用應樂而爲難之意。<sup>①</sup>司射反，搯扑，東面，命樂正曰：「命用樂。」言君有命，用樂射也。樂正在工南，北面。

**疏**注

「言君」至「北面」○釋曰：云「樂正在工南，北面」者，此時工在洗東，西面，樂正在工南，北面，司射在西階下，東面。經云「命樂正」者，東面遙命之。樂正曰：「諾。」司

射遂適堂下，北面視上射，命曰：「不鼓不釋。」不與鼓節相應，不釋筭也。鼓亦樂之節。《學記》

曰：「鼓無當於五聲，五聲不得不和。」凡射之鼓節，《投壺》其存者也。《周禮》射節，天子九，諸侯七，卿大夫以下五。

**疏**注「不與」至「下五」○釋曰：引《學記》者，證鼓得與樂

爲節之事。云「凡射之鼓節，《投壺》其存者也」者，射之鼓節多少無文，案今《禮記·投壺》篇圖出魯鼓，薛鼓，云「取半以下爲投壺節，盡用之爲射節」，是其《投壺》存者。云《周禮》射節天子九以下者，是《射人》、《樂師》皆有此

文。引之者，證射節多少。上射揖。司射退，反位。樂正命大師曰：「奏《貍首》，閒若一。」

樂正西面受命，左還，東面命大師以大射之樂章，使奏之也。《貍首》，逸《詩》，《曾孫》也。《貍》之言不來也，其詩有「射諸侯首不朝者」之言，因以名篇。後世失之，謂之《曾孫》，「曾孫」者，其章頭也。《射義》所載《詩》曰「曾孫侯氏」是也。以爲諸侯射節者，采其既有弧矢之威，又言「小大莫處，御於君所。以燕以射，則燕則譽」，有樂以時會君事之志也。「閒若一」者，調其聲之疏數重節。

**疏**

「上射」至「若一」○注「樂正」至「重節」○釋曰：云「《貍首》，逸《詩》，《曾孫》也」者，以其《貍首》是篇名，「曾孫」是章頭。知者，以其《射義》上文云「其節，天子以《騶虞》，諸侯以《貍首》，卿大夫以《采蘋》，士以《采芣》，以類言之，《騶虞》、《采蘋》是篇名，《貍首》篇名可知。《射義》下文「諸侯君臣盡志於射」，又云「故《詩》曰『曾孫侯氏，四正具舉。小大莫處，御于君所』」，注云「此《曾孫》之詩，諸侯之射節也。四正，正爵四行也。四行者，獻賓、獻公、獻卿、

①「而」，曹校云此字衍。

獻大夫，乃後樂作而射也」。上云《狸首》，下云《曾孫》，「曾孫」章頭也，是以鄭云「曾孫」其章頭，《射義》所載「曾孫侯氏」是也。云「後世失之，謂之《曾孫》者」，以「曾孫」爲篇名，是失之。云「曾孫」，其章頭也，是正世人也。云「小大莫處」已下，「則燕則譽」以上，皆《射義》文，彼注「以燕以射，先行燕禮乃射」是也。云「閒若一」者，調其聲之疏數重節者，謂九節、七節、五節中間，相去或希疏或密數，中間使如一。必疏數如一者，重此樂故也。大師不興，許諾。樂正反位。奏《狸首》以射。三耦卒射。賓待于物，如初。公樂作而后就物，稍屬，不以樂志，其他如初儀。不以樂志，君之射儀遲速從心，其發不必應樂，辟不敏也。志，意所擬度也。《春秋傳》曰：「吾志其目。」**疏**「大師」至「初儀」○注「不以」至「其目」○釋曰：此經云「如初」者，皆如上第二番射法，唯作樂爲異耳。云「辟不敏也」者，若以樂志，不與樂節相應，則見君不敏，今不以樂志，遲速從心，其發不必應樂，是「辟不敏也」。引《春秋傳》者，定八年《左氏傳》文，「正月，公侵齊，門于陽州」，其時魯人顏息「射人中眉」，退曰「我無勇，吾志其目也」，服氏注云「志中

其目，是非其誠，詐以自矜」。引之者，證志是「意所擬度」也。卒射，如初。賓就席。諸公、卿、大夫、衆射者皆繼射，釋獲，如初。卒射，降，反位。釋獲者執餘獲進告左右卒射，如初。司馬升，命取矢。負侯許諾。司馬降，釋弓，反位。小臣委矢。司馬師乘之，皆如初。司射釋弓，視筭，如初。釋獲者以賢獲與鈞告，如初，復位。司射命設豐，實觶，如初。遂命勝者執張弓，不勝者執弛弓，升，飲，如初。卒，退豐與觶，如初。司射猶袒、決、遂，左執弓，右執一个，兼諸弦，面鏃，適次，命拾取矢，如初。側持弦矢曰執。面猶尚也，兼矢於弦，尚鏃，將止，變於射也。**疏**注「側持」至「射也」○釋曰：上文皆云「挾一个」，此經云「執一个」，故上注云「方持弦矢曰挾，以其將射故也」，此注云「側持弦矢曰執」，謂鏃向上，故云「兼矢於弦，尚鏃，將止，變於射也」。案《鄉射禮》云「矢不挾，兼諸弦附」，不言「面鏃」，此言「面鏃」不

言兼弦附，各舉一邊，省文之義。言「兼弦附」者，一矢兼弦，三矢兼附也。司射反位。三耦及諸公、卿、

大夫、衆射者皆袒、決、遂，以拾取矢，如初。

矢不挾，兼諸弦，面鏃，退適次，皆授有司弓矢，襲，反位。不挾，亦謂執之，如司射。卿、大夫

升，就席。司射適次，釋弓，說決，拾，去扑，

襲，反位。司馬正命退楅、解綱。小臣師退

楅、巾車、量人解左下綱。司馬師命獲者以

旌與薦俎退。解猶釋也。今文「司馬師」無「司馬」。

司射命釋獲者退中與筭而俟。諸所退射器皆俟，備君復射。釋獲者亦退其薦俎。疏注「諸所」至「薦

俎」○釋曰：云「皆俟，備君復射」者，但射已三番，於後或射或否，但臣不敢必君射，故備擬於君也。云「釋獲者亦

退其薦俎」者，前辟薦俎，今既退中與筭，薦俎不可虛留，

明亦退之可知。公又舉奠觶，唯公所賜，若賓

若長，以旅于西階上，如初。大夫卒受者以

虛觶降，奠于筐，反位。疏「公又」至「反位」○釋

曰：此一節論射訖爲大夫舉旅之事。司馬正升自西階，東楹之東北面告于公，請徹俎。公許。射事既畢，禮殺人倦，宜徹俎燕坐。疏「司馬」至「公許」

○釋曰：自此盡「反位，坐」，論徹俎升坐安燕之事。遂

適西階上，北面告于賓。賓北面取俎以出。

諸公、卿取俎，如賓禮。遂出，授從者于門

外。自其從者。大夫降，復位。門東北面位。疏

「大夫降復位」○注「門東北面位」○釋曰：云「大夫降」者，

大夫雖無俎，以賓及公卿皆送俎，不可獨立於堂，故降復

位。云「門東北面位」者，謂初小臣納卿大夫門東北面揖

位。案下文「賓、諸公卿皆入門，東面，北上」，謂在西階

下。知大夫不復在西階下位者，以其言「復位」者，復前

位，其西階下舊無位，故知非西階下。若然，公卿入西階

下，鄭云「諸公卿不入門而右，以將燕，亦因從賓」者也。

大夫以公卿未入，不可猶居西階，故在門東北面位也。

① 「入」下，曹校云脫「在」字。

② 「猶」，曹校云當爲「獨」。

庶子正徹公俎，降自阼階以東。降自阼階，若親徹也。以東，去藏。賓、諸公、卿皆入門，東面，北上。諸公、卿不入門而右，以將燕，亦因從賓。司正升賓。賓、諸公、卿、大夫皆說屨，升，就席。公以賓及卿大夫皆坐，乃安。歸命以我安，臣於君尚猶踧踖，至此乃敢安。羞庶羞。羞，進也。庶，衆也。所進衆羞，謂腍肝腎、狗臠醢也，或有炰鼈膾鯉、雉兔鶉鴛。**疏**「羞庶羞」○注「羞進」至「鶉鴛」○釋曰：知有「腍肝腎」者，此大射先行燕禮，燕法其牲唯有狗。又案《內則》云「肝腎，取狗肝一，幪之以其腎，濡炙之，舉燠其腎，不蓐」，注云「腎，腸間脂」，故知此羞中有肝腎也。又知有「狗臠醢」者，以其《公食大夫》有牛臠炙、羊臠炙、豕臠炙，此燕無三牲，故知臠醢亦用狗。知有「炰鼈膾鯉」者，案《六月》詩云「吉甫燕喜，既多受祉」，又云「飲御諸友，魚鼈膾鯉」，故知有此也。公食大夫，有王事之勞乃有之，故《六月》詩鄭注「以吉甫遠從鎬地來，又日月長久，今飲之酒，使其諸友恩舊者侍之，又加其珍美之饌，所以極勸之也」。是有王事之勞乃有之，無王事之勞則無，故《公食大

夫》不見也。又知有「雉兔鶉鴛」者，《公食大夫》二十豆有此四者。此仍引《內則》上大夫二十豆者，不引二十豆盡，以其二十豆有三牲之物，此狗，故唯引此四者。大夫祭薦。燕乃祭薦，不敢於盛成禮。**疏**「大夫祭薦」○注「燕

乃」至「成禮」○釋曰：云「燕乃祭薦，不敢於盛成禮」者，此大夫卑，不敢與公卿同時於盛成禮也。司正升，受命，皆命：「公曰：『衆無不醉。』」賓及諸公、卿、大夫皆興，對曰：「諾，敢不醉。」皆反位，坐。皆命者，命賓、命諸公、命卿大夫，皆鄉其位也。興對必降席，敬也。司正退，立西序端。**疏**「司正」至「位

坐」○注「皆命」至「序端」○釋曰：云「興對必降席」者，經直云「興」，不言「降席」，鄭知降席者，以爲反坐，故知降席也。言「敬也」者，決上文司正命賓與大夫「以我安」，雖未坐，不云「降而對」，故以此爲敬。若然，上不降席者，彼直云「安」，未盡殷勤，故不降。此命使醉，是盡殷勤，故興降加敬也。知「司正退，立西序端」者，案司正監酒，此將獻士，事未訖，亦如《鄉飲酒》監旅時，立于西序端也。主人洗，酌，獻士于西階上。士長升，拜受鬴。

主人拜送。獻士用觶，士賤也。今文「觶」作「觚」。

**疏**「主人」至「拜送」○注「獻士」至「作觚」○釋曰：自此盡

「奠于簠」，論獻士及祝、史等之事。云「獻士用觶，士賤也」者，言獻士用觶，對上獻大夫已上觚，<sup>①</sup>觚二升，觶三升，用大者賤，用小者尊，故云「士賤也」。士坐祭，立

飲，不拜既爵。其他不拜，坐祭，立飲。其他，

謂衆士也。升不拜受爵。

**疏**注「其他」至「受爵」○釋曰：

云「其他謂衆士也」者，長謂士中之長，次云士，<sup>②</sup>謂長已下。下云「其他謂衆士」者，<sup>③</sup>亦謂二十七士，以其下經旅

食，謂庶人在官，故知此非府、史以下。乃薦司正與

射人于觶南，北面，東上，司正爲上。司正、射

人，士也。以齒受獻，既乃薦之也。司正，大射正也，射

人，小射正，略其佐。

**疏**注「司正」至「其佐」○釋曰：案

《燕禮》薦司正與射人一人，司士一人，執事二人，此不言

其數，又不言司士與執事者，以射人是小射正，非一人，互

見執事。執事者皆同獻，不言其數，不言執事者二人，文

不具。辯獻士。士既獻者立于東方，西面，

北上，乃薦士。士既獻易位者，以卿大夫在堂，臣位

尊東也。畢獻薦之，略賤。

**疏**注「士既」至「略賤」○釋

曰：云「畢獻薦之，略賤」者，案上獻士立飲，是畢獻訖，乃云

「乃薦司正與射人于觶南」，是獻士又獻司正已下。若然，薦

士當在「乃薦司正」上，至此言之者，其實薦士在「乃薦司正」

上，今此更言士得獻訖，立在東方，立畢乃薦，不畢獻，待司

正薦，乃薦士也。是以「薦司正」言「乃」者，緩辭，明司正已

下薦在士後也。祝史、小臣師，亦就其位而薦

之。亦者，亦士也，辯獻乃薦也。祝史門東北面，東上。

主人就士旅食之尊而獻之。旅食不拜受爵，

坐祭，立飲。主人既酌，西面。士旅食北面受之。不洗

者，於賤略之。

**疏**注「主人」至「略之」○釋曰：知「主人既

酌，西面。士旅食北面受之」者，以其不可背君南面授，故

知位之如此。若然，大史等亦北面，則亦西面授酒也。其

<sup>①</sup>「已上」，阮校云：毛本作「用」，《通解》「已上」之下仍

有「用」。

<sup>②</sup>「士」，曹校云當爲「其他」。

<sup>③</sup>「下」，重刊單疏本作「又」，曹校云「又」字似衍。



小臣師等案上文位在阼階東面，<sup>①</sup>自然北面授。主人

執虛爵，奠于篚，復位。賓降，洗，升，媵觶于公，酌散，下拜。公降一等。小臣正辭。

賓升，再拜稽首。公荅再拜。賓受公賜多矣，禮

將終，宜勸公，序厚意也。今文「觶」爲「觚」；「公荅拜」，無

「再拜」。<sup>②</sup>**疏**「賓降」至「再拜」○釋曰：自此盡「旅酌」，

論賓舉爵爲士舉旅行酬之事。○注「賓受」至「再拜」○釋

曰：云「賓受公賜多矣，禮將終，宜勸公，序厚意也」者，上

文爲賓、爲卿、爲大夫舉旅，皆臣自致爵，今此其賓爲士舉

旅行酬，<sup>③</sup>因得爲賓致爵於君，故鄭云「序賓厚意也」。

賓坐祭，卒爵，再拜稽首。公荅再拜。賓

降，洗象觚，升，酌膳，坐奠于薦南，降拜。

小臣正辭。賓升，成拜。公荅拜。賓反位。

反位，反席也。此觚當爲觶。**疏**注「反位」至「爲觶」○釋

曰：自此已前賓位在西階下，東面，無席，戶牖之間位則有

席。此「賓升成拜」，不言「降，反位」，明「反位」者，反於戶

牖之間席位。云「此觚當爲觶」者，凡旅酬皆用觶，獻士尚

用觶，故知觚當爲觶，下經觚亦當爲觶。公坐取賓所

媵觚，興，唯公所賜。受者如初受酬之禮。

降，更爵洗，升，酌膳，下，再拜稽首。小臣

正辭。升，成拜。公荅拜。乃就席，坐行

之。坐行之，若今坐相勸酒。有執爵者。士有盥升，

主酌授之。**疏**「有執爵者」○注「士有」至「授之」○釋曰：

知「士有盥升」者，以其爲公、卿、大夫使行旅，不可不潔。

知是士者，案下文云「士有執膳爵者，有執散爵者」，故知

「士有盥升，主酌授之」。唯受于公者拜。公所賜者

拜，其餘則否。司正命執爵者爵辯，卒受者興

以酬士。欲令惠均。**疏**注「欲令惠均」○釋曰：以堂

上公、卿、大夫旅徧，并堂下之士，故云「欲令惠均」也。

大夫卒受者以爵興，西階上酬士。士升。

大夫奠爵，拜。士荅拜。興酬士者，士立堂下，與

大夫奠爵，拜。士荅拜。興酬士者，士立堂下，與

①「面」，重刊單疏本作「南」。曹校云：「面」字訛，「南

面」二字或當並存。

②「拜」，阮校疑衍。

③「其」，曹校云此字衍。

上坐者異也。**疏**注「興酬」至「異也」○釋曰：云「興酬士」

者，決向來堂上相旅，皆坐相酬，執爵者行之，大夫未能受酬者輒興西階上，<sup>①</sup>故鄭云「士立堂下，與上坐者異也」。

大夫立卒爵，不拜，實之。士拜受。大夫拜

送。士旅于西階上，辯。祝史、小臣師、旅食皆及

焉。**疏**注「祝史」至「及焉」○釋曰：鄭知祝史以下皆得旅

酬者，前得獻祝史與旅皆得獻，<sup>②</sup>明此旅酬得之可知。

士旅酌。旅，序也。士以次自酌相酬，無執爵者。**疏**

「士旅酌」○注「旅序」至「爵者」○釋曰：云「無執爵者」，對

上文卿大夫等有執爵者，以其坐故也；士無執爵者，以其賤，不坐，故以次自酌以相酬，無執爵者也。若命曰復

射，則不獻庶子。獻庶子則正禮畢，後無事。**疏**注

「獻庶」至「無事」○釋曰：獻酬之禮，庶子以下最後得獻。

若獻庶子之後正禮畢，不得更有射事，故命復射在獻庶子之前。司射命射，唯欲。司射命賓及諸公、卿、大夫

射，欲者則射，不欲者則止，可否之事，從人心也。**疏**注

「司射」至「心也」○釋曰：此乃三番射後，爵行無筭，非直

解怠，<sup>③</sup>復有醉者，是以不可恣心所欲。<sup>④</sup>卿大夫皆

降，再拜稽首。公荅拜。拜君樂與臣下執事無已。

不言賓，賓從群臣，禮在上。**疏**注「拜君」至「在上」○釋

曰：云「不言賓，賓從群臣，禮在上」者，謂初酬賓直言賓，

再舉旅言「若長」，不專於賓，已是禮殺。第三舉旅，云「唯

公所賜，若賓若長」，至此賓士舉旅，<sup>⑤</sup>直云「唯公所賜」，

復不言「若賓若長」，賓從群臣禮在上。壹發，中三侯

皆獲。其功一也，而和者益多，尚歡樂也。矢揚觸，或有

參中者。**疏**注「其功」至「中者」○釋曰：上文第二番、第

三番，唯公得中三侯，皆釋獲。至此燕後復射，禮殺，臣與

君同，是以鄭云「和者益多，尚歡樂也」。云「其功一也」

者，謂三侯所中皆是功，故云「一也」。云「矢揚觸或有參

中者」，卿大夫主射參侯，士主射豢侯，其中或揚觸，容中

<sup>①</sup>「大夫未能受酬者輒興西階上」，曹校云：「殷本作「大

夫未受酬者興西階上酬士」。案：殷本是也，但「興」

上「輒」字似當有。」

<sup>②</sup>「旅」下，曹校云脫「食」字。

<sup>③</sup>「非直」原作「直非」，依阮校據毛本改。

<sup>④</sup>「不」，曹校云此字衍。

<sup>⑤</sup>「士」上，曹校云脫「爲」字。

別侯，皆與釋。主人洗，升自西階，獻庶子于阼階上，如獻士之禮。辯獻，降，洗，遂獻左右正與內小臣，皆於阼階上，如獻庶子之禮。

庶子既掌「正六牲之體」，又「正舞位，授舞器」，與膳宰、樂正聯事，又掌國子戒令，教治世子之官也。左右正謂樂正、僕人正也，位在中庭之左右。小樂正在頌磬之北右也，工在西即北面，工遷於東則東面。大樂正在笙磬之北左也，工在西則西面，工遷於東則北面。僕人正相大師，工升堂與其師士降立於小樂正之北，北上，工遷於東則陪其工後。國君無故不釋縣，二正，君之近官也。內小臣，奄人，掌君陰事陰令，后夫人之官也。獻三官於阼階，別內外臣也。同獻更洗，以時事不聯也。獻正下及內小臣，則磬人、鍾人、鑄人、鼓人、僕人師、僕人士盡獻可知也。庶子、內小臣，位在小臣師之東，少退，西上。**疏**「主人」至「之禮」○注「庶子」至「西上」○釋曰：云「小樂正在頌磬之北右也，工在西即北面」者，工在西謂遷樂於下時，大師、少師、上工立於鼓北也。云「工遷於東則東面」者，案上遷樂於東之時，直云大師、少師、上工皆「東楫之東」，不見小樂正從之，明留在西縣之北，東面向工矣。云「大樂

正在笙磬之北左也，工在西則西面」者，案上文司射「東面命樂正」，單言樂正者，謂大樂正，既東面命之，則大樂正元立於東矣，以其工在西階下，故知西面向之矣。云「工遷於東則北面」者，案上文樂正及位，<sup>①</sup>大師既西面，明樂正北面可知。是以《鄉射》工遷於東，西面，北上，「樂正北面立于其南」，此亦與彼同北面也。云「國君無故不釋縣，二正，君之近官也」，言此者，人君路寢之廷樂縣不釋，樂正與僕人正同掌樂事，是君之近官也。云「同獻更洗，以時事不聯也」者，以其雖同獻於阼階上，獻有前後，故更爵洗之，是以云「時事不聯也」。云「庶子、內小臣，位在小臣師之東」者，案《公食》堂上夾北有宰夫，內宰在東北，此

《射禮》堂上夾北無宰位，又案執事者堂上，<sup>②</sup>又非樂人，不得在樂正位。以其與小臣師同名小臣，故知小臣師之東也。又云「少退，西上」者，見《公食》在宰東北，少退，故知此亦少退。知西上者，以此位皆西上故也。無筭爵。筭，數也。爵行無次數，唯意所勸，醉而止。**疏**「無筭爵」

① 「及」，阮校引浦鏜云：「反」誤為「及」。

② 「又案執事者堂上」，曹校云當為「則執事者不得在堂上」。

○釋曰：自此盡「無筭樂」，論爵與樂恣意無數之事。士

也有執膳爵者，有執散爵者。執膳爵者酌

以進公，公不拜受。執散爵者酌以之公，命

所賜。所賜者興，受爵，降席下，奠爵，再拜

稽首。公荅再拜。席下，席西。受賜爵者以爵

就席，坐。公卒爵，然後飲。酬之禮爵代舉，今爵

並行，嫌不代也。並行猶代者，明勸惠從尊者來。**疏**注

「酬之」至「者來」○釋曰：凡行酬之法，轉爵遞飲，今膳散

兩有，宜得即飲，猶待公卒爵乃飲，猶代飲然，明惠從公

來，嫌得即飲不代，故著嫌不卒爵，<sup>①</sup>然後飲，故曰「嫌不

代」。執膳爵者受公爵，酌，反奠之。燕之歡在

飲酒，成其意也。**疏**注「燕之至意也」○釋曰：云「燕之歡

在飲酒」者，諸安燕之歡，<sup>②</sup>正在於飲酒，故受公爵者更

酌，反奠於公所，擬公更賜爵，是其歡燕成之意也。<sup>③</sup>受

賜者興，授執散爵者。執散爵者乃酌行之。

與其所勸者。唯受于公者拜。卒爵者興，以酬

士于西階上。士升，大夫不拜，乃飲，實爵。

乃猶而也。**疏**注「乃猶而也」○釋曰：鄭轉「乃」為「而」

者，乃是緩辭，於禮不切，故為之也。<sup>④</sup>士不拜，受

爵。大夫就席。士旅酌，亦如之。公有命

徹幕，則賓及諸公、卿、大夫皆降，西階下北

面，東上，再拜稽首。命徹幕者，公意殷勤，欲盡酒。

公命小臣正辭。公荅拜。大夫皆辟，升，反

位。升不成拜，於將醉正臣禮。**疏**注「升不」至「臣禮」

○釋曰：於例臣於堂下再拜稽首，得小臣以君命辭，其拜

不成，當升成拜，今直升不成拜者，以其拜於下，是臣之正

禮，故鄭云「於將醉正臣禮」。士終旅於上，如初。

卿大夫降而爵止，於其反席卒之。**疏**注「卿大」至「卒之」

○釋曰：上文卿大夫酬辯始酬士，公命徹幕，公卿以下降

而爵止，是以卿大夫升，反席，士以下相酬而卒之。無筭

爵。<sup>①</sup>「故著嫌不卒爵」，阮校云：《通解》、毛本作「故必卒

爵」。<sup>②</sup>「諸」，阮校云單疏作「謂」是也，曹校云單疏實作「諸」。

「之」，阮校云：陳、閩、《通解》俱作「其」。<sup>③</sup>

「之」，阮校云：毛本作「而」。<sup>④</sup>

樂。升歌、閒、合無次數，唯意所樂。宵則庶子執燭

於阼階上，司宮執燭於西階上，甸人執大燭於庭，閽人爲燭於門外。宵，夜也。燭，焦也。甸

人，掌共薪蒸者。庭大燭，爲其位廣也。爲，作也，作燭俟賓出。

**疏**「宵則庶子執燭」○釋曰：自此盡篇終，論禮畢

容公卿出入之事。賓醉，北面坐取其薦脯以降。

取脯，重得君之賜。奏《陔》。《陔夏》，樂章也，其歌

《頌》類也，以鍾、鼓奏之，其篇今亡。賓所執脯以賜

鍾人于門內雷，遂出。必賜鍾人，鍾人以鍾、鼓奏

《陔夏》。賜之脯，明雖醉，志禮不忘樂。**疏**「賓所」至「遂

出」○釋曰：案《鄉飲酒》、《鄉射》賓出無取脯賜鍾人之事

者，彼是臣禮，此爲君法，故詳略不同。卿大夫皆出。

從賓出。公不送。臣也與之安燕交歡，嫌亢禮也。**疏**

「公不送」○注「臣也」至「禮也」○釋曰：案《燕義》云「使宰

夫爲獻主，臣莫敢與君亢禮」，歸來安燕交歡，君若送之，

是臣與君亢禮，故君不送賓也，故《燕禮》注云「賓禮訖，臣

禮」是也。①公人，《驚》。《驚夏》，亦樂章也，以鍾、

鼓奏之，其詩今亡。此公出而言人者，射宮在郊，以將還爲人。燕不《驚》者，於路寢，無出入也。**疏**「公人驚」

○注「驚夏」至「人也」○釋曰：云「《驚夏》，亦樂章也」

者，案《周禮·鍾師》有九《夏》，皆樂章，其中有《驚

夏》，如《陔夏》，故云「亦樂章也」。云「以鍾、鼓奏之」

者，案《鍾師》「以鍾、鼓奏九《夏》」，鄭云「先擊鍾，次擊

鼓」，故云「以鍾、鼓奏之」。云「其詩今亡」者，鄭注《鍾

師》云「九《夏》皆《詩》篇名，《頌》之族類也。此歌之大

者，載在樂章，樂崩亦從而亡，是以《頌》不能具」，是其

今亡。云「此公出而言人者，射宮在郊，以將還爲人」

者，天子射在虞庠，周之小學祖西郊。②案《鄉射·記》

「於郊，則間中」，鄭注云諸侯「大學在郊」，是諸侯大射

所，故「言人者，射宮在郊，以將還爲人」也。鄭知燕在

路寢者，《燕禮·記》云「燕，朝服於寢」，與群臣賓客

燕，不合在燕寢，故知從路寢也。此篇所解多不具者，

以其諸侯、大夫射，先行燕禮，大射三番多依鄉射，是

①「臣禮」，阮校引浦鏜云：「是臣」誤「臣禮」。

②「祖」，曹校云當爲「在」。

以與禮同者，<sup>①</sup>於此不復重釋之也。

儀禮卷第七 經六千八百九十 注七千三百八

儀禮疏卷第十八

江寧府知府陽城張敦仁編校 元和縣

學生員顧廣圻覆校

① 「禮」上，曹校云脫「二」字。

## 儀禮疏卷第十九 儀禮卷第八

唐朝散大夫行大學博士弘

文館學士臣賈公彥等撰

**聘禮第八疏**「聘禮第八」○鄭《目錄》云：「大問曰聘。」

諸侯相於久無事，使卿相問之禮。小聘使大夫。《周禮》曰：「凡諸侯之邦交，歲相問，<sup>①</sup>殷相聘也，世相朝也。」於五禮屬賓禮。大戴第十四，小戴第十五，《別錄》第八。○釋曰：鄭云「大問曰聘」者，則此篇發首所論是也。云「久無事」者，案下記云「久無事則聘焉」，注云「事謂盟會之屬」，若有事，事上相見，故鄭據「久無事」而言。云「小聘使大夫」者，下經云「小聘曰問，其禮如爲介，三介」是也。《周禮》曰「者，《大行人》文，鄭彼注「小聘曰問。殷，中也。久無事，又於殷朝者，及而相聘也。父死子立曰世。凡君即位，大國朝焉，小國聘焉。此皆所以習禮考義，正刑一德，以尊天子也。必擇有道之國而就脩之」。然歲相

問，殷相聘，《聘義》所云「比年小聘，三年大聘」是也。《大行人》云「上公九介，侯伯七介，子男五介，又云「凡諸侯之卿，其禮各下其君二等」，《聘義》「上公七介，侯伯五介，子男三介」，是諸侯之卿介各下其君二等者也。若「小聘曰問」，使大夫，又下其卿二等。此《聘禮》是侯伯之卿大聘，以其經云五介，「上介奉束錦，士介四人皆奉玉錦」，又云「人竟張旛」，<sup>②</sup>孤卿建旛，據侯伯之卿之聘者。必見侯伯之卿聘者，周公作經，互見爲義。此見侯伯之卿大聘。《玉人》云「瑑圭璋八寸，璧琮八寸，以覲聘」，上公之臣。《公食大夫》俎實云「倫膚七」，據子男之臣。是各舉一邊而言，明五等俱有，是其互見爲義也。

儀禮 鄭

氏注

**聘禮。**君與卿圖事，圖，謀也。謀聘，故及可使者。謀事者必因朝，其位君南面，卿西面，大夫北面，士東面。**疏**「聘禮」至「圖事」○注「圖謀」至「東面」○釋曰：

① 「問」下，阮校云毛本、《通解》有「也」字。

② 「入」，阮校云：毛本作「及」。

自此盡「官具」，論聘人及用幣之事。云「謀聘、故及可使者」，謀聘者，爲久無事須聘。故，謂有事故，或因聘，或特行。若記云「若有故，則卒聘，束帛加書將命」，是因聘者也。「晉侯使韓穿來言汶陽之田」之類，是特行者也。言「及可使者」，謂於三卿之中選可使者，即經云「遂命使者」是也。其摠三事，皆須謀者也。言「謀事者必因朝」者，欲取對衆共詢之意。云「其位君南面」已下，知面位然者，此《儀禮》之內，見諸侯三朝，燕朝《燕禮》是也，又射朝《大射》是也，不見路門外正朝，正朝當與二朝面位同。案《燕禮》、《大射》皆云卿西面，大夫北面，士東面，公降階南面揖之，是以知正朝面位然也。若天子三朝，射人見射朝，司士見正朝，不見燕朝，以諸侯正朝與燕朝同，明天子燕朝亦與正朝同也。遂命使者。遂猶因也。既謀其人，因命之也。聘使卿。**疏**「遂命使者」○注「遂猶」至「使卿」○釋曰：云「既謀其人，因命之也」者，謂謀其人，人亦在謀事之中，故云「因命」，即上注「可使者」是也。云「聘使卿」者，以其經云「及竟張旌」，《周禮·司常》云「孤卿建旌」，故知使卿也。若然，使者自在謀內，審知所聘之國遠近，何以下記云使者「既受行，出，遂見宰，問幾月之資」，

注云「古者君臣謀密草創，未知所之遠近，問行用多少」。但所謀之時，經云出聘，不言其國，使者不得審知，故更問之。是以《左氏》吳公子季札遂聘齊、晉、衛、鄭之等，下文云「無行則重賄反幣」，是亦有歷聘之事也。使者再拜稽首，辭。辭以不敏。**疏**「使者」至「首辭」○注「辭以不敏」○釋曰：云「辭以不敏」者，鄭取《孝經》曾子曰「參不敏」之辭爲義也。君不許，乃退。退，反位也。受命者必進。**疏**「君不許乃退」○注「退反」至「必進」○釋曰：

知「受命者必進」者，以其云退，故知進乃有退法，是受命前進近君也。既圖事，戒上介，亦如之。既，已也。戒猶命也。已謀事，乃命上介，難於使者，易於介。

**疏**「既圖」至「如之」○注「既已」至「於介」○釋曰：既謀事，乃命介，在謀後別命之。謀使者是難，謀後命介是易也。宰命司馬戒衆介。衆介皆逆命，不辭。宰，上卿貳君事者也，諸侯謂司徒爲宰。<sup>①</sup>衆介者，士也。

①「宰」上，阮校云：《釋文》有「大」字，下注同。《集釋》此注有「大」字，下注無。



士屬司馬，《周禮》司馬之屬。《司士》：「掌作士適四方使，爲介。」逆猶受也。

**疏**「宰命」至「不辭」○注「宰上」至「受也」○釋曰：天子有六卿，天地四時之官。是諸侯兼官而有三卿，立地官司徒兼冢宰，立夏官司馬兼春官，立冬官司空兼秋官。是以《左氏》杜泄云「吾子爲司徒」，<sup>①</sup>叔孫爲司馬，孟孫爲司空」。故《禮記·內則》云「后王命冢宰，降德于衆兆民」，鄭云「《周禮》冢宰掌飲食，司徒掌十二教。今一云冢宰，記者據諸侯也。諸侯并六卿爲三，或兼職焉」。是其諸侯并六卿爲三，諸侯以司徒爲冢宰，義與此同。宰，上卿貳君事，諸侯謂司徒爲宰者也。云「士屬司馬」，引《周禮》者，案司士屬司馬，而云「作士適四方使，爲介」，諸侯之司馬亦然，故引以證諸侯「司馬戒衆介」也。云「不辭」者，是其副使之賤者，故不敢辭。宰書幣，書聘所用幣多少也。宰又掌制國之用。

**疏**「宰書幣」○注「書聘」至「之用」○釋曰：宰即上命司馬兼官者也。云「書聘所用幣多少也」者，謂聘鄰國享君及夫人，問卿之等幣。《周禮·司儀》云「凡諸侯之交，各稱其邦而爲之幣，以其幣爲之禮」，鄭云「幣，享幣也。於大國則豐，於小國則殺」是也。云「宰又掌制國之用」者，案《王制》云「冢宰制國

用，必於歲之杪」，是以使之書幣也。命宰夫官具。宰夫，宰之屬也。命之，使衆官具幣及所宜齎。

**疏**「命宰夫官具」○注「宰夫」至「宜齎」○釋曰：所命者，冢宰司徒。命之，以宰夫屬司徒。《周禮》宰夫「掌百官府之徵令」，故命諸官。云「官具」者，謂使宰夫命諸官各具所行幣。幣在官之府，其司非一，故言「衆官」幣，謂享幣及問大夫、問卿摠具之。「及所宜齎」者，謂行道所用多少皆是。及期，夕幣。及猶至也。夕幣，先行之日夕，陳幣而視之，重聘也。

**疏**「及期夕幣」○注「及猶」至「聘也」○釋曰：自此盡「受書以行」，論陳幣付使者之事。云「夕幣，先行之日夕」，知者，下云「厥明釋幣于禰」，是行日，明此夕是先行之日夕也。云「視之」者，正謂賓及衆介視之，故下云「使者朝服，帥衆介夕」，注云「視其事」是也。使者朝服，帥衆介夕。視其事也。古文「帥」皆作「率」。管人布幕于寢門外。管猶館也。館人謂掌次舍、帷幕者也。布幕以承幣。寢門，外朝也。古文「管」作「官」。

<sup>①</sup>「吾子」，阮校云：《通解》、楊氏、毛本俱作「季孫」。

今文「布」作「敷」。**疏**「管人」至「門外」○注「管猶」至「作

敷」○釋曰：云「館人謂掌次舍，帷幕者也」者，案《天官》有掌舍、掌次、幕人等。《掌次》云「有邦事，則張幕設案」，

《掌舍》職云「爲帷宮設旌門」，又《幕人》云「掌帷幕幄帟綬之事」，鄭云「在旁曰帷，在上曰幕。幕或在地，展陳于上」，即此「布幕」是也。館人即彼掌舍，以諸侯兼官，故鄭摠言之也。云「幕以承幣」者，<sup>①</sup>即下文「官陳幣」是也。

云「寢門，外朝也」者，謂路門外，即正朝之處也。下記云「宗人授次，次以帷」，則館人與宗人共掌之。若賓客，則宗人掌之也。官陳幣，皮北首，西上，加其奉於

左皮上。馬則北面，奠幣于其前。奉，所奉以

致命，謂束帛及玄纁也。馬言則者，此享主用皮，或時用馬，馬人則在幕南。皮、馬皆乘。古文「奉」爲「卷」。今文

無「則」。**疏**「官陳」至「其前」○注「奉所」至「無則」○釋

曰：云「官陳幣」者，則上文「官具」者也。館人布幕於地，

官陳幣於其上。云「奉，所奉以致命，謂束帛及玄纁也」

者，所奉謂後享時奉人以致命，故知。是以下文享時，所

致束帛加璧以享君，玄纁加琮以享夫人。鄭不言璧、琮

者，璧、琮不陳，厥明乃授之也。云「馬言則者，此享主用

皮，或時用馬」者，主用皮謂有皮之國，國無皮者乃用馬。

故下云「庭實，皮則攝之」，鄭注皮「言則者，或用馬也」，記云「皮、馬相間可也」，注「閒猶代也，土物有宜」也。云「馬

入則在幕南」者，以經云「馬則北面，奠幣于其前」也，是馬在幕南，故下展幣時，云「馬則幕南，北面，奠幣于其前」也。知「皮馬皆乘」者，案下賓覲時，云「總乘馬」，又云「禮

玉束帛乘皮」，是皆乘也。使者北面。衆介立于

其左，東上。既受行，同位也，位在幕南。**疏**「使者」

至「東上」○注「既受」至「幕南」○釋曰：云「既受行，同位」

者，對未受命行已前，卿大夫士面位各異，是以記云「使者既受行日，朝同位」，鄭注云「謂前夕幣之閒。同位者，使

者北面，介立于其左，少退，別其處臣也」是也。知「在幕

南」者，幣在幕上，使者須視幣，故在幕南也。卿大夫

在幕東，西面，北上。大夫西面，辟使者。**疏**「卿

大」至「北上」○注「大夫」至「使者」○釋曰：此謂處者大夫

常北面，今與卿同西面，故云「辟使者」。宰人，告具

于君。君朝服，出門左，南鄉。人告，入路門而

①「幕」上，阮校云：毛本有「布」字，按依注當有。

告。**疏**注「入告」至「而告」○釋曰：朝在路門外，故知入路門至路寢而告君，以其在路寢聽政處故也。史讀書，

展幣。展猶校錄也。史幕東西面讀書，賈人坐撫其幣，

每者曰「在」。必西面者，欲君與使者俱見之也。**疏**「史

讀書展幣」○注「展猶」至「之也」○釋曰：知「史幕東西面」

者，以其君南面，使者北面，故知幕東西面讀之可知，是以

鄭云「欲君與使者俱見之也」。知賈人撫幣者，以其賈人

主幣行者，故知賈人撫幣受之。其幣謂官具之者，非直所

奉而已。若然，賈人當在幕西，東面撫之，亦欲使君與賓

俱見之也。宰執書，告備具于君，授使者。使

者受書，授上介。史展幣畢，以書還授宰。宰既告

備，以授使者。其受授皆北面。**疏**注「史展」至「北面」○

釋曰：云「史展幣畢，以書還授宰」者，以其宰在幕東，西

面，史居前西面讀書，展幣，展幣訖，明迴還授宰，宰以書

授使者。云「其受授皆北面」者，當宰以書授使者之時，宰

來至使者之東，北面授使者，使者北面授介，三者皆北面，

向君故也。公揖人。揖，禮群臣。**疏**「公揖人」○釋

曰：以展幣授使者訖，禮畢，故人於寢也。官載其幣，

舍于朝。待旦行也。**疏**「官載」至「于朝」○注「待旦行

也」○釋曰：此云「官」，謂官人從賓行者，與前「官陳幣」者

異。必知行者，以下文人竟又展之，又「有司展群幣以

告」，<sup>①</sup>注云「有司，載幣者，自展自告」是也。云「待旦行」

者，下文厥明釋幣遂行是也。上介視載者，監其安處

之，畢乃出。**疏**「上介視載者」○注「監其」至「乃出」○釋

曰：經直云「上介視載者」，注云「監其安處之，畢乃出」，不

言餘人出，則上文「舍於朝」不出，待旦則行，以其須守幣

故也。所受書以行。為當復展。**疏**「所受書以行」

○注「為當復展」○釋曰：書謂前宰授使者。此書將行，為

當復展故也。厥明，賓朝服，釋幣于禰。告為君

使也。賓，使者，謂之賓，尊之也。天子、諸侯將出，告群

廟，大夫告禰而已。凡釋幣，設洗盥，如祭。**疏**「厥明」至

「于禰」○注「告為」至「如祭」○釋曰：自此盡「亦如之」，論

賓與上介將行告禰之事。云「朝服」者，卿大夫朝服祭，故

還服朝服告也。云「天子、諸侯將出，告群廟」者，案《禮

①「又」，曹校云此字衍。

記·曾子問云孔子曰「諸侯適天子，必告于祖，奠于禩」，注云「皆奠幣以告之」，是諸侯出，告群廟。案彼下文又云孔子曰「天子、諸侯將出，必以幣帛皮圭告于祖禩，遂奉以出」，是天子與諸侯同告群廟之事。云「大夫告禩而已」者，大夫三廟，降天子，<sup>①</sup>不得並告，故直告禩而已，若父在則告祖。知者，下記云「賜饗，唯羹飴。筮尸，若昭若穆」，注云「筮尸若昭若穆，容父在。父在則祭祖，父卒則祭禩」。以此言之，明初行時，父在釋幣於祖廟可知。案昭元年「楚公子圍聘於鄭」，云「布几筵於莊、共之廟而來」，服氏云「莊謂楚莊王，圍之祖；共王，圍之父」，是大夫並告群廟者。彼不告聘，直告娶，故得並告。古者大夫得因聘而娶，故《傳》云「且娶於公孫段氏」是也。云「凡釋幣，設洗盥，如祭」者，案《曾子問》云「凡告用牲幣」，注云「牲當爲制」，則告無牲，直用幣而已。但執幣須絜，當有洗而盥手，其設洗如祭祀之時，亦洗當東榮，南北以堂深，水在洗東，篚在洗西。必知無祭事者，下文還時云「乃至于禩，筵几于室，薦脯醢，觴酒陳」，鄭云「行釋幣，反釋奠，略出謹人」，是其差也。有司筵几于室中。祝先入，主人從入。主人在右，再拜，祝告，又再

拜。更云主人者，廟中之稱也。祝告，告以主人將行也。

**疏**「有司」至「再拜」○注「更云」至「行也」○釋曰：「云「更云主人者，廟中之稱也」者，上云「賓」，至此更云「主人」，是廟中之稱，故《特牲》、《少牢》皆稱「主人」，對聘稱「賓」也。釋幣，制玄纁束，奠于几下，出。祝釋之也。凡物十曰束。玄纁之率，玄居三，纁居二。朝貢禮云：「純四只，制丈八尺。」**疏**「釋幣」至「下出」○注「祝釋」至「八尺」○釋曰：知祝釋幣者，案《曾子問》「君薨而世子生，大祝裨冕，執束帛，升自西階，命無哭。告曰：『某之子生，敢告。』奠幣於殯東」，則知此亦大祝釋之可知也。云「凡物十曰束」者，案《昏禮》「玄纁束」，則每卷二丈，自餘行禮云束者，每卷一丈八尺爲制，幣帛錦十卷者皆名束，至於脯十脰亦曰束，故云「凡物十曰束」也。云「玄纁之率，玄居三，纁居二」者，言率皆如是也。玄三纁二者，象天三覆地二也。<sup>②</sup>云「朝貢禮云「純四只，制丈八尺」」者，純謂幅之廣狹，制謂舒之長短。《周禮》趙商問「只長八

<sup>①</sup>「天子」下，曹校云脫「諸侯」二字。

<sup>②</sup>「二」下，阮校云：毛本有「載」字。

寸，四八三十二，幅廣三尺二寸，大廣，非其度」，鄭志荅云「古積畫誤爲四，<sup>①</sup>當爲三，三咫則三尺四寸矣」。《雜記》云「納幣一束，束五兩，兩五尋」，然則每卷二丈，若作制幣者，每卷丈八尺爲制，合卷爲匹也。主人立于戶東。祝立于牖西。少頃之間，示有俟於神。**疏**注「少頃」

至「於神」○釋曰：案《士虞禮》無尸者出戶而聽，「若食間」，此無祭事，故云「有俟於神」也。又入，取幣，降，

卷幣，實于筭，埋于西階東。又入者，祝也。埋幣

必盛以器，若藏之然。又釋幣于行，告將行也。行者

之先，其古人之名未聞。天子，諸侯有常祀在冬。大夫三

祀，曰門，曰行，曰厲。喪禮有毀宗躐行，出于大門，則行

神之位，在廟門外西方。不言埋幣，可知也。今時民春秋

祭祀有行神，古之遺禮乎？**疏**「又釋幣于行」○注「告

將」至「禮乎」○釋曰：云「行者之先，其古人之名未聞」者，

此謂平地道路之神。<sup>②</sup>云「古人名未聞」者，謂古人教人

行道路者，其人名字未聞。云「天子，諸侯有常祀在冬」

者，《月令》「祀行」是也。言此者，欲見大夫雖三祀有行，

無常祀，因行使始出，有告禮而已。至於出城，又有輶祭，

祭山川之神，喻無險難也。「大夫三祀，曰門，曰行，曰厲」

者，見《祭法》文。云「喪禮有毀宗躐行，出于大門」者，《檀

弓》文。案彼云「掘中雷而浴，毀竈以綴足。及葬，毀宗躐

行，出于大門，殷道也」，下文周樞入毀宗，雖不云躐行，亦

有行可知。所毀者，毀廟門西而云「躐行」，明行神在廟門

西矣。「不云埋幣，可知」者，承上宗廟埋之，此亦埋可知。

云「今時民春秋祭祀有行神，古之餘禮乎」者，<sup>③</sup>鄭以行神

無正文，雖約《檀弓》，猶引漢法爲況。「乎」者，猶疑之矣。

若然，城外祭山川之神有輶壇，此禮行神，<sup>④</sup>亦當有輶壇，

是《月令》冬祭行，注云「行在廟門外之西。爲輶壇，厚二

寸，廣五尺，輪四尺」是也。遂受命。賓須介來乃受命

也。言遂者，明自是出，不復入。**疏**「遂受命」○注「賓

須」至「復入」○釋曰：下云「上介及衆介俟于使者之門

外」，是其賓須介來乃受命也。云「自是出，不復入」者，

自釋幣於門，不復更入。若然，則待介於門矣。上介釋

上介釋

①「志」，阮校云：毛本、《通解》、楊氏作「玄」。

②「地」，阮校云：毛本作「治」。

③「餘」，阮校云：毛本作「遺」，與注合。

④「禮」，阮校云：《通解》、毛本作「祭」。

幣，亦如之。如其於襴與行。上介及衆介俟于使者之門外。俟，待也。待於門外，東面，北上。

**疏**

「上介」至「門外」○注「俟待」至「北上」○釋曰：自此盡「斂旛」，爲使者與介向君朝受命即行之事。知「待於門外，東面，北上」者，上云賓釋幣訖，不復入，明介待賓於大門外，賓出則向君也。言「東面，北上」者，依賓客門外之位。使者載旛，帥以受命于朝。旛，旌旗屬也。載之者，所以表識其事也。《周禮》曰：「通帛爲旛。」又曰：「孤卿建旛。」至於朝門，使者北面，東上。古文「旛」皆爲「膳」。**疏**「使者」至「于朝」○注「旛旌」至「爲膳」○釋曰：云「載之者，所以表識其事」者，人見張旛，則知是孤卿爲使之事，是「表識其事也」。云「《周禮》曰」者，《司常》文。云「至於朝門」者，凡平諸侯三門，<sup>①</sup>阜、應、路，路門外有常朝位。下文君臣皆朝列位，乃「使卿進使者」，使者乃入至朝，即此朝門者，阜門外矣。知「北面，東上」者，還依展幣之位也。君朝服，南鄉。卿大夫西面，北上。君使卿進使者。進之者，使者謙，不敢必君之終使已。

**疏**「君朝服」至「使者」○注「進之」至「使已」○

釋曰：此還依展幣之位，知大夫與卿同西面，避賓。下文使者還，亦同展幣北面東上位。使者入，及衆介隨入，北面，東上。君揖使者，進之。上介立于其左，接聞命。進之者，有命宜相近也。接猶續也。賈人西面坐啓櫝，取圭，垂纁，不起而授宰。賈人，在官知物賈者。纁，所以藉圭也，其或拜則奠于其上。今文「纁」作「璫」。**疏**「賈人」至「授宰」○注「賈人」至「作璫」○釋曰：云「賈人，在官知物賈者」，謂若《王制》云庶人之在官，府、史、胥、徒之類，以知物賈，故名賈。云「其或拜則奠于其上」者，故《覲禮》·記云「奠圭于纁上」是也。但纁有二種，一者以木爲中幹，以韋衣之，天子五采，公侯伯三采，子男二采，采爲再行，下記及《典瑞》皆有其文。此爲纁也，下記云「絢組」尺，及《曲禮》下文「執玉，其有藉者則楊」，鄭亦爲之纁。<sup>②</sup>若韋版爲之者，奠玉於上，此則無垂纁屈纁之事。若絢組爲之者，所以繫玉於韋版，使不失墜，此乃有屈垂之法，則此經所云者是也。

①「平」，阮校云：毛本無。

②「爲」，阮校云《通解》作「謂」，曹校云「謂」字是。

案向來所注，皆以韋版纁藉解之者，鄭意以承玉及繫玉，二者所據雖異，所用相將，又同名爲纁，是以和合解之，故以韋版爲之者，以解絢組之纁也。宰執圭，屈纁，自公左授使者。屈纁者，斂之，禮以相變爲敬也。自公左，贊幣之義。

**疏**「宰執」至「使者」○注「屈纁」至「之義」○釋曰：云「自公左，贊幣之義」者，《禮記·少儀》云「詔辭自右，贊幣自左」，取地道尊右之法，是贊幣之義，故於「公左」也。使者受圭，同面，垂纁以受命。同面者，宰就使者北面並授之。既授之而君出命矣。凡授受者，授由其右，受由其左。

**疏**「使者」至「受命」○注「同面」至「其左」○釋曰：知「宰就使者北面」者，以經言「同面」，不見使者進文，使者既先北面，故知「就使者北面並面授之」，<sup>①</sup>既授與使者，即言「受命」，明知則出命矣。云「凡授受者，授由其右，受由其左」者，據此宰由其右授使者，使者受由其左，又據《鄉飲酒》、《鄉射》、《燕禮》獻酢酬，皆授由其右，受由其左，故云「凡」以廣之。若有所因由，則有授由左受由右。是以使者反命之時，宰自公左受玉，鄭云「亦於使者之東，同面並受。不右，使者由便也」。又賓授覲時，<sup>②</sup>士受馬適右受，鄭云「適牽者之右而受，由便」。

又《鄉飲酒》云「受酬者自介右」，鄭云「尊介，使不失故位」。如此者，皆是變例，鄭據平常行事而言也。既述命，同面授上介。述命者，循君之言，重失誤。

**疏**「既述」至「上介」○注「述命」至「失誤」○釋曰：上文授玉訖，君出命，命辭雖不知何語，要知使者既受命，使者又重述君命爲述命。述命者，重失誤。上介受圭，屈纁，出，授賈人。衆介不從。賈人，將行者，在門外，北面。

**疏**「上介」至「不從」○注「賈人」至「北面」○釋曰：云「衆介不從」者，以上介送圭向外，與賈人反來，故衆介不從，以待之。云「賈人，將行者」，知者，經言「授賈人」，使受之，則是行人，主掌此玉，故知「將行者」，對上云賈人出玉者是留者也。知「在門外，北面」者，以其使者在門外時，皆北面，此賈人不入，明依本北面可知。受享束帛加璧。受夫人之聘璋，享玄纁束帛加琮，皆如初。享，獻也。既聘又獻，所以厚恩惠也。帛，今之璧

<sup>①</sup> 下「面」字，據注當爲衍字。

<sup>②</sup> 「授」，曹校云此字衍。

色繒也。夫人亦有聘享者，以其與己同體，爲國小君也。其聘用璋，取其半圭也。君享用璧，夫人用琮，天地配合之象也。圭璋特達，瑞也。璧琮有加，往德也。《周禮》曰：「瑑圭璋璧琮以覲聘。」**疏**「受享」至「如初」○注「享獻」至「覲聘」○釋曰：此經中三事，上經已受聘君圭，此經受享君束帛加璧，又受聘夫人璋，又受享夫人琮。案上文夕幣時，云「官陳幣，皮北首，西上，加其奉於左皮上」，鄭注云「奉，所奉以致命，謂束帛及玄纁也」，則知所陳直陳束帛及玄纁，不陳璧琮。是以此經受璧而連言束帛、玄纁者，<sup>①</sup>以其享時束帛加璧於其上，玄纁加琮於其上，以相配之物，故兼言束帛玄纁。若然，璧琮右受者，<sup>②</sup>以其璧琮與圭璋同類，尊之故也。云「帛，今之璧色繒」者，《周禮·大宗伯》云「孤執皮帛」，鄭注亦然。又案《宗伯》云「以蒼璧禮天」，下云「牲幣，各放其器之色」，幣即幣帛，禮天之璧用蒼色，則幣帛之色亦蒼色，是璧色繒。於漢時云「璧色繒」者，亦因周法，則此束帛亦與璧色同，以其相配，但未知正用何色耳。云「聘用璋，取其半圭」，知半曰璋者，案《周禮·典瑞》云「四圭有邸，以祀天；兩圭有邸，以祀地；圭璧以祀日月；璋邸射，以祀山川」，以上向下差之，以兩圭半四圭，圭璧半兩圭，璋邸射又半圭璧，是半圭

曰璋也。云「圭璋特達，瑞也」者，《聘義》云「圭璋特達，德也」，鄭云「特達謂以朝聘也」。言瑞者，《大宗伯》云「以玉作六瑞」，「公執桓圭」以下皆是瑞，故《尚書》云「班瑞於群后」。言「特達」者，不加束帛也。云「璧琮有加，往德也」者，謂加於束帛之上。言「往德」者，《郊特牲》云「束帛加璧，往德也」，謂以束帛加璧，致厚往，爲主君有德，故以玉致之。君子於玉比德，故言「往德也」，往德義出於彼。鄭言此者，欲見朝置享用玉之意也。<sup>③</sup>《周禮》曰：「玉人」文。云「瑑圭璋璧琮以覲聘」者，欲見此篇聘賓不用君之所執圭璋，以其公則執桓圭，侯執信圭，伯執躬圭，子執穀璧，男執蒲璧，臣出聘圭、璋、璧、琮則瑑之而已，無此桓、信、躬、穀、蒲之文，又所執皆降其君一等，故引之爲證也。遂行，舍于郊。於此脫舍衣服，乃即道也。《曲禮》曰：「凡爲君使，<sup>④</sup>已受命，君言不宿於家。」**疏**「遂行舍于

① 是以此經受璧，曹校云：「是」當爲「所」，「璧」下當有「琮」字。

② 右，曹校云當爲「後」。

③ 置，曹校云當爲「聘」。

④ 使，下，阮校云：楊氏有「者」字。



郊」○注「於此」至「於家」○釋曰：言「遂行」者，受命則行，不留停，故云「遂行」。言「於此脫舍衣服，乃即道」者，<sup>①</sup>上文云賓朝服告禰及遂朝君受命，<sup>②</sup>至此衣服未改，鄭注云「吉時道路深衣」，則此脫舍朝服，服深衣而行，故云「於此所脫舍衣服，乃即道也」。引《曲禮》者，見受君命及君言，言別有告請之事，遂行，舍於郊，則彼云「不宿于家」也。**斂廬**。此行道耳，未有事也。斂，藏也。**疏**「斂

廬」○注「此行」至「藏也」○釋曰：云「此行道耳，未有事也」者，案下文云「及竟，張廬」，是有事也，故此自郊已後，<sup>③</sup>未有事，斂藏也。若過邦，至于竟，使次介假道，束帛將命于朝，曰請帥，奠幣。至竟而假道，諸侯以國爲家，不敢直徑也。將猶奉也。帥猶道也。請道已道路所當由。**疏**「若過」至「奠幣」○注「至

竟」至「當由」○釋曰：自此盡「執策於其後」，<sup>④</sup>論過他國竟假道之事。云「諸侯以國爲家，不敢直徑」者，案《左氏傳》僖三十三年秦師襲鄭，不假道於晉，爲晉所敗，是其不假道，直徑過。天子之師行過無假道，以其天子以天下爲家，所在如主人故也。天子微弱則有之，是以《周語》「定王使單襄公聘於宋，遂假道於陳，以聘楚」，服氏注云「是

時天子微弱，故與諸侯相聘同」是也。<sup>⑤</sup>下大夫取以人告，出許，遂受幣。言遂者，明受其幣，非爲許故也。容其辭讓，不得命也。**疏**「下大夫」至「受幣」○注

「言遂」至「命也」○釋曰：云「言遂者，明受其幣，非爲許故也」者，幣本爲行禮，非爲求許，若許受幣，<sup>⑥</sup>當云「出許，受幣」，不須言「遂」。今不以許道受幣，云「遂」，是以容其辭讓，不受此幣，不得命遂受之，故云「遂」也。餼之以其禮，上賓大牢，積唯芻禾，介皆有餼。凡賜人以牲，生曰餼。餼猶稟也，給也。以其禮者，尊卑有常差也。常差者，上賓上介牲用大牢，群介用少牢，米皆百筥。牲陳于門內之西，北面，米設于中庭。上賓、上介致之以束帛，群介則牽羊焉。上賓有禾十車，芻二十車，禾

<sup>①</sup>「者」，阮校云：毛本作「也」，依下文述注，當作「也者」。

<sup>②</sup>「及」，阮校云毛本作「乃」，曹校云作「乃」是。

<sup>③</sup>「自」下，曹校云脫「舍」字。

<sup>④</sup>「於」上，曹校云脫「立」字。

<sup>⑤</sup>「同」，阮校云：《要義》作「問」。

<sup>⑥</sup>「許」，阮校云：毛本「許」上有「因」字，下有「道」字。

以秣馬。**疏**「餼之」至「有餼」○注「凡賜」至「秣馬」○釋

曰：此謂主國所致禮。云「凡賜人以牲，生曰餼」者，言「凡」者，摠解諸文。案此下經云主國「使卿歸饗餼五牢」，云「飪一牢，腥二牢，餼二牢，陳于門西，鄭注云「餼，生也。牛羊右牽之，①豕束之」，②是牲生曰餼。上介及士亦皆牲生爲餼。《論語》云「告朔之餼羊」，鄭注亦云「牲生曰餼」。《春秋傳》云「餼臧石牛」，③服氏亦云「牲生」，是凡「牲，生曰餼」。《春秋》僖三十三年鄭皇武子云「餼牽竭矣」，服氏以爲「腥曰餼」，以其對「牽」，故以餼爲「腥」。《詩》序云「雖有牲牢饗餼」，鄭云「腥曰餼」，以其對生是活，故以餼爲腥。又不爲「牲生」者，鄭望文爲義，故注不同也。「餼猶稟也，給也」者，於賓爲稟，稟受也；④於主人爲給，給賓客也。云「以其禮者，尊卑有常差。常差者，上賓上介牲用大牢」，經不言上介，知與賓同大牢者，若上介與群介同，當爲介皆少牢，是以下文大夫餼賓云上賓上介皆大牢，「米八筐」，「衆介皆少牢，米六筐」，是上介與賓同之義也。云「米皆百筥」以下盡「二十車」，皆約下文君使卿致饗餼禮。若然，上介與賓同大牢，依大夫餼賓禮，米不依大夫餼賓，與上介米八筐，而依君致饗餼者，以此經有芻禾，大夫餼賓禮無芻禾，故還依主國歸饗餼之禮也。案下

歸饗餼，上賓、上介米陳于門內，衆介米百筥設於門外，鄭不言者，略而不辨之也。云「上賓、上介致之以束帛，群介則牽羊」者，案大夫餼賓禮，使「老牽牛以致之」，「上介亦如之」，不依此依歸饗餼者，以其彼此皆是國君禮，唯牽以行道之間，不依歸饗餼之法，致之用束帛，宜與歸饗餼同也。云「群介則牽羊焉」者，致禮於士，無用束帛之法，但歸餼則用大牢，禮盛，宰夫朝服牽牛以致之，此衆介皆少牢，當與大夫餼賓少牢，亦牽羊以致之同也。⑤無正文，故言「則」也。「上賓有禾十車，芻二十車」，亦與下歸饗餼同也。若然，大牢則上介與上賓同，芻禾不同者，以經上賓云「唯芻禾」，言「唯」著異，明上介無也。但下文設殯時，大夫之禮禾視死牢而已，此餼賓用生牢，不用死牢。得有禾者，此過國致禮，異於常禮，故生致而有芻禾也。以芻薪倍禾，故禾十車，芻二十車也。士帥，沒其竟。

①「右」下，阮校云：毛本有「手」字。

②「束」，依卷二十二注文當作「束」。

③「臧」，阮校云：毛本作「藏」。

④「稟」下，阮校云：毛本有「者」字。

⑤曹校云「亦」字衍。

沒，盡。誓于其竟，賓南面，上介西面，衆介北面，東上。史讀書，司馬執策，立于其後。此使次介假道，止而誓也。賓南面，專威信也。史於衆介之前，北面讀書，以勅告士衆，爲其犯禮暴掠也。禮，君行師從，卿行旅從。司馬主軍法者，執策示罰。

**疏**「誓于」至

「其後」○注「此使」至「示罰」○釋曰：此誓當在使次介假道之時，止而誓言，<sup>①</sup>今在「士帥沒其竟」之後言之者，此文因上設彼國禮法訖，乃更却本而言之，不謂此士帥沒竟後，<sup>②</sup>是以鄭云「此使次介假道，止而誓也」。言「賓南面，專威信」者，此聘禮雖非軍事，亦是梱外之事，使專威信，故南面若君然也。知「史於衆介之前，北面讀書」者，以經言「衆介北面」，則言「史讀書」，明亦北面，與衆介同北面，又賓南面，復對之故也。云「君行師從」已下，定四年召陵之會祝佗辭。引之者，此聘使有旅從，<sup>③</sup>恐暴掠也。未人竟，壹肆。謂於所聘之國竟也。肆，習也。習聘之威儀，重失誤。

**疏**「未人竟壹肆」○注「謂於」至「失誤」○

釋曰：自此盡「私事」，論雖未至主國，預習聘享威儀之事。此與下文爲目，所習之禮事在下。云「謂於所聘之國」者，

鄭解未入境，境謂所聘之國境，未入也。爲壇壇，畫階，帷其北，無宮。壇土象壇也。帷其北，宜有所鄉依也。無宮，不壇土，畫外垣也。

**疏**「爲壇」至「無宮」○

注「壇土」至「垣也」○釋曰：案《覲禮》與《司儀》同「爲壇三成」，「官方三百步」，此則無外宮，其壇壇土爲之，無成又無尺數，象之而已。云「帷其北，宜有所鄉依」者，雖不立主人，賓、介習禮，宜有所向，故帷其北也。云「無宮，不壇土，畫外垣也」者，不壇土爲宮，<sup>④</sup>是畫外垣垣牆，壇土爲外牆土，<sup>⑤</sup>今則不畫宮也。朝服，無主，無執也。不立主人，主人尊也。不執玉，不敢褻也。徒習其威儀而已。**疏**「朝服」至「執也」○注「不立」至「而已」○釋曰：云「不立主人，主人尊也」者，主人則主國君受聘享者，不立臣作君，故云「主人尊也」。介皆與，北面，西上。

① 曹校云「言」字衍。

② 曹校云「此」下脫「在」字。

③ 曹校云「此」上當有「證」字。

④ 曹校云「不」字衍。

⑤ 曹校云「土」字衍。

入門左之位也。古文「與」作「豫」。

**疏**「介皆」至「西上」

○注「入門」至「作豫」○釋曰：此所習之禮，不習大門外內及廟門內之禮者，<sup>①</sup>以其於外威儀少而易行，故略之，但習入廟聘享，揖讓升降、布幣授玉之禮，是以直云「北面，西上」之位也。云「入門左之位」者，案下文云「賓入門左」，「介皆入門左」，<sup>②</sup>北面，西上」是也。習享，士執庭實。士，士介也。庭實必執之者，皮則有攝張之節。

**疏**「習享士執庭實」○注「士士」至「之節」○釋曰：享時庭

實旅百，獻國所有，非止於皮。知所執是皮者，以其金龜竹箭之等皆列之於地，不執之，所執者唯有皮而已。是以下聘時，賓升致命授玉之時，執皮者張之以見文，是以特言執也，是以云「皮有攝張之節」。習夫人之聘享亦如之。習公事，不習私事。公事，致命者也。

**疏**

「習夫」至「私事」○注「公事致命者也」○釋曰：云「習夫人之聘享亦如之」者，以其行聘君訖，則行聘夫人；行享君訖，即行享夫人。還君受之，一如受君禮，故云「亦如之」也。云「習公事」者，謂君聘享、夫人聘享及問大夫，皆致君命，故鄭云「公事，致命者」。是以下文行君聘享及夫人聘享訖，「擯出請，賓告事畢」，鄭注云「公事畢」。又問卿

時云「卿大夫升堂」，<sup>③</sup>北面聽命。賓東面致命，鄭注云「致其君之命」，皆「公事，致命者也」。私事者，謂私覲於君，私面於卿大夫，故下文「賓覲，入門右」，注云「私事自闌右」是。又問卿訖，「賓西面」，<sup>④</sup>如覲幣，入門右，大夫辭，賓遂左」，注云「見私事，賓雖敵，謙，入門右，為若降等然」是也。若然，大夫之幣不在朝付之，至郊乃付之，避君禮，不謂非公事。及竟，張旌，誓。及，至也。張旌，明事在此國也。張旌，謂使人維之。

**疏**「及竟張旌誓」○

注「及至」至「維之」○釋曰：自此盡「入境，斂旌」，論賓至主國之境，謁闕人見威儀之事。云「張旌，明事在此國」者，以其行道斂旌，及境張旌，明所聘之事在此國，故張旌以表其事也，是以鄭云「明事在此國也」。云「張旌，使人維之」者，案《禮緯·稽命徵》云「大夫杠五刃，齊於較」。較崇八尺，人又長八尺，人維得手及之者，蓋以物接之，乃得維持之。案《節服氏》「掌祭祀朝覲，六人維王之大常」，

①「內」，曹校云當為「外」。

②「左」原作「右」，阮校引浦鍾云「左」誤「右」，據改。

③「卿大夫」，曹校云「卿」字衍。

④「西」，曹校云此字衍。

諸侯則四人」。但大常十二旒，人有六，則一人維持二旒。鄭云「維之以縷」，用線維之。大夫無文，諸侯四人不依命數，大夫或一人，或二人維持之。乃謁關人。謁，告也。古者竟上爲關，以譏異服，識異言。

**疏**「乃謁關人」

○注「謁告」至「異言」○釋曰：「古者境上爲關」者，王城十二門，則亦通十二辰，辰有一門，一關。諸侯未知幾關，魯廢六關，半天子，則餘諸侯亦或然也。<sup>①</sup>云「關譏異言」，<sup>②</sup>案《王制》云「關譏而不征」，注亦云「幾，幾異服、異言」，<sup>③</sup>二注皆無正文。案《周禮·司門》云「幾出入不物者」，注云「不物，衣服視占不與衆同」，鄭以出入不物幾之，則「不物」中含有此異服、異言，云「衣服視占不與衆同」，則是異也。但《周禮》「司關上士二人，中士四人」，又云「每關下士二人」，但司關爲都摠，主十二關，居在國都，「每關下士二人」者，各主一關。今所謂「關人」者，謂告每關，關人來告司關，司關爲之告王，故《司關》職云「凡四方之賓客叩關，則爲之告」是也。關人問：「從者幾人？」欲知聘問，且爲有司當共委積之具。

**疏**「關人」至「幾人」○注

「欲知」至「之具」○釋曰：不問使人而問從者，關人卑者，不敢輕問尊者，故問從者。云「欲知聘問」者，問得從者，

即知使者是大聘，亦知使者是小聘。知者，以君行師從一州之民，卿行旅從一黨之人，若大夫小聘，當一族之人百人也。「且謂有司當共委積之具」者，<sup>④</sup>賓客人竟，當於廬宿市設，<sup>⑤</sup>少曰委，多曰積，是爲行道之具也。以介對。

以所與受命者對，謙也。聘禮，上公之使者七介，侯伯之使者五介，子男之使者三介。以其代君交於列國，是以貴之。《周禮》曰：「凡諸侯之卿，其禮各下其君二等。」**疏**

「以介對」○注「以所」至「二等」○釋曰：云「以所與受命者對，謙也」者，上問從者幾人，當爲「卿行旅從」對，今不云，而以介與受命者對，是謙也。聘禮「上公之使七介」至「三介」，皆《禮記·聘義》文。而云「聘禮」者，《聘義》亦得言「聘禮」也。云「以其代君交於列國，是以貴之」，貴之者，<sup>⑥</sup>隨國大小節級與之介以副使者，是貴之也。引《周

①「亦」，阮校云：《要義》作「理」。

②「異言」，阮校云：毛本作「異服識異言者」。

③「幾」上，阮校云：毛本有「譏」字。

④「謂」，阮校云：毛本作「爲」。

⑤「設」下，曹校云脫「委積」二字。

⑥「貴之」，阮校云：陳、閩俱不重。

禮者，欲見貴之，<sup>①</sup>纔下其君二等而已也。鄭注《周禮》

「二等」謂「介與朝位賓主之間也」。君使士請事，遂

以入竟。請猶問也，問所為來之故也。遂以入，因道

之。**疏**「君使」至「入竟」○注「請猶」至「道之」○釋曰：君

得關人告，即知為聘來，使士迎之，故《聘義》云「君使士迎

于竟」是也。而云「使士請事」，君子不必人，故知而猶問

也。云「遂以入竟」者，若然，向來賓之間，猶停關外，君使

士請訖，乃導以入竟。入竟，斂旌，乃展。復校錄

幣，重其事。斂旌，變於始入。**疏**「入竟斂旌乃展」○注

「復校」至「始入」○釋曰：自此盡「賈人之館」，論三度展幣

之事。云「重其事」者，亦恐有脫漏失錯，故云「重其事」，

不可輕也。「斂旌，變於始入」者，上「及竟，張旌」，注云

「事在此國也」，此則入竟後乃斂，斂之者，<sup>②</sup>謂若初出至

郊「斂旌」，鄭云「行道耳，未有事也」。此亦及竟示有事於

此國，張之，始入張之，<sup>③</sup>去國遠，更是行道未有事，故鄭

云「變於始入」。始入時示有事於此國，今是行道去之，故

云「變於始入」也。布幕，賓朝服立于幕東，西

面。介皆北面，東上。賈人北面，坐拭圭，

拭，清也。側幕而坐，乃開櫝。**疏**「布幕」至「拭圭」○注

「拭清」至「開櫝」○釋曰：賓西面者，雖不對君，由是臣道，

異於前暫時示威信也。知賈人「側幕」者，以其幕所陳皆

賈人所主，此圭雖不陳，亦宜側近於幕，以開圭也。知賈

人坐者，下文聘時於廟門外，賈人開圭，坐授上介，故知此

亦坐。遂執展之。持之而立，告在。**疏**「遂執展之」

○注「持之而立告在」○釋曰：此經告訖，下文乃云「上介

北面視之」，則此所告者，告賓云在，上介乃視之。上介

北面視之，退，復位。言退復位，則視圭進，違位。

**疏**「上介」至「復位」○注「言退」至「違位」○釋曰：鄭言此

者，見經直有退文，不見其進，故云「則視圭進」也。「違

位」之言，出於《曲禮》。《曲禮》云「揖人，必違其位」，鄭云

「禮以變為敬」，今此進違位，亦是敬也。退圭。圭璋

尊，不陳之。**疏**「退圭」○注「圭璋尊不陳之」○釋曰：「尊

不陳」，對下文拭壁加于左皮上陳之，為卑故也。上不言

<sup>①</sup>「欲」，阮校云：毛本作「彼」。

<sup>②</sup>「斂」，阮校云：陳、閩、毛本俱不重。

<sup>③</sup>「始入張之」，曹校云當為「既入斂之」。

璋，直言圭，下乃言「夫人之聘享」，則璋未拭，而并言璋者，欲見皆不陳故。陳皮，北首，西上。又拭璧，展之，會諸其幣加于左皮上。上介視之，退。會，合也。諸，於也。古文曰「陳幣，北首」。

**疏**「陳

皮」至「之退」○注「會合」至「北首」○釋曰：璧言合諸幣者，享時當合，故今亦合而陳之。故《小行人》云「合六幣」，六幣亦是所享之物故也。馬則幕南，北面，奠幣于其前。前，當前幕上。<sup>①</sup>展夫人之聘享亦如之。賈人告于上介。上介告于賓。展夫人聘享，上介不視，貶於君也。賈人既拭璋，琮，南面告於上介，上介於是乃東面以告賓，亦所謂「放而文」之類。

**疏**

「展夫」至「于賓」○注「展夫」至「之類」○釋曰：知面位如此者，其賈人北面，在幕南，上介亦北面，明賈人既拭夫人聘璋享琮訖，乃迴身南面告上介，上介於是還東面告賓可知也。云「所謂「放而文」之類」者，所謂《禮器》文。案《禮器》云「有放而文也」，注云「謂若天子服日月，以至黼黻」，是天子衣放象日月以下而爲文。今夫人聘享展訖，但上介不視，至於賈人南面告上介，上介東面告賓，放象君禮

而爲文變，是其類也。有司展群幣以告。群幣，私覲及大夫者。有司，載幣者，自展自告。

**疏**

「有司」至「以

告」○注「群幣」至「自告」○釋曰：云「群幣，私覲及大夫者」，上展君及夫人幣訖，此言「有司展群幣」，故知是「私覲及大夫者」。私覲者，行君、夫人聘享訖，賓以私禮已物見主君。云「大夫」者，亦謂賓以已物面主國之卿。必知私覲之幣是賓介自將已物者，以經、記上下唯有君及夫人聘享及問大夫聘之幣付使者之文，<sup>②</sup>不見有付賓介私覲之幣。又案下文賓將還，云「遂行，舍于郊。公使卿贈，如覲幣。使下大夫贈上介，亦如之。使士贈衆介，如其覲幣」。還至本國，陳幣于朝，云「上賓之公幣、私幣皆陳。上介公幣陳，他介皆否」，注云「此幣使者及介所得於彼國君、卿大夫之贈賜也。其禮於君者不陳。公幣，君之賜也。私幣，卿大夫之幣也」。至於賓反命訖，君使宰賜使者及介幣。以此言之，彼國所報私覲之幣，還與賓介，明知私覲是賓介私齎行可知也。《夏官·校人》云「凡國之

① 「上」，阮校云：楊氏作「南」。

② 「及問大夫聘之幣」，曹校云「聘」衍字。

使者，皆供其幣、馬」，鄭注「使者所用私覲」。若然，彼使者謂天子使卿大夫存親省問諸侯之事，使者得之行私覲，<sup>①</sup>私覲之馬，校人供之，與諸侯禮異也。及郊，又

展如初。郊，遠郊也。周制，天子畿內千里，遠郊百里。

以此差之，遠郊上公五十里，侯伯三十里，子男十里也。近郊各半之。

**疏**「及郊」至「如初」○注「郊遠」至「半之」

○釋曰：云「周制，天子畿內千里」者，《周禮·大司徒》云「制其畿方千里」，據《周禮》而言。其自殷已上，亦畿方千里，《商頌》云「邦畿千里，唯民所止」。夏亦千里，《王制》云「天子縣內方千里」，鄭據夏時。《禹貢》方千里曰甸服，據唐虞畿內是也。云「遠郊百里」者，《司馬法》文。畿方千里，王城面五百里，<sup>②</sup>以百里爲遠郊。若公百里，<sup>③</sup>中置國城，面二百五十里，故遠郊五十里。自此已下至子男，差之可知。云「近郊各半之」者，亦約周天子遠郊百里，近郊五十里，亦無正文。《尚書·君陳》序云「命君陳分正東郊成周」，鄭注「周之近郊五十里，今河南洛陽相去則然」，鄭以目驗知之。若然，天子近郊半遠郊，則諸侯近郊各半遠郊可知也。及館，展幣於賈人之館，如初。館，舍也。遠郊之內有候館，可以小休止、沐浴。展幣不

于賓館者，爲主國之人有勞問己者，就焉便疾也。**疏**「及

館」至「如初」○注「館舍」至「疾也」○釋曰：案《周禮·遺

人》職云：「十里有廬，三十里有宿，五十里有市，市有候

館。」畿內道路皆有候館，鄭云「遠郊之內有候館」者，據此

候館在遠郊之內指而言之，<sup>④</sup>不謂於此獨有也。以行道

之間停息，故云「小休止、沐浴」，又得展幣也。云「展幣不

于賓館者，爲主國之人有勞問己者，就焉便疾也」者，若并

在賓館，則事煩不疾，若展幣於賈人之館，其賓館受勞問，

是以就賈人之館展幣便疾也。案《大行人》諸侯朝天子，

上公三勞，侯伯再勞，子男一勞，孤不問一勞。諸侯自相

朝，無過如朝天子；遣臣相聘，無過一勞。此文使卿近

郊勞，此乃遠郊之內，得有此勞問己者，謂同姓舅甥之國，

而加恩厚者，別有遠郊之內問勞也。賓至于近郊，張

旛。君使下大夫請行，反。君使卿朝服，用

① 曹校云「之」字似衍。

② 「畿方千里王城」，阮校云：毛本「王」字在「畿」字上。

③ 「百」上，阮校云毛本、《通解》有「五」字，曹校云有者是。

④ 「者據此」，阮校云：毛本作「若此據」。



束帛勞。請行，問所之也。雖知之，謙不必也。士請

事，大夫請行，卿勞，彌尊賓也。其服皆朝服。**疏**「賓至」

至「帛勞」○注「請行」至「朝服」○釋曰：自此盡「遂以賓

人」，論主君使大夫及卿行請勞之事。人近郊張旛者，示

將有事，以自表也。知「皆朝服」者，以卿勞禮重，尚朝服，

明以外士大夫輕者朝服可知也，故舉後以明前也。上介

出請，入告。賓禮辭，迎于舍門之外，再拜。

出請，出門西面，請所以來事也。入告，入北面告賓也。

每所及至皆有舍，其有來者者，<sup>①</sup>皆出請入告。于此言之

者，賓彌尊，事彌錄。**疏**「上介」至「再拜」○注「出請」至

「彌錄」○釋曰：云「入北面告賓也」者，此時賓當在賓館阼

階西面，故上介北面告賓也。云「每所及至皆有舍，其有

來者，皆出請入告。于此言之者，賓彌尊，事彌錄」者，道

皆有廬宿市來之舍，<sup>②</sup>前出請士，<sup>③</sup>大夫請行，亦當出請入

告。於此始言之者，先士，次大夫，後卿，以是先卑後尊。

今復見此言，故云「賓彌尊，事彌錄」也。勞者不荅

拜。凡為人使，不當其禮。**疏**「勞者不荅拜」○注「凡

爲」至「其禮」○釋曰：言「凡」者，非直此卿爲君勞賓，不敢

當其禮，不荅拜，聘賓亦初入大門，主君拜，賓辟不荅拜

也。如此之類皆然，故云「凡」以該之。至後僨勞者，與之

荅拜，爲己故也。賓揖，先入，受于舍門內。不受

于堂，此主於侯伯之臣也，公之臣受勞於堂。**疏**「賓揖」

至「門內」○注「不受」至「於堂」○釋曰：知「公之臣受勞於

堂」者，案《司儀》云「諸公之臣，相爲國客，及大夫郊勞，三

辭拜辱，三讓，登，聽命」，是公之臣受勞於堂之事。勞者

奉幣入，東面致命。**疏**「勞者」至「致

命」○注「東面鄉賓」○釋曰：賓在館如主人，當入門西面，

故勞者東面向之也。賓北面聽命，還，少退，再

拜稽首，受幣。勞者出。北面聽命，若君南面然。

少退，象降拜。**疏**「賓北」至「者出」○注「北面」至「降拜」

○釋曰：云「北面聽命，若君南面然。云少退，<sup>④</sup>象降拜」

<sup>①</sup> 下「者」字，阮校云：毛本作「與」，徐、楊、《集釋》俱無

「與」字，亦無「者」。與疏合。

<sup>②</sup> 「來」，曹校云此字衍。

<sup>③</sup> 「出請士」，據阮校毛本作「士請事」，曹校云毛本是。

<sup>④</sup> 「云」，阮校云毛本無「云」字是也。

者，下文歸饗餼，大夫東面致命，賓降階西面，<sup>①</sup>再拜稽首，是此象之也。若然，此行尊卑禮訝受法，歸饗餼時，上北面受幣，<sup>②</sup>此在庭，亦當北面訝受幣，勞者南面可知也。

**授老幣。**老，賓之臣。**疏**「授老幣」○注「老賓之臣」○

釋曰：大夫家臣稱老，若趙、魏、臧氏老之類也。**出迎**

**勞者。**欲償之。**疏**「出迎勞者」○注「欲償之」○釋曰：

《司儀》注云「上於下曰禮，敵者曰償」，此言「償」者，欲見賓以禮禮使者，故云「欲償之」。勞者禮辭。賓揖，

先入。勞者從之。乘皮設。設於門內也。物四

曰乘。皮，麋鹿皮也。**疏**「勞者」至「皮設」○注「設於」至

「皮也」○釋曰：庭實當三分庭一在南設之，今以償勞者在庭，故「設於門內也」。云「皮，麋鹿皮」者，鄭於下注云「君於臣，臣於君，麋鹿皮可」者，以無正文。知用麋鹿皮者，

案《郊特牲》云「虎豹之皮，示服猛也」，彼諸侯朝享天子法

用虎豹，此臣聘君，降於享天子法，用麋鹿皮，故《齊語》云

齊桓公使諸侯輕其幣，用麋鹿皮四張，亦一隅也。**實用**

**束錦償勞者。**言償者，實在公館如家之義，亦以來者

爲賓。**疏**「實用」至「勞者」○注「言償」至「爲賓」○釋曰：

云「言償者，實在公館如家之義，亦以來者爲賓」者，凡言償者，謂報於賓，今以賓館，<sup>③</sup>故賓若主人，故云「償勞者」，即以勞者爲賓故也。勞者再拜稽首，受。稽

首，尊國賓也。**疏**「勞者」至「首受」○注「稽首尊國賓」○

釋曰：《周禮·大祝》辨九拜：一曰稽首，首至地，臣拜君

法；二曰頓首，頭叩地，平敵相於法；<sup>④</sup>三曰空首，首至

手，君荅臣下拜法。《郊特牲》云：「大夫之臣不稽首，非尊

家臣，以辟君也。」今此勞者與賓同類，不頓首而稽首，故

云「尊國賓也」。下賓亦稽首送者，以是爲君使，故亦稽首

以報之也。賓再拜稽首，送幣。受送拜皆北面，象

階上。**疏**「受送」至「階上」○釋曰：知「受送拜皆北面，

象階上」者，此經面位無文。案歸饗餼賓償大夫時，賓楹

間北面授幣，大夫西面受，<sup>⑤</sup>此賓亦宜與彼同，北面授，還

<sup>①</sup>「面」字，阮校引浦鏜云：「面」字疑衍。

<sup>②</sup>「上」上，阮校云《通解》、毛本有「堂」字，曹校云有者

是。

<sup>③</sup>「館」上，曹校云脫「在」字。

<sup>④</sup>「於」，阮校云：毛本作「拜」。

<sup>⑤</sup>「西面」，阮校引朱子曰：「西面」當作「南面」。

北面拜送。若然，云「受送拜皆北面」者誤，當云「授送拜皆北面」，並據賓而言也。勞者揖皮，出，乃退。賓送，再拜。揖皮，出，東面揖執皮者而出。**疏**「勞者」至「再拜」○注「揖皮」至「而出」○釋曰：知「東面揖執皮者」，以其執皮者在門內當門，勞者在執皮之西，故知「東面揖皮」可知，揖之若親受之。又執皮者是賓之使者，<sup>①</sup>執皮者得揖從出，勞者從人當訝受之。是以《公食大夫禮》云：賓三飯，公侑食以束帛，庭實設乘皮，賓受幣，賓出揖庭實，<sup>②</sup>出。鄭云「揖執皮者，若親受」。云「上介受賓幣」，<sup>③</sup>從者訝受皮」，則此從者亦訝受可知。

## 儀禮疏卷第十九

江寧府知府陽城張敦仁編校 元和縣

學生員顧廣圻覆校

①「使」，曹校云當為「從」。

②「出」，曹校云此字衍。

③「云」上，曹校云脫「下」字。

## 儀禮疏卷第二十

唐朝散大夫行大學博士弘

文館學士臣賈公彥等撰

夫人使下大夫勞以二竹簋方，玄被纁裏，有蓋。竹簋方者，器名也，以竹爲之，狀如簋而方。如今寒

具筥，筥者圓，此方耳。

**疏**「夫人」至「有蓋」○注「竹簋」

至「方耳」○釋曰：自此盡「以賓人」，論夫人勞賓之事。夫人勞使下大夫者，降于君，故不使卿。凡簋皆用木而圓，受斗二升，此則用竹而方，故云「如簋而方」，受斗二升則同。「如今寒具筥」者，寒具若「籩人」先鄭云「朝事謂清朝未食，<sup>①</sup>先進寒具口實之籩」，實以冬食，故謂之「寒具」。筥圓，此方者，方圓不同爲異也。案《玉人》云：「案十有二，<sup>②</sup>棗栗十有二列，諸侯純九，大夫純五，夫人以勞諸侯。」彼有玉案者，謂王后法有玉案，并有竹簋以盛棗栗，故彼引此爲證。<sup>③</sup>此諸侯夫人勞卿大夫，故無案，直有竹

簋以盛棗栗。其實棗蒸栗擇，兼執之以進。兼猶兩也。右手執棗，左手執栗。

**疏**「其實」至「以進」○注「兼猶」至「執栗」○釋曰：云「兼猶兩」者，謂一人執兩事。

知「右手執棗，左手執栗」者，見下文云「賓受棗，大夫二手授栗」，則大夫先度右手，乃以左手共授栗便也，明知右手執棗可知。必用右手執棗先度之者，鄭注《士虞禮》云「棗美」，故用右手執棗也。賓受棗。大夫二手授栗。

受授不游手，慎之也。

**疏**注「受授」至「之也」○釋曰：初

兩手俱用，既受棗，不共授栗，<sup>④</sup>游暇一手，<sup>⑤</sup>不慎也。今右手授棗訖，即共授栗，<sup>⑥</sup>不游手，爲謹慎也。賓之受

如初禮。如卿勞之儀。賓之如初。下大夫勞

<sup>①</sup>「若」，阮校云：毛本、《通解》作「見」。

<sup>②</sup>「二」下，阮校云：毛本有「寸」字。

<sup>③</sup>「彼」下，曹校云脫「注」字。

<sup>④</sup>「不」，阮校云：毛本「不」上有「而」字，下有「兩手」二字。

<sup>⑤</sup>「游」上，阮校云：毛本有「則是」二字。

<sup>⑥</sup>「即」下，阮校云：毛本有「兩手」二字。

者遂以賓人。出以束錦授從者，因東面釋辭，請道之以入。然則賓送不拜。

**疏**

「饋之」至「賓人」○注「出以

至「不拜」○釋曰：云「出以束錦授從者，因東面釋辭，請導之」者，饋下大夫如前有束錦，則此大夫亦受得束錦。經言「遂以賓人」，明知有辭「請導之」，雖無文，鄭以意言之。大夫在西，明出時授束錦與已從者，乃得因東面釋請導之辭也。云「然則賓送不拜」者，以其云「遂以賓人」，即從之，明賓送不拜，謂若《公食大夫》使人戒「賓不拜送，遂從之」其類也。案上君使士請，遂以賓人，鄭云「因導之」，鄭不言「賓送不拜」者，士請事空手無幣，賓亦不饋，請導賓，賓從人，無再拜送之理，故鄭不言「賓送不拜」。此大夫勞饋，與卿同有拜送之理，故云「賓送不拜」也。《覲禮》大夫勞侯氏，侯氏即從大夫入，拜送大夫，天子使尊，故雖從亦拜送，與此異。至于朝，主人曰：「不腆先君之祧，既拚以俟矣。」賓至外門，下大夫入告，出釋此辭。主人者，公也。不言公而言主人，主人接賓之辭，明至欲受之，不敢稽賓也。腆，猶善也。遷主所在曰祧。周禮，天子七廟，文、武為祧。諸侯五廟，則祧始祖也，是亦廟也。言祧者，祧尊而廟親，待賓客者上尊者。

**疏**「至

于「至」俟矣」○釋曰：自此盡「俟間」，論賓初至，主君請行聘禮，賓又請俟間之事。云「至于朝」者，鄭云「賓至外門」者，外門即諸侯之外朝，故下云「以柩造朝」，亦謂大門外為外朝也。云「下大夫入告，出釋此辭」者，此下大夫，即夫人勞賓，①導賓入者也。云「明至欲受之，不敢稽賓」，②案《覲禮》云「侯氏遂從之，天子賜舍」，鄭云「且使即安」。不即言「欲受之」者，彼天子以諸侯為臣，故使且安；此鄰國聘賓，不臣人之臣，故言「不敢稽賓也」。云「遷主所在曰祧」者，此摠解天子、諸侯稱祧也。云《周禮》「天子七廟，文、武為祧」者，案《周禮》·大宗伯·序官·守祧職云「奄八人」，鄭注云「遠廟曰祧」。又《守祧》職云「掌守先王、先公之廟祧」，鄭注云「廟謂大祖之廟及三昭三穆，遷主所藏曰祧」。先公之遷主藏于后稷之廟，先王之遷主藏于文、武之廟。云「奄八人」，廟有一奄。周立七廟，通姜嫄廟為八，故奄八人。《祭法》鄭注云「祧之言超也，超上去意也」，不毀之也。云「遷主所藏曰祧」，天子有二祧以藏遷主，諸侯無二祧，遷主藏于大祖廟，故此名大祖廟為

①

「人」下，曹校云脫「使」字。

②

「賓」下，據阮校毛本有「者」字。

桃也。云「既拚」者，《少儀》云「埽席前曰拚」，拚者埽除之名。云「諸侯五廟」，《王制》與《祭法》文。云「則桃始祖，是亦廟也。言桃者，桃尊而廟親，待賓客者上尊者」，下文「迎賓於大門」，揖人，「及廟門」，受賓聘享皆在廟。此云「先君之桃」，明下云「廟」是大祖廟可知，是以於大祖廟受聘享，尊之。<sup>①</sup>若饗食則於禰廟，燕又在寢，彌相親也。

此鄭義，若孔君、王肅則以高祖之父及祖為二桃，非鄭義也。賓曰：「俟閒。」賓之意，不欲奄卒主人也。且以道路悠遠，欲沐浴、齊戒，俟閒，未敢聞命。

**疏**「賓曰俟閒」

○注「賓之」至「聞命」○釋曰：此鄭以意解之。上文以意解主君不欲稽留於賓，此經解賓意不欲奄卒主人，故云「俟閒」。必知有「齊戒、沐浴」者，案《玉藻》云「將適公所，宿齊戒、沐浴」，彼謂臣見己君，入廟必須齊戒、沐浴，此有齊戒、沐浴可知也。云「未敢聞命」者，謂「不腆先君之桃，既拚以俟」之命，不敢聞之也。大夫帥至于館。卿致館。致，至也。賓至此館，主人以上卿禮致之，所以安之也。

**疏**「大夫」至「致館」○注「致至」至「之也」○釋曰：

自此盡「送，再拜」，論主君遣卿致館之事。云「賓至此館，主人以上卿禮致之」者，案《覲禮》云「侯氏遂從之。天子

賜舍」，辭曰「賜伯父舍」，「侯氏再拜稽首受，儻之束帛乘馬」，注云「王使人以命致館，無禮猶儻之者，尊王使也」。無禮，謂無束帛，此云「以上卿禮」，明有束帛致亦可知。若然，有禮則稱致，《覲禮》不稱致，無禮故也。案《司儀》云「諸公相為賓，主君郊勞」，云「三辭，拜受」。拜受謂拜受幣。又云「致館亦如之」，鄭云「使大夫授之，君又以禮親致焉」，亦是有幣可知。又云「諸侯、諸伯、諸子、諸男之相為賓也，各以其禮相待也，如諸公之儀」。是五等相待，致館同有幣矣。天子待諸侯無幣，則其臣來無幣可知。據此文，侯伯之卿聘，郊勞、致館有幣，則五等待臣皆同有幣也。《司儀》「諸侯之臣相為國客」，亦皆有幣，與此同。若諸侯遣大夫小聘曰問，下云「小聘曰問，不享有獻，不及夫人，不筵几，不禮，面不升，不郊勞」，注云「記貶於大聘，所以為小也。獻，私獻也。面猶覲也」，雖不言「不致館」，略之耳，亦不致也。又諸臣朝覲天子，<sup>②</sup>天子無禮以致，猶儻，尊王使。又五等自相朝，主國皆有禮，皆有儻，故《司儀》云「賓繼主君，皆如主國之禮」，鄭玄謂「繼主君者，

<sup>①</sup>「享」下，阮校云：「毛本有「以」字。」

<sup>②</sup>「臣」，曹校云當為「侯」。

賓主君也。賓之者，主君郊勞、致館、饗餼、還圭、贈、郊送之時也」。此等皆主君親致館。<sup>①</sup>又云「致館亦如之」，亦如郊勞時亦有賓矣。以此言諸臣致者皆有賓也。<sup>②</sup>若諸侯遣卿大夫聘王國，有用幣致館，無賓也，故《司儀》云「諸公之臣相爲國客，致館如初之儀」，鄭注云「如郊勞也，不賓耳」是也。賓迎，再拜。卿致命。賓再拜稽首。卿退。賓送，再拜。卿不俟設餼之畢，以不用束帛致故也。不用束帛致之者，明爲新至，非大禮也。

**疏**「賓迎」至「再拜」○注「卿不」至「禮也」○釋曰：云「賓迎，再拜」者，賓在館如主人，故先拜也。卿不言荅拜，荅拜可知，但文略耳。雖不言入，言「迎」則入門可知。言「卿致命」者，亦東面致君命也。云「卿不俟設餼之畢，以不用束帛致故也」者，下直云「宰夫朝服設餼」，不言致，則此卿致館兼致餼矣。致館有束帛，致餼空以辭致君命，無束帛者，案下記云「餼不致」，鄭注云「不以束帛致命，草次饌，餼具輕」。若然，卿以空拜致餼既即退，<sup>③</sup>不待宰夫設畢也，「以不用束帛致故也」。云「非大禮也」者，對下聘日致饗，鄭云「急歸大禮也」。若然，此侯伯之卿禮，其公之臣亦以幣帛致。<sup>④</sup>案《司儀》云「諸公之臣相爲國客」，「致

館如初之儀」，鄭注云「不言致餼者，君於聘大夫，不致餼也」。《聘禮》曰「餼不致，賓不拜」是也，其子男之臣不致可知。又案《司儀》云「君親致館，至於致餼，如致積之禮」，鄭注云「俱使大夫，禮同也」。以此言之，致館、致餼似別人者，但致積在道，致餼在館，所致別人。若致館與致餼同時，致館者兼致餼，無嫌也。言「俱使大夫」者，言積與餼同使大夫，決君不親之義，何妨致館與致餼一人也。其臣致餼無幣，其五等諸侯致餼則有幣。案《司儀》諸侯相於致餼如致積，致積有幣，知致餼亦有幣也。宰

夫朝服設餼。食不備禮曰餼。《詩》云「不素餼兮」，

《春秋傳》曰「方食魚餼」，皆謂是。**疏**「宰夫朝服設餼」○

注「食不」至「謂是」○釋曰：云「食不備禮曰餼」者，對饗餼也，生與腥飪俱有，餘物又多，此餼唯有腥飪而無生，餘物又少，故云「不備禮」也。引《詩》、《傳》者，案《詩》云「彼君子兮，不素餼兮」，毛云「熟食曰餼」，鄭云「讀如魚餼之

① 「館」，曹校云此字衍。

② 「臣」，曹校云亦當爲「侯」。

③ 「拜」，曹校云當爲「手」。

④ 「亦」下，曹校云脫「不」字。

飧」，則《詩》「飧」與《傳》「魚飧」同是直食魚與飯爲飧。彼少牢小禮中不備，此則兩大牢大禮中不備，不備是同，故引證一邊不備，其實禮有異也。《春秋傳》曰「方食魚飧」者，案宣六年經書「晉趙盾，衛孫免侵陳」，《公羊傳》曰「趙盾弑君，此其復見何？親弑君者趙穿也。親弑君者趙穿，則曷爲加之趙盾？不討賊也。復國不討賊，此非弑君如何？趙盾之復國奈何，靈公爲無道」。靈公使膳宰以熊膳不熟，公殺之。盾入諫，公見盾，再拜，盾拜稽首。歸，公使勇士某者往殺之。勇士入門，不見人，闚其戶，「方食魚飧」。勇士曰：「嘻！子誠仁人也，是子之儉也，吾不忍殺子也。雖然，吾不可復見吾君矣。」遂刎頸而死。是「魚飧」之事。飪一牢在西，鼎九，羞鼎三；腥一牢在東，鼎七；中庭之饌也。飪，孰也。孰在西，腥在東，象春秋也。鼎西九，東七，凡其鼎實與其陳如陳饗餼。羞鼎則陪鼎也，以其實言之則曰羞，以其陳言之則曰陪。

**疏**「飪一」至「鼎七」○注「中庭」至「曰陪」○釋曰：云「中庭之饌也」者，對下文是堂上及門外之饌也。云「象春秋也」者，腥之言生，象春物生；飪，孰也，象秋物有成孰，故云「象春秋也」。云「鼎西九，東七」者，九謂正鼎九，

牛、羊、豕、魚、腊、腸胃、膚、鮮魚、鮮腊。東七者，腥鼎無鮮魚、鮮腊，故七。云「凡其鼎實與其陳如陳饗餼」者，如其死牢，故《掌客》云：「諸侯之禮，饗餼九牢、七牢、五牢，其死牢如飧之陳，凡介、行人皆有飧、饗餼。此則如介禮也，是飧之死牢與饗餼死牢，實與飧陳同，①亦於東階、西階也。云「羞鼎則陪鼎也」，知是一物者，此云「羞鼎」，下饗餼言「陪鼎」，故知一也。陪鼎三，則下云腳、臠、臠是也。堂上之饌八，西夾六；八、六者，豆數也。凡饌以豆爲本。堂上八豆、八簋、六鉶、兩簠、八壺，西夾六豆、六簋、四鉶、兩簠、六壺，其實與其陳亦如饗餼。

**疏**「堂上」至「夾六」○注「八六」至「饗餼」○釋曰：堂上與西夾所陳六、八非一，知六、八是豆者，凡設饌皆先設豆，乃設餘饌，故鄭云「凡饌以豆爲本」，無妨六、八之內兼有餘饌，故鄭言簋、鉶之等也。凡鄭所云，皆約饗餼，故云「亦如饗餼」也。鄭必約與陳饗餼同者，以其陳鼎饗餼同，②故知餘亦同也。門外，米禾皆二十車，禾，稟實并刈者也。

①「飧」，曹校云此字衍。

②「饗」上，曹校云脫「與」字。



諸侯之禮，車米視生牢，禾視死牢，牢十車。大夫之禮，皆視死牢而已，雖有生牢，不取數焉。米陳門東，禾陳門西。

**疏**「門外」至「十車」○注「禾稟」至「門西」○釋曰：「諸侯

之禮，車米視生牢，禾視死牢，牢皆十車」者，案《掌客》云：

「上公之禮，殯五牢，饗餼九牢，其死牢如殯之陳，牽四牢，

車米視生牢，牢十車，車乘有五簋，車禾視死牢，牢十車。

侯伯殯四牢，饗餼七牢，其死牢如殯之陳，牽三牢。子男

殯三牢，饗餼五牢，其死牢如殯之陳，牽二牢。」皆米視生

牢，牢十車，禾視死牢，牢十車，是其義也。云「大夫之禮，

皆視死牢而已，雖有生牢，不取數焉」者，知然者，見下歸

饗餼五牢：饗三牢，餼二牢。饗三牢，死牢也，門外米禾皆

三十車，與死三牢同，不取餼二牢生之數，故知義然也。

云「米陳門東，禾陳門西」者，此亦約下歸饗餼知之。上皆

云陳如饗餼，此不云如饗餼者，至下經與薪芻并云「凡此

之陳，亦如饗餼」是也。薪芻倍禾。各四十車。凡此

之陳，亦如饗餼。上介飪一牢在西，鼎七，羞鼎

三；堂上之饌六；門外米禾皆十車，薪芻倍

禾。西鼎七，無鮮魚、鮮腊。

**疏**「上介」至「倍禾」○注

「西鼎」至「鮮腊」○釋曰：六者與賓西夾數同，但言堂則西

夾無矣。云「西鼎七，無鮮魚、鮮腊」者，此亦約饗餼時賓

飪鼎數，故下文賓腥鼎七，無鮮魚、鮮腊，此亦鼎七，故知

無鮮魚、鮮腊也。衆介皆少牢。亦飪，在西，鼎五，

羊、豕、腸胃、魚、腊，新至尚孰。堂上之饌四豆、四簋、兩

鉶、四壺，無簠。**疏**「衆介皆少牢」○注「亦飪」至「無簠」

○釋曰：知「亦飪」者，依上介知然。知「鼎五」者，以賓九，

上介七，衆介當五，降殺以兩。又約少牢五鼎，此亦少牢，

故知亦五鼎也。知鼎實有羊、豕、魚、腊與腸胃者，以上介

無鮮魚、鮮腊，此又無牛，故從羊、豕以下數之得五。案少

牢有膚，此無者，生人食與祭異，故《玉藻》「朔月少牢，五

俎」，亦云羊、豕、魚、腊、腸胃，不數膚也。案上注皆不言

「新至尚孰」，於此言之者，上文賓與上介皆言「飪一牢，在

西」，下歸饗餼亦言「飪一牢，在西」，此衆介直言「少牢」，

不言「飪」，下文歸饗餼亦直言「餼一牢」，無「飪」，恐衆介

殯饗前後皆無飪，故特言之。「新至尚孰」，對後無饗，直

有餼，不尚熟也。必知少牢是「飪」者，承上介一牢飪，知

此亦飪。云「堂上之饌四豆、四簋、兩鉶、四壺，無簠」，知

數如此者，以賓與上介降殺以兩，故然也。知「無簠」者，

以賓簠有二，《曲禮》云「歲凶，大夫不食粱」，非歲凶大夫

食梁，梁大夫常食，大夫禮多與賓同，簠盛稻粱，則上介亦二簠，與賓同。士非直不合食梁，差降亦無簠也。厥

明，訝賓于館。此訝，下大夫也。以君命迎賓謂之

訝，訝，迎也，亦皮弁。**疏**「厥明」至「于館」○注「此訝」至

「皮弁」○釋曰：自此盡「每曲揖」，論將行聘禮，主君迎賓

向廟之事。云「此訝下大夫也」者，案《周禮》有掌訝，中士

八人爲之，此訝下大夫，非彼掌訝也。案下記云「卿，大夫

訝。大夫，士訝。士皆有訝」，又《周禮》掌訝云「凡賓客

諸侯有卿訝，卿有大夫訝，大夫有士訝，士皆有訝」，此大

聘是卿，故使下大夫訝也。天子、諸侯雖有掌訝之官，朝

聘之賓，不使掌訝爲訝，直以尊卑節級爲訝，故云「此訝，

下大夫也」。言「以君命迎」者，凡舉事皆以承君命，<sup>①</sup>故

知迎賓待君命也。云「亦皮弁」者，下文君及賓皮弁，明此

大夫亦皮弁服也。賓皮弁，聘，至于朝。賓人于

次。服皮弁者，朝聘主相尊敬也。諸侯視朔皮弁服。入

于次者，俟辦也。<sup>②</sup>次在大門外之西，以帷爲之。**疏**「賓

皮」至「于次」○注「服皮」至「爲之」○釋曰：云「服皮弁者，

朝聘主相尊敬也」者，《周禮》大行人「諸侯朝天子，各服

冕服，「廟中將幣，三享」。《覲禮》亦云「侯氏裨冕」，在廟

覲天子。此諸侯待四方朝聘皆皮弁者，入天子廟得申其

上服，人已廟不可以冕服，又不可服常朝之服，故服天子

之朝服。諸侯以爲視朔之服，在廟待朝聘之賓，是相尊敬

故也。知此皮弁是諸侯視朔服者，以其《玉藻》云「諸侯皮

弁以聽朔於大廟」是也。云「次在大門外之西，以帷爲之」

者，下記云「宗人授次，次以帷，少退于君之次」，以賓位在

西，故知也。乃陳幣。有司入于主國廟門外，以布幕陳

幣，如展幣焉。圭璋，賈人執櫝而俟。**疏**「乃陳幣」○注

「有司」至「而俟」○釋曰：「有司入于主國廟門外」者，案下

文行聘時幣在主國廟門外，知在此也。知有幕者，以言

「陳幣如展幣」，明亦布幕陳幣也。云「圭璋，賈人執櫝而

俟」者，案下文云「賈人東面坐，啓櫝，取圭」，鄭注「賈人鄉

入陳幣，東面俟。於此言之，就有其事也」是也。<sup>③</sup>卿爲

上擯，大夫爲承擯，士爲紹擯。擯者出請

事。擯謂主國之君所使出接賓者也。紹，繼也，其位相

①「事皆」，阮校云毛本作「皆是」。

②「辦」，阮校云：張氏曰監、杭本作「辨」。

③「其」，阮校引浦鏜云誤衍「其」字。

承繼而出也。主君公也，則擯者五人；侯伯也，則擯者四人；子男也，則擯者三人。《聘義》曰：「介紹而傳命，君子於其所尊，不敢質，敬之至也。」既知其所爲來之事，復請之者，賓來當與主君爲禮，爲其謙，不敢斥尊者，啓發以進之。於是時賓出次，直闌西，北面，上擯在闌東，闕外，西面。其相去也，公之使者七十步，侯伯之使者五十步，子男之使者三十步。此旅擯耳，不傳命。上介在賓西北，東面，承擯在上擯東南，西面，各自次序而下，末介、末擯旁相去三丈六尺。上擯之請事，進，南面，揖賓俱前。賓至末介，上擯至末擯，亦相去三丈六尺。止，揖而請事。還，人告于公。天子、諸侯朝覲，乃命介紹傳命耳，其儀各鄉本受命，反面傳而下。及末則鄉受之，反面傳而上，又受命傳而下亦如之。此三丈六尺者，門容二徹參个，旁加各一步也。今文無「擯」。

**疏**「卿爲」至「請事」○注「擯謂」

至「無擯」○釋曰：此擯陳在主國大門外，主君之擯與賓之介東西相對，南北陳之。云「其位相承繼而出也」者，從門向南陳爲繼而出。云「主君公也，則擯者五人；侯伯也，則擯者四人；子男也，則擯者三人」者，案《周禮·大行人》：「天子待諸侯，云上公之禮，擯者五人；侯伯之禮，擯者四人；子男則擯者三人。今以諸侯待聘賓，用天子待己之擯數

者，以諸侯自相待無文，鄭以意解之。但天子尊，得分辨諸侯尊卑以待之。①諸侯卑，降天子，不敢分辨前人，故據己國大小而爲擯數。且《春秋》又有大國朝焉，小國聘焉，又有卿出並聘之事，則小國有朝大國法，無大國下朝小國之禮，若相聘問，大小皆得。若然，待其臣，據此文與待君等，天子待諸侯之臣，亦宜與君同也。又案《周禮》大宗伯爲上擯，小行人爲承擯。《覲禮》：「齊夫爲末擯，若待子男三人足矣，若侯伯少一人，待上公少二人，一人二人皆以士充數也。」引《聘義》者，案彼鄭注「質謂正自相當」，故設擯介通情乃相見，是敬之至。引之者，證須擯介之意也。云「既知其所爲來之事」者，在道已遣士請事，大夫問行、郊勞、致館之等，是足知來事矣。云「復請之者，賓來當與主君爲禮，爲其謙，不敢斥尊者，啓發以進之」者，亦解所以立擯介通情及進相見之義也。云「於是時賓出次，直闌西，北面」者，案《玉藻》云「君入門，介拂闌，大夫中楨與闌之間，士介拂楨」，此謂朝君；又云「賓人不中門」，此謂聘賓，云「不中門」，則此「闌西，北面」者。若然，聘賓入門還依作介人時同，亦拂闌也。云「上擯在闌東，闕外，西

①「辨」，阮校云：毛本作「辦」，《通解》作「別」，下同。

「面」者，主位在東，故賓在闌西，上擯在闌東，以擯位並門東，西面，故上擯亦西面向君也。云「其相去也，公之使者七十步，侯伯之使者五十步，子男之使者三十步」者，此依《大行人》云「諸侯之卿，其禮各下其君二等」，鄭注云「所下者，介與賓主之間」，是以步數與介數亦降二等也。云「此旅擯耳」者，案《司儀》云三問旅擯，鄭云旅，陳，「陳擯介，不傳辭」，故鄭此云「不傳命」也。若然，上注下注皆引《聘義》，云「介紹而傳命」者，若交擯傳命，則是賓介傳命，此旅擯傳命者，直是賓來，至末介下對上擯，傳本君之命也。其介相紹繼，則交擯旅擯同，唯傳命不傳辭有異矣。是以《司儀》云「及將幣交擯」，鄭注亦引《聘義》「介紹而傳命」為證，以其皆是相連繼於位也。云「上介在賓西北，東面，承擯在上擯東南，西面」，此謂賓直闌西北面，主君在門內南面。列位時云「西北」、「東南」者，據賓西北望上介，介仍向正北陳之矣，上擯東南望承擯等，仍向正南陳之矣。不謂介西北邪陳，擯東南向邪陳也。云「各自次序而下」者，賓之介或七或五或三，從南向北次序，上下次下至末介；主人之擯或五或四或三，從承擯向南，上下次下至末擯也，東西相去三丈六尺。云「上擯之請事，進，南面，揖賓俱前」者，謂上擯人向公前，北面受命，出門南面遙揖

賓，使前。擯者漸南行，賓至末介北，東面，上擯至末擯南，西面，東西相去亦三丈六尺。云「止，揖而請事」者，二人俱立定，乃揖而請所為來之事。云「還，人告于公」者，賓對訖，上擯人告公，公乃有命納賓也。云「天子、諸侯朝覲，乃命介紹傳命耳」者，此引《聘義》文。自此以下論天子、諸侯交擯法。云「紹」者，亦謂使介相紹繼以傳命。傳命即擯介相傳賓主之命也。<sup>①</sup>此交擯謂在大門外初未迎賓時。案《曲禮》注「春夏受摯於朝，受享於廟；秋冬一受之於廟」，《覲禮》「天子不下堂而見諸侯，則秋冬受摯，受享皆無迎法，無迎法則無此交擯之義。若春夏受摯於朝無迎法，受享於廟則迎之。故《大行人》云「廟中將幣，三享」，鄭注「朝先享，不言朝者，朝正禮，不嫌有等也」，是正朝無迎法。若然，《覲禮》無迎法，此云「朝覲」，彼言「覲」者，<sup>②</sup>覲雖無迎法，饗食則有迎法，故《齊僕》云「朝覲宗遇饗食，皆乘金路。其法儀各以其等，為車送逆之節」，故連「覲」也。云「其儀各鄉本受命，反面傳而下」者，雖言各鄉本受命，非一時之事，先上擯人受命，出傳與承擯，承擯傳

① 「傳命」，阮校云：「毛本不重。」

② 「彼」，曹校云當為「連」。

與末擯，此是上擯「鄉本受命，反面傳而下」。末介向末擯邊受命，傳與次介，次介傳與上介，上介傳與賓，是「及其末則鄉受之」，<sup>①</sup>反面傳而上也。云「又受命傳而下亦如之」者，此乃發賓傳向主君，一如前發主君傳而向下，故云「亦如之」。如此三迴為交擯三辭，此則《司儀》云「諸公相為賓，交擯三辭」者也。諸侯伯子男相為賓，如諸公之儀，其交擯則同也。云「此三丈六尺」者，此則却計前云相去三丈六尺。云「門容二徹參个」者，<sup>②</sup>《冬官·匠人》云。<sup>③</sup>天子五門，《匠人》直計應門，直舉應門，則皋、庫、雉亦同。云「二徹參个」者，轍廣八尺，參个三八二十四，門容二丈四。云「傍加各壹步也」者，此無正文，但人之進退周旋不過再舉足一步，故門傍各空一步。丈二添二丈四尺為三丈六尺。公皮弁，迎賓于大門內。大夫納賓。公不出大門，降于待其君也。大夫，上擯也。謂之大夫者，上序可知。從大夫，摠無所別也。於是賓、主人皆楊。**疏**注「公不」至「皆楊」○釋曰：云「降于待其君也」者，<sup>④</sup>案《司儀》「諸公相為賓」，公皮弁交擯，「車迎拜辱」，出大門，此於門內，是降於待其君也。云「從大夫，摠無所別也」者，《春秋》之義，卿稱大夫，《王制》云「上大夫卿」，是

摠無別也。云「於是賓、主人皆楊」者，案《玉藻》云「不文飾也，不楊」，又云「執龜玉，襲」，下文行聘時執玉，賓、主人皆襲，此時未執玉，正是文飾之時，明賓主人皆楊也。賓入門左。內賓位也。<sup>⑤</sup>衆介隨入，北面，西上，少退。擯者亦入門而右，北面，東上。上擯進相君。**疏**「賓入門左」○注「由賓」至「相君」○釋曰：知「衆介隨入，北面，西上，少退」者，約下文入廟行聘享時，衆介入廟，隨賓入門左，相北面，<sup>⑥</sup>西上，少退，不敢與賓齊也。知「擯者亦入門而右，北面，東上」者，亦約衆介統於賓，北面西上，明擯者北面東上，亦約朝君揖位亦北面東上而知之也。<sup>⑦</sup>知「上擯進相君」者，《鄉黨》云「君召使擯」，鄭云「有賓客

①「鄉」，阮校云：陳、閩俱作「卿」，當從「卿」。曹校云當作「鄉」。

②「徹」，阮校云：毛本作「轍」。

③「云」，曹校云當為「文」。

④「云」下，阮校云：《要義》有「公不出大門」五字。

⑤「內」，曹校云單疏標目作「由」似是。

⑥「相」，阮校云「相」字不當有，毛本無。

⑦「揖」，曹校云似當為「擯」。

使迎之，彼據初迎賓時，至於入門之後，每事皆上擯相君也。**公再拜。**南面拜迎。

**疏**「公再拜」○注「南面拜迎」○釋曰：知君「南面」者，經雖不見君面位，主君尊於外國臣，猶南面，故《郊特牲》云「君之南鄉，荅陽之義」，故知君南面也。**賓辟，不荅拜。**辟位遠遁，不敢當其禮。

**疏**注「不敢當其禮」○釋曰：云「不敢當其禮」者，以卿奉君命使，不敢賓辟當相酬亢之禮，<sup>①</sup>故不荅拜，直遠遁而已。**公揖，入。每門，每曲揖。**每門輒揖者，以相

人偶爲敬也。凡君與賓入門，賓必後君。介及擯者隨之，並而鴈行。既入，則或左或右，相去如初。《玉藻》曰：「君入門，介拂闕。大夫中楨與闕之間，士介拂楨。賓人不中門，不履闕。」此賓謂聘卿大夫也。門中，門之正也。不敢與君並由之，敬也。介與擯者鴈行，卑不踰尊者之迹，亦敬也。賓之介猶主人之擯。

**疏**「公揖」至「曲揖」○注「每門」至「之擯」○釋曰：諸侯三門，皋、應、路，則應門爲中門，左宗廟，右社稷，入大門東行即至廟門。其閒得有「每門」者，諸侯有五廟，大祖之廟居中，二昭居東，二穆居西，廟皆別門，門外兩邊皆有南北隔牆，隔牆中夾通門。若然，祖廟已西隔牆有三，則閤門亦有三，東行經三門，乃至

大祖廟，門中則相逼，入門則相遠，是以每門皆有曲，有曲即相揖，故「每曲揖」也。是以《司儀》亦云「每門止一相」，亦據閤門而言也。云「以相人偶」者，以人意相存偶也。

云「凡君與賓入門，賓必後君」者，以賓主不敵，是以《玉藻》云於異國之君稱外臣某，故知聘賓後於主國君也。言「凡」者，非直聘享向祖廟，若饗食向禰廟，燕禮向路寢，皆當後於主君，故言「凡」以廣之。云「介及擯者隨之，並前而鴈行」者，言並上擯與上介，並次擯與次介，並末擯與末介，並各自鴈行於後也。云「既入，則或左或右」者，東行賓介於左，君擯於右也。云「相去如初」者，初謂大門外相去三丈六尺也。《玉藻》曰：「君入門，介拂闕。大夫中楨與闕之間，士介拂楨」，鄭注云「此謂兩君相見也。君人必中門，上介夾闕，大夫介、士介鴈行於後，示不相沿也。君若迎聘客，擯者亦然」。又云「賓人不中門，不履闕」，鄭注云：「辟尊者所從也。此經謂聘客。」鄭君并引朝君，欲見卿大夫聘來，還與從君爲介時入門同，故并引之也。云「君入門，介拂闕」，又云「門中，門之正」，又云「卑不踰尊者之迹」，若然，聊爲一闕言之。君最近闕，亦拂之而過，

① 曹校云「賓辟」二字衍。

上介則隨君而行，拂闌而過。所以與君同行者，臣自爲一列。主君既出迎賓，主君與賓並入，主君於東闌之內，賓於西闌之內，並行而入。上介於西闌之外，上賓於東闌之外，皆拂闌。次介、次賓皆大夫，中根與闌之間。末介、末賓皆士，各自拂根。如是得君人中門之正，上賓、上介俱得拂闌，又得不踰尊者之迹矣。又云「賓人不中門」者，此謂聘賓，大聘大夫，<sup>①</sup>故鄭卿、大夫並言。入門之時，還依與君爲介來人相似，賓人還拂闌，故上注賓自闌西，擬入時拂闌西故也。云「門中，門之正也」者，謂兩闌之間。云「卑不踰尊者之迹」者，士以大夫爲尊，大夫以上介爲尊，上介以君爲尊也。云「賓之介猶主人之賓」者，欲見賓介鴈行不別也。及廟門，公揖入，立于中庭。公揖先人，省內事也。既則立於中庭以俟賓，不復出，如此得君行一，臣行二，於禮可矣。公迎賓於大門內，<sup>②</sup>卿大夫以下入廟門，即位而俟之。**疏**「及廟」至「中庭」○注「公揖」至「俟之」○釋曰：自此盡公「楊，降立」，論行聘之事。云「公揖先人，省內事也」者，《曲禮》云「請入爲席」，彼卿大夫、士禮，是以鄭注云「雖君亦然」，「省內事」即「請入爲席」之類也。云「如此得君行一，臣行二，於禮可矣」者，言

「得君行一，臣行二」者，案下文「三揖」言之，初揖注云「將曲，揖」，謂在內雷之間住，<sup>③</sup>主君先立，無過近於內雷間。若然，去門既近，去階又遠也，以此不得君行一、臣行二。下文受玉于東楹之間，彼得爲君行一、臣行二矣。下文又云「公升二等，賓升」，君階七等，君升二等，賓升一等，已上仍有五階，<sup>④</sup>亦不得爲君行一，臣行二。與此同，欲見君行近，臣行遠之義，皆據大判而言，不可細分之矣。言「於禮可」者，以其尊者宜逸，卑者宜勞，故言「於禮可」也。云「公迎賓於大門內，卿大夫以下入廟門，即位而俟之」者，上初命拜迎賓于館之時，<sup>⑤</sup>卿大夫、士固在朝矣，及賓來大門外陳介之時，主君之賓亦在大門外之位。君在大門內時，其卿大夫不以無事亂有事，當於廟中在位矣。必知義然，<sup>⑥</sup>當見行事之時，公授宰玉，又云「士受皮」，又云

- ① 「大聘」下，曹校云脫「使卿小聘使」五字。
- ② 「于」，阮校云：《通解》無。
- ③ 「住」，阮校云：毛本作「在」。
- ④ 「階」，阮校云：毛本作「等」，以作「階」爲是。
- ⑤ 「拜」，曹校云此字衍。
- ⑥ 「然」下，曹校云脫「者」字。



宰夫授公几，皆是於外無事，在廟始有事，更不見此官等命入廟之文，明君未入廟時，此官已在位而俟。《公食大夫》以其官各具饌物，皆有事，不預入廟，故公迎賓人後乃見卿大夫以下之位，與此異也。賓立，接西塾。接猶

近也。門側之堂謂之塾。立近塾者，已與主君交禮，將有出命，俟之於此。介在幣南，北面，西上。上擯亦隨公入門東，東上，少進於士。

**疏**「賓立接西塾」○注「接猶」至

「於士」○釋曰：云「門側之堂謂之塾」者，《爾雅·釋宮》文。云「立近塾者，已與主君交禮，將有出命，俟之於此」者，對在大門外時，未與主君交禮，直使擯傳命，故去門七十步、五十步、三十步，此將與君交禮，故近門也。云「於此介在幣南，北面，西上」者，以上文入竟展幣時布幕，賓西面，介北面東上，統於賓，今此陳幣，賓在門西北面，明介北面西上，統於賓也。云「上擯隨公入門東，東上，少進於士」者，案下「几筵既設，擯者出請命」，更不見上擯別入之文，明隨公人可知也。知門東有士者。案《公食》云「士立于門東，北面，西上」，鄭云「統於門者，非其正位也」，故知此亦然。以擯者是卿，又相君，故知進於士，在士前也。几筵既設，擯者出請命。有几筵者，以

其席受，宜依神也。賓至席門，司宮乃于依前設之，神尊，不豫事也。席西上。上擯待而出請，受賓所以來之命，重停賓也。至此言命，事彌至，言彌信也。《周禮》：「諸侯祭祀，席蒲筵績純，右彫几。」**疏**「几筵」至「請命」○注「有几」至「彫几」○釋曰：云「有几筵者，以其廟受，宜依神也」者，此對不在廟受不几筵，故下云「聘遭喪，入竟則遂也，不郊勞，不几筵」，注云「致命不於廟，就尸柩於殯宮，又不神之」。下小聘「不几筵」，注云「記貶於聘」，是以記云「唯大聘有几筵」。《覲禮》不云几筵，文不具也。又案《曲禮》注「春夏受摯於朝，受享於廟，秋冬一受之於廟」，諸侯無此法，四時皆在於廟，亦無四時朝覲之別名，同皆曰朝也。云「賓至廟門，司宮乃于依前設之，神尊，不豫事也」者，此對《公食》宰夫設筵加席几，而後迎賓，彼食禮與此異也。知在宸前者，案《司几筵》云「大朝覲、大饗射，王位依前南鄉」，設筵几，《覲禮》亦云「依前」，諸侯亦然。《爾雅·釋宮》云：「牖，戶之間謂之宸。」但天子以屏風設於宸，諸侯無屏風為異，席亦不同也。云「至此言命，事彌至，言彌信

①「將」，曹校云當為「已」。



也」者，上入竟士請事，近郊下大夫請行，皆是謙問，不敢以必來之己國，<sup>①</sup>不正言之。至此事益至，言則信矣，故正問之，<sup>②</sup>而言「請命」，是其事至言信矣。云「《周禮》至「彫几」者，《周禮·司几筵》文。彼諸侯祭祀席三重，上更有「加莞筵紛純」，不引之者，文略可知。引之者，證此所設者設常祭祀之席也。賈人東面坐，啓牘，取圭，垂纁，不起而授上介。賈人鄉入陳幣，東面俟。於此言之，就有事也。授圭不起，賤，不與爲禮也。不言楊襲者，賤，不楊也。纁，有組繫也。」疏「賈人」至「上介」○

注「賈人」至「繫也」○釋曰：「賈人鄉入陳幣，東面俟。於此言之，就有事也」者，上文賓入次，乃陳幣在門外，不言者，彼賈人未有事，今此有事，故就此言面位。以此東面，明初亦東面矣，故舉此明前東面也。云「授圭不起，賤，不與爲禮也」者，以賈人是庶人在官者，故云「賤，不與爲禮」，爲禮當起而授也。云「不言楊襲者，賤，不楊也」者，若不賤，以垂纁當楊，以賤，故不楊也。云「纁，有組繫也」，知有組者，下記云「所以朝天子，圭與纁皆九寸；問諸侯，朱綠纁，八寸。皆玄纁繫，長尺，絢組」是也。上介不襲，執圭屈纁，授賓。上介北面受圭，進西面授

賓。不襲者，以盛禮不在於己也。屈纁，并持之也。《曲禮》曰：「執玉，其有藉者則楊，無藉者則襲。」疏「上介」至

「授賓」○注「上介」至「則襲」○釋曰：上介楊，於賈人處垂纁受得圭，而不襲者，鄭云「以盛禮不在於己」故也，以賓執圭升堂致命爲盛禮在己者也。云「上介北面受圭，進西面授賓」者，以上介本位北面，故北面受圭；賓東面，故上介西面授賓。引《曲禮》者，彼記人據此絢組尺爲纁藉，不據韋皮衣木板、畫以五采之纁藉也。云「執玉，其有藉者則楊」，據此賈人垂纁以授上介，上介不襲受之時也。云「其無藉者則襲」者，據此上介屈纁以授賓，賓襲受之時也。記人直記楊襲之義，不論盛禮在己之意，故各舉一邊而言也。賓襲，執圭。執圭盛禮，而又盡飾，爲其相蔽敬也。《玉藻》曰：「服之襲也，充美也。是故尸襲，執玉龜襲也。」疏「賓襲執玉」○注「執圭」至「襲也」○釋曰：云「執圭盛禮」者，《玉藻》云「執玉龜襲」，注「重寶瑞也」。若

①「以」，曹校云此字衍。

②「事益至言則信矣故」，阮校云：「陳、閩無。毛本「則」作「益」。」

然，云「盛禮」者，以其圭瑞以行禮，故爲盛禮也。云「又盡飾，爲其相蔽敬也」者，《玉藻》又云「君在則惕，盡飾也」，注云「臣於君所」，今聘賓於主君亦是臣於君所，合惕以盡飾。今既執圭，以瑞爲敬，若又盡飾而惕，則掩蔽玉之敬，故不得惕也。云「服之襲也，充美也」者，彼注云「充猶覆也」。是故尸襲者，爲尸尊，故去飾也不惕。云「執玉龜襲也」者，彼注云「重寶瑞也」，以龜玉爲寶瑞，若惕則盡飾爲蔽敬，故引之證不惕也。擯者入告，出辭玉。擯者，上擯也。人告公以賓執圭，將致其聘命。圭，贊之重者，辭之，亦所以致尊讓也。

**疏**「擯者」至「辭玉」○注「擯者」

至「尊讓」○釋曰：知擯是「上擯」者，案上相禮者皆上擯，故知此亦據上擯。云「圭，贊之重者」，《大宗伯》云「以玉作六瑞」，君之所執；又云「以禽作六贊」，臣之所執。摠而言之，皆是贊，故《左氏傳》云男贊不過玉帛、禽鳥。但君之所執，爲贊之重者也。云「辭之，亦所以致尊讓也」，「致尊讓」，《鄉飲酒義》文。彼爲賓主三辭三讓，是致尊讓，此辭玉亦是致尊讓之事，故引之爲證也。案文公十二年《左氏傳》云秦伯使西乞術來聘，襄仲辭玉，賓對曰「不腆敝器，不足辭也」。彼主人無三辭者，<sup>①</sup>文不具，亦當三辭

也。納賓。賓入門左。公事自闕西。**疏**「納賓賓

入門左」○注「公事自闕西」○釋曰：案《玉藻》云「公事自闕西」，注云「聘享也」。又云「私事自闕東」，注云「覲面也」。故鄭引之，以證此「入門左」是聘享，賓人自闕西，入門左也。介皆入門左，北面，西上。隨賓入也。介無事止於此。今文無「門」。**疏**「介皆」至「西上」○注

「隨賓」至「無門」○釋曰：案《司儀》云「諸公之臣相爲國客，及將幣，每門止一相。及廟，唯君相入」，注云「唯君相入。客，臣也，相不入矣」。此介皆入，不同者，彼云「每門止一相」，鄭云「絕行在後耳」，非是全不入廟。又云「唯君相入」者，謂前相君禮，須入，故言之。臣相不前相禮，故不言人，其實皆入，與此同也。三揖，君與賓也。入門將曲揖，既曲北面又揖，當碑揖。**疏**「三揖」○注「君與」

至「碑揖」○釋曰：前云「公揖入，立于中庭」，三分庭一在南，賓後獨入，得云「入門將曲揖」者，謂公先在庭南面，賓既入門，至碑曲揖賓。既曲，北面，賓又揖主君。揖主君，

<sup>①</sup>「彼主人無三辭者」，曹校云當爲「彼主人三辭，此無三辭者」。

二者皆向賓揖之。<sup>①</sup>再揖訖，亦主君東面向堂塗北行，當碑，乃得賓主相向而揖。是以得君行一，臣行二，非謂賓入門時，主君更向內雷相近而揖。若然，何得云「君行一，臣行二」也。<sup>②</sup>至于階，三讓。讓升。公升二等。先賓升二等，亦欲君行一，臣行二。

**疏**「公升二等」○注「先賓」至「行二」○釋曰：諸侯階有七等，公升二等，在上仍有五等，而得云「君行一，臣行二」者，但君行少，臣行多，大判而言，非謂即君行一，臣行二。此文出《齊語》晏子辭。賓升，西楹西，東面。與主君相鄉。擯者退中庭。鄉公所立處。退者，以公宜親受賓命，不用擯相也。**疏**「擯者退中庭」○注「鄉公」至「相也」○釋曰：上文「公揖入，立于中庭」，今公與賓升堂，云「擯者退中庭」，此文與君立中庭同，故云「鄉公所立處」。賓致命。致其君之命也。公左還，北鄉。當拜。

**疏**「公左還北鄉」○注「當拜」○釋曰：言「左還，北鄉」者，公升受賓致命時西鄉，以左手鄉外，迴身北面乃拜，故云「當拜」。擯者進。進阼階西，釋辭於賓，相公拜也。**疏**「擯者進」○注「進阼」至「拜也」○釋曰：知「阼階西」者，以其擯者在中庭

公立處，直言進，則進至阼階西，不得更向阼階前，亦不可更進西階，故知「進阼階西，釋辭於賓」，復得「相公拜也」。公當楣再拜。拜貺也。貺，惠賜也。楣謂之梁。

**疏**「公當楣再拜」○注「拜貺」至「賜也」○釋曰：拜貺之言，文出《聘義》，彼云「北面拜貺，拜君命之辱」是也。賓三退，負序。三退，三逡遁也。不言辟者，以執圭將進授之。

**疏**「賓三退負序」○注「三退」至「授之」○釋曰：案上文「賓入門，公再拜。賓辟，不荅拜」，又下文云「賓訝受几於筵前，公一拜送，賓以几辟」，皆言「辟」，此不言「辟」，故決之也。案《司儀》云「諸公之臣相爲國客，及將幣，客登，拜，客三辟，授幣」，注云「客三辟，三退，負序也」者，彼諸

<sup>①</sup>「賓既入門」至「主君二者」，阮校云：陳、閩、《通解》作「賓既入門至將曲之時既曲北面之時主君二者」，朱子曰：「疏說蓋印本有差誤。今以文義考之，更定如此。」阮案一本與毛本略同，但改「碑曲」爲「將曲」，「賓又揖主君」爲「賓又向主君」，「揖揖主君二者」，刪「揖」字。  
<sup>②</sup>「賓入門時主君更向內雷相近而揖若然何得云」，阮校云：陳本無此十九字，閩本作「即」。

公之臣相聘之禮，與侯伯之卿聘於鄰國之禮少異故也。

公側襲，受玉于中堂與東楹之間。側猶獨也。

言獨，<sup>①</sup>見其尊賓也。他日公有事，必有贊爲之者。凡襲

于隱者，公序站之間可知也。<sup>②</sup>中堂，南北之中也。入堂

深，尊賓事也。東楹之間，亦以君行一，臣行二。

**疏**「公

側」至「之間」○注「側猶」至「行二」○釋曰：「云他日公有

事，必有贊爲之者」，案《大射》云公卒射，「小臣正贊襲」，

是其贊爲之也。云「凡襲於隱者」，案《士喪禮》小斂，主人

袒于戶內，襲于序東，喪禮遽於事，尚襲於序東，況吉事

乎？明知襲於隱者也。云「公序站之間可也」者，《士喪》

襲于序東，謂於堂東地上，此則公在堂上，堂東南角爲站，

鄭以意斟酌，隱處無過於序東站北可也，<sup>③</sup>無正文，故云

「可也」。云「中堂，南北之中也。入堂深，尊賓事也」者，

凡廟之室堂皆五架，棟南北皆有兩架，棟北一架下有壁開

戶，棟南一架謂之楣，則楣北有二架，楣南有一架。今於

當楣北面拜訖，乃更前北侵半架，於南北之中乃受玉，故

云「南北之中」，乃「入堂深，尊賓事」故也。云「東楹之間，

亦以君行一，臣行二者，兩楹之間爲賓主處中，今乃於東

楹之間，更侵東半間，故云「君行一，臣行二」也。擯者

退，負東塾而立。反其等位，無事。賓降。介逆

出。逆出，由便。賓出。聘事畢。公側授宰玉，

使藏之，授於序端。**疏**「公側授宰玉」○注「使藏」至「序

端」○釋曰：鄭知「授於序端」者，凡公授受，皆於序端，是

以下文「公升，側受几于序端」，故知此亦「授于序端」也。

楊，降立。楊者，免上衣見楊衣。凡當盛禮者，以充美

爲敬，非盛禮者，以見美爲敬，禮尚相變也。《玉藻》曰「裘

之楊也，見美也」，又曰「麕裘青豸裘，絞衣以楊之」。《論

語》曰「素衣麕裘」，皮弁時或素衣，其裘同可知也。裘者

爲溫，表之爲其褻也。寒暑之服，冬則裘，夏則葛。凡禮

楊者左。降立，俟享也，亦於中庭。古文「楊」皆作

「賜」。<sup>④</sup>**疏**「楊降立」○注「楊者」至「作賜」○釋曰：云

「楊者，免上衣見楊衣」者，案《玉藻》云「君衣狐白裘，錦衣

<sup>①</sup>「獨」，阮校云：《要義》作「側」。

<sup>②</sup>「知」，單疏、《要義》述注皆無「知」字。阮校云各本注有「知」字誤也。

<sup>③</sup>「可也」，曹校云此二字衍。

<sup>④</sup>「賜」，阮校引浦鏜云：疑爲「楊」字之誤。

以楊之」，注云：「君衣狐白毛之裘，則以素錦爲衣覆之，使可楊也。袒而有衣曰楊。必覆之者，裘襲也。」《詩》云：「衣錦綱衣，裳錦綱裳。」然則錦衣復有上衣明矣。天子狐白之上衣，皮弁服與？凡楊衣象裘色也。」若然，凡服四時不同，假令冬有裘，觀身禪衫，<sup>①</sup>又有襦袴，襦袴之上有裘，裘上有楊衣，楊衣之上又有上服皮弁，祭服之等。若夏則以絺綌，絺綌之上則有中衣，中衣之上復有上服皮弁，祭服之等。若春秋二時，則衣袷褶，袷褶之上加以中衣，中衣之上加以上服也。言「見楊衣」者，謂袒衿前上服，見楊衣也，故《玉藻》云「裘之楊也，見美也」。襲者奄之，<sup>②</sup>故《玉藻》云「襲，充美」是也。云「凡當盛禮者，以充美爲敬，非盛禮者，以見美爲敬，禮尚相變也」者，《玉藻》云「執龜玉襲」，<sup>③</sup>是禮之盛者，充美爲敬；《玉藻》又云「君在則楊，盡飾也」，是非盛禮者，以見美爲敬。據此二者，是禮尚有相變也。<sup>④</sup>引《玉藻》者，證禮不盛者以楊見美也。又曰「麤裘青紵裘，絞衣以楊之」，引《論語》「素衣麤裘」，又云「皮弁時或素衣，其裘同可知也」，鄭并引二文者，欲見諸侯與其臣視朔與行聘禮皆服麤裘。但君則麤裘還用麤裘，臣則不敢純如君，麤裘則青紵裘。楊衣，君臣亦有異時。若在國視朔，君臣同素衣爲楊，故《鄉黨》云

「素衣麤裘」，彼一篇是孔子行事，鄭兼見君臣視朔之服，<sup>⑤</sup>是其君臣同用素楊可知。若《聘禮》亦君臣同用麤裘，但主君則用素衣爲楊，使臣則用絞衣爲楊，是以鄭摠云「皮弁時或素衣，其裘同可知也」。言「或素衣」者，在國則君臣同素衣，聘時主君亦素衣，唯臣用絞衣爲楊也。依《雜記》云朝服十五升布，<sup>⑥</sup>皮弁亦天子朝服，與諸侯朝服同用十五升布，亦同素積以爲裳，白舄，臣用白屨也。云「裘者爲溫，表之爲襲」者，<sup>⑦</sup>案《月令》云孟冬「天子始裘」，是裘爲溫。云「表之」者，則楊衣是也。楊衣象裘色，復與上服色同也。云「凡檀楊者左」者，吉凶皆袒左是也。是以《士喪禮》主人左袒，《檀弓》云吳季札「左袒，右還其封」，《大射》亦左袒。若受刑則袒右，故《覲禮》侯氏袒右

- ① 「觀身禪衫」，阮校云：毛本「觀」作「禪」，「禪」作「禪」，《通解》作「禪」，敍作「單」。曹校云「禪」字似是。
- ② 「奄」，阮校云：毛本作「掩」，是也。
- ③ 「龜玉」，阮校云：毛本作「玉龜」，與《玉藻》合。
- ④ 「有」，曹校云此字衍。
- ⑤ 「見」，阮校云：毛本作「言」。
- ⑥ 「依」，阮校云：毛本作「案」。
- ⑦ 「爲」下，阮校云：毛本有「其」字。

受刑是也。知「降立，俟享也」者，下文賓行享是也。

儀禮疏卷第二十

江寧府知府陽城張敦仁編校 元和縣  
學生員顧廣圻覆校

## 儀禮疏卷第二十一

唐朝散大夫行大學博士弘

文館學士臣賈公彥等撰

擯者出請。不必賓事之有無。

**疏**「擯者出請」○注

「不必」至「有無」○釋曰：自此盡「以束帛，如享禮」，論享禮之事。賓謁，奉束帛加璧享。擯者入告，出許。許受之。庭實，皮則攝之，毛在內，內攝之，人設也。皮，虎豹之皮。攝之者，右手并執前足，左手并執後足。毛在內，不欲文之豫見也。內攝之者，兩手相鄉也。人設，亦參分庭一在南。言則者，或以馬也。凡君於臣，臣於君，麋鹿皮可也。**疏**「庭實」至「設也」○注「皮虎」至「可也」○釋曰：知皮是虎豹皮者，經云「毛在內，不欲文之豫見」，是有文之皮。《郊特牲》云：「虎豹之皮，示服猛也。束帛加璧，往德也。」文無所屬，則天子、諸侯皆得用之。此聘使爲君行之，故知皮是「虎豹之皮」也。

《齊語》云「桓公知諸侯歸己」，令諸侯「輕其幣」，用麋鹿皮，非其正也。云「攝之者，右手并執前足，左手并執後足」者，下云皮「右首」，故云右手執前兩足。必以一手執兩足者，取兩足相向，得掩毛在內，俱放又得毛向外，故鄭云「內攝之者，兩手相鄉也」。知「人設，參分庭一在南」者，見《昏禮·記》「納徵，執皮攝之，內文，兼執足，左首」。隨入，西上，參分庭一在南，故知此亦然。但此「右首」，彼「左首」者，《昏禮》象生，故與此異也。云「則者，或以馬也」者，以其皮、馬相間，有皮則用皮，無皮則用馬，故云「則」，見其不定故也。云「凡君於臣，臣於君，麋鹿皮可也」者，云「凡君於臣」，謂使者歸，若使卿贈如覲幣，及食饗以侑幣、酬幣、庭實皆有皮，故云「凡」也。「臣於君」，謂私覲庭實設四皮及介用儼皮，此皆有麋鹿皮，<sup>①</sup>故亦云「凡」也。若然，《大宗伯》云「孤執皮帛」，鄭云天子之孤用虎皮，諸侯之孤用豹皮。得用虎豹者，彼所執以爲贊，與庭實不同，故得用虎豹也。<sup>②</sup>賓人門左，揖讓如

①「有」，曹校云當爲「用」。

②「豹」下，毛本有「皮」字。

初，升，致命，張皮。張者，釋外足見文也。**疏**「賓

人」至「張皮」○注「張者」至「文也」○釋曰：案《昏禮·記》

「賓致命，釋外足，見文。主人受幣，士受皮」，注云「賓致

命，主人受幣，庭實所用爲節」，此亦然。下受皮以授幣爲

節也。公再拜，受幣。士受皮者自後，右客。

自，由也。從東方來，由客後西居其左受皮也。執皮者既

授，亦自前西而出。**疏**「公再」至「右客」○注「自由」至

「而出」○釋曰：云「執皮者既授，亦自前西而出」者，此約

下私覲時，牽馬者自前西向出，相類，故云「亦」也。賓

出，當之，坐攝之。象受于賓。**疏**「賓出」至「攝之」

○注「象受于賓」○釋曰：云「坐攝之」者，向張皮見文，今

攝之者還如入時，執前後足，內文也。公側授宰幣，

皮如人，右首而東。如人，左在前。皮右首者，變于

生也。**疏**「公側」至「而東」○注「如人」至「生也」○釋曰：

云「公側授宰幣」者，上云「公側襲」，側猶獨也。此已上側

亦獨，無人贊之也。云「如人，左在前」者，皮四張，三人入

門時，先者北面，在左，西頭爲上。餘取皮向東者，<sup>①</sup>亦左

在前，向東爲次第也。云「皮右首者，變于生也」者，《曲

禮》云「執禽者左首」，《士相見》贊用雉，「左頭奉之」，下大

夫執鴈，上大夫執羔，如執雉，皆左首。雉雖死，以不可生

服，執之如羔，鴈，亦從左首，象陽。今此皮則右首，變於

生。《昏禮》左首，昏禮取象生，與此異也。聘于夫人

用璋，享用琮，如初禮。如公「立于中庭」以下。

若有言，則以束帛，如享禮。有言，有所告請，若

有所問也。記曰：「有故，則束帛加書以將命。」《春秋》臧

孫辰告羅于齊，公子遂如楚乞師，晉侯使韓穿來言汶陽之

田，皆是也。無庭實也。**疏**「若有」至「享禮」○注「有言」

至「實也」○釋曰：云「有言，有所告請，若有所問也」者，言

「有所告」即告羅之類是也，「請」即乞師之類是也，「問」即

言汶陽之田之類是也。鄭據傳而言，有此三事，皆是「有

言」，「有言」即記云「有故」，一也。云「有言」，即有書致

之，故記云「有故，則束帛加書以將命」也。云「《春秋》臧

孫辰告羅」者，事在莊公二十八年也。云「公子遂如楚乞

①「餘」下，曹校云上文「三人」二字當在此，「餘三人」下

當有「以次而東」四字。



師」者，事在僖二十六年也。<sup>①</sup>云「晉侯使韓穿來言汶陽之田」，事在成公八年也。此三者，皆見《春秋經》，引之者，證此「有言」，以束帛加書之事也。云「無庭實也」者，以經直云「束帛，如享禮」，則除束帛之外更無所有，故知「無庭實也」。《國語》云「臧孫辰以鬯圭」者，是告羅之物，服注云「無庭實也」，又哀七年《左傳》云「邾茅夷鴻以乘韋、束帛自請救于吳」，求救非法，故有乘韋爲庭實也。賓者出請事。賓告事畢。公事畢。賓奉束錦以請覲。覲，見也。鄉將公事，是欲交其歡敬也。不用羔，因使而見，非特來。

**疏**「賓者」至「事畢」○注「覲見」

至「特來」○釋曰：自此盡「從者訝受馬」，論賓將私覲，主人不許，而行禮賓之事。云「鄉將公事」者，聘享是也。云「是欲交其歡敬也」者，聘是公禮，非是交歡，此行私禮，爲交歡敬也。案《郊特牲》云「爲人臣者無外交」，鄭注「私覲是外交也」者，彼謂臣爲君介而行私覲，是外交，若特行聘，則得私覲，非外交也。故彼上經云「大夫執圭而使，所以申信也」，注云「其君親來，其臣不敢私見於主國君也。以君命聘，則有私見」是也。云「不用羔，因使而見，非特來」者，謂因爲君聘使而行私見，故用束錦，非特來。若特

來，則卿用羔也。若然，案《士相見》卿初仕，見己君及卿，皆見以羔。見他君得有羔者，案《尚書》有三帛二生，二生卿執羔，大夫執鴈，彼見天子法，從朝君而見，得有羔。若諸侯相朝，其臣從君，亦得執羔見主君可知。其爲君聘，則不得執羔見主君也。故鄭云「因使而見，非特來」。案定公八年經書「公會晉師于瓦」，《左傳》云「范獻子執羔，趙簡子、中行文子皆執鴈」，亦是從君見主君法也。賓者入告，出辭，客有大禮，未有以待之。

**疏**

「賓者入告出

辭」○注「客有」至「待之」○釋曰：云「大禮」者，即上行聘享是也。云「未有以待之」者，謂主人未有以待之，以禮待之，即下「禮賓」是也。故止客私覲，即下文行「禮賓」也。<sup>②</sup>請禮賓。賓禮辭，聽命。賓者入告。

告賓許也。宰夫徹几，改筵。宰夫，又主酒食者也。

將禮賓，徹神几，改神席，更布也。賓席東上。《公食大夫禮》曰「蒲筵常，緇布純，加萑席尋，玄帛純」，此筵上下大夫也。《周禮》曰「筵國賓于牖前，莞筵紛純，加縹席畫純，

<sup>①</sup>「僖」下，阮校云：毛本有「公」字。

<sup>②</sup>「文」下，阮校云：《通解》、毛本有「先」字。

左彤几」者，則是筵孤也。孤彤几，卿大夫其漆几與？

**疏**「宰夫徹几改筵」○注「宰夫」至「几與」○釋曰：云「宰

夫，又主酒食者也」者，對上宰夫設飧，今又主酒食以禮賓

也。云「賓席東上」者，對前爲神而西上也。云《公食大夫

禮》曰蒲筵及萑席，「此筵上下大夫也」者，以《公食》蒲筵、

萑席二者，是爲上下大夫法。又引《周禮》者，鄭欲推出上

下大夫用漆几也。案《司几筵》云「諸侯酢席，莞筵紛純，

加纁席畫純。筵國賓于牖前亦如之。左彤几」，注云「國

賓，諸侯來朝，孤、卿大夫來聘。後言几者，使不蒙如也。

朝者彤几，聘者彤几」。但司几筵是天子之官，几筵又是

諸侯之法。又鄭云「國賓，諸侯來朝，孤、卿大夫來聘」，是

諸侯與朝聘天子法，<sup>①</sup>則孤、卿大夫是諸侯之臣也。以此

言之，則天子孤、卿大夫几筵與諸侯之臣同可知。若然，

《公食大夫》筵上下大夫禮同用蒲筵莞席，與此席不同。

鄭注此「國賓」中卿大夫，得與孤同者，鄭欲廣「國賓」之

義，其實此「國賓」中唯有諸侯與孤，無卿大夫也。鄭必知

卿大夫漆几者，《司几筵》有五几，從上向下序之，天子玉

几，諸侯彤几，孤彤几，卿大夫漆几，下有素几，喪事所用，

差次然也。無正文，故云「與」以疑之。公出，迎賓以

人，揖讓如初。公出迎者，己之禮更端也。**疏**「公

出」至「如初」○注「公出」至「端也」○釋曰：云「公出迎者，

己之禮更端也」者，前聘享俱是公禮，故不出迎，此禮賓私

禮，改更其端序，故公出迎也。公升，側受几于序

端。漆几也。今文無「升」。宰夫內拂几三，奉兩

端以進。內拂几，不欲塵坳尊者。以進，自東箱來授

君。**疏**「宰夫」至「以進」○注「內拂」至「授君」○釋曰：知

几自東箱來者，案《覲禮·記》云「几俟于東箱」，又此經直

云「進」，不言升，明不從下來，從東箱來可知也。公東

南鄉，外拂几三，卒，振袂，中攝之，進，西

鄉。進，就賓也。**疏**「公東」至「西鄉」○釋曰：云「中攝

之」者，<sup>②</sup>擬賓用兩手在公手外取之故也。<sup>③</sup>擯者告。

告賓以公授几。賓進，訝受几于筵前，東面俟。

①「與」，曹校云此字衍。

②「云中攝之者」，阮校云：毛本作「宰夫奉几兩端，故公

中攝之」，《通解》、楊氏同。

③「在」，阮校云：陳、閩俱作「自」。

未設也。今文「訝」爲「梧」。

**疏**「賓進」至「面俟」○注「未

設」至「爲梧」○釋曰：未設而俟者，待公拜送訖，乃設之故也。公壹拜送。公尊也。古文「壹」作「一」。

**疏**「公

壹拜送」○注「公尊」至「作一」○釋曰：賓再拜稽首，公乃壹拜，當空首，故注云「公尊也」。賓以几辟。辟位遠

遁。北面設几，不降，階上荅再拜稽首。不

降，以主人禮未成也。几，賓左几。

**疏**注「不降」至「左

几」○釋曰：云「不降，以主人禮未成」者，案《鄉飲酒義》云

「啐酒，成禮也，於席末」，據此而言，則啐酒爲成禮，此設几主爲啐酒，今未啐醴，故云「禮未成也」。云「凡賓左几」

者，<sup>①</sup>對神右几也。宰夫實觶以醴，加柶于觶，

面枋。酌以授君也。君不自酌，尊也。宰夫亦洗，升，實

觶，以醴自東箱來。不面擲，不訝授也。

**疏**「宰夫」至「面

枋」○注「酌以」至「授也」○釋曰：「宰夫亦洗，升，實觶」

者，經無宰夫升降之文，以理亦之者，亦上授几時從下而

升，東箱取几，進以授君，今又從下升，<sup>②</sup>東箱酌醴，進以

授君，故「亦」之。不言宰夫升降者，賤，略之也。云「以醴

自東箱來」者，下記云「醴尊于東箱」，<sup>③</sup>瓦泰一，有豐」是

也。云「不面擲，不訝授也」者，公西面向賓，宰夫自東箱

來，在公傍側，並授與公，是以下云「公側受醴」，不訝受，故不面擲也。公側受醴。將以飲賓。賓不降，壹

拜，進筵前受醴，復位。公拜送醴。賓壹拜者，

醴質，以少爲貴。**疏**注「賓壹」至「爲貴」○釋曰：《禮器》

云：「禮有以少爲貴者。」今賓於上下皆再拜稽首，獨此一

拜，故鄭據大古之醴質，無玄酒配之，故壹拜，以少爲貴也。宰夫薦籩豆、脯醢。賓升筵。擯者退，

負東塾。事未畢，擯者不退中庭，以有宰夫也。**疏**「宰

夫」至「東塾」○注「事未」至「宰夫」○釋曰：云「事未畢，擯

者不退中庭，以有宰夫也」者，案上文「擯者退中庭」，又云

「擯者進」，事未畢，在中庭可知。此下文亦云「擯者進相幣」，事亦未畢而在東塾，故決之。若然，以有宰夫主，<sup>④</sup>

①「凡」，阮校云：陳、楊俱作「几」。

②「又」，阮校云：陳本作「亦」。

③「醴」，阮校云：毛本作「禮」；又下文「瓦泰一」，「泰」作「大」是也。

④「主」，曹校云當作「在」。

飲食之事，宰夫所主，己雖事未畢，猶得負束塾，以其間有事宰夫相，己無事故也。若無宰夫，在中庭矣。<sup>①</sup>賓祭

脯醢，以柶祭醴三。庭實設。庭實，乘馬。**疏**

注「庭實乘馬」○釋曰：鄭知「乘馬」者，下文元缺起此。「賓

執左馬以出」，故知也。降筵，北面，以柶兼諸觶，

尚擯，坐啐醴。降筵，就階上。**疏**注「降筵就階上」

○釋曰：以左手執觶，右手以柶祭醴訖，降筵北面，以柶兼并於觶，兩手奉之。「尚擯」不作上字者，尚古今通用

也。<sup>②</sup>云「降筵，就階上」者，以《鄉飲酒》賓主行禮，獻酢

卒爵，皆各於其階，此降筵啐醴，明亦在西階之上。公用

束帛。致幣也。言用，尊于下也。亦受之于序端。**疏**

注「致幣」至「序端」○釋曰：上文郊勞，賓用束錦僨勞者，

下文歸饗餼於上介，云「大夫用束帛致之」，皆亦云「用」，

獨於此「言用，尊於下」者，僨勞者及歸饗餼皆是賓敬君之

使者，自尊之可知。今君親用束帛禮賓，故「言用，尊于

下」也。云「亦受之于序端」者，上公側受几於序端，則知

此幣亦受之於序端也。建柶，北面奠于薦束。糟

醴不啐。<sup>③</sup>擯者進相幣。贊以辭。賓降，辭幣。

不敢當公禮也。公降一等辭。辭賓降也。栗階

升，聽命。栗階，趨君命，尚疾，不連步。**疏**注「栗階」

至「連步」○釋曰：凡栗階者，其始升亦連步於上，栗階不

過二等。今云「不連步」者，謂不從下向上皆連步，其始升

連步，則有之也。降拜。拜受。公辭。不降一等，殺

也。**疏**注「不降一等殺也」○釋曰：案前賓辭幣，君降一

等，今不降，故言「殺」。升，再拜稽首，受幣，當東

楹，北面，亦訝受而北面者，禮主於己，己臣也。**疏**注

「亦訝」至「臣也」○釋曰：前行聘享時，賓東面，主君西面

訝授受，但以奉君命，故賓不北面。此以主君禮己，己臣

也，故北面受，異於聘享時也。若然，上受几受醴，亦是己

之禮，以禮未成，故不北面也。此禮成，故北面也。退，

東面俟。俟君拜也。不北面者，謙若不敢當階然。公

壹拜。賓降也。公再拜。不俟公再拜者，不敢當

①「在上」，阮校云：陳、閩、《通解》、楊氏俱有「則」字。

②「尚」下，曹校云當有「上」字。

③「啐」，阮校云：張爾岐曰「啐字誤」。當作「卒」。

公之盛也。公再拜者，事畢成禮也。

**疏**注「不俟」至「禮

也」○釋曰：此賓主俱謙，公本欲再拜，賓見公一拜止，<sup>①</sup>則降不敢當，公不止，遂再拜也。云「公再拜者，事畢成禮也」者，前受几及醴，公送皆一拜，注云「公尊也」，今事畢成禮，不可亦自尊亢，故送幣亦再拜也。賓執左馬以

出。受尊者禮，宜親之也。效馬者，并左右勒授之。餘三馬，主人牽者從出也。**疏**注「受尊」至「出也」○釋曰：

案下歸饗餼於賓，賓饋大夫，庭實設乘馬，賓用束錦、乘馬，「大夫降，執左馬以出」。《覲禮》侯氏至郊，王使人用璧勞訖，「侯氏用束帛，乘馬饋使者」，使者受幣，「降，以左驂出」。二者皆是尊國賓故也。唯上文郊勞，賓饋勞執幣揖皮者，<sup>②</sup>皮是死物，異於馬故也。云「效馬者，并左右勒授之」者，《曲禮》云「效馬效羊者，右牽之」，效猶呈見，故謂牽馬人為效馬者也。云「餘三馬，主人牽者從出也」者，以是主人庭實，出門乃有從者訝受馬，明「主人牽者從出」可知。上介受賓幣，從者訝受馬。從者，士介。

**疏**注「從者，士介」○釋曰：鄭云「從者，士介」，下記文。

案《公食》云「上介受賓幣，從者訝受皮」，鄭注「從者，府史之屬」，不為士者，彼公食是子男之大夫，小聘，一介，其

餘皆府史以下，故知從者是府史之屬也。《既夕》云贈馬兩，「士受馬」，鄭云「此士謂胥、徒之長，有勇力者受馬」。彼據一廟下士，不應更有其屬士，故以為「胥、徒之長」言之也。《昏禮·記》云「士受皮」，鄭注「士謂若中士、下士不命者，以其主人為官長」，據上士而言也。<sup>③</sup>元缺止

此。賓覲，奉束錦，總乘馬，二人贊，入門右，北面奠幣，再拜稽首。不請不辭，鄉時已請也。覲

用束錦，辟享幣也。總者，總八轡牽之。贊者，居馬間扣馬也。入門而右，私事自闌右。奠幣再拜，以臣禮見也。贊者，賈人之屬。介特覲也。**疏**「賓覲」至「稽首」○注

「不請」至「覲也」○釋曰：自此盡「公降立」，論行私覲之事。云「不請不辭，鄉時已請也」者，云不請，賓不請，不辭，主君不辭。所以不辭者，鄉時已請覲，主人辭之，以禮賓，故今不復請，亦不辭之也。云「覲用束錦，辟享幣也」者，以上文享主君用束帛，享夫人用玄纁束帛，以今用束

① 「止」，阮校云：陳、閩、《通解》俱無。

② 「勞」下，曹校云脫「者」字。

③ 「也」，阮校云：《要義》作「之」。

錦，是辟享幣也。云「總者」至「扣馬也」者，賓總八轡，在前牽之，二人贊者各居兩馬間，各用左右手，手扣一匹，故云「在馬間扣馬也」。云「入門而右，私事自闌右」者，《玉藻》云「公事自闌西」，鄭注云「聘享也」。又云「私事自闌東」，注云「覲面也」。此行覲禮，故引之也。云「奠幣再拜，以臣禮見也」者，謂由闌東，介又不從，又自牽馬，又不升堂入幣，<sup>①</sup>皆是以臣禮見也。云「贊者，賈人之屬」者，既行臣禮，不使介從，明贊者是賈人之屬從行者。云「介特覲也」者，主君辭賓，賓入門左，則介五人隨入門西，北面西上，其介五人行覲禮，各自特行，無介從，為特覲也。賓者辭。辭其臣。賓出。事畢。賓者坐取幣，出。有司二人牽馬以從，出門，西面于東塾南。將還之也。贊者有司受馬乃出。凡取幣于庭北面。**疏**注「將還」至「北面」○釋曰：云「贊者有司受馬乃出」者，賓出之時，贊扣馬者未得出，待人受馬乃得出。所以然者，幣可奠之於地，其馬不可散放，故待人受之乃可以出，故云「有司受馬乃出」也。云「凡取幣于庭北面」者，言「凡」非一，此時辭賓，更出取幣，<sup>②</sup>後門右禮訖，又取幣，皆北面，又衆介奠幣，賓者取亦北面，故云「凡」以廣之也。

賓者請受。請以客禮受之。賓禮辭，聽命。賓受其幣，贊者受馬。牽馬右之，入設。庭實先設，客禮也。右之，欲人居馬左，任右手便也。於是牽馬者四人，事得申也。《曲禮》曰：「效馬效羊者，右牽之。」**疏**「牽馬右之人設」○注「庭實」至「牽之」○釋曰：云「庭實先設，客禮也」者，對前入門右時，賓奉束錦，總乘馬，一時入，無先後之別，是臣禮。今此人設，下經乃云「賓奉幣」，是先設庭實，客禮也。云「於是牽馬者四人，事得申也」者，知四人者，若如前贊者二人，則不得云「右之」，既言右之，明人牽一匹，不須賓牽之。事得申，人牽一匹，賓不摠牽是也。引《曲禮》者，欲見牽馬在右，禮之常。彼效馬效羊，謂尊者之物使養之。今來呈見，此取一邊牽之法，義不與彼同也。賓奉幣，入門左。介皆入門左，西上。以客禮入，可從介。**疏**注「以客」至「從介」○釋曰：對入門右行臣禮，不得從介也。公揖讓如初，升。公北面再拜。公再拜者，以其初以臣禮見，新之也。**疏**「公

① 「入」，曹校云當為「授」。

② 「出」，曹校云此字當在「幣」下。

揖「至」再拜」○注「公再拜」至「之也」○釋曰：「臣禮見」，謂初入門右，是以今再拜，新之也。知此不爲拜至者，下記云「禮，不拜至」，鄭注云「以賓不於是始至」。私覲固非始至，而爲再拜，明爲「臣禮見，新之也」。賓三退，反還，負序。反還者，不敢與授主同。

**疏**「賓三」至「負

序」○注「反還」至「主同」○釋曰：云「反還者，不敢與授主同」者，上行聘時「三退，負序」，不言「反還」，故決之也。振幣，進授，當東楹，北面。不言君受，略之也。

**疏**注「不言」至「之也」○釋曰：此決聘享皆言「公受」，此乃私覲，故略之，不言其公受也。①士受馬者自前

還牽者後，適其右，受。自，由也，適牽者之右而受之也。此亦並授者，不自前左，由便也，使其已授而去也。受馬自前，變於受皮。

**疏**「士受」至「右受」○注「自由」至

「受皮」○釋曰：此庭實之馬四匹，在庭北面西上。牽馬者亦四人，各在馬西，以右手執馬而立。士受馬者從東方來，由馬前各適牽馬者之前，還遶其後，適牽馬者之東馬西而受之。牽馬者自前行而出之。云「此亦並授者，不自前左，由便也」者，《鄉飲酒》之等於西階之上皆授由其右，

受由其左，今乃受馬者不自左而由其右受者，使授馬者授訖，右迴其身，於出時爲便，故鄭注云「使其已授而去也」。云「受馬自前，變於受皮」者，上受享庭實之皮，「受皮者自後右客」，鄭注云「自，由也」。從東方來，由客後西居其左受皮也，此亦從東而來，由馬前者，馬是生物，恐驚，故由前，是「變於受皮」也。牽馬者自前西，乃出。自，

由也。**疏**「牽馬」至「乃出」○釋曰：四馬並北面，牽馬者

皆在馬西。士既受馬，其最西頭者便即出門，不須由馬之前，其次東三匹者皆由西於馬前而出，故云「牽馬者自前西乃出」，據三人而言也。賓降階東，拜送。君辭。拜送幣于階東，以君在堂，鄉之。

**疏**「賓降」至「君

辭」○注「拜送」至「鄉之」○釋曰：此言賓「拜送幣」者，私覲已物故也。前享幣不拜送者，致君命，非已物故也。拜也。君降一等辭。君乃辭之，而賓由拜，②敬也。

**疏**注「君乃」至「敬也」○釋曰：經上云「拜送」，而云「君辭」，君辭復云「拜也」，是其君乃辭之，賓由拜者，敬主國

①「其」，曹校云此字衍。

②「由」，阮校云：楊、敖俱作「猶」。

君故也。擯者曰：「寡君從子，雖將拜，起也。」此《禮》固多有辭矣，未有著之者，是其志而煥乎？

未敢明說。

**疏**注「此禮」至「明說」○釋曰：云「此禮固多有辭矣」者，謂此《儀禮》之內，賓主之辭固多有辭矣。但

周公作經，未有顯著明言之者，直云「辭耳」，此及《公食》皆著其辭，此二者是志記之言，煥乎可見。云「未敢明說」者，據此二者觸類而長之，餘辭亦可以意量作，但疑事無質，未可造次明說，故上注每云「其辭未聞」也。栗階

升。公西鄉。賓階上再拜稽首。成拜。公少

退。爲敬。賓降出。公側授宰幣，馬出。廟中

宜清。

**疏**「賓降」至「馬出」○注「廟中宜清」○釋曰：云

「公側授宰幣」，不言出，言「馬出」者，以廟中宜清潔，出就廄。幣不言出，與上皮幣同，皆以東入藏之，故記云「賓之幣唯馬出，其餘皆束」，注云「馬出，當就廄也。餘物皆束，藏之內府」，是幣不出之義也。公降立。擯者出

請，上介奉束錦，士介四人皆奉玉錦束，請覲。玉錦，錦之文織縹者也。禮有以少、文爲貴者。後

言束，辭之便也。

**疏**「公降」至「請覲」○注「玉錦」至「便

也」○釋曰：自此盡「舉皮以束」，論上介、衆介行私覲之事。云「玉錦，錦之文織縹者也」者，案《聘義》孔子論玉

而云「縹密以栗，知也」，是玉有密致，錦之織縹，似玉之密致者。云「禮有以少、文爲貴」者，《禮器》直云「有以文爲貴者，有以少爲貴者」，無「少、文爲貴」之語，但有「以少爲貴」、「以文爲貴」，明亦有以少、文爲貴，故鄭以義而言之也。擯者入告，出許。上介奉幣，僂

皮，二人贊，僂猶兩也。上介用皮，變於賓也。皮，麋

鹿皮。

**疏**注「上介用皮變於賓」○釋曰：賓用馬，今上介

用皮，故云「變於賓也」。皆入門右，東上，奠幣，

皆再拜稽首。皆者，皆衆介也。贊者奠皮出。

**疏**注

「贊者奠皮出」○釋曰：鄭知「贊者奠皮出」者，下云「有司二人舉皮從其幣出」，無人授之，明贊者奠即出可知。

擯者辭。亦辭其臣。介逆出。亦事畢也。擯者

執上幣，士執衆幣，有司二人舉皮從其幣

出，請受。此請受，請于上介也，擯者先即西面位請之。釋辭之時，衆執幣者隨立門中而俟。

**疏**注「此請」

至「而俟」○釋曰：云「此請受，請于上介也」者，對前賓此



請上介，<sup>①</sup>亦不請衆介也。知「擯者先即西面位請之」者，以其上介等先立門西，東面，故擯西面對之。云「釋辭之時，衆執幣者隨元缺起此。立門中而俟」者，<sup>②</sup>以其「請受」之下，經云「委皮南面。執幣者西面」，故知當請之時，立于門中可知。言「隨」者，謂相隨從。故《昏禮·記》云「納徵執皮隨人」，注云「爲門中阨狹」，記云「凡庭實隨人，左先」，明此出時亦隨出而立也。案《匠人》云「廟門容大扁七个」，注「大扁，牛鼎之扁，長三尺」，七个則二丈一尺，闔東明不得並出也。<sup>③</sup>

**委皮南面。**擯者既釋辭，執衆幣者進即位，有司乃得委之。南面，便其復入也。委皮當門。**疏**注「擯者」至「當門」○釋曰：云「擯者既釋辭，執衆幣者進即位，有司乃得委皮」者，以前文云「舉皮者從其幣出」，皮在後可知。隨立門中之時，未得委皮，明執幣者進即位乃得委皮也。云「南面，便其復入也。委皮當門」者，此決執幣者西面，其皮不西面委之者，以皮入右首，右先，故南面橫委於門中，當門，北上，執皮者北面受之，而乃入便故也。

**執幣者西面，北上。擯者請受。**請于上介也。上言其次，此言其位，互約文也。**疏**注「請于」至「文也」○釋曰：上文「擯者執上幣」，注云「請受，請于上

介也」，此雖衆介所請，亦請上介，上介尊故也。云「上言其次，此言其位，互約文也」者，上云「擯者執上幣，士執衆幣，有司二人舉皮從其幣出，請受」，是其次也。此言「委皮南面，執幣者西面，北上」，是其位也。言「互」者，此言「西面，北上」，則上當有「北面，東上」之文，下云士介覲幣時，<sup>④</sup>「士三人東上，坐取幣，立」是也。此宜有「士執衆幣，立於南面」之文，<sup>⑤</sup>如是者，互文也。言「約」者，雖互見其文，文猶不備，若欲備文，當上取歸賓幣之文，<sup>⑥</sup>下取歸士介幣之文，<sup>⑦</sup>以理推約之乃備也。若然，上當言「擯者執幣士四人，北面，東上，坐取幣。從有司二人坐舉皮，從其幣出，隨立於門中。擯者出門西面，于東塾南請受。士執幣者進，立擯南，西面，北上。執皮者南面，委皮於門

- ①「賓此」，阮校云：毛本作「擯出」，陳、閩「此」俱作「者」。曹校云「賓」上似脫「請」字。
- ②「隨」原作「臨」，按阮校據毛本改。
- ③「闔東」下，阮校引朱子云「闔東」下當有脫字。
- ④曹校云「云」當爲「文」，「幣」衍字。
- ⑤「南面」，曹校云似當爲「擯南」。
- ⑥「上取」二字，阮校云：陳、閩俱無。
- ⑦「取」，阮校云：陳、閩俱無。

中，北上」，如是乃爲文備也。介禮辭，聽命，皆進，訝受其幣。此言皆訝受者，嫌擯者一一授之。**疏**注

「此言」至「授之」○釋曰：「此言皆訝受者，嫌擯者一一授之」者，案上受享皮及賓私覲之馬，並不云「皆」，此獨云「皆」者，嫌擯者獨請上介，請先授上介幣，<sup>①</sup>故言「皆」，明不一一授，同時訝受可知也。享幣無門外授先後之法，故不言「皆」。上介奉幣，皮先，入門左，奠皮。皮先者，介隨執皮者而人也。入門左，介至揖位而立。執皮者奠皮，以有不敢授之義。古文重「人」。**疏**注「皮先」至「重人」○釋曰：云「介至揖位而立」者，謂賓覲時，「幣入門左」，<sup>②</sup>介皆入門左，西上。公揖讓如初，升，賓至此待揖而後進，明此介亦至揖位而立。云「執皮者奠皮，以有不敢授之義」者，案享時庭實使人執之，昏禮庭實亦使人執之，亦皆東，不奠於地，以其得親授主人有司，此奠之不敢授，故下「二人坐舉皮」，<sup>③</sup>明不授也。公再拜。拜中庭也。不受于堂，介賤也。**疏**注「拜中」至「賤也」○釋曰：

知「拜中庭」者，上云公「降立」，不見更有進退之文，自受享以來，降立皆在中庭，故知此公拜亦中庭可知也。介

振幣，自皮西進，北面授幣，退，復位，再拜稽首送幣。進者北行，參分庭一而東行，當君乃復北行也。**疏**注「進者」至「行元缺止此」也○釋曰：介初在揖

位，君在中庭，奠皮近西，故介發揖位，經皮西，北出三分一乃東行，<sup>④</sup>北向當君乃北行，至君所乃授幣，故云「自皮西進，北面授幣」也。介出，宰自公左受幣。不側

授，介禮輕。**疏**「介出」至「受幣」○注「不側授介禮輕」○

釋曰：案賓覲禮云「側授宰幣」，此不云「側授」，故云「介禮輕」。「宰自公左受」，即是側，不云「側」者，當有贊者於公受，轉授宰，故云「介禮輕」也。有司二人坐，舉皮以東。擯者又納士介。納者，出道人也。**疏**「擯

者又納士介」○注「納者，出道人也」○釋曰：自此盡「序從之」，論士介行私覲之事。云「納者，出道人也」者，謂若《燕禮》、《大射》小臣納卿大夫，出道人之也。士介人

①「請」，曹校云此字衍。

②「幣」上，曹校云脫「奉」字。

③「二人」，阮校云：《要義》作「云」。按當作「云二人」。

④「一」上，曹校云脫「庭」字。

門右，奠幣，再拜稽首。終不敢以客禮見。

**疏**注

「終不」至「禮見」○釋曰：上介奠幣訖，辭之，終以客禮，<sup>①</sup>是士介卑，奠幣出，私覲即了，終不敢以客禮見也。擯者

辭。介逆出。擯者執上幣以出，禮請受。

賓固辭。禮請受者，一請受而聽之也。<sup>②</sup>賓爲之辭，士

介賤，不敢以言通於主君也。固，衍字，當如面大夫也。

**疏**「擯者」至「固辭」○注「禮請」至「大夫也」○釋曰：知

「固，衍字，當如面大夫」者，案下士介面大夫時，「擯者執上幣出，禮請受。賓辭」，無「固」字，故知此「固」衍字，當

如士介面大夫。公荅再拜。擯者出，立于門中

以相拜。擯者以賓辭入告，還立門中，闕外，西面。公

乃遙荅拜也。相者贊告之。**疏**注「擯者」至「告之」○釋

曰：鄭知擯「立門中，闕外，西面」者，以公在內，賓在門外之西，東面，擯者兩處相之，明居「闕外，西面」，向賓告之也。士介皆辟。辟於其東面位，遂遁也。士三人

東上，坐取幣，立。俟擯者執上幣來也。**疏**「士三

至「幣立」○注「俟擯」至「來也」○釋曰：上文擯者執上幣以出，賓辭之，士介皆辟之，乃云士三人「取幣，立」，擯者

執上幣始來，明士三人立俟之可知也。擯者進。就公

所也。**疏**「擯者進」○注「就公所也」○釋曰：以公在庭，

故擯者自門外來，進向公左，授幣與宰也。宰夫受幣

于中庭，以東。使宰夫受于士，士介幣輕也，受之于

公左。賓幣公側授宰，上介幣宰受于公左，士介幣宰夫受

于士，敬之差。**疏**注「使宰」至「之差」○釋曰：云「使宰夫

受于士」者，以上文「士三人」取幣，明此宰夫所受，「受於

士」也。知「受之於公左」者，《禮記·少儀》云「贊幣自

左」，是以凡受幣皆於公左也。云「賓幣公側授宰」者，即

上文「公側授宰幣」于序端是也。云「上介幣宰受於公左」

者，即上云庭中「宰自公左受之」是也。<sup>③</sup>云「士介幣宰夫

受于士」者，即經文是也。在公左受之，是尊卑不同，敬之

差也。元缺一字。所受之雖不同，<sup>④</sup>及其以東其藏并是宰

①「禮」下，曹校云當有「見」字。

②「受」，阮校云：楊本無。

③「云」，曹校云當爲「文」。

④「之」下，曹校云脫「人」字。

夫，<sup>①</sup>宰夫幣所主故也。執幣者序從之。序從者，以

宰夫當一一受之。擯者出請。賓告事畢。賓既告

事畢，衆介逆道賓而出也。

**疏**「擯者」至「事畢」○注「賓

既」至「出也」○釋曰：自此盡「不顧」，論事畢送賓之事。

云「衆介逆道賓而出也」者，介爲首，賓爲尾，謂逆道也。<sup>②</sup>

必知有逆出者，上文聘訖云「賓降，介逆出」，又聘夫人、私

覲亦介逆出，諸聘禮之等皆逆出，<sup>③</sup>故知此亦逆出可知

也。擯者入告，公出送賓。公出，衆擯亦逆道。紹

擯及賓並行，間亦六步。及大門內，公問君。鄉以

公禮將事，無由問也。賓至始入門之位，北面，將揖而出，

衆介亦在其右，少退，西上。於此可以問君居處何如，序

殷勤也。時承擯紹擯，亦於門東，北面，東上。上擯往來

傳君命，南面。蘧伯玉使人於孔子，孔子問曰「夫子何

爲」，此公問君之類也。

**疏**「及大」至「問君」○注「鄉以」

至「類也」○釋曰：云「衆介亦在其右，少退，西上」者，案上

賓初「入門左」，鄭注云「由賓位也」。衆介隨入，北面，西

上，少退，今賓出至入門之位，將北面拜君而後出，故知

其位亦當初入門之位，此位前後皆約聘享入廟北面西上

之位也。云「時承擯紹擯，亦於門東，北面，東上。上擯往

來傳君命」者，亦約常朝入門門東北面東上之揖位。上擯

往來相君，自是其常。引《論語》者，彼雖非聘，亦是大夫

使人往來法，問「夫子何爲」，亦是問君之類，故云「之類」

也。賓對，公再拜。拜其無恙。公拜，賓亦辟。**疏**

注「拜其」至「亦辟」○釋曰：案《爾雅·釋言》：「恙，憂

也。」言「亦」者，亦初迎賓入門，主君拜，賓辟，故云「亦」

也。公問大夫，賓對。公勞賓，賓再拜稽首，

公荅拜。勞以道路之勤。公勞介，介皆再拜稽

首，公荅拜。賓出，公再拜送，賓不顧。公既

拜，客趨辟君命。上擯送賓出，反告賓不顧，於此君可以

反路寢矣。《論語》說孔子之行曰：「君召使擯，色勃如也，

足躩如也。賓退，必復命曰：賓不顧矣。」**疏**「公勞」至「不

顧」○注「公既」至「顧矣」○釋曰：云「賓不顧」，據上擯送

賓，復迴，謂君云「賓不顧」矣，故引孔子事爲證。若然，此

送賓是上擯，則卿爲上擯。孔子爲下大夫，得爲上擯者，

送賓是上擯，則卿爲上擯。孔子爲下大夫，得爲上擯者，

① 「其藏」，曹校云「其」字衍。

② 「謂」，曹校云當作「爲」。

③ 「等」，曹校云當爲「事」。

以孔子有德，君命使攝上擯，若定十年夾谷之會，令孔子爲相同也。賓請有事於大夫。請問，問卿也。不言問聘，聘亦問也，嫌近君也。上擯送賓出，賓東面而請之，擯者反命，因告之。

**疏**「賓請」至「大夫」○注「請問」至「告之」○釋曰：自此盡「亦如之」，論賓請問大夫訖，即館，卿大夫勞賓、介之事。云「不言問聘，聘亦問也，嫌近君也」者，對文大聘曰聘，小聘曰問，摠而言之，問聘一也，不得云問卿，若言問近君矣，故云「有事于大夫」也。鄭云「擯者反命，因告之」者，但從朝以來，行聘享，行禮賓之事，事已煩矣，今日即請，未可即行，故云「反命，因告之」，告之使知而已。是以賓至館行勞賓、介，及受饗餼，終日有事，明日乃行問卿之禮也。賓所請問卿，宜云「有事于某子」，故下記云「幣之所及皆勞」，鄭云「所以知及不及者，賓請有事，固曰某子某子」是也。公禮辭，許。禮辭，一辭。賓即館。小休息也。即，就也。

**疏**「賓即

館」○注「小休息也」○釋曰：言「休息」者，據此一日之間，

其事多矣，明且行問卿，暫時止息，故云「小休息也」。卿

大夫勞賓。賓不見。以己公事未行。上介以賓辭

辭之。

**疏**注「以己」至「辭之」○釋曰：「以己公事未行」者，其聘享公事已行，仍有問大夫之等公事未行，故不敢見。云「上介以賓辭辭之」者，以經云「賓不見」，明「上介以賓辭辭之」可知，是以下言「上介受」，明此上介辭也。

大夫奠鴈，再拜。上介受。不言卿，卿與大夫同執鴈，下見于國君。《周禮》凡諸侯之卿見朝君，皆執羔。

**疏**「大夫」至「介受」○注「不言」至「執羔」○釋曰：云《周禮》者，案《周禮·秋官·掌客》云：「凡諸侯之禮，上公五積，卿皆見以羔，侯伯四積，卿皆見以羔。」是主國之卿見朝君，皆執羔。引之證主國卿見聘客，不得執羔，與大夫同用鴈，不見朝君故也。勞上介，亦如之。君使

卿韋弁，歸饗餼五牢。變皮弁服韋弁，敬也。韋

弁，韠韋之弁，兵服也。而服之者，皮、韋同類，取相近耳。

其服蓋韠布以爲衣而素裳。牲殺曰饗，生曰餼。今文

「歸」或爲「饋」。

**疏**「君使」至「五牢」○注「變皮」至「爲饋」○釋曰：自此盡「無償」，論主君使卿歸饗餼於賓介

① 「聘」，阮校引盧文弨云此字疑衍。

② 「償」，阮校云：陳、閩俱作「擯」。

之事。云「變皮弁服韋弁，敬也」者，案《周禮·春官·司服》王之吉服有九，祭服之下，先云「兵事，韋弁服」，後云「視朝，皮弁服」，則韋弁尊於皮弁。今行聘享之事等皆皮弁，至歸饗餼則韋弁，故云「敬也」。云「韋弁，韋之弁，兵服也」者，鄭知弁用韋者，案《司服》注鄭引《春秋傳》曰「晉郤至衣韋之跗注」，又云「今時五伯緹衣，古兵服之遺色」，故知用韋也。韋即赤色，以赤韋爲弁也。云「兵服」者，《司服》云「凡兵事，韋弁服」，故云「兵服也」。云「服之者，皮，韋同類，取相近耳」者，有毛則曰皮，去毛熟治則曰韋，本是一物，有毛無毛爲異，故云「取相近耳」。云「其服蓋韋布以爲衣而素裳」者，此無正文，但正服則鄭注《司服》云「韋弁以韋爲弁，又以爲衣裳」，又「晉郤至衣韋之跗注」，《鄭志》解此「跗注」以跗爲幅，以注爲屬，謂制韋如布帛之幅，而連屬爲衣及裳。今此鄭云「以韋布爲衣而素裳」，全與兵服異者，鄭以意量之，此爲賓館於大夫士之廟，<sup>①</sup>既爲人廟之服，不可純如兵服，故爲韋布爲衣而素裳。《鄭志》兵服，以其與皮弁同白鳥，故以素裳解之，此言素裳，又與《鄭志》同。若然，唯變其衣耳。以無正文，故云「蓋」以疑之也。云「殺曰饗，生曰餼」者，《周禮》有內饗、外饗，皆掌割烹之事。《詩》云「有母之尸饗」，

故知「殺曰饗」。「生曰餼」者，以其對饗是腥飪，故知餼是生，故下云「餼二牢」，皆活陳之也。上介請事。賓朝服，禮辭。朝服，示不受也。受之當以尊服。

**疏**

「上介」至「禮辭」○注「朝服」至「尊服」○釋曰：鄭知義然者，案下云「賓皮弁迎大夫」，是受之用皮弁爲尊服，明此著朝服，朝服卑於皮弁，是示不受。言「示不受」，終受之也。有司入陳。入賓所館之席，陳其積。

**疏**

「有司入

陳」○注「入賓」至「其積」○釋曰：案上文直云「致館」及「即館」，不辨廟與正客館之名。案下記云「卿館於大夫，大夫館於士」，皆是大夫、士之廟。下文又云「揖，入，及廟」，鄭據此而言，明陳之於廟也。《曾子問》孔子云「自卿大夫、士之家曰私館」，即卿大夫、士之廟，一也。孔子又云「公館，與公所爲曰公館」，鄭注云「公館，若今縣官宮也」，彼是正客館。彼此兩言之者，若朝聘使少，則皆於正客館；若使多，則有在大夫廟，<sup>②</sup>多少不定，兩言之也。案《大行人》及《掌客》積與饗餼各別，此注以饗餼爲「陳其

① 「爲賓」，阮校云：「陳、閩俱作『賓而』」。

② 「有」，阮校云：「陳、閩俱作『自』」。

積」者，對文饗餼與積別，散文摠是委積，故云「積」也。饗：謂飪與腥。**疏**「饗」○注「謂飪與腥」○釋曰：知者，

上摠言「饗餼五牢」，下陳有三處。據此「饗」下云「飪一牢」、「腥二牢」，下又別云「餼二牢」，故知饗別飪、腥二者也。若然，飪與腥共以饗目之者，以其同是死，列之以鼎故也。飪一牢，鼎九，設于西階前。陪鼎當內廉，東面，北上，上當碑，南陳。牛、羊、豕、魚、腊，腸胃同鼎，膚、鮮魚、鮮腊，設扃。臠、臠、臠、臠，蓋，陪牛、羊、豕。陪鼎三牲，臠、臠、臠、臠陪之，庶羞加也。當內廉，辟堂塗也。腸胃次腊，以其出牛、羊也。膚，豕肉也，唯燂者有膚。此饌先陳其位，後言其次，重大禮，詳其事也。宮必有碑，所以識日景，引陰陽也。<sup>①</sup>凡碑引物者，宗廟則麗牲焉，以取毛血。其材宮廟以石，寔用木。**疏**注「陪鼎」至「用木」○釋

曰：案《公食大夫》庶羞也，以非正饌，故在正鼎後而言加也。云「當內廉，辟堂塗也」者，正鼎九，雖大判繼階而言，其云于階前，則階東稍遠，故陪鼎猶當內廉也，而辟堂塗，堂塗之內也。云「腸胃次腊，以其出牛、羊也」，鄭言此者，以其膚是豕肉，腸胃是腹內之物，而在肉前者，以其腸胃

出於牛、羊，故在膚前列之也。云「膚，豕肉也，唯燂者有膚」者，君子不食圉腴，犬、豕曰圉。若然，牛、羊有腸胃而無膚，豕則有膚而無腸胃也。且豕則有膚，豚則無膚，故《士喪禮》豚皆無膚，以其皮薄故也。縱豕以四解亦無膚，<sup>②</sup>故《既夕》大遣奠少牢無膚，以其豚解故也。云「此饌先陳其位，後言其次，重大禮，詳其事也」者，先陳其位者，「南陳」已上是也；「後言其次」者，「牛、羊、豕」已下是也。案設飧時直云「飪一牢，在西，鼎九，羞鼎三，腥一牢在東，鼎七」，直言西九東七，不言次陳位，飧是小禮，輕之故也。云「宮必有碑，所以識日景，引陰陽也」者，言「宮必有碑」者，案諸經云「三揖」者，鄭注皆云「入門，將曲揖，既北面，<sup>③</sup>揖，當碑，揖」。若然，《士昏》及此《聘禮》是大夫、士廟，內皆有碑矣。《鄉飲酒》、《鄉射》言「三揖」，則庠、序之內亦有碑矣。《祭義》云「君牽牲，麗于碑」，則諸侯廟內有碑明矣。天子廟及庠、序有碑可知。但生人寢內，不見有碑。雖無文，兩君相朝，燕在寢，豈不三揖乎？明亦當

①「引」，阮校朱子曰：「引」疑當作「別」。

②「縱」上，阮校云：陳、閩有「故」字。

③「既」下，阮校云毛本有「曲」字，曹校云有者是。

有碑矣。言「所以識日景」者，《周禮·匠人》云「爲規識日出之景與日入之景」者，自是正東西南北，此識日景，唯可觀碑景邪正，以知日之早晚也。又云「引陰陽」者，又觀碑景南北長短，十一月日南至，景南北最長，陰盛也；五月日北至，景南北最短，陽盛也。二至之間，景之盈縮，陰陽進退可知。云「凡碑引物者，宗廟則麗牲焉，以取毛血」者，云「凡碑引物」，則識日景、引陰陽皆是引物，則宗廟之中是引物。<sup>①</sup>但廟碑又有「麗牲」，麗，繫也。案《祭義》云「君牽牲，麗于碑」，以其鸞刀以取血毛，毛以告純，血以告殺，兼爲此事也。云「其材宮廟以石，窆用木」者，此雖無正文，以義言之。葬碑取縣繩緯，暫時之間，往來運載，當用木而已。其宮廟之碑，取其妙好，又須久長，用石爲之，理勝於木，故云「宮廟以石，窆用木」也。是以《檀弓》云「公室視豐碑，三家視桓楹」，時魯與大夫皆僭，言「視桓楹」，桓楹宮廟兩楹之柱，是葬用木之驗也。腥二牢，鼎二七，無鮮魚、鮮腊，設于阼階前，西面，南陳，如飭鼎，二列。有腥者，<sup>②</sup>所以優賓也。

**疏**

「腥二」至「二列」○注「有腥」至「賓也」○釋曰：云「優賓」者，案下文士四人皆饌大牢，無腥，是不優之也。堂上

八豆，設于户西，西陳，皆二以並，東上。韭菹，其南醯醢，屈。户，室户也。東上，變于親食賓也。醢醢，汁也。屈猶錯也。今文「並」皆爲「併」。

**疏**

「堂上」至「醢屈」○注「户室」至「爲併」○釋曰：云「設于户西，西陳，皆二以並，東上，韭菹，其南醢醢，屈」者，謂其南東上醢醢，<sup>③</sup>醢醢西昌本，昌本西麋臠，麋臠西菁菹，菁菹北鹿臠，鹿臠東葵菹，葵菹東蜩醢，蜩醢東韭菹。案《周禮·天官·醢人》朝事之豆有八，韭菹、醢醢、昌本、麋臠、菁菹、鹿臠、荂菹、麇臠；饋食之豆葵菹、羸醢。此經直云「韭菹、醢醢，屈」，知此昌本以下八豆者，案《公食》下大夫六豆，韭菹、醢醢、昌本、麋臠、菁菹、鹿臠，又云「上大夫八豆」，鄭注云「記公食上大夫，異於下大夫之數，豆加葵菹、蜩醢」，以充八豆。若然，案朝事八豆菁菹、鹿臠下仍有荂菹、麇臠不取，而取饋食葵菹、蜩醢者，案《少牢》正祭用韭菹、醢醢、葵菹、蜩醢，朝事、饋食之豆

①

「是」上，曹校云脫「亦」字。

②

「腥」原作「腊」，據毛本改。

③

「南」，阮校云：毛本無。



兼用之，明此賓上大夫亦兼用朝事、饋食之豆，以充八豆可知。云「東上者，變於親食賓也」者，案《公食大夫》「公親食賓，云「宰夫自東房薦豆六，設于醬東，西上」，此云「東上」，是「變於親食賓也」。云「屈猶錯也」者，猶下經錯黍，<sup>①</sup>此經菹菹不自相當，<sup>②</sup>皆交錯陳之，故云錯也。

**八簋繼之，黍，其南稷，錯。**黍在北。**疏**「八簋」

至「稷錯」○注「黍在北」○釋曰：云「繼」者，繼八豆以西陳之。云「八簋」者，此陳之次第與八豆同，故鄭云「屈猶錯也」。八豆言「屈」，八簋言「錯」者，以八豆之實各別，直次第屈陳之，則得相變，故云「屈」也。八簋唯有黍、稷二種，雖屈陳之，則閒雜錯陳之，使當行黍、稷閒錯，不得並陳設，亦相變，故鄭下注「凡饌屈錯，要相變」是也。**六鉶繼之，牛以西羊、豕，豕南牛，以東羊、豕。**鉶，羹器也。**疏**「六鉶」至「羊豕」○注「鉶羹器也」○釋

曰：此不言絳、屈、錯者，絳文自具，故不言之也。案此文上下絳、屈、錯似各別，鄭此注「屈猶錯」，《士喪禮》「陳衣於房中，南領，西上，絳」，注云「絳猶屈」，又似不別者，云絳、屈二者，下手陳之，少異。屈者句而屈陳之，絳者直屈陳之，不為句陳，訖則相似，故注《士喪禮》云「絳猶屈」。

言錯者，閒雜而陳之，與絳、屈同。或句屈陳而錯，此文是也。或絳陳如錯，《公食大夫》是也。故《公食大夫》云「宰夫設黍、稷六簋于俎西，二以並，東北上。黍當牛俎，其西稷，錯以終，南陳」，是其直絳錯之也。**兩簋繼之，梁在北。**簋不次簋者，梁稻加也。凡饌屈錯，要相變。**疏**

注「凡饌」至「相變」○釋曰：凡豆及簋之數皆耦，兩自相對，而陳之屈、錯不相對者，欲使陳設者其要殺各得相變，<sup>③</sup>不使相當。其六鉶絳者，牛及豕二者相變，羊豕相當，<sup>④</sup>不相變。以其大牢牛、羊、豕不耦，故羊豕不得變也。<sup>⑤</sup>**八壺設于西序，北上，二以並，南陳。**

壺，酒尊也。酒蓋稻酒、梁酒。不錯者，酒不以雜錯為味。**疏**「八壺」至「南陳」○注「壺酒」至「為味」○釋曰：鄭云「蓋稻酒、梁酒也」者，以下夫人歸禮，醖、黍、清各兩壺，此中若有黍，不得各二壺，若三者各二壺，則止有六

①「黍」下，曹校云脫「其南稷」三字。

②下「菹」字，阮校云毛本作「醢」，曹校云毛本是。

③「殺」，曹校云此字衍。

④「豕」，曹校云當為「自」。

⑤「豕」，曹校云此字衍。

壺，與夫人歸禮同。又不得各三壺，若三者各三壺，則九壺，不合八數。止有稻、梁，無正文，故云「蓋」以疑之。鄭知不直有稻、黍而為稻、梁者，稻、梁是加，相對之物，故為稻、梁也。此陳饗餼，堂上及東西夾簋有二十，簠六。上文設飧時，與此堂上及西夾其對，則簋十四，簠四。案《掌客》設飧，公侯伯子男簋同十二，公簠十，侯伯簠八，子男簠六，又皆陳饗餼，其死牢加飧之陳。如何此中飧之簋數及饗餼之簋數皆多於君者？彼是君禮，自上下為差，此乃臣禮，或多或少，自是一法，不可以彼相並。又此中致饗餼於賓，醢醢百甕，米百筥，《周禮》上公甕、筥百二十，侯伯甕、筥百，子男甕、筥八十，子男少於此卿大夫禮，禮或損之而益，此其類也。西夾六豆，設于西墉下，北上。韭菹，其東醢醢，屈。六簋繼之，黍，其東稷，錯。四鉶繼之，牛以南羊，羊東豕，豕以北牛。兩簠繼之，梁在西。皆二以並，南陳。六壺，西上，二以並，東陳。東陳，在北墉下，統於豆。

**疏**「西夾」至

「東陳」○釋曰：六豆者先設韭菹，其東醢醢，又其東昌本，南麋臠，麋臠西菁菹，又西鹿臠，此陳還取朝事之

豆。其六簋、四鉶、兩簠，①六壺東陳，其次可知，義復與前同也。

儀禮疏卷第二十一元缺第四葉、第八葉，今補。

江寧府知府陽城張敦仁編校 元和縣  
學生員顧廣圻覆校

①「簠」下，曹校云脫「南陳」二字。

## 儀禮疏卷第二十二

唐朝散大夫行大學博士弘

文館學士臣賈公彥等撰

饌于東方，亦如之，東方，東夾室。西北上。亦

韭菹，其東醯醢也。

**疏**「饌于」至「北上」○釋曰：云「西北

上」者，則於東壁下南陳，西北有韭菹，東有醯醢，次昌本，次南麋臠，次西有菁菹，次北有鹿臠，<sup>①</sup>亦屈錯也。上西夾饌六豆，直言「北上」，不云「西北上」，此東夾獨云「西北上」者，以其西夾言「北上」，「其東醯醢」，是「西北上」可知。此東夾饌若不言「西北上」，恐東夾饌從東壁南陳，以東北爲上，其西有醯醢，與西夾相對陳之，故云「西北上」。見雖東夾，其陳亦與西夾同，是以鄭云「亦韭菹，其東醯醢也」。壺東上，西陳。亦在北墉下，統於豆。醯醢百饗，夾碑，十以爲列。醢在東。夾碑，在鼎之中央也。醢在東，醢，穀，陽也；醢，肉，陰也。

**疏**「醢醢」

至「在東」○注「夾碑」至「陰也」○釋曰：案《既夕禮》云「甕三：醢、醢、屑」，鄭注云「甕，瓦器，其容亦蓋一穀」。《瓶人》云「簋實一穀」，又云「豆實三而成穀」，四升曰豆，則甕與簋同受斗二升也。《禮器》云「五獻之尊，門外缶，門內壺，君尊瓦甗」，注云「壺大一石，瓦甗五斗」，即此壺大一石也。云「夾碑，在鼎之中央也」者，上陳鼎云「西階前，陪鼎當內廉，東面，北上，上當碑，南陳」，下腥鼎亦如之，此言「夾碑」，自然在鼎之中央可知。云「醢在東，醢，穀，陽也；醢，肉，陰也」者，醢是釀穀爲之，酒之類，在人消散，故云「陽」；醢是釀肉爲之，在人沈重，故云「陰」也。《大宗伯》云「天產作陰德，地產作陽德」，注云「天產，六牲之屬；地產，九穀之屬」，以六牲爲陽，九穀爲陰，與此醢是穀物爲陽違者，物各有所對，六牲動物，行蟲也，故九穀爲陰。《郊特牲》云：「鼎俎奇而籩豆偶，陰陽之義也。」又以籩豆醢醢等爲陰，鼎俎肉物摠爲陽者，亦各有所對，以鼎俎之實以骨爲主，故爲陽，籩豆穀物，故爲陰也。《有司徹》注又以庶羞爲陽，內羞爲陰者，亦羞中自相對。內羞雖有糝

①「北」，曹校云當爲「西」。

食，是肉物，其中有糗餌粉飧食物，<sup>①</sup>故爲陰。庶羞肉物，故爲陽也。餼二牢，陳于門西，北面，東上。牛以西羊、豕，豕西牛、羊、豕。餼，生也。牛、羊，右手牽之。豕束之，寢右，亦居其左。

**疏**「餼二」至

「羊豕」○注「餼生」至「其左」○釋曰：先言饗，後言餼者，陳者先以孰爲主，是以先陳饗，饗下即陳孰物繼之，故六豆以下相次。此餼是生物，其下次陳芻薪、米禾之等相繼也。云「牛、羊右手牽之」者，《曲禮》云「效馬效羊者，右牽之」，以不噬齧人，用右手便也。言「右手牽之」，則人居其左也。云「豕束之，寢右，亦居其左」者，豕束縛其足，亦北首，寢卧其右，亦人居其左。案《特牲》云「牲在其西，北首，東足」，鄭注云「東足者，尚右也」，與此不同者，彼祭禮法用右胖，故寢左，上右。《士虞·記》云「陳牲于廟門外，北首，西上，寢右」，鄭注「寢右者，當升左胖也」，變吉，故與此生人同也。米百筥，筥半斛，設于中庭，十以爲列，北上。黍、粱、稻皆二行，稷四行。庭實固當庭中，言當中庭者，南北之中也。東西爲列，列當醢醢南，亦相變也。此言中庭，則設碑近如堂深也。

**疏**「米百」至「四行」○注「庭實」至「深也」○釋曰：云「庭

實固當庭中，言當中庭者，南北之中也」者，上享時直言庭實「入設」，不言「中庭」，則在東西之中，其南北三分庭一在南。此更言「中庭」，欲明南北之中也。上文公「立於中庭」，宰「受幣於中庭」，皆南北之中也。知北上東西爲行者，以經云「北上」。黍、粱、稻皆兩行，稷四行，若南北縱陳，止得言東西，不得言北上。何者？以黍、粱、稻及稷當行皆一種，<sup>②</sup>無上下故也，明橫陳可知。黍兩行在北，次粱兩行，次稻兩行，次南稷四行。所以不用稻爲上者，稻、粱是加，黍、稷是正，故黍爲上端，稷爲下端，以見上下，而稻、粱居其間。「亦相變」者，亦上絳、屈、錯之義。云「此言中庭，則設碑近如堂深也」者，陳鼎上當其碑，南向陳之，醢醢夾碑，在鼎中央，亦南向陳之。今米爲筥在醢醢之南北之中，<sup>③</sup>則碑近北可知。言「堂深」者，猶若設洗「南北以堂深」相似。若然，碑東當洗矣。門外，米三十車。車秉有五簋，設于門東，爲三列，

①「食」，曹校云似當爲「穀」。

②「當」，阮校云：毛本作「每」。

③曹校云「爲」字衍，「南」字當重。

東陳。大夫之禮，米、禾皆視死牢。秉、斂，數名也。秉有五斂，二十四斛也。斂讀若不數之數，今文「斂」或爲「逾」。

**疏**門外「至東陳」○注「大夫」至「爲逾」○釋曰：

云「大夫之禮，米、禾皆視死牢」者，上文飪一牢，腥二牢，是三牢死，故米三十車，并下禾三十車，亦是視死牢也。云「秉、斂，數名也。秉有五斂，二十四斛也」者，下記云：

「十斗曰斛，十六斗曰斂，十斂曰秉」。若然，一秉十六斛，又有五斂爲八斛，摠二十四斛也。云「斂讀若不數之數」

者，鄭君時以斂爲數名，數名有數有不數，故云「不數之數」。此從音讀，其字仍竹下爲之，得爲十六斗爲斂，故下記注云「今江、淮之間量名有爲斂者」，是十六斗量器之名。禾三十車，車三秬，設于門西，西陳。秬，

數名也。三秬，千二百秉。

**疏**注「秬數」至「百秉」○釋

曰：下記云：「四秉曰筥，十筥曰稷，十稷曰秬，四百秉爲一秬。」三四十二，爲千二百秉也。薪芻倍禾。倍禾

者，以其用多也。薪從米，芻從禾，四者之車皆陳，北轉。凡此所以厚重禮也。《聘義》曰：「古之用財不能均如此，然而用財如此其厚者，言盡之於禮也。盡之於禮，則內君臣不相陵而外不相侵，故天子制之而諸侯務焉爾。」**疏**「薪

芻倍禾」○注「倍禾」至「焉爾」○釋曰：云「薪從米，芻從禾」者，以其薪可以炊爨，故從米陳之；芻可以食馬，故從禾陳之。鄭言此者，以經云「倍禾」，恐並從禾陳之故也。云「四者之車皆陳，北轉」者，以其向內爲正故也。引《聘義》者，欲見主君享禮聘賓，外內皆善，故引爲證也。賓

皮弁，迎大夫于外門外，再拜。大夫不荅

拜。大夫，使者，卿也。**疏**「賓皮」至「荅拜」○注「大夫

使者卿也」○釋曰：云「外門外」者，謂於主人大門外，入大門東行，即至廟門也。云「不荅拜」者，亦以爲君使，不敢

當故也。云「大夫，使者，卿也」者，即上「卿韋弁」者也。

揖，入，及廟門。賓揖，入。賓與使者揖而入，使

者止，執幣。賓俟之于門內，謙也。古者天子適諸侯，必

舍於大祖廟。諸侯行，舍于諸公廟。大夫行，舍于大夫

廟。**疏**「揖入」至「揖入」○注「賓與」至「夫廟」○釋曰：云

「使者止，執幣」者，下經始云「大夫奉束帛，入」，明此賓揖入時，「使者止，執幣」可知。云「賓俟之于門內，謙也」者，

聘時主君揖，入，立于庭，尊卑法，此賓與使者幣，故賓在門內，謙也。云「門內」即寧下，故下賓問卿，云「及廟門，

大夫揖入」，鄭注「入者，省内事也，既而俟于寧下」是也。

云「古者天子適諸侯，必舍于大祖廟」者，案《禮運》云「天子適諸侯，必舍其祖廟」。下記云「卿館於大夫，大夫館于士，士館于工商」，鄭注云「不館於敵者之廟，為大尊也」。以此差之，諸侯無正文，鄭注「舍于諸公廟」者，諸公大國之孤。云「大夫行，舍于大夫廟」者，謂卿舍于大夫也。若無孤之國，諸侯舍於卿廟也。大夫奉束帛，執其所以

將命。人。三揖，皆行。皆猶並也。使者尊，不後

主人。**疏**「人三揖皆行」○注「皆猶」至「主人」○釋曰：云

「使者尊，不後主人」者，主人則賓，所在若主人也。然君與使者行，當後君也。至于階，讓。大夫先升一

等。讓不言三，不成三也。凡升者，主人讓于客三，敵者

則客三辭，主人乃許升，亦道賓之義也。使者尊，主人三讓，則許升矣。今使者三讓，則是主人四讓也。公雖尊，亦三讓乃許升，不可以不下，主人也。古文曰「三讓」。

**疏**「至于」至「一等」○注「讓不」至「三讓」○釋曰：云「讓

不言三，不成三也。凡升者，主人讓于客三，敵者則客三辭，主人乃許升」者，是三讓三辭成也。今賓三讓，大夫即升，無三辭，則不成三也。云「使者尊，主人三讓，則許升矣」者，即此經主人「讓，大夫先升」是也。云「今使者三

讓，則是主人四讓也」者，經雖言「讓，大夫先升」，大夫之讓不明，故鄭君兩言之，但使尊終先升，若主人三讓，使人亦三讓，主人又一讓，則主人四讓，使者乃升，故鄭復言此也。案《周禮·司儀》云「諸公之臣，相為國客」，「大夫郊勞，三讓，登，聽命」，又云「致饗餼如勞之禮」，即得行三讓之禮。此中古文云「三讓」，與彼合。鄭不從者，《周禮》統

心，<sup>①</sup>舉其大率，而云「三讓」；此《儀禮》據屈曲行事，觀此經直云「讓，大夫先升」，是主人或三讓，大夫無三讓，故不從古文也。云「公雖尊，亦三讓乃許升，不可以不下，主人也」者，此據公為主人亦有三讓，故上行聘時云「至於階，三讓，公升二等，賓升」，亦是公先讓，先升，故成三讓。是以《聘義》云「三讓而後升」，公尊，必三讓者，不下賓客，<sup>②</sup>主人之義故也。賓從，升堂，北面聽命。北面于階上也。大夫東面致命。賓降，階西再拜稽首，拜餼亦如之。大夫以束帛，同致饗餼也。賓殊拜

① 「統心」，阮校云：毛本作「則」，《通解》無，監本作「刪」。

② 「不」，曹校云殿本改作「必」。

之，敬也，重君之禮也。

**疏**注「大夫」至「禮也」○釋曰：大

夫以束帛，同致饗餼五牢及陳豆、壺、車、米之等。今賓拜饗三牢及庭實，又別拜餼二牢及門外米禾，殊拜之者，敬主君以重禮故也。大夫辭，升，成拜，尊賓。受幣

堂中西，北面。趨主君命也。堂中西，中央之西。①

大夫降，出。賓降，授老幣，出迎大夫。老，家臣也。賓出迎，欲擯之。②大夫禮辭，許。人，揖

讓如初。賓升一等，大夫從，升堂。賓先升，敵也。皆北面。③**疏**「大夫」至「升堂」○注「賓先」至「北面」

○釋曰：前大夫奉君命歸饗餼，故先升一等，今賓私僨使者，無君命，體敵，故賓先升，在館，如主人之儀故也。知「皆北面」者，以其體敵，又下始云「賓奉幣，西面，大夫東面」，明此「北面」可知。庭實設，馬乘。乘，四馬也。

賓降堂，受老束錦。大夫止。止，不降，使之餘尊。**疏**注「止不」至「餘尊」○釋曰：凡賓主體敵之法，主

人降，賓亦降。今賓降，使者不降者，使之餘尊，雖合降而不降。賓奉幣西面，大夫東面。賓致幣。不言

致命，非君命也。大夫對，北面當楣，再拜稽首，

稽首，尊君客也。致對有辭也。

**疏**注「稽首」至「辭也」○

釋曰：賓主既行敵體之禮，當行頓首，今大夫稽首於賓，為拜君之拜，「尊君客」故也。「致」者，賓致幣，當有辭。「對」者，大夫對，亦當有辭，所以無辭者，文不具故也。受幣于楹間，南面，退，東面俟。賓北面授，尊君之使。**疏**「受幣」至「面俟」○注「賓北」至「之使」○釋曰：

此賓僨使者，是體敵之義。經云「受幣于楹間，南面」，知賓不南面並授，而云「賓北面授」者，凡敵體授之義，③授由其右，受由其左。今尊君之使，是以大夫南面，賓北面，故知賓北面授幣。賓再拜稽首送幣。大夫降，

執左馬以出。出廟門，從者亦訝受之。**疏**注「出廟」

至「受之」○釋曰：言「亦」者，上賓受禮時，受幣、馬，云「賓降，執左馬以出。上介受賓幣，從者訝受馬」，此亦從者訝

受馬，故云「亦」也。賓送于外門外，再拜。明日，賓拜于朝，拜饗與餼，皆再拜稽首。拜謝

①「央」原作「夫」，據阮本改。

②「擯」，阮校云：毛本作「僨」。

③「授」下，阮校云毛本有「受」字，曹校云有者是。

主君之恩惠於大門外。《周禮》曰：「凡賓客之治，令訝聽之。」此拜亦皮弁服。

**疏**「賓送」至「稽首」○注「拜謝」至

「弁服」○釋曰：知拜謝在「大門外」者，以其直言「賓拜於朝」，無入門之文，故知在「大門外」。若然，諸侯外朝在大門外明矣。引《周禮》者，《秋官·掌訝》職云賓客「至于國，賓入館，次于舍門外，待事于客。及將幣，爲前驅。至于朝，詔其位。凡賓客之治，令訝訝治之」。引之者，欲見賓客發館至朝來往，皆掌訝前驅爲之導。知「此拜亦皮弁」者，以其受時皮弁，故知此拜亦皮弁也。故《公食大夫》云「若不親食，使大夫各以其爵，朝服，以侑幣致之，賓朝服以受。明日，賓朝服以拜賜于朝」。彼朝服受，還朝服拜，則知此皮弁受，亦皮弁拜可知。上介饗餼三牢。飪一牢在西，鼎七，羞鼎三。飪鼎七，無鮮魚、鮮腊也。賓、介皆異館。

**疏**「上介」至「鼎三」○釋曰：

自此盡「兩馬束錦」，論主君使下大夫歸饗餼於上介之事。○注「飪鼎」至「異館」○釋曰：云「飪鼎七，無鮮魚、鮮腊也」者，對上賓九鼎有鮮魚、鮮腊也。云「賓、介皆異館」者，案下記云「卿館於大夫，大夫館於士，士館於工商」。彼云「卿」，即此「賓」，一也。彼云「大夫」，即此「上介」也。

彼云「士」，即此「衆介」也。故知「賓、介各異館」。必異館者，所陳饗餼後無所容故也。①腥一牢在東，鼎七。

堂上之饌六。六者，賓西夾之數。西夾亦如之，

宮及甕如上賓。凡所不貶者，尊介也。言如上賓者，

明此賓客介也。

**疏**「西夾」至「上賓」○注「凡所」至「介

也」○釋曰：云「如上賓者，明此賓客介也」者，案下云「賓之公幣私幣皆陳，上介公幣陳」，是上介有與賓同者。前

經不言「如上賓」，獨此經言「如上賓」，以其此饗餼大禮，

西夾「宮及甕如上賓」，以其客此上介，如上賓之禮也。

餼一牢。門外米、禾視死牢，牢十車。薪芻

倍禾。凡其實與陳，如上賓。凡，凡飪以下。

下大夫韋弁，用束帛致之。上介韋弁以受，

如賓禮。介不皮弁者，以其受大禮似賓，不敢純如賓

也。儻之兩馬束錦。

**疏**「儻之兩馬束錦」○釋曰：

此下大夫使者受上介之儻禮，如卿使者受賓儻禮當庭

①「後」，阮校云：陳、閩俱作「厚」。



同。①不言「如上大夫」者，省文也。士介四人，皆餼大牢、米百筭，設於門外。牢米不入門，略之也。

米設當門，亦十爲列，北上。牢在其南，西上。

**疏**「士介」

至「門外」○注「牢米」至「西上」○釋曰：自此至「無償」，論使宰夫歸餼於衆介之事。上文賓與上介米陳碑南，餼陳門內，此不入門，陳於門外者，鄭云「略之也」。云「米設當門，亦十爲列，北上」，彼亦當門，此直云「設於門外」，不云東西，明當門，北上，與賓同。云「牢在其南，西上」者，以此餼本設於庭，在門內，由士介賤，不得入門，且賓與上介門東有米三十車，薪六十車，門西禾三十車，芻六十車，皆統門爲上，此餼本非門外東西之物，制不在門外東西，②宜當門陳之。云「牢在其南，西上」，知如此設之者，以其賓、上介餼在米南，門西，東上，明知此牢亦在米南，而「西上」爲異耳。宰夫朝服，牽牛以致之。執紼牽之，東面致命。朝服、無束帛，亦略之。士介西面拜迎。③

**疏**「宰夫」至「致之」○注「執紼」至「拜迎」○釋曰：案下記

云「士館于工商」，則此致者在工商之館。宰夫從外來，即爲賓客，宜在門西，東面，此就大牢之中取以致餼。云「朝服、無束帛，亦略之」者，決上賓與上介皮弁、有束帛，故以

爲略之也。云「士介西面拜迎」者，以其士介爲主人，故西面，每上賓與上介米、④禾皆視死牢，具有芻薪米禾，此士直有生餼，無死牢，則無芻薪米禾矣。士介朝服，北面，再拜稽首，受。受，於牢東拜，自牢後適宰夫右

受，由前東面授從者。

**疏**「士介」至「首受」○注「受於」至

「從者」○釋曰：知「自牢後適宰夫右受」者，以其牢東北面拜，明在宰夫東南，從牢後來適宰夫，至宰夫之後受，⑤取牛便故也。必知在「宰夫右受」者，見前君使士受私覲之馬，「適其右受」，知此亦在右受也。若然，君使士受私覲由前，此由牢後，與受馬不同者，牛畜擾馴，與馬有異，故得從其後適宰夫右，取便也。云「由前東面授從者」，於宰夫之後受牛，遂由宰夫之前東授從者，亦是取便也。無

① 曹校云「如」當爲「與」，「庭」字衍。

② 「制」，曹校云當爲「知」。

③ 「士」，阮校引許宗彥云當作「上」。曹校云：「士」嚴作「上」，誤，此從他本。

④ 曹校云「每」字似誤，或當爲「拜」，屬上讀。

⑤ 「後」，曹校云當爲「右」。

擯。<sup>①</sup>既受，拜送之矣。明日衆介亦各如其受之服，從

賓拜於朝。**疏**「無擯」○注「既受」至「於朝」○釋曰：言

「無擯」者，決上賓與上介皆有擯，<sup>②</sup>士介賤，故略之。知

「明日衆介亦各如其受之服，從賓拜於朝」者，案下「夫人

使下大夫韋弁歸禮，賓受如受饗之禮」，賓之乘馬、束錦。

又歸禮於上介，上介「受之如賓禮，賓之兩馬、束錦。明

日，賓拜禮於朝」，鄭注云「於是乃言賓拜，明介從拜」。夫

人歸禮介尚從拜，則君饗餼介皆從拜可知。**賓朝服問**

卿。不皮弁，別於主君。卿，每國三人。**疏**「賓朝服問

卿」○注「不皮」至「三人」○釋曰：自此盡「無擯」，論賓齋

聘君之幣，問主國卿之事。云「不皮弁，別於主君」者，對

上文行聘享私覲皆皮弁，此朝服降一等，故鄭注云「別於

主君」。云「卿，每國三人」者，每國三卿是其常。鄭言此

者，欲見三卿皆以幣問之，其主國下大夫曾使向己國

者，<sup>③</sup>乃得幣問之，與卿異。**卿受于祖廟。**重賓禮

也。祖，王父也。**疏**「卿受于祖廟」○注「重賓」至「父也」

○釋曰：卿受鄰國君所問之禮不辭讓者，以其初君送客之

時，「賓請有事於大夫，君禮辭許」，是以卿不敢更辭，故下

記云「大夫不敢辭」。云「祖，王父也」者，大夫三廟，有別

子者立大祖廟，非別子者并立曾祖廟，王父即祖廟也。今

不受於大祖廟及曾祖廟，而受於祖廟者，以其天子受於文

王廟，諸侯受於祖廟，<sup>④</sup>大夫下君，故受於王父廟。下大

夫擯。無士擯者，既接於君所，急見之。**疏**「下大夫擯」

○注「無士」至「見之」○釋曰：行聘享於主國君時，主君擯

者三人以上，并有士擯，賓又設介。今直云「大夫擯」，無

士擯者，以其設擯介多者不敢質，示行事有漸。但賓行聘

享於主君之時，卿以與賓相接，故急見之，不須士擯。擯

者出請事。大夫朝服迎于外門外，再拜。

賓不荅拜。揖，大夫先入，每門每曲揖。及

廟門，大夫揖，入。入者，省內事也。既而俟于宁

也。**疏**「擯者」至「揖入」○注「入者」至「宁也」○釋曰：大

夫二門，入大門東行，即至廟門，未及廟門而有「每門」者，

①「擯」，阮校云：毛本作「賓」。下同。

②「賓」，阮校云：陳本作「擯」。

③「向」，阮校云：閩本作「至」。

④「於」下，阮校云：毛本、《通解》、楊氏有「太」字，是也。

大夫三廟，每廟兩旁皆南北豎牆，牆皆闔門，<sup>①</sup>假令王父廟在東，則有每門每曲之事。云「人者，省内事也」者，《曲禮》云「請人爲席」是也。云「既而俟于宁」者，宁，門屋宁也。知「俟于宁」者，下云賓入「三揖，皆行」，鄭注云「皆猶並也」，賓與卿並行，以卿俟于宁，故得並行。與卿三揖不俟于庭者，下君也。案《曲禮》云「客至於寢門，則主人請入爲席，然後出迎客，主人肅客而入」。此卿既入，不重出迎客者，彼《曲禮》平常賓客，故重出迎客，此聘問之賓與平常賓客異，上君揖賓不重出，此卿亦不重出，與彼同，但在庭與在宁不同矣。擯者請命。亦從入而出請。不几筵，辟君也。**疏**注「亦從」至「君也」○釋曰：「亦」者，亦君受聘時擯者從君而入，几筵既設，擯者出請。此擯者亦從卿而入省内，然後出請。庭實設，四皮。麋鹿皮也。賓奉束帛，入。三揖，皆行，至于階，讓。皆猶並也。古文曰「三讓」。**疏**注「古文曰三讓」○釋曰：不從古文者，亦是不成三，故賓先升一等，大夫從升堂，故不從三讓也。賓升一等，大夫從升堂，北面聽命。賓先升，使者尊。賓東面致命。致其君命。

大夫降，階西再拜稽首。賓辭，升，成拜，受幣堂中西，北面。於堂中央之西受幣，趨聘君之命。賓降，出。大夫降，授老幣。無擯。<sup>②</sup>不擯賓，辟君也。

**疏**注「不擯賓辟君也」○釋曰：上文賓行聘享訖而君禮賓，有束帛，乘馬，敵者曰擯，今卿「不擯賓」者，辟國君也。擯者出請事。賓面，如覲幣。面亦見也，其謂之面，威儀質也。**疏**「擯者」至「覲幣」○注「面亦」至「質也」○釋曰：自此至「授老幣」，論賓行私面於卿之事。賓私面於卿，其幣多少與私覲於君同，故云「如覲幣」。賓私覲之時，用束錦，乘馬，則此私面於卿，亦用束錦，乘馬可知也。云「面亦見也，其謂之面，威儀質也」者，覲、面並文，其面爲質，若散文面亦爲覲，故鄭《司儀》注云「私面，私覲也」，又《左傳》云「楚公子棄疾以乘馬八匹私面鄭伯」是也。賓奉幣，庭實從，庭實，四馬。

**疏**「賓奉幣庭實從」○注「庭實四馬」○釋曰：以其言「如

<sup>①</sup>「皆」下，曹校云似脫「有」字。

<sup>②</sup>「擯」，阮校云：毛本作「儻」。

覲幣」，故知「庭實四馬」也。入門右，大夫辭。大夫

於賓人，自階下辭，迎之。**疏**注「大夫」至「迎之」○釋曰：

知「階下辭」者，以其授老幣時降故也。知「迎」者，下文

「揖讓如初」，明元缺一字。迎之可知。賓遂左。見，私事

也，雖敵，賓猶謙，入門右，為若降等然。《曲禮》曰「客若

降等，則就主人之階」，主人興，辭於客，「然後客復就西

階」。**疏**注「見私」至「西階」○釋曰：云「為若降等」者，主

人是大夫，客是士，降等法士就東階，今此賓與卿覲者，<sup>①</sup>

就門右，若士於大夫降等。引《曲禮》者，主人辭賓，賓遂

左，就門右西階復正也。<sup>②</sup>庭實設。揖讓如初。

大夫至庭中，旋並行。**疏**「庭實」至「如初」○注「大夫」至

「並行」○釋曰：云「大夫至庭中，旋並行」者，賓初入門右，

大夫階下辭賓，賓遂門左；<sup>③</sup>大夫至庭中迎賓，大夫迴旋，

與賓揖而並行，北出。言「如初」者，大夫不出門，唯有庭

中一揖，至碑元缺一字。又揖，再揖而已。大夫升一

等，賓從之。大夫先升，道賓。大夫西面，賓稱

面。稱，舉也，舉相見之辭以相接。大夫對，北面當

楣再拜，受幣于楹間，南面，退，西面立。受

幣楹間，敵也。賓亦振幣進，北面授。**疏**注「受幣」至「面

授」○釋曰：知賓「北面授」者，以云大夫「南面，退，西面

立」，言退，明賓不得南面。又見下文「賓當楣再拜」，明北

面授，因拜可知。云「受幣楹間，敵也」者，凡授受之義，在

於兩楹之間者，皆是體敵。故《昏禮》云「授于楹間，南

面」，注云「授於楹間，明為合好，其節同也。南面，並授

也」，謂賓主俱至楹間，南面並而授。是以《曲禮》云「鄉與

客並，然後受」，注云「於堂上則俱南面，禮敵者並授」，此

是敵者之常禮也。雖是敵者，於兩楹之間，或有訝受者，

皆是相尊敬之法。則此云大夫南面，賓北面授，雖是敵

禮，是尊大夫，故訝受。又前致饗餼，饗使者於楹間，賓北

面授幣，鄭云「賓北面授，尊君之使」。自餘不在楹間，別

相尊敬，是以前云「公受玉于中堂與東楹之間」，鄭注云

「東楹之間，亦以君行一，臣行二」。又云「公禮賓，賓受幣」，

①「覲」，曹校云當為「敵」。

②「遂左就門右」，阮校云：陳本「遂」作「迎」。閩本作

「就門左由」。

③「門」，曹校云此字衍。

當東楹，北面」，注云「亦訝受」。又賓觀公云「振幣，進授，當東楹，北面」。如此之類，不在兩楹之間者，皆非敵法，就文解之。<sup>①</sup>賓當楣再拜送幣，降，出。大夫降，授老幣。擯者出請事。上介特面，幣如覲。介奉幣。特面者，異於主君，士介不從而入也。君尊，衆介始覲，不自別也。上賓則衆介皆從之。**疏**「擯者」至「奉幣」○注「特面」至「從之」○釋曰：自此盡「再拜，送幣」，論上介私面於鄰國卿之事。云「特面者，異於主君」者，介初覲主君之時，不敢自尊別，與衆介同執幣而入，今私面於鄰國卿，不與衆介同，而特行禮焉，故云「特面者，異於主君也」。云「士介不從而入」者，對覲君時衆介從而入，故鄭云「君尊，於衆介始覲，<sup>②</sup>不自別也」。云「上賓則衆介皆從之」者，上介言「特面」，則賓問卿與私面，介皆從可知。皮二人贊。亦儷皮也。**疏**「皮二人贊」○注「亦儷皮也」○釋曰：案經云「幣如覲」，則上介私面，亦與私覲於君幣同，故云「亦儷皮也」。入門右，奠幣，再拜。降等也。**疏**「入門」至「再拜」○注「降等也」○釋曰：言「降等」者，主人是卿，上介是大夫，故「入門

右」，不敢自同賓客。大夫辭。於辭上介則出。擯者反幣。出還于上介也。**疏**「擯者反幣」○注「出還于上介也」○釋曰：不言反皮，出還於上介，皮出可知，但文不具。庭實設，介奉幣入。大夫揖讓如初。大夫亦先升一等。今文曰「入設」。**疏**注「大夫」至「入設」○釋曰：云「亦」者，亦上賓行私面，大夫升一等，賓乃升，此上介私面亦然，故云「亦」也。介升。大夫再拜，受。亦於楹間，南面而受。**疏**注「亦於」至「而受」○釋曰：「亦」者，賓行私面，大夫受幣於楹間，南面，故云「亦」得在楹間。爲敵法，上介是下大夫，與卿小異大同，明得行敵法，在楹間可知。介降拜，大夫降辭。介升，再拜送幣。介既送幣，降出也。大夫亦授老幣。擯者出請。衆介面，如覲幣，入門右，奠幣，皆再拜。大夫辭。介逆出。擯者執上幣出，

① 「就」上，阮校云：毛本有「故」字。

② 「於」，阮校云各本注俱無「於」字，曹校云「於」字衍。

禮請受。賓辭。賓亦爲士介辭。

**疏**「擯者」至「賓

辭」○注「賓亦」爲「士介辭」○釋曰：自此至「拜辱」，論士介私面於鄰國卿之事。云「賓亦爲士介辭」者，「亦」者，亦士介私覲於主國君時，故云「亦」也。大夫荅再拜。

擯者執上幣，立于門中以相拜。士介皆辟。

老受擯者幣于中庭。士三人坐取群幣以從

之。擯者出請事。賓出，大夫送于外門外，

再拜。賓不顧。不顧，言去。擯者退。大夫拜

辱。拜送也。下大夫嘗使至者，幣及之。嘗使

至己國，則以幣問之也。君子不忘舊。

**疏**「下大」至「及

之」○注「嘗使」至「忘舊」○釋曰：自此盡「于卿之禮」，論

主國下大夫嘗使至己國者，聘君使上介以幣問之事。諸

侯之國皆有三卿、五大夫，其三卿不問至己國不至己國，

皆以幣及之，上已論訖。其五大夫者，或作介，或特行，至

彼國者，乃以幣及之，略於三卿故也。言「君子不忘舊」

者，此大夫嘗與彼國君相接，即是故舊也，今以幣及之，故

云「君子不忘舊」也。上介朝服，三介，問下大

夫。下大夫如卿受幣之禮。上介三介，下大夫使

之禮也。**疏**注「上介」至「禮也」○釋曰：云「上介三介，下

大夫使之禮也」者，下經云「小聘曰問，其禮如爲介，三介」，是下大夫小聘之禮，據此篇，大聘使卿，五介，小聘使

大夫，三介。若大國之卿，七介，小聘使大夫，五介。小國

之卿三介，小聘使大夫，一介也。《曲禮》云：「擬人必於其

倫。」故問下大夫還使上介，是各於其爵，<sup>①</sup>易以相尊敬者

也。其面，如賓面于卿之禮。大夫若不見，

有故也。**疏**「大夫若不見」○注「有故也」○釋曰：自此盡

「不拜」，論主國卿大夫有故不得親受聘君之幣之事。言

「有故」者，或有病疾，<sup>②</sup>或有哀慘，不得受其問禮。君使

大夫各以其爵爲之受，如主人受幣禮，不

拜。各以其爵，主人卿也，則使卿；大夫也，則使大夫。

不拜，代受之耳，不當主人禮也。**疏**「君使」至「不拜」○

注「各以」至「禮也」○釋曰：云「各以其爵，主人卿也，則

使卿；大夫也，則使大夫」者，若然，經云「君使大夫」，大

夫。下大夫如卿受幣之禮。上介三介，下大夫使

① 「於」，曹校云當爲「以」。

② 「病疾」，曹校云此二字當倒。

夫中有卿，大夫摠名也。云「各以其爵」，亦是易以相尊敬故也。云「不拜，代受之耳，不當主人禮也」者，案《周禮·宗伯》云「大賓客則攝而載裸」，鄭注云宗伯「代王爲裸，拜送則王」，亦此類。拜是致敬之事，不可代人之拜，故直授之而已，<sup>①</sup>不當主人之禮拜之。夕，夫人使下大夫韋弁歸禮。夕，問卿之夕也。使下大夫，下君也。君使之，云夫人者，以致辭當稱寡小君。

**疏**

「夕夫」

至「歸禮」○注「夕問」至「小君」○釋曰：自此盡賓拜禮於朝，論主君夫人歸禮於賓與上介之事。云「夕，問卿之夕也」者，案下記云「聘日，致饗。明日，問大夫。夕，夫人歸禮」，是其問卿之夕也。云「使下大夫，下君也」者，歸饗餼使卿，此夫人使下大夫，故云「下君也」。云「君使之，云夫人者，以致辭當稱寡小君」者，案隱二年傳「九月，紀裂繡來逆女。何以不稱使？婚禮不稱主人」，又云「紀有母乎？曰有。有則何以不稱母？母不通也」，何休注云「禮，婦人無外事」。明知此使下大夫歸禮者，是君使之可知。而稱「夫人使」者，以其致辭於賓客時當稱寡小君，故稱「夫人使下大夫」，其實君使之也。堂上籩、豆六，設于戶東，西上，二以並，東陳。籩豆六者，下君

禮也。臣設于戶東，又辟饌位也。其設脯，其南醢，屈六籩、六豆。

**疏**

「堂上」至「東陳」○注「籩豆」至「六豆」○釋

曰：言「籩、豆六，東陳」者，其饌自戶東爲首，二以並，東陳。先於北設脯，即於脯南設醢，又於醢東設脯，<sup>②</sup>以次屈而陳之，皆如上也。云「籩、豆六者，下君禮也」者，君歸饗餼八豆，此六豆，故云「下君」也。設於戶東，又辟君饌位故也。云「其設脯，其南醢，屈六籩、六豆」者，此約君禮設豆法，云「韭菹，其南醢醢，屈」，故知此醢在南，屈陳之。又知籩、豆各六者，下文「上介四豆、四籩」，降殺以兩，明夫人多二，六豆、六籩可知。壺設于東序，北上，二以並，南陳。醢、黍、清，皆兩壺。醢，白酒也。凡酒稻爲上，黍次之，梁次之，皆有清、白。以黍間清、白者，互相備，明三酒六壺也。先言醢，白酒尊，先設之。

**疏**

「壺設」至「兩壺」○注「醢白」至「設之」○釋曰：其設壺

於東序，自北向南而陳，稻、黍、梁皆二壺並之而陳也，故言「醢、黍、清，皆兩壺」也。云「以黍間清、白者，互相備」

<sup>①</sup> 「授」，曹校云當爲「受」。

<sup>②</sup> 「又於醢」，阮校云：陳、閔俱無。

者，醲，白也，上言白，明黍、粱皆有白；下言清，明稻、黍亦有清故也。於清、白中言黍，明醲即是稻，清即是粱也，故言「互相備」也。三酒既有清、白二色，故言「六壺」。必先言「醲」者，以白酒尊重，故先設之也。大夫以束帛致之。致夫人命也。此禮無牢，下朝君也。**疏**「大夫」至

「致之」○注「致夫」至「君也」○釋曰：案《周禮·掌客》云「上公之禮，夫人致禮，八簋，膳大牢，致饗大牢」。侯伯以下亦皆有牢，是朝君來時有牢，此卿來聘無牢，故云「下朝君也」。賓如受饗之禮，儻之乘馬、束錦。上介四豆、四簋、四壺，受之如賓禮，四壺，無稻酒也。不致牢，下於君也。**疏**注「四壺無稻酒」○釋曰：知

者，案上致於賓六壺，稻、黍、粱皆有清、白，今上介四壺，明從上去之，無稻米之酒，清、白俱去之，元缺一字。故四壺也。

儻之兩馬、束錦。明日，賓拜禮於朝。於是乃言賓拜，明介從拜也。今文「禮」爲「體」。**疏**注「於

是」至「爲體」○釋曰：鄭解若於上文賓下言之，則介從拜之事不明，故於上介之下乃云「明日，賓拜禮於朝」，則介從元缺起此。賓拜可知。大夫餼賓大牢，米八筐。

其陳於門外。黍、粱各二筐，稷四筐，二以並，南陳，無稻。牲陳於後，東上。不饌於堂庭，辟君也。**疏**注「其陳」至

「君也」○釋曰：自此至「牽羊以致之」，論主國大夫餼賓及上介之事。云「陳於門外」，知者，經無牢，米入門之文，故明是門外可知，與君餼士介同。云「黍、粱各二筐，稷四筐，二以並，南陳，無稻」者，案上使卿歸饗餼之時，米百筥，設於中庭，十以爲列，北上，稻、黍、粱各二行，稷四行。此云「八筐」，黍、粱、稷亦宜法其行數，故知黍、粱各二筐，稷四筐。知「二以並，南陳」者，以其君筥米北上，故知此亦北上，南陳。知「二以並」者，以其陳筥米黍、粱、稻不雜陳，則知此筐米亦不雜陳，「二以並」可知。云「無稻」者，見記云「凡餼大夫黍、粱、稷，筐五斛」是也。云「牲陳於後，東上」者，此與君餼士介略同。餼士介時，不言門東西，鄭注云「當門」，則知此門外亦當門。君餼賓米在庭，牲在門西，雖不正當米南，亦得牲在其南，故知此牲陳亦在米南可知。知「東上」者，君餼賓時，陳於門西，東上也。云「不饌於堂庭，辟君也」者，案上君致饗餼，簋、豆在堂，牲、牢、米等在庭，此在門外，故云「辟君也」。若然，案《掌客》鄰國之君來朝，卿皆見以羔，膳大牢，侯伯子男膳特牛，彼又無筐米。此侯伯之臣得用大牢，有筐米者，彼爲



君禮，此是臣禮，各自爲差降，不得以彼難此。賓迎再拜。老牽牛以致之。賓再拜稽首，受。老退。賓再拜送。老，室老，大夫之貴臣。

**疏**注「老

室」至「貴臣」○釋曰：案《喪服》「公士大夫之衆臣，爲其君布帶繩屨。傳曰：室老、士、貴臣，其餘皆衆臣也」，鄭注云「室老，家相也。士，邑宰也」，即此「室老」。「貴臣」者，家相、邑宰之屬，故爲「貴臣」也。上介亦如之。衆介皆少牢，米六筐，皆士牽羊以致之。米六筐者，又無梁也。士亦大夫之貴臣。

**疏**注「米六」至「貴臣」○

釋曰：言「又無梁也」者，上文八筐無稻，從上去之，明知此亦從上去之，無梁，其稻梁是加，故去之。云「士亦大夫之貴臣」者，即是大夫邑宰也，以其大夫使之，故知「大夫之貴臣」也。公於賓，壹食，再饗。饗謂亨大牢以飲賓也。《公食大夫禮》曰「設洗如饗」，則饗與食互相先後也。古文「壹」皆爲「一」。今文「饗」皆爲「鄉」。

**疏**注「饗

謂」至「爲鄉」○釋曰：此篇雖據侯伯之卿聘使，五等諸侯其臣聘使牢禮皆同，無大國次國之別。是以《掌客》五等諸侯相朝，其下皆云「群介、行人、宰、史，皆有飧饗餼，以

其爵等爲之牢禮之陳數」。又云「凡諸侯之卿大夫、士爲國客，則如其介之禮以待之」，鄭注云「尊其君，以及其臣也。以其爵等爲之牢禮之數陳」，<sup>①</sup>爵卿也，則飧二牢，饗餼五牢。大夫也，則飧大牢，饗餼三牢。士也，則飧少牢，饗餼大牢也。此降小禮豐大禮也。以命數則參差難等，略於臣，用爵而已。以此言之，公侯伯子男大聘使卿，主君一食再饗，小聘使大夫，則主君一食一饗。若然，案《掌客》子男一食一饗，子男之卿再饗，多於君者，以其君臣各自相望，不得以君決臣也。云「饗謂亨大牢以飲賓也」者，以其饗禮與食禮同，食禮既亨大元缺止此。牢，明饗禮「亨大牢」可知。但以食禮無酒，饗禮有酒，故以「飲賓」言之。引《公食》「饗與食互相先後」者，此經先言食，後言饗，則食在饗前。《公食》言設洗如饗禮，則饗在食前。饗先後出於主君之意，故先後不定也。燕與羞、俶獻無常數。羞謂禽羞，鴈鶩之屬，成孰煎和也。俶，始也，始獻四時新物，《聘義》所謂「時賜」。無常數，由恩意也。古文「俶」作「淑」。

**疏**「燕與」至「常數」○注「羞謂」至「作淑」

① 「數陳」，阮校云：毛本作「陳數」。

○釋曰：案《周禮·掌客》上公三燕，侯伯再燕，子男一燕，皆有常數，此臣無常數者，亦是君臣各爲一，不得相決。知「羞謂禽羞，鴈鶩之屬」者，案下記云「禽羞，俶獻」，故知是禽。知「成孰煎和」者，以其言「羞」，鼎臠之類，故知「成孰煎和」者也。知禽是「鴈鶩之屬」者，案下記云「宰夫歸乘禽，日如饗餼之數」，鄭注「乘禽，乘行之禽也」，亦云「鴈鶩之屬」。以無正文，故以意解之。賓、介皆明日拜于朝。上介壹食，壹饗。饗食賓，介爲介，從饗獻矣，復特饗之，客之也。

**疏**注「饗食」至「之也」○釋曰：不

言從食者，公食介雖從人，不從食，賓食畢，介逆出，是不得從食矣。知「從饗」者，下記云「大夫來使，無罪，饗之，過則饗之。其介爲介」，注云「饗賓有介者，賓尊，行敵禮也」，故知介從饗。案襄二十七年「宋公兼享晉、楚之大夫，趙孟爲客，子木與之言，弗能對。使叔向侍，言焉，子木亦不能對也」。叔向爲趙孟介而得從饗，是其義也。云「復特饗之」，即此經是也。若不親食，使大夫各以其爵，朝服致之以侑幣，如致饗。無償。君不親食，謂有疾及他故也。必致之，不廢其禮也。致之必使同班敵者，易以相親敬也。致禮於卿，使卿致禮於大

夫，使大夫，非必命數也。無償，以己本宜往。古文「侑」皆作「宥」。**疏**若不「至」無償○注「君不」至「作宥」○釋曰：案上文云君使卿歸饗餼於賓館，賓償之，今君有故不親食，使卿生致其牢禮，亦於賓館，但無償爲異。云「謂有疾及他故也」者，「他故」之中，兼及有哀慘。云「非必命數也」者，依《典命》：公侯伯之卿三命，大夫再命，子男之卿再命，大夫一命，經云「各以其爵」，故知不依命數。云「無償，以己本宜往」者，饗餼之等不宜召賓，故君使人致禮，賓則償使者，此饗食之禮，主君無故，合速賓之來就主君，**①**入廟，賓無償禮。今主君有故，生致於賓，亦無償，故云「本宜往」。此篇據侯伯之卿來聘，是使卿致禮，鄭兼云使大夫於大夫者，**②**小聘使大夫來，使大夫致禮也。若然，經直言「使大夫」者，大夫中兼有上大夫兼卿也。**③**致饗以酬幣，亦如之。酬幣，饗禮酬賓酌酒之幣也，所用未聞也。禮幣束帛、乘馬，亦不是過也。《禮器》

**①**「之」，曹校云此字衍。

**②**曹校云「使」「於」二字當互易。

**③**「兼卿也」，曹校云「兼」字衍。

曰「琥璜爵」，蓋天子酬諸侯。

**疏**「致饗」至「如之」○注

「酬幣」至「諸侯」○釋曰：云「禮幣束帛、乘馬，亦不是過也」者，鄭以饗之酬幣無文，故約上主君禮賓之時用束帛、乘馬，此饗賓酬幣，亦不過是，故云「亦不是過」。引《禮器》者，案彼經云「有以少爲貴者，圭璋特，琥璜爵」，鄭注云「圭璋特，朝聘以爲瑞，無幣帛也。琥璜爵者，天子酬諸侯，諸侯相酬，以此玉將幣也」。彼經不云天子、諸侯相酬之幣，故此注云「蓋」，言酬諸侯者，公侯伯用琥，於子男用璜。引之者，證與此酬卿大夫不同之義。大夫於賓壹饗，壹食。上介若食，若饗。若不親饗，則公作大夫致之以酬幣，致食以侑幣。作，使也。大夫有故，君必使其同爵者爲之致之。列國之賓來，榮辱之事，君臣同之。**疏**「大夫」至「侑幣」○注「作使」至「同之」○釋曰：此一經論主國卿大夫饗食聘賓及上介之事。此直言饗食，不言燕，亦有燕。是以《鄭詩·羔裘》云「知子之來之，雜佩以贈之」，鄭注云「與異國賓客燕時，雖無此物，猶言之，以致其厚意。其若有之，固將行之。士大夫以君命出使，主君之臣必以燕禮樂之，助君之歡」是也。又昭二年《左傳》云韓宣子來聘，「宴于季氏」，傳無譏

文，明鄰國大夫有相燕之法。又此大夫相禮，饗食有常數，雖有燕之，<sup>①</sup>亦無常數，亦無酬幣矣。

儀禮疏卷第二十二元缺第九葉，今補。

江寧府知府陽城張敦仁編校 元和縣

學生員顧廣圻覆校

①「之」，曹校云此字似衍。

## 儀禮疏卷第二十三

唐朝散大夫行大學博士弘

文館學士臣賈公彥等撰

君使卿皮弁還玉于館。玉，圭也。君子於玉比德

焉。以之聘，重禮也。還之者，德不可取於人，相切厲之義也。皮弁者，始以此服受之，不敢不終也。

**疏**「君使」

至「于館」○注「玉圭」至「終也」○釋曰：自此盡「賓送，不拜」，論主君使卿詣館還玉及報享之事。云「玉，圭也」者，舉聘君之圭。<sup>①</sup>云「君子於玉比德焉。以之聘，重禮也」，

并「相切厲之義」，並《聘義》文。案《聘義》云「天子制諸侯，比年小聘，三年大聘，相厲以禮」，又云「已聘而還圭璋，此輕財而重禮之義」，又云「夫昔者君子比德於玉焉」，是其義也。云「還之者，德不可取於人，相切厲之義也」者，既以玉比德，德在於身，不取於人，彼既將玉來，似將德與己，己不可取彼之德，故還之，不取德也。既不得取

而將玉往來者，相切磋、相磨厲以德而尊天子，故用之也。

云「皮弁者，始以此服受之，不敢不終也」者，始謂受聘享在廟時，今還以皮弁還玉，是終之也。賓皮弁，襲，迎

于外門外，不拜，帥大夫以入。迎之不拜，示將

去，不純為主也。帥，道也。今文曰「迎于門外」。古文

「帥」為「率」。**疏**「賓皮」至「以入」○注「迎之」至「為率」

○釋曰：云「帥大夫以入」者，大夫即卿，卿亦大夫也。云

「不純為主也」者，<sup>②</sup>客在館如主人，卿往如賓，今不拜迎，

是不純為主也。決上君使卿歸饗餼時，賓拜迎，是純為主

人故也。大夫升自西階，鉤楹。鉤楹，由楹內。將

南面致命，致命不東面，以賓在下也。必言鉤楹者，賓在

下，嫌楹外也。**疏**「大夫」至「鉤楹」○注「鉤楹」至「外也」

○釋曰：云「不東面，以賓在下也」者，決歸饗餼時，大夫東

面致命，行聘時賓亦東面致命也。云「必言鉤楹者，賓在

下，嫌楹外也」，若然，不在楹外近之者，以初行聘時在堂

上楹內，故今還在楹內也。賓自碑內聽命，升自西

<sup>①</sup>「舉」，曹校云似當為「據」。

<sup>②</sup>「云」下，阮校云：《要義》有「將去」二字。

階，自左南面受圭，退，負右房而立。聽命於

下，敬也。自左南面，右大夫且並受也。必並受者，若鄉君前耳。退，爲大夫降逡遁。今文或曰「由自西階」，無

「南面」。

**疏**「賓自」至「而立」○注「聽命」至「南面」○釋

曰：「云『聽命於下，敬也』者，此決賓受禮時，公用束帛，賓

西階上聽命，歸饗饌時，賓阼階上聽命，此特於下聽命，故

云「敬也」。云「自左南面，右大夫且並受也」者，以《鄉飲

酒》獻酢之時，授者在右，受者在左，故右大夫也。「且並

受」者，欲取如向君前然也。云「若向君前耳」者，謂於本

國君前受圭璋時，北面並受，今還南面並受，面位受不

同，<sup>①</sup>並受一邊不異，故云「若向君前耳」。云「退，爲大夫

降逡遁」者，以大夫降，爲之逡遁而退，因即負右房南面而

立。大夫，士直有東房西室，天子、諸侯左右房，今不在大

夫廟，於正客館，故有右房也。大夫降中庭。賓

降，自碑內東面授上介于阼階東。大夫降出，

言中庭者，爲賓降節也。授於阼階東者，欲親見賈人藏之

也。賓還阼階下，西面立。**疏**「大夫」至「階東」○注「大

夫」至「面立」○釋曰：云「大夫降出，言中庭者，爲賓降節

也」者，以其大夫授賓圭訖，降自西階，將出門，至中庭不

止，今云「大夫降出中庭」者，<sup>②</sup>大夫中庭，<sup>③</sup>賓乃降，故鄭

云「爲賓降節也」。云「授於阼階東者，欲親見賈人藏之

也」者，賈人是上啓櫝者，是掌玉之人，此時無事，在堂東

待此玉，故賓向阼階東得見之。云「賓還阼階下，西面立」

者，以其賓在館如主人，在階下西面立，是其常處。立者，

以待授璋也。上介出請，賓迎。大夫還璋，如

初人。出請，請事於外，以人告也。賓雖將去，出入猶

東，唯升堂由西階。凡介之位未有改也。**疏**注「唯升堂」

至「改也」○釋曰：案上文云「賓自碑內聽命，升自西階」，

是其升堂由西階也。云「凡介之位未有改也」者，以其賓

唯升自西階，明介猶在東方，故上文授上介于阼階東也，

故言「未有改」。賓謁，迎。大夫賄用束紡，賄，予

人財之言也。紡，紡絲爲之，今之縛也。所以遺聘君，可

以爲衣服，相厚之至。**疏**「賓謁」至「束紡」○注「賄予」至

「至也」○釋曰：此則未知何用之財，若是報享之物，不應

「至也」○釋曰：此則未知何用之財，若是報享之物，不應

①「受」，阮校云毛本、《通解》無，曹校云「受」字衍。

②「出」，曹校云此字衍。

③「夫」下，曹校云似脫「至」字。

在禮玉之上。今言此「束紡」者，以其上圭璋是彼國之物，下云「禮玉、束帛」，報聘君之享物。彼君厚禮於此，此亦當厚禮於彼，故特加此「束紡」，是以鄭云「相厚之至」也。云「賄，予人財之言也」者，案下記云「賄，在聘于賄」，又云「無行，則重賄，反幣」，鄭注《周禮》云「布帛曰賄」，<sup>①</sup>是賄爲財物，是與人財物謂之賄也。云「紡，紡絲爲之」者，因名此物爲紡。云「今之縛也」者，鄭注《周禮·內司服》亦云「素紗者，今之白縛也」，則此「束紡」者，素紗也，故據漢法況之。禮玉束帛乘皮，禮，禮聘君也，所以報享也。亦言玉，璧可知也。今文「禮」皆作「醴」。

**疏**

「禮玉束帛

乘皮」○注「禮禮」至「作醴」○釋曰：云「禮，禮聘君也」者，此謂報享之物，以其彼持享物來禮此主君，此主君亦以物禮彼君，故云「禮，禮聘君也」。云「所以報享也」者，彼以物享此君，此君亦以物享彼君。《曲禮》云：「往而不來非禮也，來而不往亦非禮也。」今以來而往，是相享之法，故云「報享也」。云「亦言玉，璧可知也」者，上文聘賓行享之時，束帛加璧，束錦加琮，今報享物亦有璧琮致之，故云「亦言玉，璧可知」。此玉則琮也，<sup>②</sup>以其經言「玉」，<sup>③</sup>故以玉言之。<sup>④</sup>若然，經言「束帛」，兼有束錦矣。案下記云

「賄，在聘于賄」，又云「無行，則重賄，反幣」，則此禮也。皆如還玉禮。大夫出，賓送，不拜。公館賓。爲賓將去，親存送之，厚殷勤，且謝聘君之意也。公朝服。

**疏**

「公館賓」○注「爲賓」至「朝服」○釋曰：自此盡

「賓退」，論明日賓將發，主君就館拜謝聘君使臣來禮己國之事。云「公朝服」者，以其行聘享在廟之時，相尊敬重，故著皮弁，此拜謝之禮輕，故知著朝服。賓辟。不敢受主國君見已於此館也。此亦不見，言辟者，君在廟門，敬也。凡君有事於諸侯臣之家，<sup>⑤</sup>車造廟門乃下。

**疏**

「賓

辟」○注「不敢」至「乃下」○釋曰：云「此亦不見，言辟者，君在廟門，敬也」者，此言「亦」者，亦勞賓時，故上文賓即館，卿大夫勞賓，賓不見。以其不見，故遣上介聽命，故知此賓亦不見。凡言「辟」者，將見而不見，則謂之辟。此本

①「曰」原作「白」，據重刊單疏本改。

②「琮」上，曹校云脫「璧」字。

③「經」上，曹校云似脫「上」字。

④「以」上，曹校云似脫「亦」字。

⑤「侯」，阮校云：毛本無。按下疏亦無「侯」字。

不見而言「辟」者，以其君在廟門外，雖不見而言「辟」，故鄭云「敬也」。云「凡君有事於諸臣之家，車造廟門乃下」者，以其卿館于大夫之廟，此館則是諸臣之家。案《公食·記》云「賓之乘車在大門外」，又《曲禮》云「客車不入大門」。以此言之，君車入大門矣。大夫、士有兩門，入門東行，則是廟門矣。既至廟門，須與賓行禮，故鄭云「造廟門乃下」也。

### 上介聽命

聽命於廟門中，西面，如相拜然也。賓者每贊君辭，則曰：「敢不承命，告于寡君之老。」

**疏**「上介聽命」○注「聽命」至「之老」○釋曰：云「聽命於廟門中，西面，如相拜然也」者，案前受士介幣之時，「賓固辭。公荅再拜。賓者出，立于門中以相拜」，注云「立門中，闔外，西面」。此中賓不見，<sup>①</sup>使介聽命，明「如相拜然」，取其視外便也。必知在「門中，西面」者，以其君來如賓禮，東面，介西面，面公可知。云「賓者每贊君辭，則曰：「敢不承命，告于寡君之老」者，以其君尊，不自出辭，以是故君之賓者每事贊君出辭。則曰「敢不承命」者，謂上介荅君之辭。知告賓云「告于寡君之老」者，案《玉藻》云「賓者曰寡君之老」，注云「賓者之辭，主於見他國君」，今上介當賓者之處，故知告于賓，稱「告于寡君之老」。

聘

享、夫人之聘享、問大夫、送賓，公皆再拜。拜此四事。公東面拜，賓者北面。

**疏**「聘享」至「再拜」○

注「拜此」至「北面」○釋曰：云「聘享」者，謂賓聘君以圭，享君以璧。「夫人聘享」者，謂賓聘夫人以璋，享夫人以琮。「問大夫」者，問三卿及嘗聘彼國之下大夫。「送賓」以登路。云「拜此四事」者，君禮一，夫人禮二，大夫禮三，送賓禮四，四事皆再拜。云「公東面」者，公如賓禮，門西，東面，賓者向公、向介，故知「北面」，為相而言也。公退，賓從請命于朝。賓從者，實為拜主君之館己也。言請命者，以己不見，不敢斥尊者之意。

**疏**「公退」至「于朝」○注「賓從」至「之意」○釋曰：云「言請命者，以己不見，不敢斥尊者之意」者，案《司儀》云「君館客，客辟。介受命，遂送，客從拜辱于朝」，此經不言「拜辱」而言「請命」，凡言「請」者，得不由君，君聽則拜。此下經直云「公辭，賓退」，不見拜文，是君不受其謝，故云「請命者，以己不敢斥尊者之意」，故不言「辱」而言「請」。

<sup>②</sup>公辭，賓

<sup>①</sup>「中」，曹校云此字似衍。

<sup>②</sup>「辱」上，曹校云脫「拜」字。

退。辭其拜也。退，還館裝駕，爲旦將發也。《周禮》曰：

「賓從拜辱于朝。明日，客拜禮賜，遂行之。」<sup>①</sup>**疏**「公辭賓

退」○注「辭其」至「行之」○釋曰：云「退還館裝駕」者，以

明旦將發，故裝束駕乘。引《周禮》者，證「明日客拜禮賜，

遂行」之事。鄭彼注云「禮賜者，謂乘禽」，即此文賓「拜

乘禽」是也。賓三拜乘禽於朝，訝聽之。發去乃

拜乘禽，明已受賜，大小無不識。**疏**「賓三」至「聽之」○

注「發去」至「不識」○釋曰：自此盡「送至于竟」，論賓、介

發行，主國贈送之事。云「明已受賜，大小無不識」者，以

其乘禽是禮以細小，<sup>②</sup>尚記識而拜之，況饗餼食禮之大

者，<sup>③</sup>記識可知，故云「大小無不識」。遂行，舍于郊。

始發且宿近郊，自展軛。**疏**「遂行舍于郊」○注「始發」至

「展軛」○釋曰：《曲禮》云「已駕，僕展軛」，鄭注云「具視」

也。彼是君車，故使僕展之，此卿大夫，故鄭云「自展軛」，

恐不得所故也。公使卿贈，如覲幣。贈，送也，所以

好送之也。言「如覲幣」，見爲反報也。今文「公」爲「君」。

**疏**「公使」至「覲幣」○注「贈送」至「爲君」○釋曰：「所以

好送之」者，來而不往非禮，以禮來往，皆是和好之事，故

云「好送之也」。云「言如覲幣，見爲反報也」者，以其贈之

多少，一如覲幣，故鄭云「見爲反報也」。受于舍門

外，如受勞禮，無償。不入，無償，明去而宜有已也。

如受勞禮，以贈，勞同節。**疏**注「不入」至「同節」○釋曰：

言「不入，無償」，對歸饗餼人設而有償，此則「不入，無

償」，明賓去禮宜有已。云「如受勞禮，以贈，勞同節」者，

賓來勞之，去有贈之，皆在近郊，禮又不別，故言「同節」

也。使下大夫贈上介，亦如之。使士贈衆

介，如其覲幣。大夫親贈，如其面幣，無償。

贈上介亦如之。使人贈衆介，如其面幣，士

送至于竟。使者歸，及郊，請反命。郊，近郊

也。告郊人，使請反命於君也。必請之者，以己久在外，

嫌有罪惡，不可以入。春秋時，鄭伯惡其大夫高克，使之

將兵，<sup>④</sup>逐而不納，此蓋請而不得入。**疏**「使者」至「反

①「之」，孫校云：《司儀》無，此疑涉疏而行。

②「以」，阮校云《要義》作「之」，曹校云「之」字是。

③「食」上，曹校云脫「饗」字。

④「兵」，阮校云：《釋文》無。



命」○注「郊近」至「得人」○釋曰：自此盡「拜其辱」，論使者反命之事。知郊是「近郊」者，以下文云「朝服載旌」，鄭云「行時稅舍於此郊，今還至此，正其故行服，以俟君命，敬也」者，初行云「舍於郊，斂旌」，今至此載旌而入，故知「近郊」也。云「告郊人，使請反命於君」者，以其使者至所聘之國謁闕人，明此至郊告郊人，使請可知。引《春秋》者，案閔二年《公羊傳》云「鄭伯惡高克，使之將，逐而不納，棄師之道也」，何休云「使將師救衛，隨後逐之」。彼無「大夫」文，言「大夫」者，鄭君加之也。朝服，載旌，行時稅舍于此郊，今還至此，正其故行服，以俟君命，敬也。古文「旌」作「膳」。褱，乃人。褱，祭名也，為行道累歷不祥，褱之以除災凶。疏「褱乃人」○注「褱祭」至「災凶」

○釋曰：案《春官·小祝》云「掌侯褱禱祠之祝號」，鄭注云「褱，褱卻凶咎」，故鄭此云褱是「祭名」也。乃人，陳幣于朝，西上。上賓之公幣、私幣皆陳，上介公幣陳，他介皆否。皆否者，公幣、私幣皆不陳。此幣使者及介所得於彼國君、卿大夫之贈賜也。其或陳，或不陳，詳尊而略卑也。其陳之及卿大夫處者，待之如夕幣。其禮於君者不陳。上賓，使者。公幣，君之賜也。私

幣，卿大夫之幣也。他介，士介也。言他，容眾從者。

疏

「乃人陳」至「皆否」○注「皆否」至「從者」○釋曰：云「此幣使者及介所得於彼國君卿大夫之贈賜也」者，於君所得為公幣，於卿大夫所為私幣。①賓之公幣有八：郊勞幣，一也；禮賓幣，二也；致饗餼，三也；夫人歸禮幣，四也；侑食幣，五也；再饗幣，六也；夕幣，②七也；贈賄幣，八也。此八者皆主君禮賜使者，皆用束錦，故曰公幣。賓之私幣略有十九：主國三卿、五大夫皆一食有侑幣，饗有酬幣，皆用束錦，則是十六，有三卿郊贈，則十九也。其上介公幣則有五：致饗餼，一也；夫人致禮幣，二也；侑食幣，三也；饗酬幣，四也；郊贈幣，五也。降於賓者，以其上介無郊贈幣，③又無禮賓幣，又闕一饗幣，故賓八上介五也。上介私幣有十一：主國三卿、五大夫或饗或食不備，要有一，則其幣八也，又三卿皆有郊贈，如其面幣，通前則十一也。主國下大夫嘗使己國者聘，亦有幣及之，則亦有報

①「所」下，阮校云毛本有「得」字，曹校云「得」字當有。

②「夕幣」，朱子以「夕」字為「饗」字之誤，應當在「再饗」之前。

③「贈」，曹校云當為「勞」。

幣之事，其數不定。士介四人，直有郊贈報私幣，<sup>①</sup>主國卿大夫報士介私面，<sup>②</sup>士介私幣數不甚明。云「禮於君者不陳」者，謂賄用束紡，禮用束帛乘皮，<sup>③</sup>不陳之者，以經云「公幣」，又云「上介公幣」，<sup>④</sup>他介皆否，若禮於君者一統於賓，不得云介之幣，故知「禮於君者不陳」。必禮於君不陳，禮於已始陳者，以其禮於君者是其正，故不陳之；禮於已者以其榮，故陳之。是以下注云「不加於其皮上，榮其多」，是其義也。若然，聘君以幣問卿，而其卿不見報聘君之幣者，以其尊卑不敵，若報之，嫌其敵體故也。束帛

各加其庭實，皮左。不加於其皮上，榮其多也。

**疏**

注「不加」至「多也」○釋曰：此決初夕幣時，束帛皆加于左皮上，今不言加於皮上者，若加於皮上，相掩蔽，故「不加於皮上，榮其多也」。公南鄉。亦宰告于君，君乃朝服，

出門左，南鄉。**疏**「公南鄉」○注「亦宰」至「南鄉」○釋

曰：此陳幣當如初夕幣之時，「管人布幕于寢門外。使者北面。衆介立于其左，東上。卿大夫在幕東，西面，北上。宰告於君，君朝服，出門左，南鄉」，是以鄭此注亦依夕幣而言之。卿進使者。使者執圭垂纁，北面。

上介執璋屈纁，立于其左。此主於反命。士介亦

隨入，並立東上。**疏**「卿進」至「其左」○注「此主」至「東

上」○釋曰：案上行聘禮之時，上介「屈纁授賓，賓襲」，受之，今此賓「執圭垂纁」，賓則裼，變於賓彼國致命時也。<sup>⑤</sup>

「上介執璋屈纁」者，變於賓故也。必變之者，反命致敬，少於鄰國致命時，故賓於君前得裼，見美為敬也。云「士介亦隨入，並立東上」者，此言「亦」者，亦初行受于朝時，<sup>⑥</sup>君使卿進使者，入，衆介隨入，北面，東上，此中雖不云「士介人」，明亦隨入可知。反命曰：「以君命

聘于某君，某君受幣于某宮，某君再拜。以享某君，某君再拜。」君亦揖使者進之，乃進反命也。

某君，某，國名也。某宮，若言桓宮、僖宮也。某君再拜，謂再拜受也。必言此者，明彼君敬君，已不辱命。**疏**「反

命」至「再拜」○注「君亦」至「辱命」○釋曰：云「君亦揖使

①「私」下，曹校云脫「覲」字。

②「面」下，曹校云脫「幣」字。

③「用」，曹校云當為「玉」。

④「幣」下，阮校云：《要義》有「陳」字。

⑤「賓」，阮校云毛本、《通解》無此字。

⑥「于」上，曹校云脫「命」字。

者進之，乃進反命也」者，「亦」謂亦受命於朝位，立定時，君揖使者，乃進受命，明反命亦然。「某君，某，國名」者，<sup>①</sup>若云鄭國君、齊國君。云「某宮，若言桓宮、僖宮」者，《左傳》有桓宮之楹，宮是廟名，其受聘享於廟，故以宮言之。但受聘享在大祖廟，<sup>②</sup>不在親廟四，<sup>③</sup>而云桓宮、僖宮者，略舉廟名而言也。宰自公左受玉。亦於使者之東，同面並受也。不右使者，由便也。

**疏**「宰自公左受

玉」○注「亦於」至「便也」○釋曰：此言「亦」者，亦於出使初受玉時，宰「自公左授使者圭，同面」，注云「北面並授之。凡並授者，授由其右，受由其左」。此中受由其右者，因東藏之便，故鄭云「不右使者，由便也」。受上介璋，

致命，亦如之。變反言致者，若云非君命也。致命

曰：「以君命聘於某君夫人，某君再拜。以享于某君夫人，某君再拜。」不言受幣于某宮，可知略之。

**疏**「受上」至

「如之」○注「變反」至「略之」○釋曰：云「變反言致者，若云非君命也」者，君與夫人聘於鄰國君與夫人，各有所當聘，鄰國君受命於君，今使者還反命於君，聘於鄰國夫人，當受命於夫人，使者還反命於夫人。但婦人無外事，雖聘夫人亦君命之。今使還反命，不云反命於君，變反言「致

命」者，若本非君命，猶夫人之命然，<sup>④</sup>故變反言「致」也。若然，夫人既無外事而承君命聘鄰國夫人者，<sup>⑤</sup>以其夫婦一體，共事社稷，故下記云「君以社稷故，在寡小君，拜」，是賓主相對之辭也。云「致命曰」已下，聘夫人反命無文，此鄭君依記上文反命於君之辭而言之。<sup>⑥</sup>云「不言受幣於某宮，可知略之」者，以其夫人受聘享，皆因君聘享，同時同宮，故略之也。執賄幣以告，曰：「某君使某子賄。」授宰。某子，若言高子、國子。凡使者所當以告君者，上介取以授之。賄幣在外也。

**疏**「執賄」至

「授宰」○注「某子」至「外也」○釋曰：此「賄幣」者，即上文「賄用束紡」是也。云「某子，若言高子、國子」者，案閔公二年冬，經書「齊高子來盟」，僖三十三年經書「齊國歸父

①「某君」上，阮校云：毛本有「云」字。

②「在」，阮校云：毛本作「於」。

③「不在親廟四」，阮校云：毛本「在」作「出」，「四」字，毛本、《通解》無。

④「猶夫人之命」，阮校云：《要義》無。

⑤「夫」，阮校云：《要義》作「婦」。

⑥「記」，曹校云當為「託」。

來聘」，《左傳》曰「國子爲政，齊猶有禮」者是也。云「凡使者所當以告君者，上介取以授之」者，以上受上介璋，是上介授賓，明其餘皆上介取以授之。云「賄幣在外」者，以其上文云「禮於君者不陳」，此賄幣即是禮於君前，<sup>①</sup>明在外也。禮玉亦如之。亦執束帛加璧也。告曰：「某君使

某子禮。」宰受之，士隨自後左士介，受乘皮如初。上介出，取玉、束帛，士介從取皮也。

**疏**「禮玉亦如之」○注

「亦執」至「皮也」○釋曰：此即上云「禮玉束帛、乘皮」，鄭注云「禮，禮聘君也，所以報享也」。云「亦執束帛加璧也」

者，言「亦」，亦上文行享時，「束帛加璧」者也。云「宰受之，士隨自後左士介，受乘皮」者，此約初行享之時，「公側授宰幣」，「士受皮」皆「自後右客」，今執享皮幣玉，<sup>②</sup>宰受

之可知。言「宰受之，士隨自後」，隨宰，自後謂自士介後。<sup>③</sup>其在東上者，不須云自後，其餘三人皆後，乃得左

之。必左士介者，取向東藏之便故也。云「上介出取玉、束帛，士介從取皮也」者，此亦初享之時，<sup>④</sup>賓奉束帛加

璧，是上介取以授賓，明士介從取皮可知。執禮幣以

盡言賜禮。禮幣，主國君初禮賓之幣也。以盡言賜

禮，謂自此至於贈。

**疏**注「禮幣」至「於贈」○釋曰：云「禮

幣，主國君初禮賓之幣也」者，謂從郊勞已後，至於贈賄，

八度禮賓，皆有幣，是自郊勞爲初也。云「以盡言賜禮，謂

自此至於贈」者，此則郊勞也。公曰：「然，而不善

乎！」善其能使於四方。而猶女也。授上介幣，再

拜稽首。公荅再拜。授上介幣，當拜公言也。不授

宰者，當復陳之。

**疏**「授上」至「再拜」○注「授上」至「陳

之」○釋曰：云「不授宰者，當復陳之」者，此幣皆先陳之，

今賓執以告君，賓釋辭，君曰「勤勞使於四方」，故授上介

幣，當拜荅君言。此幣不授與宰者，當復陳之於本處。此

幣入於己者，故不授宰也。上賄幣禮君者，反命訖，皆授

宰，故以此決之。私幣不告。亦略，卑也。君勞

之，再拜稽首，君荅再拜。勞之以道路勤苦。若

有獻，則曰：「某君之賜也，言此物某君之所賜予

爲惠者也。其所獻雖珍異，不言某爲彼君服御物，謙也。

①「前」，曹校云似當爲「者」。

②「享皮」，曹校云當爲「報享」。

③「隨宰自後」，阮校云：毛本作「者」。

④「亦」下，曹校云脫「約」字。

其大夫出，反必獻，忠孝也。

**疏**「若有」至「賜也」○注「言

此」至「孝也」○釋曰：此獻物謂入賓者，故下記云「既覲，賓若私獻，奉獻將命」，注云「時有珍異之物，或賓奉之，猶以君命致之」，則是賓亦言有私獻於彼君，<sup>①</sup>則彼君亦有私獻報賓，則此獻者也。云「大夫出，反必獻忠孝也」者，案《下曲禮》云「大夫私行出疆，必請，反必有獻」。彼私行出疆，反必有獻，此以公聘出疆，反亦有獻，故云「大夫出，反必獻」。此以入己之物獻於君者，忠孝也。事君言忠，事父言孝，此獻君，忠也，而兼言「孝」者，忠臣出孝子之門，故連言「孝」也。君其以賜乎？不必其當君也。獻不拜者，為君之荅己也。

**疏**「君其以賜乎」○注「不必」

至「己也」○釋曰：言「君其以賜乎」者，大夫所獻之物，謙不必當君所須，此物君其以賜臣下乎？言「乎」者，或當君意，或不當君意，故言「乎」以疑之。云「不拜者」，<sup>②</sup>為君之荅己也者，士拜國君，國君不拜，士賤故也。大夫拜國君，國君即荅拜，大夫尊故也。故云「不拜者，為君之荅己拜」。若然，自反命以來，盡於賜禮之等，或拜，或不拜，無「荅己」之嫌，獨此不拜，「為君之荅己」者，自此以前，皆是彼國報君之物，賓直告事而已，君受之而無言，故賓不拜，

君有言及己者乃拜之，拜君言也。此獻是彼國君賜於己，

理須拜送，是以《玉藻》云「凡獻於君，大夫使宰，士親，皆再拜稽首送之」，又《郊特牲》云「大夫有獻弗親，不面拜，為君之荅己」，亦此類，故鄭云「獻不拜者，為君之荅己」。若然，《玉藻》不親，此親者，此因反命，故親獻也。上介

徒以公賜告，如上賓之禮。徒謂空手，不執其幣。

君勞之，再拜稽首，君荅拜。勞士介亦如之。士介四人，旅荅壹拜，又賤也。**疏**注「士介」至「賤

也」○釋曰：鄭知旅荅士介共一拜者，君勞上介，上介再拜稽首，君荅拜，不言再拜，則君荅上介一拜矣。勞士亦如之，不言皆，則摠荅一拜矣。勞賓君荅再拜，勞上介君荅一拜，對賓再拜已是賤矣，今此士介四人共荅一拜，故云「又賤也」。此一拜荅臣下，則《周禮·大祝》辨九拜，「七曰奇拜」是也，是以彼注云「一拜荅臣下」也。案《曲禮》云「君於士不荅拜」，此君荅拜士者，以其新行反命，君勞苦之，故荅拜，異於常也。君使宰賜使者幣。使者

①「亦言」，曹校云此二字衍。

②「云」下，阮校云：毛本有「獻」字。

再拜稽首。以所陳幣賜之也。禮，臣子人賜之而必獻之君父，不敢自私服也。君父因以予之，則拜受之，如更受賜也。既拜，宰以上幣授之。

**疏**「君使」至「稽首」○注

「以所」至「授之」○釋曰：云「禮，臣子人賜之而必獻之君父，不敢自私服也。君父因以予之，則拜受之，如更受賜也」者，案《內則》云「婦或賜之衣服，則受而獻諸舅姑，舅姑受之，則喜。若反賜之，則辭。不得命，如更受賜」，臣子於君父亦然。言此者，證此經君使宰以所獻之物反賜使者，使者辭，不得命，再拜稽首受之，如更受賜。云「既拜，宰即以上幣授之」者，以其上文云「執禮幣，授上介」者，是執上幣，不執下幣，明知宰所執授之者，是上幣可知。賜介，介皆再拜稽首。士介之幣皆載以造朝，不陳之耳。與上介同受賜命俱拜，既拜，宰亦以上幣授上介。乃退。君揖入，皆出去。

**疏**「乃退」○注「君揖入

皆出去」○釋曰：知「君揖入，皆出去」者，初賓將行，君前受命訖，君揖入，揖賓介出，<sup>①</sup>故知此君退者，亦反命訖，賓介出可知。介皆送至于使者之門，將行俟于門，反又送于門，與尊長出入之禮也。

**疏**「介皆」至「之門」○

注「將行」至「禮也」○釋曰：云「將行俟於門」，是出之禮。

初行之時，介皆至賓門俟賓同行，今行反，又送至于門，是人之禮。故云「與尊長出入之禮」。乃退，揖。揖別也。使者拜其辱。隨謝之也。再拜上介，三拜士介。

**疏**注「再拜上介三拜士介」○釋曰：上介是大夫，與己同

類，故知再拜。士卑，與己異類，各一拜，故言「三拜士介」。釋幣于門，門，大門也。主于闕，布席于闕西，闕外，東面。設洗于門外，東方。其餘如初于櫺時。出于行，入于門，不兩告，告所先見也。

**疏**「釋幣于門」○注

「門大」至「見也」○釋曰：自此盡「亦如之」，論賓上介使還禮門神及奠於櫺之事。知「門」是大門者，以其從外來，先至大門，即禮門神，故知「門」是大門也。案《特牲》筮時云「席於門中，闕西，闕外」，故知此亦「席于闕西，闕外」。知「東面」者，神居東面為正故也。云「設洗于門外，東方」者，以其廟在學，<sup>②</sup>設洗皆云「洗當東榮」，故在門外亦在東方也。云「其餘如初于櫺時」者，初出亦釋幣於行，不如

<sup>①</sup>「揖」，曹校云此字衍。

<sup>②</sup>「在」，曹校云當為「若」。

之者，以其初出於廟，<sup>①</sup>禮文具設，于行其文略，故此云如禴時也。言「如」者，謂「釋幣於」，<sup>②</sup>祝先人，已下「埋于西階東」是也。<sup>③</sup>云「出于行，入于門，不兩告，告所以先見也」者，<sup>④</sup>出時自廟出，先見行，即告行，入時先見門，故告門，出入皆告一，故云「不兩告」也。乃至于禴。筵几于室，薦脯醢。告反也。薦，進也。

**疏**「乃至」至

「脯醢」○注「告反也薦進也」○釋曰：云「筵几于室」者，還以《特牲》、《少牢》，<sup>⑤</sup>「司宮設席于奧，東面，右几」。但無牲牢，進脯醢而已，以告祭非常故也。觴酒陳。主人酌，進奠，一獻也。言陳者，將復有次也。先薦後酌，祭禮也。行釋幣，反釋奠，略出謹人也。

**疏**「觴酒陳」○注「主

人」至「人也」○釋曰：云「言陳者，將復有次也」者，但云主人一獻當言奠，今不言奠而言「陳」者，以其下仍有室老及士獻，以備三獻，故言「陳」。「陳」，有次第之言，以其三時次第皆列于坐者也。云「先薦後酌，祭禮也」者，以其《特牲》、《少牢》皆先薦饌，乃後獻奠于銅南。<sup>⑥</sup>此與彼同，故云「先薦後酌，祭禮也」。云「行釋幣，反釋奠，略出謹人也」者，必「略出謹人」者，出時以禱祈，入時以祠報，故不同也。席于阼。為酢主人也。酢主人者，祝取爵酌，不

酢於室，異於祭。**疏**「席于阼」○注「為酢」至「於祭」○釋

曰：鄭知「祝取爵酌」者，案《特牲》、《少牢》尸酢主人，祝取爵以酢主人，<sup>⑦</sup>但此無尸為異也。「不酢於室，異於祭」者，此決《特牲》、《少牢》皆於室內，尸東西面受酢。此乃於外行來告反，故在阼不在室，知與正祭異也。又於正祭時有尸，尸飲卒爵，以尸爵酢主人，此告祭，無尸，爵兼奠，故別取爵以酢主人，亦異也。薦脯醢。成酢禮也。

**疏**

「薦脯醢」○注「成酢禮也」○釋曰：此奠，<sup>⑧</sup>謂若《特牲》、《少牢》主人受酢時，皆席于戶內，有薦俎。此雖無俎，亦薦脯醢于主人之前，以成酢禮也。三獻。室老亞獻，士

①「廟」，曹校云當為「禴」。

②「於」下，曹校云脫「禴」字。

③「埋」上，曹校云脫「至」字。

④「以」，阮校云：毛本、《要義》無。按各本注俱無「以」字。

⑤「以」，曹校云似當為「依」。

⑥「獻」，曹校云當為「酌」。

⑦「祝取爵以酢主人」，曹校云當為「祝取爵酌授尸，尸以酢主人」。

⑧「奠」，曹校云當為「薦」。

三獻也。每獻奠輒取爵酌，主人自酢也。

**疏**「三獻」○注

「室老」至「酢也」○釋曰：鄭注《喪服》云「室老，家相。士，邑宰」，知無主婦而取士者，以其自外來，主於告反，即釋奠於禰廟，故知主婦不與而取士備三獻。必知有室老與士者，以其前大夫致饗餼於賓時，<sup>①</sup>使「老牽牛以致之」，<sup>②</sup>鄭注云皆「大夫之貴臣」，故知此亦貴臣爲獻也。<sup>③</sup>云「每獻奠輒取爵酌」者，此通三獻皆獻奠訖，別取爵自酢，故云「輒取爵酌」也。別云「主人自酢」者，對正祭有尸，三獻，皆獻尸訖，尸酢主人、主婦、賓長，今此無尸，皆自酢。獨云「主人」者，主人爲首正，故舉前以包後。一人舉爵，三獻禮成，更起酒也。主人奠之未舉也。

**疏**「一人舉爵」

○注「三獻」至「舉也」○釋曰：云「三獻禮成」者，大夫、士家祭三獻，《特性》、《少牢禮》是也。云「更起酒」者，此欲獻酬從者，不得酌神之尊，是以《特性》行酬時設「尊兩壺於阼階東，西方亦如之」，鄭注云「謂酬賓及兄弟」，則此亦當然，故知別取酒也。云「主人奠之未舉」者，以其下文云「獻從者」乃云「行酬」，似《鄉飲酒》、《鄉射》一人舉觶未舉，待獻介、衆賓後，乃行酬亦然也。獻從者，從者，家臣從行者也。主人獻之，勞之也。皆升飲酒於西階上。

不使人獻之，辟國君也。

**疏**「獻從者」○注「從者」至「君

也」○釋曰：知升飲於上者，案《特性禮》獻衆賓及兄弟之等，皆升飲於西階上，故此獻從者亦於階上可知。云「不使人獻之，避國君」者，若正祭，雖國君亦自獻，故《祭統》云「尸飲五，君洗玉爵獻卿，尸飲七，君洗瑤爵獻大夫」之等。若然，則告祭非常，今獻從者從燕法。案《燕禮》使宰夫爲獻主，是國君不親獻，此大夫親獻，故云「避國君也」。行酬，乃出。主人舉奠酬從者，下辯，室老亦與焉也。

**疏**注「室老亦與」○釋曰：知者，案《燕禮》使者勞者在者

亦與，<sup>④</sup>故知此室老亦與。不言士者，文不具，亦與可知。上介至，亦如之。聘遭喪，人竟則遂也。遭

喪，主國君薨也。人竟則遂，國君以國爲體。士既請事，已人竟矣。闕人未告則反。

**疏**「聘遭喪人竟則遂也」○

注「遭喪」至「則反」○釋曰：自此盡「卒殯乃歸」，上陳吉行

①「饗」，曹校云此字衍。

②此句之下，曹校云脫「饗士介士牽羊以致之」九字。

③「故」，阮校云：陳、閩無。

④「使者勞者」，曹校云當爲「勞使者」。



聘之事，<sup>①</sup>此以下論或遭主國君喪，或聘君薨於後，或使者與介身卒，安不忘危，故見此非常之事。從此盡「練冠以受」，論主國君或夫人薨，或世子死，行變禮之事。云「以國爲體」者，謂《公羊傳》宋人執鄭祭仲，使之逐忽而立突，仲以逐忽則國存，不逐則國滅，故逐忽而立突，是以國爲體。但聘君主以聘國，故君雖薨而遂入。「關人未告則反」者，聘使至關，乃謁關人，關人入告君，君知乃使士請事，已入關自然入矣。若關人未告君，君不知，使者又未入，聞主國君死，理當反矣。不郊勞，子未君也。

**疏**

「不郊勞」○注「子未君也」○釋曰：案文公八年天王崩，九年毛伯來求金，《公羊傳》曰「何以不稱使？當喪未君也。

踰年矣，何以謂之未君？即位矣而未稱王也。未稱王，

何以知其即位？以諸侯踰年即位，亦知天子之踰年即位

也。<sup>②</sup>以天子三年然後稱王，亦知諸侯於其封內三年稱

子」。若然，云「子未君」，《公羊傳》文。但彼據踰年即位

後，此據新遭父喪。引之者，以其同是子未君故也。不

筵几，致命不於廟，就尸柩於殯宮，又不神之。

**疏**「不筵

几」○注「致命」至「神之」○釋曰：「不筵几，致命不於廟」，

決正聘設几筵也。「就尸柩於殯宮」者，國君雖以國爲體，

主聘其國，但聘亦爲兩君相好，<sup>③</sup>今君薨當就尸柩，故不就祖廟也。云「又不神之」者，以其鬼神所在曰廟，則殯宮亦得爲廟，則設几筵亦可矣。但始死不忍異於生，不神之，故於殯傍無几筵也。《曾子問》云「君薨世子生」，告殯，殯東有几筵者，鄭云「明繼體也」，然則尋常則殯東不設几筵，當在室內矣。不禮賓。喪，降事也。

**疏**「不禮

賓」○注「喪降事也」○釋曰：云「不禮」者，謂既行聘享訖，

不以醴酒禮賓也。主人畢歸禮，賓所飲食，<sup>④</sup>不可廢

也。禮謂饗餼饗食。**疏**「主人畢歸禮」○注「賓所」至「饗

食」○釋曰：知「歸禮」中兼有饗食者，主人有故，雖饗食亦

有生致法，故主人亦歸之。且下文云「賓唯饗餼之受」，明

本并饗食亦歸賓，乃就中受饗餼。若本不歸饗食，空歸饗

餼，何頓云「饗餼之受」，<sup>⑤</sup>明其時并致饗食也。賓唯饗

①「吉」原作「告」，據重刊單疏本改。

②「知」，阮校云：毛本作「如」。

③「亦」，阮校云：毛本作「則」。

④「所」，阮校云：《集釋》作「於」。

⑤「頓」，阮校云《要義》作「須」，曹校云「須」字是。

餽之受。受正不受加也。**疏**「賓唯饗餽之受」○注「受

正不受加也」○釋曰：饗餽大禮是其正，自饗食之等是其加也。不賄，不禮玉，不贈。喪殺，禮爲之不備。

**疏**「不賄不禮玉不贈」○注「喪殺禮爲之不備」○釋曰：云

「不賄」者，皆據上文，謂不以束紃。<sup>①</sup>「不禮玉」者，謂不

以束帛、乘皮以報享。「不贈」者，賓出至郊，不以物贈之

也。遭夫人、世子之喪，君不受，使大夫受于

廟，其他如遭君喪。夫人、世子死，君爲喪主，使大

夫受聘禮，不以凶接吉也。其他謂禮所降。**疏**「遭夫」至

「君喪」○注「夫人」至「所降」○釋曰：云「夫人、世子死，君

爲喪主」者，案《禮記·服問》云「君所主夫人、妻、大子、適

婦」，鄭注云「言妻，見大夫以下亦爲此三人爲喪主也」，故

云「君爲喪主」。既爲喪主，是以使大夫受聘禮，不以凶接

吉也。云「其他謂禮所降」者，謂「不禮」以下，「不贈」以

上，皆闕之。遭喪，將命于大夫，主人長衣、練

冠以受。遭喪，謂主國君薨，夫人、世子死也。此三者

皆大夫攝主人。長衣，素純布衣也。去衰易冠，不以純凶

接純吉也。吉時在裏爲中衣。中衣、長衣繼皆掩尺，表之

曰深衣，純袂寸半耳。君喪不言使大夫受，子未君，無使臣義也。**疏**「遭喪」至「以受」○注「遭喪」至「義也」○釋

曰：此經摠說上三人死，主君不得受命，故使將命於大夫。

主人即大夫，故鄭云「此三者皆大夫攝主人」也。云「長

衣，素純布衣」者，此長衣則與深衣同布，但袖長素純爲

異，故云「長衣，素純布衣也」。此長衣之緣以素爲之，故

云「素純」也。「去衰易冠」者，謂脫去斬衰之服而著長

衣，<sup>②</sup>脫去六升、九升之冠而著練冠，故云「去衰易冠」也。

云「不以純凶接純吉」者，聘禮是純吉禮，爲君三升衰裳，

六升冠，爲夫人、世子六升衰裳，九升冠，是純凶禮，麻經

與屨不易，直去衰易冠而已，故云「不以純凶接純吉」。云

「吉時在裏爲中衣，中衣、長衣繼皆掩尺，表之曰深衣，純

袂寸半耳」，鄭言此者，欲廣解長衣、中衣、深衣三者之義。

此三者之衣，皆用朝服十五升布，六幅分爲十二幅，而連

衣裳，袖與純緣則異，故云「吉時在裏爲中衣」。「中衣與

長衣繼皆掩尺」者，案《玉藻》云「長、中繼掩尺」，鄭注云

「其爲長衣、中衣，則繼袂，揜一尺」，此鄭云「吉時之服」。

① 「紃」下，曹校云脫「遭聘君」三字。

② 「之」上，曹校云脫「齊衰」二字。

「純袂寸半」者，純爲衣裳之側，袂爲口緣，皆寸半，表裏共三寸。案《深衣目錄》云：「深衣，連衣裳而純以綵，純素曰長衣，有表則謂之中衣。」以此言之，則長衣、中衣皆用素純。云「君喪不使大夫受，子未君，無使臣義也」者，其疏見於上。若然，臣爲君斬，爲夫人、世子期，輕重不同，今受鄰國之聘禮，同用「長衣、練冠」者，但接鄰國者，禮不可以純凶，故權制此服，略爲一節耳。向來所釋皆是君主始薨，假令君薨踰年，嗣子即位，鄰國朝聘，以吉禮受之於廟。故成十七年經書「邾子貜且卒」，十八年「邾宣公來朝」，傳云「即位而來見」。踰年可以朝他國，他國來朝，亦得以吉禮受之於廟矣。雖踰年而未葬，則不得朝人，人來朝已，亦使人受之於廟。於夫人、世子亦然，以其本爲死者來故也。聘，君若薨于後，人竟則遂。既接於主國君也。**疏**「聘君」至「則遂」○注「既接於主國君也」○釋曰：自此盡「唯稍，受之」，論聘者遭己君之喪，行非常之禮事。云「接於主國」者，<sup>①</sup>謂謁關人，關人告君，君使士請事，是接於主國矣。<sup>②</sup>故入境則遂也。赴者未至，則哭于巷，衰于館，未至，謂赴告主國君者也。哭于巷者，哭于巷門，未可爲位也。衰于館，未可以凶服

出見人。其聘享之事，自若吉也。今文「赴」作「訃」。**疏**

「赴者」至「于館」○注「未至」至「作訃」○釋曰：「未至，謂赴告主國君者也」，以其本國遭喪，赴者有兩使，一使告聘者，一使告主國。云「未可爲位」者，以其赴主國之使未至，是以未可爲位受人弔禮。云「衰于館，未可以凶服出見人」者，對下經「赴者至，則衰而出」。云「其聘享之事自若吉」者，下云受饗餼之禮，故知先行聘享，乃後受禮，以其主國未得赴告，故自若吉也。受禮，受饗餼也。**疏**

「受禮」○注「受饗餼也」○釋曰：上文遭主國之喪，「賓唯饗餼之受」，受禮亦饗餼之禮。不受饗食。亦不受加。

**疏**「不受饗食」○注「亦不受加」○釋曰：上文遭主國之喪，云「唯饗餼之受」，注云「受正不受加也」，加即此「饗食」也，故此云「亦不受加」也。赴者至，則衰而出。禮，爲鄰國闕，於是可以凶服將事也。**疏**「赴者」至「而

出」○注「禮爲」至「事也」○釋曰：云「禮，爲鄰國闕」者，案襄二十三年《春秋左氏傳》云「杞孝公卒，晉悼夫人喪之，

<sup>①</sup>「國」下，阮校云：毛本有「君」字。

<sup>②</sup>「國」，阮校云：《通解》、毛本作「君」。

平公不徹樂，非禮也。禮，為鄰國闕，服注云「鄰國尚為之闕樂，況舅甥之親乎」。若然，赴者至主國，君使者衰而出，則主國可以闕樂。云「於是可以凶服將事」者，謂主人所歸禮，則實可以凶服受之。其正行聘享，則著吉服矣，故《雜記》云「執玉不麻」是也。唯稍受之。稍，稟食也。

**疏**「唯稍受之」○注「稍稟食也」○釋曰：禮，君行師從，卿行旅從。從者既多，不可闕於稍食。案《周禮》每云「稍事」，皆謂米稟，以其稍稍給之，故謂米稟為稍。歸，

執圭復命于殯，升自西階，不升堂。復命于殯者，臣子之於君父，存亡同。**疏**「歸執」至「升堂」○注「復

命」至「亡同」○釋曰：自此盡「即位，踊」，論使者喪還，<sup>①</sup>執圭還國復命之事。云「臣子之於君父，存亡同」者，案

《禮記》奔父母之喪，升自西階，此「復命於殯」，亦「升自西階」。法生時出必告，反必面，故云「臣子於君父，存亡同」也。子即位，不哭。將有告請之事，宜清淨也。不言

世子者，君薨也。諸臣待之，亦皆如朝夕哭位。**疏**「子即

位不哭」○注「將有」至「哭位」○釋曰：云「不言世子者，君薨也」者，案《公羊傳》「君存稱世子，君薨稱子某，既葬稱

子，踰年稱君」。案上文稱「世子」，此文單稱「子」，是知其君薨，故君不稱某，而與此既葬同號者，以其既不得稱世子，略云「子」而已，故不言某。其實正法稱子某，是以《雜記》在殯待鄰國之使，皆稱某。云「諸臣待之，亦皆如朝夕哭位」者，但臣子一例。<sup>②</sup>上下文唯言子，不言群臣，與子同。知「如朝夕哭位」者，案《奔喪》云：「奔父之喪，在家者待之皆如朝夕哭位。」故知此亦然。辯復命，如聘。自陳幣至于上介以公賜告，無勞。

**疏**「辯復命如聘」○注「自陳」至「無勞」○釋曰：言「辯復命，如聘」者，上文君存時，使者復命，自「陳公幣」已下至「賜告」之等，<sup>③</sup>今復命於殯所，亦盡陳之，故言「辯」。知「無勞」者，勞，主君出命，今君薨，不可代君出命，故知無勞也。子、臣皆哭。使者既復命，子與群臣皆哭。**疏**「子臣皆哭」○注「使者」

至「皆哭」○釋曰：此據子在位哭，亦兼群臣，故鄭云「子與群臣皆哭」。與介人，北鄉哭。北鄉哭，新至，別於

①「喪還」，曹校云當為「遭喪」。

②「列」，阮校云：毛本作「例」。

③「至」下，曹校云脫「上介以公」四字。

朝夕。**疏**「與介人北鄉哭」○注「北鄉」至「朝夕」○釋曰：

使者升階復命訖，不見出文，而言「與介人」者，以其復命之時，介在幣南北面，去殯遠，復命訖，除去幣，賓更與介前人，近殯北鄉哭，鄉內爲人，故云「與介人，北鄉哭」也。云「北鄉哭，新至，別於朝夕」者，朝夕哭位在阼階下西面，今於殯前北鄉，故云「別於朝夕」也。出，袒、括髮。悲哀變於外，臣也。

**疏**「出袒括髮」○注「悲哀變於外臣也」○釋曰：案《奔喪》云「至於家，入門左，升自西階」，東面哭，括髮，袒於殯東。是於內者，子故也。此使者出門，「袒，括髮」，變於外者，臣故也。入門右，即位踊。

從臣位。自哭至踊，如奔喪禮。

**疏**「入門右即位踊」○注

「從臣」至「喪禮」○釋曰：案《奔喪》云袒、括髮，於西階東，<sup>①</sup>即位踊，「襲，經於序東」。此門外袒、括髮，「入門右，即位踊」，亦當襲，經於序東，故鄭云「自哭至踊，如奔喪禮」也。若有私喪，則哭于館，衰而居，不饗食。私喪，謂其父母也。哭于館，衰而居，不敢以私喪自聞于主國，凶服于君之吉使。《春秋傳》曰：「大夫以君命出，聞喪，徐行而不反。」**疏**「若有」至「饗食」○注「私喪」至

「不反」○釋曰：自此盡「從之」，論使者有父母之喪，行變禮之事。云「不敢以私喪自聞于主國」者，解「哭于館」。

又云「凶服于君之吉使」者，亦取不敢解之，言「衰而居」，謂服衰居館，行聘享即皮弁吉服，故不敢「凶服于君之吉使」也。引《春秋傳》者，案宣八年經書「夏六月，公子遂如齊，至黃乃復」，《公羊傳》云「其言至黃乃復何？有疾也。何言乎有疾乃復？譏。何譏爾？大夫以君命出，聞喪，

徐行而不反」，何氏注「聞大喪而不反，重君命也。徐行者，爲君當使人追代之。以喪喻疾者，喪猶不還，而況疾乎」是也。以此言之，使雖未出國境，聞父母之喪，遂行，不敢以私廢王事，君使人代之可也。以此言之，明至彼所使之國，雖聞父母之喪，不反可知，是以「哭于館，衰而居」。歸，使衆介先，衰而從之。已有齊、斬之服，不忍顯然趨於往來。其在道路，使介居前，歸又請反命，已猶徐行隨之，君納之乃朝服。既反命，出公門，釋服，哭而歸。其它如奔喪之禮。吉時道路深衣。**疏**「歸使」至「從之」○注「已有」至「深衣」○釋曰：云「已有齊、斬之服」

<sup>①</sup>「於西階」，曹校云似當爲「降堂」二字。

者，以其私喪之內，有爲父斬，爲母齊衰，故齊、斬並言之也。云「不忍顯然趨於往來」者，解經並「使衆介先，<sup>①</sup>衰而從之」意。經云「歸」，據反國時，兼云「往」者，鄭意去時聞父母之喪，不敢即反，亦「使衆介先，衰而從之」，故往來並言。云「在道路，使介居前」者，謂去向彼國時。云「歸又請反命，己猶徐行隨之」者，此謂還國至近郊，使人請反命，君許入，猶使介居前，徐行於後，隨介至國也。云「君納之乃朝服」者，以其行聘之時，猶不以凶服干君之吉使而服吉服，知此反命時，亦不以凶服干君之吉使而服朝服，如吉時反命矣。云「出公門，釋服，哭而歸」者，案《雜記》云「大夫、士將與祭於公，既視濯而父母死，則猶是與祭也，次於異宮。既祭，釋服出公門外，哭而歸」，亦云「其它如奔喪之禮」，明此亦出公門，釋朝服而歸。但彼祭服不可著出，故門內釋服，此朝服可以著，出門乃釋服，爲異也。云「其他如奔喪之禮」者，案《奔喪》云：「至於家，入門左，升自西階，殯東，西面坐，哭盡哀，括髮、袒。降堂東，即位，西鄉哭，成踊。襲，經于序東，絞帶，反位。拜賓，成踊。送賓，反位。有賓後至者，則拜之，成踊，送賓，皆如初。衆主人、兄弟皆出門，出門哭止，闔門，相者告就次。於又哭，括髮、袒，成踊。於三哭，猶括髮、袒，成踊。三日

成服，拜賓、送賓皆如初。」云「吉時道路深衣」者，以其朝服之下，唯有深衣，庶人之常服，既以朝服反命，出門去朝服，還服吉時深衣，三日成服乃去之。

### 儀禮疏卷第二十三

江寧府知府陽城張敦仁編校 元和縣

學生員顧廣圻覆校

①「並」，阮校云：毛本作「歸」。

## 儀禮疏卷第二十四

唐朝散大夫行大學博士弘

文館學士臣賈公彥等撰

賓人竟而死，遂也。主人爲之具而殯。具謂

始死至殯所當用。

**疏**「賓人」至「而殯」○注「具謂」至「當

用」○釋曰：自此盡「卒殯乃歸」，論賓介死之事。云「賓人

境而死，遂也」者，若未入境，即反來。云「主人爲之具而

殯」者，謂從始死至殯所當用者，主人皆供之。鄭云「具謂

始死至殯所當用」，直云「至殯所當用」，明不殯於館，取其

至殯節，<sup>①</sup>主人供喪具。以其大斂訖即殯，故連言殯，故

下文「歸，介復命」之時，柩止門外，明斂於棺而已。介攝

其命。爲致聘享之禮也。初時上介接聞命。**疏**「介攝

其命」○注「爲致」至「聞命」○釋曰：云「初時上介接聞命」

者，鄭解介得代賓致命之意。以其命出於君，初賓受命於

君之時，賓介同北面，上介接聞君命矣。以是今賓死，得

攝其命。君弔，介爲主人。雖有臣子親因，猶不爲

主人，以介與賓並命於君，尊也。**疏**「君弔介爲主人」○

注「雖有」至「尊也」○釋曰：古者賓聘，家臣、適子皆從行，

是以延陵季子聘於齊，其子死，葬於嬴、博之間，故鄭云

「雖有臣子親因，猶不爲主人」以其介尊故也。主人歸

禮幣，必以用。當中奠贈諸喪具之用，不必如賓禮。

**疏**「主人」至「以用」○注「當中」至「賓禮」○釋曰：賓既

死，主人所歸禮與幣必以當喪者之用。云「當中奠贈」

者，<sup>②</sup>解經中小斂、大斂之用。<sup>③</sup>云「當中奠贈諸喪具之

用」者，<sup>④</sup>具謂襲與小斂、大斂，<sup>⑤</sup>解經「幣」。云「不必如賓

<sup>①</sup>「至殯所」至「取其」十二字，阮校云：陳、闕俱無，毛本

有，惟「殯」下多一「爲」字。

<sup>②</sup>「贈」，曹校云此字疑衍。

<sup>③</sup>曹校云「中」當爲「禮」，「小」上似脫「奠謂」二字，「用」

當爲「奠」。

<sup>④</sup>「當中奠」，曹校云此三字衍。

<sup>⑤</sup>此句下，曹校云似脫「諸衣物」三字。

禮者，不必如致飧饗之禮，束紡、皮帛之類，<sup>①</sup>不堪喪者之用故也。介受賓禮，無辭也。介受主國賓己之

禮，無所辭也，以其當陳之以反命也。有賓喪，嫌其辭之。

**疏**「介受賓禮無辭也」○注「介受」至「辭之」○釋曰：云

「介受主國賓己之禮」者，謂公幣、私幣之屬，故鄭云「當陳之以反命也」。言無辭者，雖無三辭，以其賓受饗餼之時禮辭，受食三辭，明介亦有禮辭。云「無所辭也」者，以有賓喪，<sup>②</sup>嫌介有三辭，故云「介受賓禮無辭也」。不饗

食。**疏**「不饗食」○釋曰：案上遭君喪，受饗餼，不受饗

食，鄭云「受正不受加」。此云「不饗食」，介不就君受饗食，明受饗餼正禮也。歸，介復命，柩止于門外。

門外，大門外也。必以柩造朝，達其忠心。**疏**「歸介」至

「門外」○注「門外」至「忠心」○釋曰：知「門外」是「大門外」者，國君有三門，皋、應、路，又有三朝，內朝在路寢庭，

正朝在路門外，應門外無朝，外朝當在皋門外。經直云「止於門外」，無人門之言，明知止於大門外外朝之上，是以上賓拜賜皆云「於門外」，亦在外朝矣，故鄭云「必以柩造朝，達其忠心」也。介卒復命，出，奉柩送之。

君弔，卒殯。卒殯，成節乃去。**疏**「介卒」至「卒殯」○

注「卒殯成節乃去」○釋曰：當介復命之時，賓之尸柩在外

朝上。「介卒復命」，謂復命訖，出君大門，奉賓之柩，送至

賓之家。屍柩入，殯於兩楹之間，君往就弔。「卒殯」者，

謂殯訖。殯是喪之大節，故云「卒殯，成節乃去」，謂君與

大夫盡去。若大夫介卒，亦如之。不言上介者，小

聘，上介士也。**疏**「若大」至「如之」○注「不言」至「士也」

○釋曰：云「不言上介者，小聘，上介士也」者，案經「大夫

介卒」，據大聘上介是大夫而言，今鄭以經不言上介，則

「大夫介卒」中兼有聘使大夫，其卒亦如之，故鄭云「不言

上介，小聘，上介士也」，欲兼見小聘之法也。若小聘，上

介、未介皆士，則入下文「士介死」中，以其下文更不見小

聘賓介死法，故此兼言之也。士介死，為之棺，<sup>③</sup>斂

<sup>①</sup>「紡」，曹校云當為「錦」。「類」，阮校云《要義》作

「贈」。

<sup>②</sup>「有」，阮校云：毛本作「其」。

<sup>③</sup>「為」上，阮校云：《要義》有「則」字。



之。不具佗衣物也，<sup>①</sup>自以時服也。

**疏**注「不具」至「服

也」○釋曰：以其士介卑，其禮降於賓與上介，非直具棺，他衣物亦具之，<sup>②</sup>此士介直具棺，不具他物也，<sup>③</sup>其士介從者自用時服斂之。君不弔焉。主國君使人弔，不親

往。**疏**「君不弔焉」○注「主國」至「親往」○釋曰：云「主

國君使人弔，不親往」者，對上經賓死「君弔，介爲主人」，

此士云「不弔」者，明不親弔，使人弔之可知也。若賓

死，未將命，則既斂于棺，造于朝，介將命。

未將命，謂俟閒之後也。以柩造朝，以已至朝，志在達君

命。**疏**「若賓」至「將命」○注「未將」至「君命」○釋曰：前

云「賓入境而死」，謂在路死，未至國，此經更說賓至朝，俟

閒之後，使大夫致館，未行聘享而賓在館死之事，故鄭云

「俟閒之後」。是以鄭云「以柩造朝」，<sup>④</sup>以其既至朝，「志

在達君命」，則知上國外死，不以柩造朝可知。若介死，

歸復命，唯上介造于朝。若介死，雖士介，

賓既復命，往，卒殯乃歸。往謂送柩。小聘曰

問。不享，有獻，不及夫人，主人不筵几，不

禮，面不升，不郊勞。記貶於聘，所以爲小也。獻，

私獻也。面猶覲也。**疏**「小聘」至「郊勞」○注「記貶」至

「覲也」○釋曰：自此盡「三介」，論侯伯行小聘之事。云

「不享」者，謂不以束帛加璧，獻國所有。云「不禮」者，聘

訖不以齊酒禮賓。<sup>⑤</sup>「面不升」者，謂私覲庭中受之，不升

堂，此對大聘升堂受。<sup>⑥</sup>若然，不言「私覲」而言「面」者，

對大聘言「覲」，故辟之而言「面」也。其禮如爲介，三

介。如爲介，如爲大聘上介。**疏**「其禮」至「三介」○注

「如爲」至「上介」○釋曰：云「其禮如爲介」者，謂特問使大

夫，得主國之禮多少，如大聘卿，<sup>⑦</sup>此大夫爲上介之時，即

上文介之禮殯饗餼及食燕之等。「三介」者，大夫降於卿

二等故也。舉此侯伯之小聘，則公之臣、子男之臣小聘禮

數，其義可知也。

①「物」，阮校云：《通解》作「服」。

②「物」，阮校云：《要義》作「服」。

③「物」上，阮校云：毛本有「衣」字。

④「是以鄭云」，曹校云此四字衍。

⑤「齊」，據文義似當爲「禮」。

⑥「聘」下，阮校云：毛本有「時」字。

⑦「卿」上，曹校云脫「使」字。

記。久無事，則聘焉。事謂盟會之屬。**疏**

「記久」至「聘焉」○注「事謂盟會之屬」○釋曰：此云「久無事，則聘焉」者，則《周禮》「殷聘」也。是以《周禮》·大行人云「凡諸侯之邦交，歲相問也，殷相聘也，世相朝也」，注云「小聘曰問。殷，中也。久無事又於殷朝者，及而相聘也」。云「事謂盟會之屬」者，案《春秋》有事而會，不協而盟。是以《春秋》有會而不盟，盟必因會，若有盟會相見，故云「久無事則聘焉」。若有故，則卒聘，束帛加書將命。百名以上書於策，不及百名書於方。故謂災患及時事相告請也。將猶致也。名，書文也，今謂之字。策，簡也。方，板也。

**疏**

若有「至」於方

○注「故謂」至「板也」○釋曰：云「故謂災患及時相告請」者，<sup>①</sup>此即上經云「若有言」，一也。言，災患，上注引《春秋》臧孫辰告糴于齊，公子遂如楚乞師。此云「及時事」者，即上注引《春秋》「晉侯使韓穿來言汶陽之田」是也。云「名，書文，今謂之字」者，鄭注《論語》亦云「古者曰名，今世曰字」，許氏《說文》亦然。言此者，欲見經云「名」，名者，即今之文字也。云「策，簡。方，板也」者，簡謂據一片而言，<sup>②</sup>策是編連之稱，是以《左傳》云「南史氏執簡以

往」，是簡者未編之稱。此經云「百名以上書之於策」，是其衆簡相連之名。鄭作《論語序》云：「《易》、《詩》、《書》、《禮》、《樂》、《春秋》，策皆尺二寸，<sup>③</sup>《孝經》謙半之，《論語》八寸策者，三分居一，又謙焉」，是其策之長短。鄭注《尚書》，三十字一簡之文。服虔注《左氏》云「古文篆書，一簡八分字」，是一簡容字多少者。云「方，板」者，以其百名以下書之於方，若今之祝板，不假連編之策，一板書盡，故言「方，板也」。主人使人與客讀諸門外。受其意，既聘享，賓出而讀之。讀之不於內者，<sup>④</sup>人稠處嚴，不得審悉。主人，主國君也。<sup>⑤</sup>人，內史也。書必璽之。

**疏**

「主人」至「門外」○注「受其」至「璽之」○釋曰：云「既

<sup>①</sup>「時」下，阮校云：毛本有「事」字，按各本注俱有「事」字。

<sup>②</sup>「簡謂」，阮校云：毛本「簡」作「皆」，陳、閩、《要義》「皆」上俱有「簡」字。《要義》無「皆」字，陳、閩無「謂」字。

<sup>③</sup>「尺二寸」，阮校以爲當作「二尺四寸」。

<sup>④</sup>「讀之」，阮校云：毛本、《通解》不重。

<sup>⑤</sup>「主」，阮校云：徐本、《集釋》、《通解》、《要義》、楊氏俱無。

聘享，賓出而讀之」者，上經云「若有言，則以束帛，如享禮」，文承聘享之後，故知此「讀諸門外」，故云「既聘享」也。<sup>①</sup>鄭知人是內史者，案《內史》職云「凡四方之事書，內史讀之」，此云「使人與客讀諸門外」者，亦是「四方事書」，故知人是內史也。知「書必璽之」者，案襄二十九年《左傳》云公如楚，「還及方城，季武子取卣，使公治問，璽書追而與之」，故知此書亦璽之也。客將歸，使大夫以其束帛反命于館。為書報也。疏「客將」至「于」

館」○注「為書報也」○釋曰：此為書報上有故之事。彼以「束帛加書將命」，此亦以束帛加書反命于館。明日，君館之。既報館之，書問尚疾也。疏「明日君館之」○注

「既報」至「疾也」○釋曰：為昨日為書報之，<sup>②</sup>今日君始就館送客者，書問之道尚疾故也。必須尚疾者，以其所報告請多是密事，是以鄭云「既報館之，書問尚疾也」。既受

行，出，遂見宰，問幾月之資。資，行用也。古者

君臣謀密草創，未知所之遠近，問行用當知多少而已。古

文「資」作「齎」。疏「既受」至「之資」○注「資行」至「作

齎」○釋曰：使者受命於君，但知出聘，不知遠近，故云「古

者君臣謀密草創，未知所之遠近」，故問宰行糧多少，即知遠近也，故知須問之。使者既受行日，朝同位。

謂前夕幣之間。同位者，使者北面，介立于左，少退，別其處臣也。疏「使者」至「同位」○注「謂前」至「臣也」○釋

曰：云「既受行日」者，謂已受命日夕幣之前。使者及介朝

君之時，皆同位，北面東上，在朝處臣東方西面北上，故鄭云「同位者，使者北面」，<sup>③</sup>介立于左，少退，以別處臣也。

出祖，釋輶，祭酒脯，乃飲酒于其側。祖，始

也。既受聘享之禮，行出國門，止陳車騎，釋酒脯之奠於輶，為行始也。《詩傳》曰「輶，道祭也」，謂祭道路之神。

《春秋傳》曰「輶涉山川」，然則輶山行之名也。道路以險阻為難，是以委土為山，或伏牲其上，使者為輶，祭酒脯祈告也，卿大夫處者於是餞之，飲酒於其側，禮畢乘車轅之，而遂行，舍於近郊矣。其牲犬羊可也。古文「輶」作「拔」。

疏「出祖」至「其側」○注「祖始」至「作拔」○釋曰：云「既

① 「故云」，曹校云當為「在」。

② 阮校云毛本、《通解》、楊氏俱無上「為」字。

③ 「使者」原無，按阮校據毛本改。

受聘享之禮，行出國門，止陳車騎，釋酒脯之奠於輶者，凡道路之神有二，在國內釋幣於行者，謂平敞道路之神；<sup>①</sup>出國門釋奠於輶者，謂山行道路之神，是以委土為山象。國中不得輶名，國外即得輶稱。引《詩傳》曰「者，證輶祭道路之神也。」引《春秋傳》曰「者，案襄二十八年《左氏傳》子大叔云「輶涉山川，蒙犯霜露」。引之者，證輶是山行之名，涉者水行之稱。故《鄘詩》云「大夫輶涉，我心則憂」，毛傳云「草行曰輶，水行曰涉」。云「是以委土為山」者，案《月令》冬祀行，鄭注「行廟門外之西」，<sup>②</sup>為輶壤，厚二寸，廣五尺，輪四尺。祀行之禮，北面設主於輶上。」國外祀山行之神為輶壤，大小與之同。鄭注《夏官·大馭》云：「封土為山象，以苦芻棘柏為神主。既祭之，以車轆之而去，喻無險難也。」云「或伏牲其上」者，案《周禮·犬人》云「掌犬牲。凡祭祀供犬牲，用牲物，伏瘞亦如之」，鄭注云「伏謂伏犬，以王車轆之」，故知有伏牲其上。云「使者為輶，祭酒脯祈告也」者，案《周禮·大馭》「掌馭玉路以祀。及犯輶，王自左馭，馭下祝，登受轡」。彼天子禮，使馭祭，此大夫禮，故使者自祭，犯輶而去。云「卿大夫處者於是餞之」者，案《詩》云「飲餞于欄」，是處者送行人而飲酒名曰餞也。云「遂行，舍于郊」者，即上經云「舍

于近郊」是也。云「其有牲」，<sup>③</sup>犬羊可「者，《犬人》職云「伏瘞亦如之」，是用犬也。《詩》云「取羝以輶」，是用羊也。是犬、羊各用其一，未必並用之。言「可」者，人君有牲，大夫無牲，直用酒脯。若然，此見出行時祭輶。案《韓奕》詩云「韓侯出祖，出宿于屠。顯父餞之，清酒百壺」，是韓侯入覲天子，出京城為祖道。又《左氏傳》「鄭忽逆婦嬀于陳，先配而後祖。陳鍼子曰：是不為夫婦，誣其祖矣」。《鄭志》以祖為祭道神，是亦將還而後祖道。此聘使還，亦宜有祖，但文不具。所以朝天子，圭與纁皆九寸，剡上寸半，厚半寸，博三寸，纁三采六等，朱、白、倉。圭，所執以為瑞節也。剡上，象天圓地方也。雜采曰纁。以韋衣木板，飾以三色再就，所以薦玉，重慎也。九寸，上公之圭也。古文「纁」或作「藻」，今文作「藻」。疏「所以至「白倉」○注「圭所」至「作藻」○

①「敵」，曹校云當為「地」。

②「注行」，阮校云：毛本「注」下有「云」字，「行」下有「在」字。

③「有」，阮校云：毛本無。按各本注俱無。

釋曰：云「圭，所執以爲瑞節」者，案《周禮·大宗伯》云「以玉作六瑞，以等邦國」，又云「王執鎮圭，公執桓圭，侯執信圭，伯執躬圭，子執穀璧，男執蒲璧」，是以其圭爲瑞。又案《周禮·掌節》有「玉節」之節，即是節與瑞別矣。今此云「瑞節」，但連言節者，<sup>①</sup>案節不得言瑞，瑞亦是節信，故連言節也。云「剡上，象天圓地方也」者，下不剡象地方，上剡象天圓。案《雜記》贊大行曰「博三寸，厚半寸，剡上左右各寸半」，此經直「剡上寸半」，<sup>②</sup>不言左右，文不具也。凡圭，天子鎮圭，公桓圭，侯信圭，皆博三寸，厚半寸，剡上左右各寸半，唯長短依命數不同。云「雜采曰纁」者，凡言纁者，皆象水草之文。天子五采，公侯伯三采，子男二采，皆是雜采也。云「以韋衣木板，飾以三色再就」者，依《漢禮器制度》而知也。但木板大小一如玉制，然後以韋衣之，大小一如其板。經云「三采六等」，注云「三色再就」者，就即等也，是一采爲再就，三采即六等也。是以鄭注《典瑞》云「一采爲一就」。《典瑞》云侯伯「三采三就」者，以一采雖有再市，併爲一就。《覲禮》注云「朱白倉爲六色」者，亦是一采一市爲二色，三采故六色。三采據公侯伯，子男則二采，故《典瑞》云「子男皆二采再就」是也。「所以薦玉，重慎」者，玉者寶而脆，今以纁藉薦之，是其重

慎也。問諸侯，朱綠纁，八寸。二采再就，降於天子也。於天子曰朝，於諸侯曰問，記之於聘，文互相備。**疏** 問諸至「八寸」○注「二采」至「相備」○釋曰：此諸侯使臣聘纁藉之等。云「二采再就」者，上云「三采六等」，此二采不云四就者，此臣禮與君禮異。此二采雖與子男同，子男即一采爲一市，<sup>③</sup>二采爲再市，爲四等，今臣一采爲一就，二采共爲再就，是二采當君一采之處。是以《典瑞》云「瑑圭璋璧琮，纁皆二采一就，以覲聘」，亦是臣二采共當君一采一市之處。云「降於天子」者，案《典瑞》「王執鎮圭，纁藉五采五就」，言「五就」者，據一采爲一等，若據一采一市而言，即五采十等，此二采二等，是降於天子也。此亦降於諸侯，而言「降於天子」者，此鄭君指上文「朝天子」而言，故言聘諸侯降於朝天子也。云「於天子曰朝」者，據上文「所以朝天子」是也，則諸侯自相朝亦同，圭與纁九寸，侯伯以下亦依命數。云「於諸侯曰問」者，諸侯遣

①「但」，曹校云當爲「乃」。

②「直」下，曹校云脫「言」字。

③「子男即」，阮校云：毛本作「但」。

臣自問。<sup>①</sup>若遣臣問天子，圭與纁亦八寸，是以云「記之於聘，文互相備」。案《玉人》云「瑑圭璋八寸，璧琮八寸，以覲聘」，無所依據，則於天子、諸侯同言八寸者，據上公之臣。侯伯之臣則六寸，子男之臣則四寸，各降其君二等。<sup>②</sup>若然，經言「八寸」者，據上公之臣也。皆玄纁繫，長尺，紃組。采成文曰紃。繫無事則以繫玉，因為飾，皆用五采組，上以玄，<sup>③</sup>下以絳為地。今文「紃」作「約」。**疏**「皆玄」至「紃組」○注「采成」至「作約」○釋曰：上文纁藉尊卑不同，此之組繫尊卑一等。云「采成文曰紃」，鄭注《論語》「文成章曰紃」，與此語異義同。云「繫無事則以繫玉，因為飾」者，無事，謂在櫝之時，亦以繫玉，因為飾。此組繫亦名纁藉，即上文反命之時，「使者執圭垂纁，上介執璋屈纁」。又《曲禮下》云「執玉，其有藉者則楊，無藉者則襲」，鄭注亦云「藉，纁也」。楊、襲皆據有纁無纁之時，是其因為飾。云「皆用五采組」者，以其言紃，紃是文章之名，經又言「皆」，復無尊卑之別，故知「皆用五采組」也。云「上以玄，下以絳為地」者，以其皆用五采，而經直云「玄纁」為地，上加五采，上下皆據垂之為上下。必知上玄下絳者，上玄以法天，下絳以法地故也。

經云「纁」，注云「絳」者，《爾雅》「三人赤汁為纁」，絳則赤也，故本絳以解纁。<sup>④</sup>問大夫之幣俟于郊，為肆，又齋皮馬。肆猶陳列也。齋猶付也。使者既受命，宰夫載問大夫之禮，待於郊，陳之為行列，至則以付之也。使者初行，舍于近郊。幣云肆，馬云齋，因其宜，亦互文也。不於朝付之者，辟君禮也。必陳列之者，不夕也。古文「肆」為「肆」。**疏**「問大夫」至「皮馬」○注「肆猶」至「為肆」<sup>⑤</sup>○釋曰：知載大夫幣是宰夫者，以其初宰衆官具幣，<sup>⑥</sup>故知載幣於郊付使者，亦是宰夫可知。云「幣云肆，馬云齋，因其宜，亦互文也」者，以其幣是財賄，易可陳列，故言肆，不言齋，亦付使者矣。馬是難陳之物，故直言齋，亦付使者，<sup>⑦</sup>亦陳之，是「因其宜，互文也」。辭無常，

- ① 「問」上，阮校云：毛本有「相」字。
- ② 「二」，曹校云當為「一」。
- ③ 「玄」下，阮校云：聶有「為天」二字。
- ④ 「本」，阮校云：毛本作「舉」。
- ⑤ 「肆」原作「隸」，據重刊單疏本改。
- ⑥ 「宰」下，曹校云脫「夫使」二字。
- ⑦ 「亦」，曹校云此字衍。

孫而說。孫，順也。大夫使受命，不受辭，辭必順且說。

**疏**注「受命不受辭」○釋曰：受命謂受君命，聘於鄰國，不受賓主對荅之辭。必不受辭者，以其口及則言，辭無定準，以辭無常，故不受之也。辭多則史，少則不達。

史謂策祝。**疏**注「史謂策祝」○釋曰：案《周禮》大史、內

史皆掌策書。《尚書·金縢》云「史乃策祝」，是策書祝辭，

故辭多爲文史。<sup>①</sup>辭苟足以達，義之至也。至，

極也。今文「至」爲「砥」。辭曰：「非禮也，敢。」對

曰：「非禮也，敢辭。」<sup>②</sup>辭，<sup>③</sup>不受也。對，荅問也。

二者皆卒曰「敢」，言不敢。**疏**「辭曰」至「敢辭」○注「辭

不」至「不敢」○釋曰：辭謂賓辭主人，荅謂賓荅主人，介則

在旁曰「非禮也，敢」。<sup>④</sup>故《易·旅卦》初六云「瑣瑣」，<sup>⑤</sup>斯

其所取災，鄭云：「瑣瑣，猶小小。爻互體艮，艮小石，小

小之象。三爲聘客，初與二，其介也。介當以篤實之人爲

之，而用小人瑣瑣然，客主人爲言，不能辭曰非禮，不能對

曰非禮，每者不能以禮行之，則其所以得罪。」是其義也。

卿館於大夫，大夫館於士，士館於工商。館

者必於廟。不館於敵者之廟，爲大尊也。自官師以上有

廟有寢，工商則寢而已。**疏**「卿館」至「工商」○注「館者」

至「而已」○釋曰：云「館者必於廟」，案上歸饗饋云「於

廟」，明其禮皆在廟可知。云「不館於敵者之廟，爲大尊

也」者，以其在廟，尊則尊矣，故就降等而已。若又在敵者

之廟，以上是其大尊。云「自官師以上有廟有寢」者，案

《祭法》云「適士二廟」，「官師一廟」，鄭云「官師謂中士、下

士」，是其官師有廟。知廟有寢，<sup>⑥</sup>案《周禮·隸僕》云「掌

五寢之埽除」，鄭注云「五寢，五廟之寢。天子七廟，唯祫

無寢。《詩》云「寢廟奕奕」，相連之貌」。故《左傳》云「大

叔之廟在道南，其寢在道北」，是其前曰廟，後曰寢。「工

商則寢而已」者，案《爾雅·釋宮》云「室有東西廂曰廟」，

注云「夾室前堂」，又云「無東西廂有室曰寢」，注云「但有

「爲」，阮校云：《要義》作「則」。

<sup>②</sup>「敢辭」，阮校云：毛本、《集釋》、《通解》、楊氏、敖氏無

「辭」字。

<sup>③</sup>「辭」，阮校云：毛本、《集釋》、《通解》、楊氏俱重。

<sup>④</sup>「敢」下，阮校云：毛本有「辭」字。

<sup>⑤</sup>「瑣瑣」上，阮校云：《要義》有「旅」字。

<sup>⑥</sup>「寢」下，曹校云似脫「者」字。

大室」，是其自士以上有廟者必有寢，庶人在官者、工商之等有寢者，則無廟。故《祭法》云「庶士、庶人無廟」，祭於寢是也。管人爲客，三日具沐，五日具浴。管

人，掌客館者也。客謂使者，下及士介也。飧不致。不

以束帛致命，草次饌，飧具輕。

**疏**「飧不致」○注「不以」

至「具輕」○釋曰：君「不以束帛致命」者，<sup>①</sup>對饗餼以束帛致之，此不以束帛致。「草次饌具輕」者，<sup>②</sup>以其客始至則致之，故言「草次」也。對聘日致饗餼生死俱有，禮物又多爲重，故以此物爲輕而不致。賓不拜，以不致命。<sup>③</sup>

**疏**「賓不拜」○注「以不致命」○釋曰：云「不拜」者，宰夫

朝服設食，<sup>④</sup>賓無拜受之文，以其不以束帛致故也。沐

浴而食之。自絜清，尊主國君賜也。記此，重者沐浴

可知。**疏**「沐浴而食之」○注「自絜」至「可知」○釋曰：云

「記此，重者沐浴可知」者，以其食禮輕，<sup>⑤</sup>尚沐浴而食，饗

餼食重者，<sup>⑥</sup>沐浴而食可知。卿，大夫訝。大夫，

士訝。士皆有訝。卿，使者。大夫，上介也。士，衆

介也。訝，主國君所使迎待賓者，如今使者護客。**疏**「卿

大」至「有訝」○注「卿使」至「護客」○釋曰：云「卿，大夫

訝」者，謂大聘使卿，主人使大夫迎。「士訝」者，小聘使大夫，主人使士迎。言「皆有訝」者，自介已下皆迎之。云「卿，使者。大夫，上介。士，衆介也」者，據此篇是侯伯之卿大聘而言，其實小聘使大夫，亦使士迎之。所迎者，謂初行聘及饗食燕皆迎之，故鄭君無所止定。賓即館，

訝將公命，使已迎待之命。**疏**「賓即館訝將公命」○

注「使已迎待之命」○釋曰：案《秋官·掌訝》職云「賓入館，次于舍門外，待事于客」，注云「次，如今官府門外更衣處」。<sup>⑦</sup>待事于客，通其所求索。彼謂天子有掌訝之官，共承客禮，此諸侯使無掌訝，<sup>⑧</sup>是以還遣所使大夫、士訝

①「君」，阮校云：疑「云」字之誤。

②「饌」，阮校云：毛本作「飧」。

③「命」，阮校云：敖氏作「也」。

④「食」，曹校云當爲「飧」。

⑤「食」，曹校云亦當爲「飧」。

⑥「食」，曹校云此字衍。

⑦「官」原作「官」，據阮校改，毛本、《要義》、楊氏皆作

「官」。

⑧「使」，曹校云此字衍。



將公命，有事通傳于君。又見之以其摯。又，復也。

復以私禮見者，訝將舍於賓館之外，宜相親也。大夫訝者執鴈，士訝者執雉。

**疏**「又見之以其摯」○注「又復」至

「執雉」○釋曰：云「復以私禮見者，訝將舍於賓館之外，宜相親也」者，禮，掌訝舍於賓之館門外，此大夫、士君使爲訝，雖非掌訝之官，亦爲次舍于賓之館外，宜相親，故執摯以相見。「大夫訝者執鴈，士訝者執雉」，案《士相見》及

《大宗伯》文也。賓既將公事，復見之以其摯。

既，已也。公事，聘享、問大夫。復，報也。使者及上介執鴈，群介執雉，各以見其訝。

**疏**「賓既」至「其摯」○注「既

已」至「其訝」○釋曰：云以「公事聘享、問大夫」者，<sup>①</sup>此並行君物，<sup>②</sup>享主國君及問大夫，故云「公事」也。云「復，報也」者，有報訝者以摯私見已，<sup>③</sup>今還以摯私報之。知使者及上介同執鴈，不執羔者，見上文主國卿大夫勞賓同執鴈，則知此使者及上介同執鴈可知。「各以見其訝」者，謂使者見大夫之訝者，上介見士之訝者，士介亦見士訝者。凡四器者，唯其所寶，以聘可也。言國獨以此爲寶也。四器謂圭、璋、璧、琮。

**疏**「凡四」至「可也」○注

「言國」至「璧琮」○釋曰：案《周禮》·大宗伯云「以玉作六

瑞。王執鎮圭，公執桓圭」以下，人執之曰瑞。又云「以玉

作六器，以禮天地四方」，謂禮神曰器。此四者人所執，不言「瑞」而言「器」者，對文執之曰瑞，禮神曰器，散文則通，

雖執之亦曰器。是以《尚書》云「五器卒乃復」，與此文皆稱「器」。云「言四國獨此以爲寶」者，<sup>④</sup>案《周禮》·天府

職「凡邦國之玉鎮大寶器藏焉」，注云「玉鎮大寶器，玉瑞玉器之美者」，是其玉稱「寶」。<sup>⑤</sup>云「四器謂圭、璋、璧、

琮」者，是據上經圭、璋以行聘，璧、琮以行享而言。此據公侯伯之使者用圭、璋、璧、琮，若子男使者聘用璧、琮，享

用琥、璜。宗人授次，次以帷，少退于君之次。

主國之門外，諸侯及卿大夫之所使者，次位皆有常處。

**疏**「宗人」至「之次」○注「主國」至「常處」○釋曰：主國門外，以其行朝聘陳賓介皆在大門外，故次亦在大門外可

①「以」，曹校云此字衍。

②「物」，阮校云：毛本作「聘」。

③「有」上，阮校云毛本有「向」字，曹校云「有報訝者」當爲「訝向者」。

④「四」，阮校云：毛本、《要義》無。

⑤「其」，阮校云：毛本作「以」。

知。云「諸侯及卿大夫之所使者，①次位皆有常處」者，以其上公九十步，侯伯七十步，子男五十步，使其臣聘使，大聘小聘，又各降二等，其次皆依其步數，就西方而置之。未行禮之時，止於次中，至將行禮，賓乃出次。②凡爲次，君次在前，臣次在後，故云「少退於君之次」，故云「皆有常處」。上介執圭如重，授賓。慎之也。《曲禮》曰：

「凡執主器，執輕如不克。」**疏**「上介」至「授賓」○注「慎之」

至「不克」○釋曰：此謂當將聘於主君廟門外，③上介屈纁以授賓，賓襲受之節。引《曲禮》者，彼器即此玉，欲證執

玉如重之義也。賓入門，皇。升堂，讓。將授，志趨。皇，自莊盛也。讓，謂舉手平衡也。志猶念也，念

趨謂審行步也。孔子之執圭，「鞠躬如也，如不勝。上如揖，下如授。勃如戰色，足蹢蹢如有循」。古文「皇」皆作

「王」。**疏**「賓人」至「志趨」○注「皇自」至「作王」○釋曰：

「賓入門，皇」，謂未至堂時。「升堂，讓」，謂升堂東面向主君之時。「將授，志趨」，謂賓執玉向楹，將授玉之時。念鄉入門在庭時，執玉徐趨，今亦然。④若降堂後趨進翼如，則疾趨也。云「讓，謂舉手平衡也」者，謂若《曲禮》云「凡奉者當心」。下又云「執天子之器則上衡」，注云「謂高

於心」。「國君則平衡」，注云「謂與心平」。則此亦執國君器也，故引之爲證。⑤引孔子之執圭者，《鄉黨》論孔子爲君聘使法。彼「足蹢蹢如有循」，謂徐趨，據入彼國廟門執玉行步之時，以足容重退之在降堂之下，與此「趨」同，故爲證也。授如爭承，下如送。君還而后退。重

失隊也。而后猶然後也。

**疏**「授如」至「後退」○注「重

失」至「後也」○釋曰：授謂就東楹授玉於主君時，如與人爭承取物，恐失墜。云「下如送。君還而后退」者，以上文次言之，此「下如送」者，止謂聘享每訖，君實不送，而賓之敬如君送然，故云「下如送」也。君迴還，賓則退出廟門，更行後事，非謂賓出大門也。下階，發氣，怡焉。

再三舉足，又趨。發氣，舍息也。再三舉足，自安定乃復趨也。至此云舉足，則志趨，卷趨而行也。孔子之升堂，「鞠躬如也，屏氣似不息者。出，降一等，逞顏色，怡怡

①「所」字原無，按阮校據毛本補。

②「次」，阮校云：陳、閩、《通解》俱作「也」。

③「當」下，阮校云：毛本有「時」字。

④「今」下，阮校云：毛本、《通解》有「當」字。

⑤「爲」上，阮校云：《要義》有「以」字。

如也。沒階，趨進，翼如也。」

**疏**「下階」至「又趨」○注

「發氣」至「如也」○釋曰：云「下階，發氣，怡焉」者，即《論語》云「出，降一等，逞顏色，怡怡如也」。云「再三舉足，自安定乃復趨也」者，謂降時再三舉足，故又「趨進，翼如也」。云「發氣，舍息」者，以將授玉，「屏氣似不息」，今既授玉降階，縱舍其氣，怡然和悅也。云「至此舉足，則志趨，卷趨而行也」者，是釋「志趨」爲徐趨，此「舉足」爲疾趨也。及門，正焉。容色復故。此皆心變見於威儀。

**疏**「及門正焉」○注「容色」至「威儀」○釋曰：此謂聘訖，

將更有享而出門時。云「心變見於威儀」者，以其貌從心起，觀威儀省禍福，觀貌可以知心故也。執圭入門，

鞠躬焉，如恐失之。記異說也。**疏**「執圭」至「失

之」○注「記異說也」○釋曰：亦謂將聘執圭入廟門時。云

「鞠躬焉」，則「鞠躬如也」。「如恐失之」者，即「執輕如不克」也。云「記異說」者，以上文已記執圭，此又記執圭之儀，以同記事而言有差，異人記事，說有不同也。及享，

發氣焉，盈容。發，舍氣也。孔子之於享禮有容色。

**疏**「及享」至「盈容」○注「發舍」至「容色」○釋曰：云「及

享，發氣焉，盈容」者，即孔子行「享禮有容色」，一也，故注引爲證也。此「發氣」即上注云「舍息」，一也。衆介北

面，蹕焉。容貌舒揚。**疏**「衆介北面蹕焉」○注「容貌

舒揚」○釋曰：此謂賓行聘，衆介從入門左，北面。《曲禮》

云「大夫濟濟，士蹕蹕」，鄭云「皆行容止之貌」，故此注亦

云「容貌舒揚」也。但彼大夫云「濟濟」，諸侯云「皇皇」，上

文「賓入門，皇」，得與諸侯同者，以其執君圭璋，志在重

玉，故行容得與君同，若尋常行，則大夫「濟濟」也。私

覲，愉愉焉。容貌和敬。**疏**「私覲愉愉焉」○注「容貌

和敬」○釋曰：上文享時「盈容」，對聘時儀貌戰戰色顏舒緩，

此「私覲對享時。又「愉愉」和敬，舒於「盈容」也。出，

如舒鴈。威儀自然而有行列。舒鴈，鴈。**疏**「出如舒

鴈」○注「威儀」至「鴈鴈」○釋曰：此出廟門之外，行步如

鴈，又舒緩於愉愉也。云「舒鴈，鴈」者，《爾雅·釋鳥》文。

皇且行。入門主敬。升堂主慎。復記執玉異

說。**疏**「皇且」至「主慎」○注「復記執玉異說」○釋曰：上

已二度記執玉行步之法，今又云「皇且行」，是別有人更記

此執玉行法，故云「復記執玉異說」也。凡庭實隨人，

左先，皮馬相閒可也。隨入，不並行也。閒猶代也。土物有宜，君子不以所無爲禮，畜獸同類可以相代。

古文「閒」作「干」。

**疏**「凡庭」至「可也」○注「隨入」至「作干」○釋曰：云「左先」者，以皮馬以四爲禮，北面，以西頭爲上，故左先入陳也。云「君子不以所無爲禮」者，案《禮器》云「天不生，地不養，君子不以爲禮」，言當國有馬而無

虎豹皮，則用馬，或有虎豹皮，并有馬，則以皮爲主而用皮也。云「畜獸同類可以相代」者，畜謂馬，獸謂虎豹，《爾雅》釋云「在家曰畜，在野曰獸」。云「同類」者，《爾雅》又云「二足而羽謂之禽，四足而毛謂之獸」。若然，則馬畜亦是四足之類，故云「同類可以相代」也。賓之幣唯馬出，其餘皆束。馬出，當從廢也。餘物皆束藏之內府。

**疏**「賓之」至「皆束」○注「馬出」至「內府」○釋曰：云「馬出，當從廢也」者，若有皮之國用皮，則不出，亦從餘物束藏也。知「束藏之內府」者，案《天官·內府職》云「凡四方之幣獻之金玉、齒革、兵器，凡良貨賄入焉」，注云「諸侯朝聘所獻國珍」。彼天子禮，諸侯亦當有內府，諸侯自朝聘，其貨獻珍異亦入內府，<sup>①</sup>故注依之也。多貨，則傷

于德。貨，天地所化生，謂玉也。君子於玉比德焉。朝聘之禮以爲瑞節，重禮也。多之則是主於貨，傷敗其爲德。

**疏**「多貨則傷于德」○注「貨天」至「爲德」○釋曰：此經主論聘享所用圭、璋、璧、琮不得過多之事也。云「貨，天地所化生，謂玉也」者，鄭注《周禮》九職亦云「金玉曰貨，布帛曰賄」，故此注云「貨，天地所化生，謂玉也」。下注云「幣，人所造成」，幣則「布帛曰賄」，對金玉是自然之物也。云「君子於玉比德焉」者，《聘義》文。云「重禮也」，亦《聘義》文。云「多之則是主於貨，傷敗其爲德」者，以玉比德，故朝聘用之，相厲以德，不取重寶珍美之意。若多之，則是主於貨物，不取相厲以德，是傷敗其爲德。是以圭、璧聘享主國君，璋、琮聘享主國夫人，各用一而已也。幣美，則沒禮。幣，人所造成以自覆。幣謂束帛也。愛之，斯欲衣食之，君子之情也。是以享用幣，所以副忠信。美之則是主於幣，而禮之本意不見也。

**疏**「幣美則沒禮」○注「幣人」至「見也」○釋曰：此主論享時用束帛，故享君用束帛，享夫人用束錦，皆不得過美。云「幣，人所

①「貨」，阮校云陳本作「貢」，曹校云「貢」字是。

造成以自覆。幣謂束帛也」者，案《禮記·檀弓》「伯高之喪，孔氏之使者未至，冉子攝束帛乘馬而將之。孔子曰：『異哉，徒使我不誠於伯高！』」鄭注云「禮，所以副忠信也。忠信而無，禮何傳乎？」是知自覆者，覆忠信而已。若更美，則主意於財美，而禮不見，故「沒禮」也。云「愛之，斯欲衣食之，君子之情也」者，《禮記·檀弓》云「愛之斯錄之矣」。彼據愛父母而作重，此亦微取彼文，但此云「愛之，斯欲衣食之」，兼言食，謂以幣欲之，<sup>①</sup>君子之情則忠信。賄，在聘于賄。賄，財也。于讀曰爲。言主國禮賓，

當視賓之聘禮，而爲之財也。賓客者，主人所欲豐也。若苟豐之，是又傷財也。《周禮》曰：「凡諸侯之交，各稱其邦而爲之幣，以其幣爲之禮。」古文「賄」皆作「悔」。**疏**「賄在聘于賄」○注「賄財」至「作悔」○釋曰：鄭轉「于」作「爲」者，欲就《司儀》之文爲解故也。云「言主國禮賓」者，釋經「賄」是「主國禮賓」也。云「當視賓之聘禮」者，釋經「在聘」，謂在賓聘財多少。云「而爲之財也」者，釋經「于賄」也，謂主人視賓多少爲財賄報賓。云「若苟豐之，是又傷財也」者，凡行禮用財者，取不豐不儉，取於折中，若苟且豐多，則傷於貪財。引《周禮》者，《秋官·司儀》職文。案

彼注云「幣謂享幣也，於大國則豐，於小國則殺」，解經「各稱其邦而爲之幣」。彼又注云「主國禮之，如其豐殺之禮」，<sup>②</sup>解經「以其幣爲之禮」。謂賄用束紡、禮玉、束帛、乘皮及贈之屬是也。<sup>③</sup>凡執玉，無藉者襲。藉謂繯也。繯所以緼藉玉。

**疏**「凡執玉無藉者襲」○注「藉謂」至「藉玉」○釋曰：凡繯藉有二種，若以木爲中幹，<sup>④</sup>施五采三采者，此繯常有，不得云「無藉」。今此云「無藉者襲」，據絢組尺繯藉而言，<sup>⑤</sup>若廟門外賈人啓櫝，取玉垂繯以授上介，上介楊受，上介屈繯以授賓，賓即襲受，即此「執玉，無藉者」是也。此文與《曲禮》同，故《曲禮》「凡執玉，其有藉者則謁，無藉者則襲」是也。禮，不拜至。以賓不於是始至。今文「禮」爲「體」。**疏**「禮不拜至」○

① 「欲」，曹校云疑當爲「侑」。

② 「之禮」，孫校云：《司儀》注無，疑當作「禮之」，屬下讀。

③ 「玉束帛」，阮校云：毛本作「用玉帛」，《要義》作「用束帛」。

④ 「木」原作「禾」，據曹校改。

⑤ 「據絢組尺」，阮校云：毛本「尺」字在「據」字下。

注「以賓」至「爲醴」○釋曰：此文承執玉帛之下聘臣事。<sup>①</sup>據《鄉飲酒》賓主升堂，主人有拜至之禮，此賓昨日初至之時，主人請賓行禮，賓言「俟閒」，此時賓已至矣，故聘時不拜至，是以鄭云「以賓不於是始至」。

醴尊于東箱，<sup>②</sup>

瓦大一，有豐。瓦大，瓦尊。豐，承尊器，如豆而卑。

薦脯五臠，祭半臠橫之。臠，脯如版然者，或謂之

臠，皆取直貌焉。

疏注「臠脯」至「貌焉」○釋曰：此脯，禮

賓時所用薦脯是也。案《鄉飲酒禮》云「薦脯五臠」，故云

「或謂之臠，皆取直貌」。

祭醴再扱，始扱一祭，卒

再祭。卒謂後扱。

主人之庭實，則主人遂以

出，賓之士訝受之。

此謂餘三馬也，左馬賓執以出

矣。士，士介從者。

疏「主人」至「受之」○注「此謂」至

「從者」○釋曰：此「主人之庭實」者，謂主人禮賓時設乘馬

也。經云「賓執左馬以出」，三馬在後，主人從者牽之，遂

從賓以出於門外，賓之士介迎受之，故鄭云「此謂餘三馬

也」。知士是「士介從者」，以其經云「從者訝受馬」，此既

云「士」，故知「士介從者」也。

既覲，賓若私獻，奉

獻將命。時有珍異之物，或賓奉之，所以自序尊敬也。

猶以君命致之。

疏「既覲」至「將命」○注「時有」至「致

之」○釋曰：云「猶以君命致之」者，以經云「將命」，是以知

雖是私獻已物，與君物同，皆云君命致之，<sup>③</sup>臣統於君故。

賓者入告，出，禮辭。辭其獻也。賓東面坐奠

獻，再拜稽首。送獻不人者，奉物禮輕。

疏注「送

獻」至「禮輕」○釋曰：云「奉物禮輕」者，謂以奉私獻人，則

是主於貨，傷敗於享，覲，故不入。

賓者東面坐取

獻，舉以入告，出，禮請受。

東面坐取獻者，以宜

並受也。其取之由賓南，而自後右客也。

疏「賓者」至

「請受」○注「東面」至「客也」○釋曰：「賓者東面坐取獻，

舉以入告」者，謂賓者從門東適南方，西行，於賓北舉

幣，<sup>④</sup>人告於君。及出，一請於賓而受之，故云「出，禮請

受」。云「東面坐取獻者，以宜並受也」者，獻物在門外，賓

①「聘臣事」，曹校云當爲「言聘事」。

②「箱」，阮校云：毛本作「廂」。

③「云」，阮校云：《要義》作「以」。

④「北」下，阮校云：毛本有「坐」字，陳、閩、《通解》「坐」

上有「東面」二字。

者出受之，擯者與賓敵並受，故云「宜並受也」。云「其取之由賓南，而自後右客也」者，案上受享之時，「受皮者自後右客」，鄭注云「自由也」。從東方來，由客後西，居其左受皮也，此賓門西東面奠獻，擯者從東由賓南，自客後，居賓左取獻物，故云「自後右客」也。<sup>①</sup>賓固辭。公荅再拜。拜受於賓也。「固」亦衍字。

**疏**注「固亦衍

字」<sup>②</sup>○釋曰：知「固」是衍字者，以其上擯者「禮請受」，不云「固」，明知賓不固辭，故云「固」衍字。云「亦」者，亦士介私覲時，「賓固辭」，鄭注云「固衍字，當如面大夫也」。擯者立于闕外以相拜。賓辟。相，贊也。古文

「闕」爲「蹙」。擯者授宰夫于中庭。東藏之，既乃

介覲。若兄弟之國，則問夫人。兄弟謂同姓，若

昏姻，甥舅有親者。問猶遺也，謂獻也。不言獻者，變於君也。非兄弟，獻不及夫人。**疏**注「兄弟至「夫人」○釋

曰：云「兄弟謂同姓」者，若魯於晉、鄭之等，同姓也。云

「若昏姻，甥舅有親者」，若魯取齊女以爲舅，齊則以魯爲甥，是「有親者」也。云「非兄弟，獻不及夫人」者，以其經云「兄弟之國，則問夫人」，則非兄弟，問不及夫人可知。

若君不見，君有疾，<sup>③</sup>若他故，不見使者。**疏**「若君不

見」○注「君有」至「使者」○釋曰：云「他故」者，病之外或新有哀慘也。使大夫受。受聘享也。大夫，上卿也。

**疏**「使大夫受」○注「受聘」至「卿也」○釋曰：知「受聘享」

者，以其在後雖有覲獻之法，聘享在前，是以據在先者而

言。云「大夫，上卿也」者，以其卿上大夫，故以卿爲大夫。

必知使卿不使下大夫者，以其君無故君親受，今既有故，明使上卿代君受之。自下聽命，自西階升受，負

右房而立，賓降亦降，此儀如還圭，然而賓、大夫易

處耳。今文無「而」。**疏**注「此儀」至「處耳」○釋曰：案上

使大夫「還玉於館」，「大夫升自西階，鉤楹。賓自碑內聽

命，升自西階，自左南面受圭，退負右房而立。大夫降中

庭。賓降，自碑內東面授上介于阼階東」。此中與彼還玉

皆升自西階，此非易處也，但還玉時賓自大夫左受之，此中大夫於賓左受之，其賓主之位皆易處於還玉時，故云

①「云」，阮校云：毛本作「亦」。

②「固亦」，按阮校據毛本改作「拜受至」。

③「疾」，阮校云：葛本作「病」。

「易處」也。不禮。辟正主也。古文「禮」作「體」。

**疏**

「不禮」○注「辟正主也」○釋曰：案上聘享及私覲訖，<sup>①</sup>主君禮賓，此大夫代君不禮，故云「辟正主也」。幣之所

及皆勞，不釋服。以與賓接於君所，賓又請有事于

己，不可以不速也。所不及者，下大夫未嘗使者也。不勞

者，以先是賓請有事於己同類，既聞彼為禮所及，則己往有嫌也。所以知及不及者，賓請有事，固曰某子某子。

**疏**「幣之」至「釋服」○注「以與」至「某子」○釋曰：云「不

可以不速也」者，釋經「不釋服」，即注云「所不及者，下大夫未嘗使者」。以其經云「下大夫嘗使至者，幣及之」，故

知所不及者，是下大夫未嘗使者也。云「不勞者，以先是

賓請有事於己同類，既聞彼為禮所及，則己往有嫌也」者，

此勞賓在後，賓請有事於大夫在聘日。云「先是賓請有事

於己同類」，同類謂幣所及者，故鄭云「既聞彼為禮所及」。

云「則己往有嫌」者，彼國幣及己，是以禮加於己，今勞賓

者是以禮報之，若幣不及己，若往勞賓，則是己有禮於賓，

是譏賓無禮於己之嫌，是以不往勞之，故云「己往有嫌

也」。云「所以知及不及者，賓請有事，固曰某子某子」者，

當賓請事於大夫之時，顯此張子、李子之等，使受禮者預

知爾。時不道己姓，則知己乃幣所不及。賜饗，唯羹

飪，筮一尸，若昭若穆。羹飪，謂飪一牢也。肉謂

之羹，唯是祭其先，大禮之盛者也。筮尸，若昭若穆，容父

在，父在則祭祖，父卒則祭禰。腥醢不祭，則士介不祭也。

士之初行，不釋幣于禰，不祭可也。古文「羹」為「羔」，

「飪」作「臠」。

**疏**

「賜饗」至「若穆」○注「羹飪」至「作臠」

○釋曰：古者天子、諸侯行，載廟木主，大夫雖無木主，亦以幣帛主其神，是以受主國饗醢，故筮尸祭，然後食之，尊

神以求福故也。昭穆言「若」者，以其昭穆不定，故云「若」

也。云「腥醢不祭，則士介不祭也」者，上致饗醢之時，云

「上介饗醢三牢」，則飪腥醢三者皆有，故云「士介四人」，<sup>②</sup>

皆醢大牢，無飪可祭，故知「士介不祭」也。僕為祝，

祝曰：「孝孫某，孝子某，薦嘉禮于皇祖某

甫，皇考某子。」僕為祝者，大夫之臣攝官也。

**疏**

「僕

為」至「某子」○注「僕為」至「官也」○釋曰：經並云孝孫、

孝子，皇祖、皇考，以其不定，故兩言，謂上經「若昭若穆」

<sup>①</sup> 曹校云「及私覲」三字衍，或「及」下脫「請」字。

<sup>②</sup> 「故」，阮校云：毛本作「後」。



亦兩言之。云「僕爲祝者，大夫之臣攝官也」者，若然，諸侯不攝官，使祝祝策矣。案定四年祝佗云：「嘉好之事，君行師從，卿行旅從，則臣無事。」若君到主國祭饗之時，得不攝官乎？諸侯不使人攝，<sup>①</sup>是以《覲禮》云「侯氏裨冕，釋幣于禰」，注云「釋幣于禰之禮既，則祝藏其幣，歸乃埋之於桃西階之東」。大夫使僕攝祝，則是本無祝官，與諸侯異矣。其諸侯禮，大祝不行。知不使小祝行者，以其《掌客》云「群介行人宰史」，是諸侯從官，不言祝，明大小祝俱不行矣。如饋食之禮。如少牢饋食之禮。不言少牢，今以大牢也。今文無「之」。**疏**「如饋食之禮」○注「如少牢」至「無之」○釋曰：云「如少牢饋食之禮」者，案《少牢禮》有尊、俎、籩、豆、鼎、敦之數，陳設之儀，陰厭、陽厭之禮，九飯三獻之法，上大夫又有正祭於室，饋尸於堂，此等皆宜有之。至於致爵、加爵及獻兄弟、弟子等，固當略之矣。假器於大夫。不敢以君之器爲祭器。**疏**「假器於大夫」○注「不敢」至「祭器」○釋曰：案《曲禮》云「大夫、士去國，大夫寓祭器於大夫，士寓祭器於士」，注云「與得用者。言寄，覬己後還」。若然，卑者不得用尊者之器。是以此大夫聘使，不得將己之祭器而行。致饗餼，雖

是祭器，人臣不敢以君之器爲祭器，是以聘使是大夫，還於主國大夫假祭器而行之。盼肉及廋車。盼猶賦也。廋，廋人也。車，巾車也。二人掌視車馬之官也。賦及之，明辯也。古文「盼」作「紛」。**疏**「盼肉及廋車」○注「盼猶」至「作紛」○釋曰：此謂祭訖，歸胙在下。云「廋，廋人也。車，巾車也」者，案《周禮》天子夏官有廋人職，掌養馬，春官有巾車職。諸侯雖兼官，亦當有廋人、巾車，是故引《周禮》爲證。聘日致饗。急歸大禮。明日，問大夫。不以殘日問人，崇敬也。古文曰「問夫人也」。夕，夫人歸禮。與君異日，下之也。今文「歸」作「饋」。既致饗，旬而稍，宰夫始歸乘禽，日如其饗餼之數。稍，稟食也。乘禽，乘行之禽也，謂鴈鷺之屬。其歸之以雙爲數。其，賓與上介也。古文「既」爲「餼」。**疏**「既致」至「之數」○注「稍稟」至「爲餼」○釋曰：云「既致饗，旬而稍」者，以其賓客之道，十日爲正，行聘禮既訖合歸，一旬之後，或逢凶變，或主人留之，不得時反，

①「不」，阮校云：《要義》、毛本作「亦」。

即有稍禮。故下文云「既將公事，賓請歸」，注云「謂已問大夫，事畢請歸，不敢自專，謙也」。主國留之，饗食燕獻無日數，盡殷勤也，是主人留之。是以《周禮·漿人》亦「共賓客之稍禮」，注云「稍禮，非飡饗之禮，留閒王稍所給賓客者。漿人所給，亦六飲而已」。諸侯相待亦如之，是其留閒致稍者也。云「乘禽，乘行之禽也」者，別言此者，欲見此乘非物四曰乘。言「如其饗餼之數」者，一牢當一雙，故《聘義》云「乘禽曰五雙」，是此饗餼五牢者也。云「鴈鷺之屬」者，案《爾雅》「二足而羽」，若然，上介三牢則三雙也，士介一牢則一雙也，羽謂之禽，故以禽爲鴈鷺之屬。云「其，賓與上介也」者，以其下文別有士介故也。士中日則二雙。中猶閒也。不一日一雙，大寡，不敬也。凡獻，執一雙，委其餘于面。執一雙，以將命也。面，前也。其受之也，上介受以入告之，士舉其餘從之。賓不辭，拜受于庭。上介執之以相拜于門中，乃入授人。上介受亦如之。士介拜受于門外。

**疏**

「凡獻」至「于面」

○注「執」至「門外」○釋曰：云「上介受以入告之，士舉其餘從之」者，此乘禽而云「凡獻」，宜約私獻，私獻擯者取獻以入，士舉其餘，此若上介受人，明其餘士舉從人可知。

云「不辭，拜受于庭」者，以其經無辭文，又饗餼云「禮辭」，明此禽禮輕無辭，受于庭可知。「上介執之以相拜于門中，乃入授人」者，此亦約私獻，私獻之時，擯者取獻以入，又云「擯者立于闕外以相拜，賓辟，擯者授宰夫」，是其約也。云「上介受亦如之」者，以其受饗餼之時，上介受已如賓禮，故知受乘禽亦如賓也。云「士介拜受於門外」者，以其受餼在門外，此受乘禽在門外可知。禽羞、俶獻比。比，放也。其致之禮如乘禽也。禽羞謂成孰有齊和者。俶獻，四時珍美新物也。俶，始也，言其始可獻也。《聘義》謂之時賜。

**疏**

「禽羞俶獻比」○注「比放」至「時賜」

○釋曰：云「禽羞謂成孰有齊和者」，以其稱「羞」，謂若庶羞、內羞之等，故稱「禽」，則以鴈鷺等爲之，故以「成孰」解之。《聘義》謂之時賜「者，案《聘義》云「燕與時賜無數」，時賜謂四時珍異以賜諸賓客，與此俶獻是一物，故引以爲證。歸大禮之日，既受饗餼，請觀。聘於是國，欲見其宗廟之好，百官之富，若尤尊大之焉。訝帥之，自下門入。帥猶道也。從下門外人，游觀非正也。各以其爵，朝服。此句似非其次，宜在「凡致

禮「下，絕爛在此。」

**疏**「各以其爵朝服」○注「此句」至「在

此」○釋曰：云「宜在「凡致禮」下」者，以其「各以其爵朝服」爲致禮而言，故知義然。士無饗，無饗者無

擯。<sup>①</sup>謂歸餼也。**疏**「士無」至「無擯」○注「謂歸餼也」

○釋曰：案上經直云「宰夫朝服」以致之，是其無饗，宰夫退去，士介不償之是也。大夫不敢辭，君初爲之

辭矣。此句亦非其次，宜在「明日問大夫」之下。**疏**「大

夫」至「辭矣」○注「此句」至「之下」○釋曰：此謂賓問卿之

時，卿「不敢辭」者，以賓聘享訖，出大門，請有事於大夫，君禮辭，許。是君初爲之辭，故卿不辭也。凡致禮，皆

用其饗之加籩、豆。凡致禮，謂君不親饗賓及上介，

以酬幣致其禮也。其，其實與上介也。加籩、豆，謂其實也，亦實於簠簋。饗禮今亡。**疏**「凡致」至「籩豆」○注

「凡致」至「今亡」○釋曰：云「其，其實與上介也」者，案上

經「賓壹食壹饗，上介若食若饗」，唯士介不言饗，故知其

中唯有賓與上介耳。云「加籩、豆，謂其實也，亦實于簠」者，<sup>②</sup>案致饗餼醢醢是豆實，實于簠，明此饗之豆實，亦實于簠可知也。案昭六年「夏，季孫宿如晉，拜莒田也。晉

侯享之，以加籩。<sup>③</sup>武子退，使行人告曰：小國之事大國

也，苟免於討，不敢求貺，得貺不過三獻。今豆有加，下臣弗堪，無乃戾也」。此中致饗有加籩、豆者，饗使者無加

籩、豆是正禮，<sup>④</sup>此云加籩、豆者，殷勤之義也。云「饗禮今亡」者，以其食禮在，知其豆數，饗禮亡，無文以知之。

無饗者無饗禮。士介無饗禮。**疏**「無饗者無饗禮」

○注「士介無饗禮」○釋曰：「無饗者無饗禮」，文承饗下，故鄭以「無饗禮」解之。<sup>⑤</sup>以其實與上介饗餼俱有，故有

饗。士介唯有餼而已，無饗，故無饗禮也。凡餼，大夫

黍、梁、稷，筐五斛。謂大夫餼賓、上介也。器寡而

大，略。**疏**「凡餼」至「五斛」○注「謂大」至「大略」○釋

曰：案上經云「大夫餼賓大牢，米八筐，衆介米六筐」，<sup>⑥</sup>不

辨大小，故此記人辨之。云「筐五斛」，云「器寡而大，略」

<sup>①</sup>「擯」，阮校云毛本作「償」，李氏曰當爲「償」。

<sup>②</sup>「簠」下，阮校云：毛本有「筐」字。

<sup>③</sup>「以」，阮校引浦鏜云：「有」誤「以」。

<sup>④</sup>「是」原作「之」，據重刊單疏本改。

<sup>⑤</sup>「以」下，阮校云《要義》有「士介」二字，曹校云有者是。

<sup>⑥</sup>「六」原作「八」，按阮校據聶氏改。

者，以其君歸饗餼于賓與大夫、介，筥米小而多者，是尊者所致，以多器爲榮。今大夫致禮於賓、介，器寡而大，是略之於卑者也。既將公事，賓請歸。謂已問大夫，事

畢請歸，不敢自專，謙也。主國留之，饗食燕獻無日數，盡殷勤也。**疏**「既將公事實請歸」○注「謂已」至「勤也」○

釋曰：云「已問大夫」者，請問三卿與下大夫嘗使於彼國幣所及，皆是君命及以君物行禮者，皆是公事，事訖，故請歸也。云「主國留之，饗食燕獻無日數，盡殷勤也」者，亦謂至旬，賓乃將歸，主君乃留賓，有此饗食燕獻之等，故《燕禮》注云「今燕又宜獻焉」是也。云「無日數」者，謂行此饗食之等，相去希數，無常日數，盡主人殷勤也。凡賓拜于朝，訝聽之。拜，拜賜也。唯稍不拜。**疏**「凡賓」

至「聽之」○注「拜拜」至「不拜」○釋曰：案上經云「賓三拜乘禽於朝，訝聽之」。遂行，舍于郊，又案《司儀》云「明日客拜禮賜，遂行」，是臨行大小禮皆拜賜，則知唯米稟芻薪等不拜也。<sup>①</sup>燕則上介爲賓，賓爲苟敬。饗食，

君親爲主，尊賓也。燕，私樂之禮，崇恩殺敬也，賓不欲主君復舉禮事禮已，于是辭爲賓，君聽之，從諸公之席，命爲苟敬。苟敬者，主人所以小敬也，更降迎其介以爲賓。

介，大夫也，雖爲賓，猶卑於君，君則不與亢禮也。主人所以致敬者，自敵以上。**疏**「燕則」至「苟敬」○注「饗食」至

「以上」○釋曰：云「饗食君親爲主，尊賓也」者，以其饗食在廟爲賓，故君親爲主，至後燕禮在寢，又以醉爲度，崇於恩，殺於敬，故賓辭而使介爲賓也。以「苟敬」爲「小敬」者，以阼階西近主爲位，諸公坐位，故云「小敬」，對戶牖南面爲大敬。云「更降迎其介以爲賓」者，介在廟門內西北面，降至庭迎之。云「不與亢禮也」者，略取《燕義》文，解君不親爲獻主而使宰夫之意也。云「主人所以致敬者，自敵以上」者，謂兩君相見，兩大夫、兩士以上，則主人親獻也。宰夫獻。爲主人代公獻。無行，則重賄，反幣。無行謂獨來，復無所之也。必重其賄與反幣者，使

者歸以得禮多爲榮，所以盈聘君之意也。反幣謂禮玉、束帛、乘皮，所以報聘君之享禮也。昔秦康公使西乞術聘于魯，辭孫而說，襄仲曰：「不有君子，其能國乎？」厚賄之。此謂重賄反幣者也。今文曰「賄，反幣」。**疏**「無行」至

「反幣」○注「無行」至「反幣」○釋曰：云「重其賄」，即上

①「等」，阮校云：毛本無。

「賄在聘于賄」是也。「反幣」，謂上「禮玉、束帛、乘皮」是也。云「秦康公」者，案文公十二年《左氏傳》云「秦伯使西乞術來聘」云云是也。此特來，非歷聘，歷聘則吳公子札聘於上國，聘齊、聘魯是也。曰：「子以君命在寡君，寡君拜君命之辱。」此贊君拜聘享辭也。在，存也。**疏**「日子」至「之辱」○釋曰：此及下三經即上經云「公館賓，賓辟。上介聽命。聘享，夫人之聘享，問大夫，送賓，公皆再拜」，注云「拜此四事」。彼見其拜，此見其贊辭也。「君以社稷故在寡小君，拜。」此贊拜夫人聘享辭也。言「君以社稷故」者，夫人與君體敵，不敢當其惠也。其卒亦曰：「寡君拜命之辱。」**疏**「君以」至「君拜」○注「此贊」至「之辱」○釋曰：云「言「君以社稷故」者，夫人與君體敵，不敢當其惠也」者，釋經云「社稷故」。以其人與君體敵，不敢當其惠也。《禮記·哀公問》孔子云取夫人「為社稷主」，婦人無外事，天地并社稷后夫人雖不與，以夫婦一體，故夫人亦得云「社稷主」。是其云「社稷故」者，見夫人與君體敵，令夫人使致禮來，主人不敢當。下文云「君貺寡君，延及二三老」，是與君不敵，敢當之也。「君貺寡君，延及二

三老，拜。」此贊拜問大夫之辭。貺，賜也。大夫曰老。又拜送。拜送賓也。其辭蓋云：「子將有行，寡君敢拜送。」自拜聘享至此，亦非其次，宜承上「君館」之下。**疏**

「又拜送」○注「拜送」至「之下」○釋曰：此即上經君即館拜送賓，故鄭云此宜承上「君館」之下。賓於館堂楹

閒釋四皮、束帛，賓不致，主人不拜。賓將遂去是館，留禮以禮主人，所以謝之也。不致，不拜，不以將別崇新敬也。**疏**注「不致」至「敬也」○釋曰：若賓敬，主

宜致，主人敬賓宜拜，皆是崇敬。若致與拜即是崇新敬，故不為，若《鄉飲酒》送賓，賓不荅，禮有終相類也。大夫

來使，無罪，饗之。樂與嘉賓為禮。**疏**「大夫」至

「饗之」○注「樂與嘉賓為禮」○釋曰：案《鹿鳴》序「燕群臣嘉賓」，此無罪饗之，亦是樂賓為禮者也。過，則餼之。

餼之，腥致其牢禮也。①其致之辭不云君之有故耳。《聘義》曰：「使者聘而誤，主君不親饗食，所以愧厲之也。」不言罪者，罪將執之。**疏**「過則餼之」○注「餼之」至「執之」

①「腥」，阮校云：毛本、《集釋》作「生」。

○釋曰：云「過，則餽之」，謂禮有失誤。故引《聘義》「使者聘而誤，主君」。<sup>①</sup>云「不言罪者，罪將執之」者，《春秋》之義，聘賓有罪皆執之。若然，上經云「無罪饗之」，有罪非但不饗又執之，此「過則餽之」，雖不饗猶生致，過輕故也。若然，上云「罪」，下云「過」，互見其義也。其介爲介。饗賓有介者，賓尊，行敵禮也。

**疏**「其介爲介」○注「饗賓」至「禮也」○釋曰：謂饗賓於廟之時，還以聘之上介爲介。若然，上經上介主人別行饗，則是從賓爲介，得介得饗，<sup>②</sup>復別饗也。云「賓尊，行敵禮也」者，若《鄉飲酒》賓主行敵禮而有介然也。有大客後至，則先客不饗食，致之。卑不與尊者齊禮。

**疏**「有大」至「致之」○注

「卑不」至「齊禮」○釋曰：此據聘禮而言，則無君朝之事。<sup>③</sup>若然，則前有小國之卿大夫來聘，將行饗食。有大國卿大夫來聘，則廢小國饗食之禮，以其卑，不與尊齊禮並行之。唯大聘有几筵。謂受聘享時也。小聘輕，雖受于席，不爲神位。

**疏**「唯大聘有几筵」○注「謂受」至

「神位」○釋曰：案上經云「几筵既設，擯者出請命」者，<sup>④</sup>行聘享及私覲禮畢，<sup>⑤</sup>云「宰夫徹几改筵」，是行聘享爲神

位，今小聘不爲神位，屈也。十斗曰斛，十六斗曰簋，十簋曰秉，秉，十六斛，今江淮之間量名有爲簋者。今文「簋」爲「逾」。二百四十斗。謂一車之米，秉有五簋。四秉曰筥，此秉謂刈禾盈手之秉也。筥，積名也，若今萊易之間，<sup>⑥</sup>刈稻聚把有名爲筥者。《詩》云「彼有遺秉」，又云「此有不斂穧」。

**疏**「四秉曰筥」○注

「此秉」至「斂穧」○釋曰：云「此秉爲刈禾盈手之秉也」，對上文「秉」爲量名也。引《詩》者，證此秉爲盈手，穧即此筥亦一，即今人謂之一鋪兩鋪也。十筥曰稷，十稷曰秬，四百秉爲一秬。一車之禾三秬，爲千二百秉，三

<sup>①</sup>「君」下，毛本有「不親饗食所以愧厲之也」十字，《要義》有「云云」二字。

<sup>②</sup>「得介得饗」，下「得」字阮本作「則」，阮校云：毛本無此四字，有「之外」二字，《通解》、楊氏同。曹校云「得介」二字衍。

<sup>③</sup>「則」，阮校云：毛本作「而」。

<sup>④</sup>「者」，曹校云此字衍。

<sup>⑤</sup>曹校云「及私覲」三字亦衍，或「及」下當有「請」字。

<sup>⑥</sup>「易」原作「陽」，據重刊嚴州本改。

百筥，三十稷也。古文「稷」作「縷」。

**疏**注「一車」至「作

縷」○釋曰：云「一車之禾三秬」，即經致饗餼時云「禾三十車，車三秬」也。

儀禮卷第八 經五千三百四 注一萬九百六十一

儀禮疏卷第二十四

江寧府知府陽城張敦仁編校 元和縣

學生員顧廣圻覆校

## 儀禮疏卷第二十五 儀禮卷第九

唐朝散大夫行大學博士弘

文館學士臣賈公彥等撰

### 公食大夫禮第九疏「公食大夫禮第九」○鄭《目錄》

云：「主國君以禮食小聘大夫之禮，於五禮屬嘉禮。大戴第十五，小戴第十六，《別錄》第九。」○釋曰：鄭知是「小聘大夫」者，案下文云「宰夫自東房薦豆六於醬東」，①「設黍稷六簋」，又設庶羞十六豆，此等皆是下大夫小聘之禮。下乃別云「上大夫八豆、八簋」，又云「上大夫庶羞二十豆」，是食上大夫之法，故知此篇據「小聘大夫」也。若然，《聘禮》據侯伯之大聘，此篇據「小聘大夫」者，周公設經，互見為義。案篇末云「魚、腸胃、倫膚，若九若十有一。下大夫則若七若九」，鄭注云「此以命數為差，九謂再命者，十一謂三命者，七謂一命者。九或上或下者，再命謂小國之卿，次國之大夫也。卿則曰上，大夫則曰下。大國之孤

視子男」。以此言之，魚、腸胃、倫膚皆七者，謂子男小聘之大夫。此《公食》序在《聘禮》之下，是因聘而食之。不言食賓與上介，直云「大夫」者，若云食賓與上介，則小聘使下大夫，上介乃是士，是以直云「大夫」，兼得大夫聘賓與上介，亦兼小聘之賓。若然，《聘禮》據大聘，因見小聘，此《公食》先見小聘後言大聘者，欲見大聘、小聘或先或後不常之義。

儀禮 鄭氏注

### 公食大夫之禮。使大夫戒，各以其爵。

戒猶告也。告之必使同班，敵者易以相親敬。疏「公食」

至「其爵」○注「戒猶」至「親敬」○釋曰：自此盡「如聘」，論主君使大夫就館戒聘客，使來行食禮之事。云「各以其爵」者，此篇雖據子男大夫為正，兼見五等諸侯大聘使卿之事，故云「各以其爵」也。上介出請，入告。問所以來事。②疏「上介出請入告」○注「問所以來事」○釋曰：據大夫就賓館之門外，賓使上介出請大夫所為來之

① 「於」上，孫校據曹校補「設」字。

② 「以」下，阮校云：毛本有「為」字。



事。三辭，爲既先受賜，不敢當。**疏**「三辭」○注「爲

既」至「敢當」○釋曰：「既先受賜」者，謂聘日致饗，受賜大禮，故今辭食不敢當之。但受饗之時，禮辭而已，至於饗食，皆當三辭。賓出，拜辱。拜使者屈辱來迎己。大

夫不荅拜，將命。不荅拜，爲人使也。將猶致也。

賓再拜稽首。受命。大夫還。復於君。賓不拜送，遂從之。不拜送者，爲從之不終事。**疏**「賓不」至

「從之」○注「不拜」至「終事」○釋曰：案《鄉飲酒》主人拜送，賓不荅拜，云「禮有終」，此賓不拜送，爲「從之不終事」，故「賓不拜送」也。若然，《鄉飲酒》、《鄉射》戒賓，遂從之，而云「拜辱」、「拜送」者，以其主人先反，不隨，故得拜辱、拜送。《覲禮》使者勞賓於門外，侯氏再拜，遂送之，<sup>①</sup>使者既不先反，猶拜送者，尊天子使故也。賓朝服，即位于大門外，如聘。於是朝服，則初時玄端。如聘，亦入于次俟。

**疏**「賓朝」至「如聘」○注「於是」至「次俟」○釋曰：云「大門外，如聘」者，則賓主設摯介以相待，如聘時。云「於是朝服，則初時玄端」者，初時謂賓發館時服玄端，若《鄉射》「主人朝服，乃速賓」，鄭注云

「射，賓輕也，戒時玄端」。以此言之，亦賓在館拜所戒大

夫，即玄端，賓遂從大夫至君大門外，入次乃去玄端，著朝服，出次即位也。云「如聘，亦入於次俟」者，案《聘禮》「賓皮弁聘，至于朝，賓入于次」，注云「入于次者，俟辦」，則此入次，亦俟主人辦也。若然，聘禮重，賓發館即皮弁，此食禮輕，及大門乃朝服。即位，具。主人也。摯者侯君

於大門外，卿大夫、士序，及宰夫具其饌物，皆於庑門之外。**疏**「即位具」○注「主人」至「之外」○釋曰：云「摯者

侯君於大門外」者，解即位之事。云「卿大夫、士序，及宰夫具其饌物，皆於廟門之外」者，以其君迎賓入，始言卿大夫以下廟內之位，則知此具饌物時，皆在廟門外也。故鄭下文注云「自卿大夫至此，不先即位，從君而入者，明助君饗食賓，自無事」，故不在大門內，<sup>②</sup>是其義也。羹定，肉謂之羹。定猶孰也。著之者，下以爲節。**疏**「羹定」○

注「肉謂」至「爲節」○釋曰：云「肉謂之羹」者，《爾雅》文。

<sup>①</sup>「於門外侯氏再拜遂送之」，曹校云：當作「侯氏送於門外，再拜，遂從之」。

<sup>②</sup>「大」，孫校據曹校改作「廟」。

云「著之者，下以爲節」者，「羹定」與下文「陳鼎」之節爲目也。甸人陳鼎七，當門，南面，西上。設扃

鼎，鼎若束若編。七鼎，一大牢也。甸人，冢宰之屬，兼亨人者。南面西上，以其爲賓，統於外也。扃，鼎扛，所以舉之者也。凡鼎鼎蓋以茅爲之，長則束本，短則編其中央。今文「扃」作「鉉」。古文「鼎」皆作「密」。

**疏**

「甸人」

至「若編」○注「七鼎」至「作密」○釋曰：云「七鼎，一大牢也」者，案《聘禮》致飧與饗餼皆九鼎，此亦一大牢而七鼎者，此食禮輕，無鮮魚、鮮腊，與《聘禮》「腥二牢，鼎七」同也。云「甸人，冢宰之屬，兼亨人者」，案《天官》有甸師氏，兼有亨人，皆屬冢宰。彼天子禮，諸侯比天子爲兼官，故甸人兼亨人也。必使甸人陳鼎兼亨人者，案《亨人》職云「掌共鼎鑊」，又案《甸師職》云「掌帥其徒以薪蒸，役外內饗之事」，故使甸人兼亨人陳鼎。若然，案《少牢》「羹定，饗人陳鼎」者，以其無甸人官，故饗人陳鼎也。《既夕》「士禮」云「甸人抗重」，又云「甸人築圻坎」，以士無臣，使屬吏攝甸人之事，非謂置此官也。云「凡鼎鼎蓋以茅爲之」者，諸文多言鼎鼎，皆不言所用之物，此經雖言「若束若編」，亦不指所用之體，故鄭云「蓋」以疑之。然必知用茅者，

《詩》曰「白茅苞之」，<sup>①</sup>《尚書》孔傳云「直以白茅」。茅是潔白之物，故疑用茅也。設洗如饗。必如饗者，先饗後食，如其近者也。《饗禮》亡，《燕禮》則設洗於阼階東南。古文「饗」或作「鄉」。

**疏**

「設洗如饗」○注「必如」至

「作鄉」○釋曰：云「必如饗者，先饗後食，如其近者也」，鄭據此文行食禮而云「如饗」，明先饗，設洗訖乃後食，故鄉前如之，是先饗後食也。案《聘禮》云「公於賓壹食再饗」，則食在饗前矣。不言如《燕禮》者，饗食在廟，燕在寢，則是饗食重，先行之，故二者自相先後，是以不得用《燕禮》決之也。引《燕禮》者，欲見設洗之法，燕與饗食同，故無《饗禮》，引《燕禮》而言也。小臣具槃匱，在東堂下。爲公盥也。公尊，不就洗。小臣於小賓客饗食，掌

正君服位。**疏**「小臣」至「堂下」○注「爲公」至「服位」○

釋曰：知此「爲公盥」者，案《特性》尸尊，不就洗，盥用槃匱，故知此所設槃匱，亦爲公盥，不就洗也。云「小臣於小賓客饗食，掌正君位」者，<sup>②</sup>按《夏官·小臣》職云「小祭

<sup>①</sup>「曰」，曹校云單疏作「云」。

<sup>②</sup>「君」下，孫校據曹校補「服」字。

祀、賓客饗食，如大僕之法」，此諸侯之聘客饗食，故亦小臣掌之也。宰夫設筵，加席几。設筵於戶西，南面而左几。公不賓至授几者，親設涪醬，可以略此。

**疏**「宰

夫」至「席几」○注「設筵」至「略此」○釋曰：云「設筵於戶西，南面而左几」者，以其實在戶牖之間南面，又生人左几，異於神右几故也。云「公不賓至授几者，親設涪醬，可以略此」者，決《聘禮》禮賓時公親授几者，以無設涪醬之事故也。故下記云「不授几」，鄭云「異於禮也」。無尊。

主於食，不獻酬。飲酒、漿飲俟于東房。飲酒，清酒也。漿飲，載漿也。其俟奠於豐上也。飲酒先言飲，明非獻酬之酒也。漿飲先言漿，別於六飲也。

**疏**「飲酒」至

「東房」○注「飲酒」至「飲也」○釋曰：云「飲酒，清酒也」者，按《周禮》·酒正注「先鄭云：清酒，祭祀之酒」，後鄭從之，則此賓客用之者，優賓故也。云「漿飲，載漿也」者，載之言載，以其汁滓相載，故云載，漢法有此名故也。云「其俟奠於豐上也」者，下云「飲酒實於觶，加于豐」是也。此云「奠」，即彼「加」也。云「飲酒先言飲，明非獻酬之酒也」者，以其《鄉飲酒》、《燕禮》等獻酬之酒，皆不言飲，飲之可知，此擬醕口，故言「飲」，是異於獻酬酒故也。是以《酒

人》云「共賓客之禮酒、飲酒」，鄭注云「禮酒，饗燕之酒」，不言飲食之酒，<sup>①</sup>云飲，亦是其義也。云「漿飲先言漿，別於六飲也」者，按《漿人》云「共王六飲：水、漿、醴、涼、醫、醕」，彼先云「六飲」，後云水、漿，與此先云「漿」不同，故云「先云漿，別於六飲」。必別於六飲者，彼六飲為渴而飲，此漿為醕口，不為渴，故異之。凡宰夫之具，饌于東房。凡，非一也。飲食之具，宰夫所掌也。酒漿不在凡中者，雖無尊，猶嫌在堂。

**疏**「凡宰」至「東房」○注「凡

非」至「在堂」○釋曰：云「酒漿不在凡中者，雖無尊，猶嫌在堂」者，以其酒漿常在堂，若不特言之，則「凡」中不含之，言謂酒漿仍在堂，<sup>②</sup>故上特言之。公如賓服，迎賓于大門內。不出大門，降於國君。

**疏**「公如」至「門

內」○注「不出」至「國君」○釋曰：自此盡「階上北面再拜稽首」，論主君迎賓人拜至之事。云「不出大門，降於國君」者，按《周禮》·司儀云「將幣，交擯，三辭。車逆，拜辱。賓車進，荅拜」，又云致饗餼、饗食「皆如將幣之儀」，

① 「飲」下，孫校據曹校補「飲酒」二字。

② 「言」，阮校浦鏗云：疑「嫌」字誤。

是國君來則出迎也。大夫納賓。大夫謂上擯也。納

賓以公命。賓入門左。公再拜。賓辟，再拜

稽首。左，西方賓位也。辟，遂遁不敢當君拜也。公

揖入，賓從。揖入，道之。及廟門，公揖入，廟

禰廟也。**疏**「及廟門公揖入」○注「廟禰廟也」○釋曰：

《儀禮》之內，單言廟者，皆據禰廟。是以《昏禮》納采云

「至于廟」，記云「凡行事必用昏昕，受諸禰廟」。以此而

言，則言廟皆禰廟也。若非禰廟，則言廟祧，<sup>①</sup>若《聘禮》

云「不腆先君之祧」，問卿云「受于祖廟」之類是也。但受

聘在祖廟，食饗在禰，燕輕於食饗，又在寢，是其差次也。

賓入，三揖，每曲揖，及當碑揖，相人偶。至于階，

三讓。讓先升。**疏**「至于階三讓」○釋曰：按《曲禮》

云：「客若降等，則就主人之階。主人固辭，然後客復就西

階。」此亦降等，初即就西階者，此君與客食禮，禮之正，彼

謂大夫，士以小小燕食之禮，故與此不同也。公升二

等，賓升。遠下人君。**疏**「公升二等賓升」○注「遠下

人君」○釋曰：言「遠下人君」者，亦取君行一，臣行二之義

也。大夫立于東夾南，西面，北上。東夾南，東

西節也。取節於夾，明東於堂。**疏**「大夫」至「北上」○注

「東夾」至「於堂」○釋曰：此謂主國卿大夫立位。云「取節

於夾，明東於堂」者，序已西為正堂，序東有夾室，今大夫

立于夾室之南，是「東于堂」也。士立于門東，北面，

西上。統於門者，非其正位，辟賓在此。**疏**「士立」至

「西上」○注「統於」至「在此」○釋曰：案《燕禮》、《大射》士

在西方，東面，<sup>②</sup>北上，不統於門。又在門東北面，宜東統

於君。今在門東西上，統於門者，以賓在門西，辟賓在此，

非正位故也。小臣東堂下，南面，西上。宰東

夾北，西面，南上。宰，宰夫之屬也。古文無「南

上」。**疏**「小臣」至「南上」○注「宰宰」至「南上」○釋曰：

云「宰東夾北，西面，南上」者，謂在北堂之南，與夾室相

當，故云「夾北」也。云「宰，宰夫之屬也」者，以經云「南

上」，則非止一人，但宰官之內，有宰夫之等，是以下有宰

夫之官，皆於此立可知，故云「之屬」也。若然，宰尊官，在

①「祧」，曹校云似當為「號」。

②「面」原作「西」，據重刊單疏本改。

小臣之下者，<sup>①</sup>以其小臣位在北堂南，<sup>②</sup>故先見之，非謂尊卑先後爲次也。內官之士在宰東北，西面，南上。夫人之官，內宰之屬也。自卿大夫至此不先即位，從君而入者，明助君饗食賓，自無事。

**疏**「內官」至「南上」○注「夫人」至「無事」○釋曰：云「夫人之官，內宰之屬也」者，經云「內官」，按《周禮·天官》內宰下大夫，掌王后已下。彼天子內官，諸侯未必有內宰，以其言「內官之士」，以士爲之，明當天子內宰，故舉內宰況之也。云「自卿大夫至此不先即位，從君而入者，明助君饗食賓，自無事」者，按前聘時，君迎客于大門內時，卿大夫已下入廟即位者，受聘事重，非饗食之事，故先入廟即位。此已下雖有宰及宰夫者，皆有事，及大夫二牲，<sup>③</sup>士庶羞之等，皆助君食賓，非己之事，故後人也。介門西，北面，西上。西上，自統於賓也。然則承擯以下，立於士西，少進，東上。

**疏**「介門」至「西上」○注「西上」至「東上」○釋

曰：云「然則承擯以下，立於士西，少進，東上」者，以其介統於賓而「西上」，則擯統於君而「東上」可知。承擯以下，既有事之人，承擯是大夫，又尊於士，故知「少進，東

上」。不言上擯者，上擯有事，其位不定，故不言。公當楣北鄉至再拜。賓降也。公再拜。楣謂之梁。至再拜者，興禮俟賓，嘉其來也。公再拜，賓降矣。

**疏**

「公當」至「再拜」○注「楣謂」至「降矣」○釋曰：自此盡「稽首」，論公拜至，賓荅拜之事。云「公再拜，賓降矣」者，釋經「賓降」在「至再拜」下，「公再拜」上。以其「至再拜」者，公已一拜，賓即降，下「公再拜」者，賓降後又一拜，雖一拜，本當再拜，故皆以「再拜」言之。猶下侑幣之時，「公一拜，賓降，公再拜」，注云「賓不敢俟成拜」也。若然，鄭云「公再拜，賓降矣」者，解經「至再拜」者，<sup>④</sup>賓降也。<sup>⑤</sup>賓西階東，北面荅拜。西階東，少就主君，敬也。擯者辭。辭拜於下。拜也，公降一等，辭曰：「寡君從子，雖將拜，興也。」賓降再拜。公降，擯者釋

①「在上」，阮校云：陳、閩、《通解》有「反」字。

②「北堂南」，曹校云當爲「東堂下」。

③「二」，阮校引浦鏜云：「匕」誤「二」。

④「者」，阮校以爲衍文。

⑤「也」，阮校云：毛本作「矣」。

辭矣。賓猶降，終其再拜稽首。興，起也。

**疏**「賓西」至

「荅拜」○釋曰：自此盡「稽首」，論賓降荅拜之事。此云「荅拜」，下云「拜也」，並據公未降之前，賓爲一拜。以其賓始一拜之間，公降一等，故間在一辭之中，是以鄭云「賓降再拜」，釋經「北面荅拜」及「拜也」。云「公降，擯者釋辭矣」者，解經「辭曰：『寡君從子，雖將拜，興也。』」鄭注云「賓猶降，終其再拜稽首」者，按下文「賓栗階升，不拜」，升既不拜，略於下雖辭，<sup>①</sup>賓猶終降再拜稽首也。若然，擯者辭拜於下之時，其位在下，故下記云「卿擯由下」，注云「不升堂」是也。按下文云「擯者退，負東塾而立」，注云「無事」。又云「擯者進相幣」，然則擯者有事則進，無事則退，故負東塾也。賓栗階升，不拜，自以已拜也。

栗，寔栗也，不拾級連步。趨主國君之命，不拾級而下曰走。**疏**「賓栗階升不拜」○注「自以」至「曰走」○釋曰：云

「自以已拜也」者，於堂下終爲再拜稽首，故於堂上不拜也。云「栗，寔栗也」者，謂疾之意也。云「不拾級連步」者，《曲禮》云「拾級聚足」，<sup>②</sup>連步以上，鄭注云「拾當爲涉，聲之誤也。級，等也。涉等聚足，謂前足躡一等，後足從之併」，此涉級也。「連步」，鄭云「重蹉跌也。連步謂足

相隨，不相過也」。其連步據足而言，涉級據階而說，其實一也。此等尋常升法，此栗階據趨君命而上。按《燕禮·記》云「凡君所辭皆栗階」，注云「栗，蹙也，謂越等急趨君命也」。又曰「凡栗階不過二等」，注云「其始升，猶聚足連步，越二等，左右足各一發而升堂」，是栗階之法也。云「不拾級而下曰走」者，凡升降有四種，云走者，君臣急諫諍，則越三等爲走階，越一等爲歷階，又有連步，又有栗階，爲四等也，義已具於《燕禮·記》疏也。命之成拜，

階上北面再拜稽首。賓降拜，主君辭之。賓雖終

拜，於主君之意，猶爲不成。**疏**「命之」至「稽首」○注「賓

降」至「不成」○釋曰：按《論語》孔子云「拜下，禮也，今拜乎上，泰也」，是以上文主君雖辭，賓猶終拜於下，盡臣之禮，爲成拜。主君之意猶以爲不成，故命之升成拜，賓遂主君之意，故升更拜也。士舉鼎，去冪於外，次

① 「略」，曹校云當作「明」。

② 「拾」原無，據重刊單疏本補。

人，陳鼎于碑，南面，<sup>①</sup>西上。右人抽扃，坐奠于鼎西，南順，出自鼎西。左人待載。人由東，出由西，明爲賓也。今文「奠」爲「委」。古文「待」爲「持」。

**疏**「士舉」至「待載」○注「人由」至「爲持」○釋曰：自此盡「逆退，復位」，論鼎人已載之事。<sup>②</sup>云「去冪於外，次入」者，<sup>③</sup>次入謂序入也，故《少牢》云「序入」。「去冪於外」者，以其人當載於俎，故去之也。《士喪》、《士虞》皆入乃去冪者，喪禮變于吉故也。雍人以俎入，陳于鼎南。旅人南面加匕于鼎，退。旅人，雍人之屬，旅食者也。雍人言入，旅人言退，文互相備也。出人之由，亦如舉鼎者。匕、俎每器一人，諸侯官多也。

**疏**「雍人」至「鼎退」○注「旅人」至「多也」○釋曰：云「旅人，雍人之屬」者，即《燕禮》云「尊士旅食于門西，兩鬯壺」，鄭云士旅食者，「所謂庶人在官者也」，引《王制》解之者是也。云「雍人言入，旅人言退，文互相備也」者，雍人言入亦退，旅人言退亦入，皆入而退去，故云「文互相備也」。云「每器一人，諸侯官多也」者，按《少牢》云「鼎序入，雍正執一匕以從，雍府執四匕以從，司士合執二俎以從，司士贊者二人皆合執二俎以相從」，<sup>④</sup>是大夫官少，故每人兼執也。

若然，《特牲》云「贊者執俎及匕從鼎入」，《士虞》亦云「匕、俎從」，《士昏禮》亦云「匕、俎從設」，彼注云「執匕者，執俎者從鼎而入設之」，不言并合者，士官彌少，并合可知。不言者，文不具，或可。<sup>⑤</sup>士禮又異於大夫，執鼎人兼執匕、俎，故《士喪禮》小斂、大斂奠，舉鼎者兼執俎也，若依前釋，則士喪禮略威儀故也。大夫長盥，洗東南，西面，北上，序進盥，退者與進者交于前。卒盥，序進，南面匕。長，以長幼也。序猶更也。前，洗南。

**疏**「大夫」至「面匕」○注「長以」至「洗南」○釋曰：云「進盥，退者與進者交于前」，鄭云「前」謂「洗南」，但言「前」，不云北，<sup>⑥</sup>《鄉飲酒》、《鄉射》賓盥北面，則

- ①「南」，阮校云：徐本、楊氏、毛本重此字。敖氏曰「碑」下缺一「南」字。
- ②「已」，阮校引浦鏜云：「匕」誤「已」。
- ③「次」字原本缺，據重刊單疏本補。「冪」，阮校云：毛本作「鼎」。
- ④「從」下，阮校云：毛本有「入」字。
- ⑤「可」，阮校云：毛本作「云」。
- ⑥「北」，曹校云當爲「面」。

此大夫亦皆北面可知。云「長，以長幼也」者，若《燕禮》云「命長」之類，皆據長幼爲長，不謂衆中之長者也。載者西面。載者，左人，亦序自鼎東，西面於其前。大夫匕則載之。

**疏**

「載者

西面」○注「載者」至「載之」○釋曰：前云「左人待載」，其時鼎東，南面，今大夫鼎北面南匕之，<sup>①</sup>左人當載，故序自鼎東，西面於其前矣。俎正當鼎南，則載者在鼎南稍東也。魚腊飪。飪，孰也。食禮宜孰，饗有腥者。

**疏**

「魚

腊飪」○注「飪孰」至「宜孰」○釋曰：上文直云「羹定」，肉謂之羹，恐魚腊不在「羹定」之中，故此特著「魚腊飪」也。以食禮尚孰，故皆飪也。○注「饗有腥者」○釋曰：《樂記》云大饗「而俎腥魚」，鄭注云「以腥魚爲俎實，不臠孰之」，是饗禮有腥也。又宣公十六年冬，晉侯「使士會平王室，定王享之，原襄公相禮，殺烝」。武子私問其故。王聞之，召武子曰：「季氏而弗聞乎？」王享有體薦，宴有折俎。公當享，卿當宴，王室之禮也。又《國語》云：「禘郊之事，則有全烝。王公立飫，則有房烝。親戚宴饗，則有殺烝。」以此觀之，明饗有腥，以饗禮用體薦，體薦則腥矣。故《禮記》云「腥其俎」，謂豚解而腥之，豚解者皆腥也。載體，

進奏。體，謂牲與腊也。奏，謂皮膚之理也。進其理本

在前。下大夫體七个。

**疏**

「載體進奏」○注「體謂」至「七

个」○釋曰：三牲與腊皆載體，直言體，不辨體形及數，以下魚、腸胃、倫膚皆言七，則此亦七體，故鄭云「下大夫體七个」。若然，七个此不言體形，按《士虞·記》云「升左肩、臂、臠、肫、肫、肫、脊、脅」七體，<sup>②</sup>彼喪禮用左，又按《鄉飲酒》、《鄉射·記》皆云「右胖進腠」，則此亦用右胖肩、臠、臂、肫、肫、脊、脅可知。<sup>③</sup>既用右胖，則左胖爲庶羞。其庶羞者，此下大夫十六豆，上大夫二十豆是也。若致飧及歸饗餼腥鼎，皆無庶羞。《鄉飲酒》、《鄉射》、《燕禮》、《大射》雖同用狗一牲，以其亨，亨亦皆有庶羞也。云「奏，謂皮膚之理。進其理本在前」者，此謂生人食法，故進本，本謂近上者。若祭祀則進末，故《少牢》云「進下」，鄭云「變於食生」是也。魚七，縮俎，寢右。右首也，寢右，進誓也。乾魚近腴，多骨鯁。

**疏**

「魚七縮俎寢右」○注「右

①「面南」，孫校據曹校乙作「面南」。

②「肫」，阮校云：閩本作「肫」。

③「臠臂」，孫校據曹校乙作「臂肫」。



首「至」骨鯁」○釋曰：云「縮俎」者，於人爲橫。<sup>①</sup>縮，縱也。魚在俎爲縱，於人亦橫。云「寢右」，鄭云「右首也，寢右，進饗也」，賓在戶牖之間南面，俎則東西陳之，魚在俎，首在右，腹腴鄉南。饗，脊也，進脊在北，鄉賓。必以脊鄉賓者，鄭云「乾魚近腴，多骨鯁」，故不欲以腴鄉賓，取脊少骨鯁者鄉賓，優賓故也。若祭祀則進腴，以鬼神尚氣，腴者氣之所聚，故《少牢》「進腴」是也。腸胃七，同俎。以其同類也。不異其牛羊，腴賤也。此俎實凡二十八。

**疏**「腸胃七同俎」○注「以其」至「十八」○釋曰：云「以其同類也」者，釋經「同俎」，以其牛羊同是畜類也。云「不異其牛羊，腴賤也」者，以牲體則異俎，及此腸胃即同俎，以其腹腴賤，故略之同俎也。云「此俎實二十八」者，牛羊各有腸胃，腸胃各七，四七二十八也。但此腸胃與牲或同鼎同俎，或別鼎別俎，何者？據此下文七鼎，腸胃與牲別鼎別俎，是其正法，取其鼎俎奇也。《少牢》五俎，腸胃與牲同鼎者，以其有鮮獸，若腸胃別鼎，則六不得奇，故并腸胃與牲同鼎，《有司徹》亦然。此「腸胃七」者，以其與牲體別鼎，故取數於牲，亦七。《少牢》并腸胃於牲鼎，故云「腸三胃三」，取數於脊、脅各三也。賓尸禮殺於正祭，故腸胃各

一。《既夕》盛葬奠，故腸胃五也。倫膚七。倫，理也，謂精理滑脆者。<sup>②</sup>今文「倫」或作「論」。**疏**「倫膚七」○

釋曰：倫膚，謂豕之皮革爲之。但此公食大夫爲實用爲美，故膚與腸胃皆別鼎俎。《特牲》脰有三鼎，<sup>③</sup>魚腊不同鼎，故膚從牲同鼎。《有司徹》雖同《少牢》，亦止三鼎而已，羊、豕、魚皆一鼎，故膚還從於牲鼎也。又此膚與牲體之數亦七，而《少牢》膚九者，此食禮，故膚從體數，《少牢》大夫之祭，膚出下牲，故取數於牲之體而九也。腸胃、

膚皆橫諸俎，垂之。順其在牲之性也。腸胃垂及俎

拒。**疏**「腸胃」至「垂之」○注「順其」至「俎拒」○釋曰：腸

胃得在牲而垂，膚亦言順牲之性者，從多而言。云「垂及俎拒」者，《少牢》云「腸三、胃三，垂及俎拒」是也。大夫

既匕，匕奠于鼎，逆退，復位。事畢宜由便也。

士匕載者又待設俎。**疏**「大夫」至「復位」○注「事畢」至

①「於」上，曹校云似脫「俎」字。

②「脆」，阮校云：徐、陳、閩、監、葛本，《集釋》、《通解》作「脆」。

③「脰」，孫校據曹校改作「惟」。

「設俎」○釋曰：「士匕載者又待設俎」者，以上文云「士舉鼎」，又云「左人待載」，下文云「士設俎于豆南」，是「載者又待設俎」可知也。**公降盥。**將設醬。**疏**「公降盥」○

注「將設醬」○釋曰：自此盡「各卻于其西」，論公與宰夫為賓設正饌之事。云「將設醬」者，下云「公設之」，是以盥手也。**賓降，公辭。**辭其從己。**卒盥，公壹揖壹**

**讓，公升，賓升。**揖讓皆壹，殺於初。古文「壹」皆作「一」。宰夫自東房授醢醬，授，授公也。醢醬，以醢和醬。**疏**「宰夫」至「醢醬」○注「授授」至「和醬」○釋

曰：按記云「蒲筵常」，長丈六尺，於堂上戶牖之間南面設之。乃設正饌於中席已東，自中席已西設庶羞也。云「醢醬，以醢和醬」者，按歸饗餼醢醢別，知此醢醬不別而以醢和醬者，此經所陳物，異者皆別器，此醢醬下但言「醬」，不別言醢，明以醢和醬可知。祭祀無此法，以生人尚褻味，故有之。**公設之。**以其為饌本。**賓辭，北面坐遷**

**而東遷所。**東遷所，莫之東側其故處。**疏**「賓辭」至

「遷所」○注「東遷」至「故處」○釋曰：云「東遷所」者，謂以西為上，君設當席中，故東遷之，辟君設處。側，近也，近

其故處。**公立于序內，西鄉。**不立阼階上，示親饌。

**疏**「公立」至「西鄉」○注「不立」至「親饌」○釋曰：云「不立阼階上，示親饌」者，以其君之行事，皆在阼階上，今近阼北者，以其設饌在戶西近北，今君亦近北，是亦親監饌故也。**① 賓立于階西，疑立。**不立階上，以主君離

阼也。疑，正立也，自定之貌。**② 今文曰「西階」。**宰夫

自東房薦豆六，設于醬東，西上。韭菹，以東醢醢、昌本，昌本南麋醢，以西菁菹、鹿醢。醢醢，醢有醢。昌本，昌蒲本，菹也。醢有骨謂之醢。菁，萸菁菹也。今文「醢」皆作「麋」。**疏**「宰夫」至

「鹿醢」○注「醢醢」至「作麋」○釋曰：云「醢醢，醢有醢」者，按《周禮·醢人》云「朝事之豆，韭菹、醢醢」，已下依此為次，彼注云「醢，肉汁也」，則此醢醢是肉之汁。昌本者，彼注云「昌蒲根」。又按彼注「麋菹之稱，菜肉通」，又云

① 「亦」，阮校云：毛本、《通解》作「示」。

② 「自」原作「白」，據重刊嚴州本改。

「細切爲蜚，全物若牒爲菹」。又按彼經爲「菹」者，經言「菹」，<sup>①</sup>不言「蜚菹」者，即是蜚也，彼言昌本亦即蜚也。此注云「菹」者，蜚菹麤細爲異，通而言之，蜚亦得爲菹，故云「菹」也。云「醢有骨者謂之醢」，<sup>②</sup>案《爾雅·釋器》云「肉爲之醢，有骨者謂之醢」，又鄭司農云「有骨爲醢，無骨爲醢也」。云「菁，莫菁菹也」者，即今之蔓菁也。士設俎于豆南，西上，牛、羊、豕，魚在牛南，<sup>③</sup>腊、腸胃亞之。亞，次也。不言絳錯，俎尊。

**疏**「士設俎

至「亞之」○注「亞次」至「俎尊」○釋曰：云「不言絳錯，俎尊」者，上設豆絳陳之，下設黍稷錯陳之，此設俎不絳，不錯者，但尊故也。<sup>④</sup>膚以爲特。直豕與腸胃東也。特

膚者，出下牲，賤。

**疏**「膚以爲特」○注「直豕」至「牲賤」

○釋曰：云「出下牲，賤」者，以豕在牛羊之下，賤，膚豕之所出，故云「出下牲，賤」，特之於俎東也。旅人取匕，

甸人舉鼎，順出，奠于其所。以其空也。其所，謂

當門。

**疏**「旅人」至「其所」○釋曰：前旅人以匕入，加於

鼎，退出，今還使之取匕。前士舉鼎入，今不使士舉鼎出者，以其士載訖，遂設俎於賓前，事未畢，故甸人舉鼎而出

也。宰夫設黍稷六簋于俎西，二以並，東北上。黍當牛俎，其西稷，錯以終，南陳。並，併也。今文曰「併」。古文「簋」皆作「軌」。大羹湑不和，實于鐙。宰右執鐙，左執蓋，由門入，升自阼階，盡階，不升堂，授公，以蓋降，出，入，反位。大羹湑，煮肉汁也，大古之羹。不和，無鹽菜。瓦豆謂之鐙。宰謂大宰，宰夫之長也。有蓋者，饌自外人，爲風塵。今文「湑」爲「汁」，又曰「入門自阼階」，無

「升」。**疏**「大羹」至「反位」○注「大羹」至「無升」○釋曰：

云「以蓋降，出，入，反位」者，宰位在東夾北，西面，南上，今以蓋降出，送於門外，乃更入門，反於東夾北位也。云「大羹湑，煮肉汁也，大古之羹」者，謂是大古五帝之羹。云「不和，無鹽菜」也，<sup>⑤</sup>大古質，故不和以鹽菜，對鉶羹調

①「菹」下，孫校據曹校增「爲齋者」三字。

②「之」原作「爲」，據重刊單疏本改。

③「南」，原作「西」，據重刊嚴州本改。

④「但」，阮校云：毛本作「俎」。

⑤「也」，孫校據曹校改作「者」。

之以鹽菜者也。云「瓦豆謂之鐙」，《詩》云「于豆于登」，毛亦云「木曰豆，瓦曰登」。云「宰謂大宰，宰夫之長」者，以單言宰，諸侯三卿，無大宰，以司徒兼大宰，大宰之下有宰夫，故云「宰夫之長」也。公設之于醬西。賓辭，坐遷之。亦東遷所。

**疏**「公設」至「遷之」○注「亦東遷所」○釋曰：言「亦」者，亦前醬「東遷所」，以醬既東遷所，今於醬西遷之，明「亦東遷所」，移之故醬處也。宰夫設鉶四于豆西，<sup>①</sup>東上，牛以西羊，羊南豕，豕以東牛。鉶，菜和羹之器。

**疏**「宰夫」至「東牛」○注

「鉶菜和羹之器」<sup>②</sup>○釋曰：云「鉶，菜和羹之器」者，下記云「牛藿、羊苦、豕薇」，是菜和羹，以鉶盛此羹，故云「之器」也。據羹在鉶言之謂之鉶羹，據器言之謂之鉶鼎，正鼎之後設之謂之陪鼎，<sup>③</sup>據人庶羞言之謂之羞鼎，其實一也。飲酒實于觶，加于豐。豐，所以承觶者也，如豆而卑。宰夫右執觶，左執豐，進設于豆東。食有酒者，優賓也。設于豆東，不舉也。《燕禮·記》曰：「凡奠者於左。」**疏**「宰夫」至「豆東」○注「食有」至「於左」○釋曰：云「食有酒者，優賓也」者，按下文宰夫執漿飲，賓

興，受，唯用漿醕口，不用酒，今主人猶設之，是優賓。引《燕禮》者，<sup>④</sup>彼據酒，<sup>⑤</sup>主人奠於薦左，<sup>⑥</sup>賓不飲，取奠於薦右，<sup>⑦</sup>此酒不用，故亦奠於豆東，酒義雖異，不舉是同，故引為證也。按《燕禮》無此文，《鄉飲酒》、《鄉射·記》皆云「凡奠者於左，舉者於右」，不同之而引《燕禮·記》者，<sup>⑧</sup>此必轉寫者誤，<sup>⑨</sup>鄭本引《鄉飲酒》、《鄉射》之等也。宰夫東面坐，啟篋會，各卻于其西。會，篋蓋也，亦一一合卻之，各當其篋之西。**疏**注「會篋」至「之西」○釋曰：云「亦一一合卻之」者，卻者，仰也，篋蓋有

- ①「鉶」，阮校云：《釋文》作「鉶」。
- ②「和羹」，阮校云：毛本作「至」。
- ③「正」上，孫校據曹校增「據」字。
- ④「禮」下，阮校云：《要義》有「記」字。
- ⑤「酒」上，孫校據曹校增「酬」字。
- ⑥「左」，孫校據曹校改為「右」。
- ⑦「右」，孫校據曹校改為「左」。
- ⑧「同」，阮校云：疑誤，或是「引」字。
- ⑨「轉寫者」，阮校云：毛本作「傳寫者之」，張淳作「傳寫者」。

六，<sup>①</sup>兩兩皆相重而仰之，謂之卻合，<sup>②</sup>故云「一一卻合之，各當其簋之西」，爲兩處。<sup>③</sup>「亦」者，亦《少牢》，故《少牢》云「佐食啟會蓋，二以重，設于敦南」也。贊者負東房，南面告具于公。負東房，負房戶而立也。南面者，欲得鄉公與賓也。

**疏**「贊者」至「于公」○注「負東」至

「賓也」○釋曰：自此盡「醬酒不祭」，論賓所祭饌之事。經直云「負東房」，鄭知「負房戶而立」者，以公在東序內，賓在戶西，<sup>④</sup>雖告具于公，且欲使賓聞之，故知於房近西，是以鄭云「得鄉公與賓也」。

公再拜，揖食。再拜，拜賓

饌具。賓降拜。荅公拜。公辭，賓升，再拜稽

首。不言成拜，降未拜。賓升席，坐取韭菹，以

辯孺于醢，上豆之間祭。孺猶染也。今文無「于」。

贊者東面坐取黍，實于左手，辯，又取稷，

辯，反于右手，興，以授賓。賓祭之。取授以

右手，便也。賓亦興受，坐祭之，於豆祭也。獨云贊興，優

賓也。《少儀》曰：「受立，授立，不坐。」**疏**「贊者東面」至

「祭之」○注「取授」至「不坐」○釋曰：此所授者，皆謂遠賓者，故菹醢及鉶皆不授，以其近賓，取之易，故不言。按

《曲禮》云「殺之序，辯祭之」，故知雖不授亦祭可知也。經直云「祭」，知「祭之於豆祭」者，按《少牢》云「戶取韭菹，辯授于三豆，祭于豆間」，故知於豆祭也。云「獨云贊興，優賓」者，欲見賓坐而不興，是優賓，其實俱興也。引《少儀》者，欲見贊興賓亦興之義，以其賓坐贊亦坐故也。三牲

之肺不離，贊者辯取之，壹以授賓。肺不離者，判之也。不言判，判則祭肺也。此舉肺不離而判之，便賓祭也。祭離肺者，絕肺祭也。壹猶稍也。古文「壹」作「一」。

**疏**「三牲」至「授賓」○注「肺不」至「作一」○釋曰：

云「肺不離者，判之也」者，按《少儀》云「牛羊之肺，離而不提心」，鄭云「提猶絕也，判之」，<sup>⑤</sup>不絕中央少者」，此即爲食而舉肺也。《少牢》云「舉肺一，長終肺，祭肺三，皆切之」，是祭肺切，舉肺不切。云「不言判，判則祭肺也」者，是與祭肺同，其實舉肺。云「祭離肺者，絕肺祭也」者，此

①「蓋」，阮校云：《要義》作「會」。

②「卻合」，阮校云：《要義》此二字倒。下同。

③「兩」，曹校云當爲「三」。

④「戶」，曹校云當爲「階」。

⑤「判」下，阮校云：毛本、《通解》有「離」字。

鄭解舉肺將祭之時，絕末而祭之，與祭肺異也。凡舉肺有

二名：一名離肺，亦名舉肺；祭肺亦名剝肺也。賓興

受，坐祭，於是云賓興受，坐祭，重牲也。賓亦每肺興

受，祭於豆祭。扱手，扱上鉶以枲，辯擣之，上

鉶之間祭。扱，以枲扱其鉶菜也。扱，拭也，拭以巾。

**疏**「扱手」至「間祭」○注「扱以」至「以巾」○釋曰：此云

「上鉶之間祭」者，著其異於餘者，餘祭於上豆之間，此鉶

別自祭鉶間。云「扱，拭也，拭以巾」者，案《內則》「左佩紛

帨」，帨即佩巾，而云「扱，拭」，拭手以巾。似帨不名巾者，

本名帨者，以拭手為名，其實名巾，故鄭舉其實稱也。此

有四鉶，而云扱上鉶，辯擣，則唯有一枲，優賓，故用一枲

而已。《少牢》二鉶，祭神，故宜各有枲也。祭飲酒於

上豆之間，魚、腊、醬、醢不祭。不祭者，非食物

之盛者。**疏**「祭飲」至「不祭」○注「不祭」至「盛者」○釋

曰：此「不祭」者，以正在饌之內，<sup>①</sup>以其有三牲之體，魚、

腊、醢、醬非盛者，故不祭也。若入庶羞則祭之，故下文云

「士羞庶羞，皆有大」，又云「辯取庶羞之大，興，一以授賓，

是亦祭之。宰夫授公飯梁，公設之于湑西。

賓北面辭，坐遷之。既告具矣，而又設此，殷勤之加

也。遷之，遷而西之，以其東上也。**疏**「宰夫」至「遷之」

○注「既告」至「上也」○釋曰：自此盡降，出，論設加饌

梁與庶羞之事。云「遷之，遷而西之，以其東上也」，知梁

東上者，下文「宰夫膳稻于梁西」，是以梁在東為上也。

公與賓皆復初位。位，序內、階西。**疏**「公與賓皆

復初位」○注「位序內階西」○釋曰：按上公設醬時立于序

內，賓立於階西，此云「公與賓復初位」，故知公還在序內，

賓還在階西也。宰夫膳稻于梁西。膳猶進也。進

稻梁者以簋。**疏**「宰夫」至「梁西」○注「膳猶」至「以簋」

○釋曰：知進稻以簋者，下記云「簋有蓋幕」，鄭注云「稻梁

將食乃設，去會於房，蓋以幕」，上云設黍稷訖，<sup>②</sup>云卻會，

此稻梁不云卻會者，先於房去之故也。士羞庶羞，皆

有大，蓋，執豆如宰。羞，進也。庶，衆也。進衆珍

<sup>①</sup>「正在」，阮校云毛本作「在正」。曹校云當依毛本倒。

<sup>②</sup>「云」，孫校據曹校改作「文」。

味可進者也。大，以肥美者特爲饗，所以祭也。魚或謂之臠，臠，大也。唯醢醬無大。如宰，如其進大羹湑，右執鐙，左執蓋。

**疏**「士羞」至「如宰」○注「羞進」至「執蓋」○

釋曰：云「皆有大」者，中有二物，三物之肉，<sup>①</sup>兼有魚也。云「魚或謂之臠，臠，大也」者，或《有司徹》云「尸俎五魚，侑，主人皆一魚，皆加臠，祭于其上」是也，《少儀》云「祭臠」也。<sup>②</sup>云「唯醢醬無大」者，鄭注《周禮·醢人》作醢之法，「先膊乾其肉，乃後莖之，雜以梁麴及鹽，漬以美酒，塗置甑中，百日則成矣」，何大饗之有也？醬則醢也，亦無大饗也。先者反之，由門入，升自西階。庶羞多，羞人不足，則相授於階上，復出取也。

**疏**「先者反之」

○釋曰：「反之」者，以其庶羞十六豆，羞人不足，故先至者反取之。下文云「先者一人升，設於稻南」，其人不反，則此云「先者反之」，謂第二已下爲「先者」也。先者一人

升，設于稻南，簋西，閒容人。簋西，黍稷西也。

必言稻南者，明庶羞加，不與正豆併也。閒容人者，賓當從閒往來也。

**疏**注「簋西」至「往來也」○釋曰：「簋西，黍

稷西也。必言稻南」者，以其黍稷西近北有稻，故庶羞設黍稷西南，南陳之，是稻梁與庶羞俱是加，<sup>③</sup>故南北相繼，

而在黍稷正饌之西，<sup>④</sup>是下「不與正豆併也」。<sup>⑤</sup>云「閒容人者，賓當從閒往來也」者，下文賓「左擁簋梁，右執湑以降。公辭，升，反奠于其所」，是賓往來也。旁四列，西

北上。不統於正饌者，雖加，自是一禮，是所謂羹載中

別。**疏**「旁四列西北上」○注「不統」至「中別」○釋曰：云

「所謂羹載中別」者，按《曲禮》云「左般右載」，彼云般，骨體也，此肉謂之羹，亦一也。般爲正饌，載謂切肉，<sup>⑥</sup>則庶羞。云「左般右載」，則曰此正饌在東，<sup>⑦</sup>庶羞在西，閒容人同，故謂「所謂羹載中別」也。腳，以東臠、臠、牛炙，腳、臠、臠，今時臠也，牛曰腳，羊曰臠，豕曰臠，皆香美之名也。古文「腳」作「香」，「臠」作「薰」。炙南醢，

<sup>①</sup>「物」，孫校據曹校改作「牲」。

<sup>②</sup>「祭臠」二字原倒，據孫校改。

<sup>③</sup>上「是」字，孫校據曹校刪。「梁」，阮校云：毛本、《通

解》無。

<sup>④</sup>「而」，阮校云：毛本作「俱」。

<sup>⑤</sup>「下」，阮校引浦鏜云誤衍。

<sup>⑥</sup>「謂」，阮校云：毛本作「爲」。

<sup>⑦</sup>「曰」，孫校據曹校改作「與」。

以西牛載、醢、牛鮓，先設醢，絳之以次也。《內則》

謂鮓爲膾，<sup>①</sup>然則膾用鮓。今文「鮓」作「鮓」。

**疏**注「先

設醢絳之以次也」○釋曰：此云「先設醢，絳之次」，而《特

牲》注云「以有醢不得絳也」，與此「先設醢，<sup>②</sup>絳之以次」

違者，大凡醢配載是其正，而醢卑于載，今牛羊豕載皆在

醢下者，直是絳之次，非尊卑之列。《特性》以一有醢，<sup>③</sup>

若絳之當醢在載上，不成錯，故不得絳。《少牢》四豆，羊

載、醢，故得絳而錯，與此同也。鮓南羊炙，以東羊

載、醢、豕炙，炙南醢，以西豕載、芥醬、魚

膾。芥醬，芥實醬也。《內則》曰：「膾，春用葱，秋用芥。」

衆人騰羞者盡階，不升堂，授，以蓋降，出。

騰當作賡，賡，送也。授，授先者一人。贊者負東房，

告備于公。復告庶羞具者，以其異饌。

**疏**「贊者」至

「于公」○釋曰：自此盡「兼壹祭之」，論贊告饌具賓祭之

事。贊升賓。以公命命賓升席。

**疏**「贊升賓」○注「以

公命命賓升席」○釋曰：前設饌訖，贊者「告具于公。公再

拜，揖食」，此使「贊升賓」者，以其禮殺故也。是以上文正

饌，公先拜，賓荅拜，此賓先拜公，公荅拜，爲異也。賓坐

席末，取梁即稻，祭于醬涪間。即，就也。祭稻

梁不於豆祭，祭加宜於加。

**疏**注「即就」至「於加」○釋

曰：云「祭稻梁不於豆祭，祭加宜於加」者，按下文云「賓三

飯，以涪醬」，注云「每飯歃涪，以肴搗醬，食正饌也，三飯

而止」。又云「不以涪醬」，<sup>④</sup>注云「不復用正饌也」。則此

涪醬是正饌，而云「加」者，但涪醬與梁皆是加，故公親設

之。下文爲正饌，而此云「加」者，爲涪醬雖是加，以在正

饌之上，得與正饌爲本，故名正饌，其實是正饌之加，故公

親設之也。贊者北面坐，辯取庶羞之大，興，

一以授賓。賓受，兼壹祭之。壹壹受之而兼一

祭之，<sup>⑤</sup>庶羞輕也。自祭之於腳臚之間，以異饌也。

**疏**

「贊者」至「祭之」○注「壹壹」至「饌也」○釋曰：「壹壹受之

①「內」，原作「肉」，據阮校引監、毛本及《禮記·內則》文改。

②「先」原作「設」，據重刊單疏本改。

③「一有」，孫校云當乙。

④「涪醬」，據下經文此二字當倒。

⑤「壹」，阮校云：《集釋》皆作「一」。「一」，阮校云：《集釋》作「壹」。



而兼一祭之，庶羞輕也」者，決上三牲之脯祭之，<sup>①</sup>今此祭庶羞并之，故云「輕也」。云「自祭之於腳腫之間，以異饌也」者，不云「於豆祭」而云「於腳腫之間」，以祭宜於加故也。<sup>②</sup>賓降拜。拜庶羞。

**疏**「賓降拜」○注「拜庶羞」

○釋曰：自此盡「魚腊不與」，論賓正食受侑幣，至於食終之事。公辭。賓升，再拜稽首。公荅再拜。

賓北面自閒坐，左擁簠梁，右執涪以降。自閒坐，由兩饌之間也。擁，抱也。必取梁者，公所設也。

以之降者，堂尊處，欲食於階下然也。公辭。賓西面

坐奠于階西，東面對，西面坐取之，栗階升，

北面反奠于其所。降辭公。奠而後對，成其意

也。降辭公，敬也。必辭公者，為其尊而親臨己食，侍食

贊者之事。**疏**注「奠而」至「之事」○釋曰：云「成其意」

者，謂成其食降階下之意，<sup>③</sup>故奠乃對。此決下文大夫相食，賓執梁與涪之西序端，主人辭，賓反之而不奠也。公

許。賓升，公揖，退于箱。箱，東夾之前，俟事之

處。**疏**注「箱東」至「之處」○釋曰：按《爾雅》「有東西廂

曰廟」，其夾皆在序外故也。知是「俟事之處」者，正以此

文公揖退于廂而俟賓食，即待事之處也。擯者退，負

東塾而立。無事。賓坐，遂卷加席，公不辭。

贊者以告公，公聽之，重來，優賓。**疏**「賓坐」至「不辭」○

注「贊者」至「優賓」○釋曰：知云「贊者以告公」，<sup>④</sup>公聽之

者，公既在序外，賓食在戶西，若不告公，公何以知之，明知贊者告公也。云「重來，優賓」者，若公來則勞賓，不來

則賓不勞，故難重來，而不來則優饒賓也。賓三飯，以

涪醬。每飯歡涪，以肴濡醬，<sup>⑤</sup>食正饌也。三飯而止，君

子食不求飽。不言其肴，優賓。**疏**「賓三飯以涪醬」○注

「每飯」至「優賓」○釋曰：云「每飯歡涪，以肴濡醬」者，按

《曲禮》「三飯，主人延客食載，然後辯殺」，鄭注云「先食

載，後食殺，殺尊」。此先食殺者，彼鄭云「大夫、士與客燕

<sup>①</sup>「脯」，盧文弨、孫校改為「肺」。下「之」字上，曹校云

似當有「一一」二字。

<sup>②</sup>「加」下，曹校云宜增「饌」字。

<sup>③</sup>「食降」，曹校云胡氏引作「降食」是也。

<sup>④</sup>「知」，孫校據曹校刪。

<sup>⑤</sup>「肴」，阮校云：毛本作「殺」。「肴」、「殺」諸本錯出，不

悉出校。

食之法，其禮食宜放《公食大夫禮》云。若然，此為禮食，故先食殽；彼大夫、士與客燕食，<sup>①</sup>則先食載，故不同。又按《昏禮》同牢，云「贊爾黍，授肺、脊，皆食以滯醬，皆祭舉、食舉也」，注云「皆食黍也。以，用也。用者，謂歡滯啣醬」。而不食殽者，此公食賓禮，解體折節，明食殽可知，彼豚解者，皆不食，故彼不食殽也。是以彼又云「三飯卒食」，注「同牢示親，不主為食起，三飯而成禮也」，故不食殽也。但滯言啜，淡故也；醬言濡，鹹故也。云「三飯而止，君子食不求飽」者，解三飯而止，故下宰夫進漿，是不求飽，故引《論語》學者「食不求飽」為證也。云「不言其殽，優賓」者，案《特牲》、《少牢》尸食時舉殽，皆言次第，此不言者，任賓取之，是優賓也。宰夫執觶漿飲與其豐以進。此進漱也，非為卒食，為將有事，緣賓意欲自潔清。賓挽手，興，受。受觶。宰夫設其豐于稻西。酒在東，漿在西，是所謂左酒右漿。<sup>②</sup>疏「宰夫」至「稻西」○注「酒在」至「右漿」○釋曰：云「酒在東，漿在西」者，案上「飲酒實于觶」，宰夫「設于豆東」，是酒在東也。云「漿在西」者，即此經設於稻西是也。云「是所謂左酒右漿」者，按《曲禮》云「酒漿處右」，鄭云「此言若酒若漿耳，

兩有之則左酒右漿」。云「兩有」者，據此公食而言，左酒右漿也。庭實設。乘皮。賓坐祭，遂飲，奠於豐上。飲漱。公受宰夫束帛以侑，西鄉立。束帛，十端帛也。侑猶勸也。主國君以為食賓殷勤之意未至，復發幣以勸之，欲用深安賓也。西鄉立，序內位也，受束帛于序端。<sup>③</sup>疏「公受」至「鄉立」○注「束帛」至「序端」○釋曰：云「西鄉立，序內位也」者，按上文公設醬，「公立于序內，西鄉」，此經亦云「西鄉立」，故知亦在「序內位也」。云「受束帛于序端」者，按《大射禮》公凡受於序端，故每云公之所受者，皆約之受於序端。賓降筵，北面。以君將有命也，北面於階上。<sup>④</sup>疏「賓降筵北面」○注「以君」至「階上」○釋曰：云「以君將有命」者，謂有束帛侑食之命，故賓降筵北面於西階上，以待主君之命。賓者進相幣。為君釋幣辭於賓。賓降辭幣，升，聽命，降辭幣，主國君又命之升。聽命，釋許辭。<sup>⑤</sup>疏「賓

①「彼」字原本無，按阮校據毛本、《通解》補。

②「於」下，阮校云：徐本、《集釋》、《通解》、楊氏、毛氏有「西」字。

降」至「聽命」○注「降辭」至「許辭」○釋曰：云「主國君又命之升」，知者，約《聘禮》禮賓「賓降辭幣，公降一等辭。栗階升，聽命」是也。降拜。當拜受幣。公辭。賓

升，再拜稽首，受幣，當東楹，北面。主國君南面授之。當東楹者，欲得君行一，臣行二也。退西楹西，東面立。俟主國君送幣也。退不負序，以將降。

**疏**「退西楹西東面立」○注「俟主」至「將降」○釋曰：按

《聘禮》「賓三退，負序」，注云「三退，三逡遁也。不言辟者，<sup>①</sup>以執圭將進授之」。彼皆當楣再拜，故賓退負序，此亦為公拜送幣，但在楹西耳，故賓在階西，「不負序，以將降」故也。公壹拜，賓降也，公再拜。賓不敢俟成

拜。介逆出。以賓事畢。賓北面揖，執庭實以出。揖執者，示親受。公降立。俟賓反。上介受

賓幣，從者訝受皮。從者，府史之屬。訝，迎也。今文曰「梧受」。

**疏**注「從者」至「梧受」○釋曰：云「從者，府史之屬」，知非士介者，此子男小聘使大夫，士介一人而已，介已受賓幣，故知訝受者非士介，是府史之屬也。賓

入門左，沒雷，北面，再拜稽首。便退則食禮未

卒，不退則嫌。更人行拜，若欲從此退。**疏**「賓人」至「稽

首」○注「便退」至「此退」○釋曰：云「便退則食禮未卒，不

退則嫌」者，此鄭探解賓意。食禮自有常法，三飯之後當

受侑幣，更人以終食禮，故送庭實而後入，是以鄭云「便退

則食禮未卒」，解經「賓人」之意。云「不退則嫌」者，謂有

貪食之嫌，解「再拜稽首」將辭之意。是以「更人行拜，若

欲從此退」者，待公設辭留賓之意也。公辭。止其拜，

使之卒食。揖讓如初，升。如初人也。賓再拜稽

首。公荅再拜。賓拜，拜主國君之厚意。賓揖介人

復位。**疏**注「賓揖介人復位」○釋曰：上文云「介逆出」，

下更云「介逆出」，明知中間介復人可知，但復人之節，當

此賓人之時也。賓降辭公，如初，將復食。賓升。

公揖，退于箱。賓卒食會飯，三飲，卒，已也，已

食會飯，三漱漿也。會飯謂黍稷也。此食黍稷，則初時食

稻粱。**疏**注「卒已也」至「稻粱」○釋曰：知會飯是黍稷

<sup>①</sup>「不言」至「以將降故也」，孫校據曹校，「皆」改作

「君」，「耳」改作「者」，「不負序」下補「者」字。曹校

云：「故」當為「此」，或「耳」故賓在階西「六字衍」。

者，見上文云「宰夫東面坐啓簋會，各卻於其西」，此云「食會飯」，故知會飯者是黍稷也。前賓三飯不云會，以其簋盛稻粱，以其稻粱無會，故鄭云「此食黍稷，則初時食稻粱」矣。

**不以醬涪。**不復用正饌也。初時食加飯，用正饌，此食正飯，用庶羞，互相成也。後言涪者，涪或時後用。

**疏**「不以醬涪」○注「不復」至「後用」○釋曰：「云」初時食加飯，用正饌，此食正飯，用庶羞，互相成也」者，按上文「賓三飯以涪醬」，注云「每飯歡涪，以穀搗醬」，是正饌，稻粱是其加，此云「卒食會飯，三飲，不以醬涪」，鄭意以庶羞黍稷是其正，庶羞是其加，互相成而已。言「相成」者，既非互文，直取饌食互相成而已。云「後言涪者，涪或時後用」者，前文「賓三飯以涪醬」，先言涪，後言醬，是先涪，此後言涪，或容前三飯後用涪也，故作文有先後也。

**挽手，興，北面坐取粱與醬以降，西面坐奠于階西，示親徹也。**不以出者，非所當得，又以已得侑幣。

**疏**注「示親」至「侑幣」○釋曰：云「不以出者，非所當得，又以已得侑幣」者，云「不以出者」，決《士昏禮》「賓取脯出，以授從者，彼是已所當得，此非直已得侑幣」。下文「有司卷三牲之俎，歸于賓館」，是已所當得。鄭不言「三牲」

而言「侑幣」者，據已得者而言之。東面再拜稽首。卒食拜也。不北面者，異於辭。

**疏**「東面再拜稽首」○注「卒食」至「於辭」○釋曰：云「卒食拜也。不北面者」，按上文賓受侑幣出，「入門左，<sup>①</sup>沒雷，北面，再拜稽首」，其時辭欲退，公留之卒食，故決之。以其待公留，故北面，此卒食禮終，故東面，為意有異，故面位不同，是以鄭云「不北面者，異於辭」也。

**公降，再拜。**荅之也。不辭之使升堂，明禮有終。

**介逆出。賓出，公送于大門內，<sup>②</sup>再拜。賓不顧。**初來揖讓，而退不顧，退禮略也，示難進易退之義。擯者以賓不顧告公，公乃還也。

**疏**「介逆」至「不顧」○注「初來」至「還也」○釋曰：云「擯者以賓不顧告公，公乃還也」者，知擯者告公者，按經「公送于大門內」，公不見賓矣，而云「賓不顧」，明知擯者告公，公還入宴寢也。<sup>③</sup>此擯者告賓不顧，即《論語》云「賓退，必復命曰：賓不顧矣」。但彼據聘享訖，此據食禮訖，

①「入」上，阮校云：毛本、《通解》有「更」字。

②「送」原作「逆」，據重刊嚴州本改。

③「宴」，曹校云當為「燕」。

事雖不同，復命云「賓不顧矣」即不異。有司卷三牲之俎，歸于賓館。卷猶收也，無遺之辭也。三牲之俎，正饌尤尊，盡以歸賓，尊之至。歸俎者，實于簠，它時有所釋故。**疏**「有司」至「賓館」○注「卷猶」至「釋故」○釋曰：云「歸俎者，實于簠」者，此食禮無所俎，而言「卷三牲之俎」，不言用俎，唯云「實于簠」。<sup>①</sup>按《士虞禮》亦無所俎，尸舉牲體皆盛於簠，吉凶雖不同，無所俎是一，故知同用簠也。云「它時有所釋故」者，解三牲之俎言「卷」。案《特牲》及《士虞》尸卒食，取俎歸於尸三个，<sup>②</sup>是有所釋，此無所釋，故稱卷也。彼注云「釋猶遺也，遺者，君子不盡人之歡，不竭人之忠也」。魚、腊不與。以三牲之俎無所釋故也。禮之有餘為施惠。不言腸胃、膚者，在魚、腊下，不與可知也。古文「與」作「豫」。

## 儀禮疏卷第二十五

江寧府知府陽城張敦仁編校 元和縣

學生員顧廣圻覆校

①

「唯」，曹校云似當為「故」。

②

「三」上，曹校云殿本增「釋」字。

## 儀禮疏卷第二十六

唐朝散大夫行大學博士弘

文館學士臣賈公彥等撰

明日，賓朝服拜賜于朝，拜食與侑幣，皆再拜稽首。朝謂大門外。

**疏**「明日」至「稽首」○注「朝謂

大門外」○釋曰：自此盡「訝聽之」，論賓拜謝主君之事。

云「朝謂大門外」者，以其經云「拜賜于朝」，無賓入之文，

又《聘禮》以樞造朝，亦無喪入之，故皆言朝云云「朝謂大

門外」也。①若然，案閔二年《左氏傳》云季友將生，使卜，

楚丘之父卜之，曰：「男也。其名曰友，在公之右。閒於兩

社，為公室輔。」注：「兩社，周社、亳社之間，朝廷執政所

在。」但諸侯左宗廟，右社稷，在大門之內，則諸侯外朝不

在大門內者，但外朝在大門外兩社之間，遙繫外朝，而言

「執政所在」。又此食禮拜侑幣，聘禮歸饗餼直言拜饗與

餼，不拜束帛者，彼使人致之，故不拜，此食禮君親賜，故

拜之。訝聽之。受其言，人告出報也。此下大夫，有士

訝。**疏**「訝聽之」○注「受其」至「士訝」○釋曰：云「此下

大夫，有士訝」者，此篇是子男使下大夫小聘。又案《周

禮·掌訝》「大夫有士訝」，故云「此下大夫，有士訝」也。

上大夫八豆、八簋、六鉶、九俎，魚、腊皆二

俎。記公食上大夫異於下大夫之數。豆加葵菹、蜩醢，

四四為列，俎加鮮魚、鮮腊，三三為列，無特。**疏**「上大

夫」至「二俎」○注「記公」至「無特」○釋曰：云「豆加葵菹、

蜩醢」者，案《周禮·醢人》朝事之豆云「韭菹、醢醢、昌本、

麋醢、菁菹、鹿醢、茆菹、麋醢」。案上文下大夫六豆，用鹿

醢，以下仍有茆菹、麋醢在。今上大夫八豆，不取茆菹、麋

醢而取饋食之豆「葵菹、蜩醢」者，鄭以《特牲》、《少牢》參

之，彼二篇俱以饋食為始，皆用《周禮》饋食之豆。特性兩

豆，用饋食葵菹、蜩醢。少牢四豆，二豆與特性同，兩豆用

朝事之豆「韭菹、醢醢」，注云「韭菹、醢醢，朝事之豆也，而

饋食用之，豐大夫禮」。以此觀之，故此《公食大夫》兼用

①「故」，曹校云殿本改作「文」，屬上讀。上「云」字，曹

校云殿本改作「故」。

饋食之豆，亦是「豐大夫禮」也。云「俎加鮮魚、鮮腊」者，上文下大夫七俎，牛、羊、豕、魚、腊、腸胃與膚，此云「九俎」，明加鮮魚、鮮腊。云「無特」者，陳饌要方，上七俎者，東西兩行爲六俎，一俎在特于俎東，此九俎爲三行，故無特，雖無特，膚亦爲下。魚、腸胃、倫膚，若九若十

有一，下大夫則若七若九。此以命數爲差也。九

謂再命者也，十一謂三命者也，七謂一命者也。九或上或下者，再命謂小國之卿，次國之大夫也，卿則曰上，大夫則曰下。大國之孤視子男。

**疏**「魚腸」至「若九」○注「此

以「至「子男」○釋曰：云「此以命數爲差也」者，案《周禮·典命》公侯伯之卿三命，大夫再命，士一命；子男之卿再命，大夫一命，士不命。則諸侯之臣分爲三等，三命、再命、一命，不命與一命同。此經魚、腸胃、倫膚亦分爲三等，有十一，有九，有七，則十一當三命，九當再命，七當一命。若然，唯有上下二文者，以公侯伯之大夫與子男之卿同再命，卿爵尊爲上，大夫爵卑爲下。則上言「若九」者，子男之卿也，下言「若九」者，公侯伯大夫也。①故鄭云「卿則曰上，大夫則曰下」。云「大國之孤視子男」者，欲見此經唯見三命以下。案《周禮·典命》大國之孤四命，又

《大行人》云「大國之孤，執皮帛以繼子男」，又云「其他皆視小國之君」。若然，孤與子男同十三，侯伯十五，上公十七，差次可知。庶羞，西東毋過四列。謂上下大夫也。古文「毋」爲「無」。

②**疏**「庶羞」至「四列」○注「謂

上」至「爲無」○釋曰：上文云庶羞「旁四列」，此上下大夫饌內言「庶羞，西東毋過四列」，則東西橫行，上下大夫皆四以爲行，下大夫四四十六，東西四行，南北亦四行，上大夫東西四行，南北五行矣。上大夫庶羞二十，加於

下大夫以雉、兔、鶉、鴛。鴛，無母。

**疏**「上大」至

「鶉鴛」○注「鴛無母」○釋曰：云「鴛無母」者，案《爾雅·釋鳥》云「鴛，鶉母」，郭氏曰「鶉也，青州人呼曰鶉母」。《莊子》曰「田鼠化爲鶉」，《淮南子》云「蝦蟇所化」也，《月令》曰「田鼠化爲鶉」，然則鶉、鶉一物也。若不親食。

謂主國君有疾病，若它故。

**疏**「若不親食」○注「謂主」至

「它故」○釋曰：自此盡「聽命」，論主君不親食，使大夫致禮於賓館之事。疾病之外別云「他故」者，君有死喪之事。

①「伯」下，阮校云：《要義》有「之」字。

②「爲」，阮校云：鍾本作「作」。

故《聘禮》云「主人畢歸禮，賓唯饗餼之受」，謂畢致饗食，但賓不受之。使大夫各以其爵，朝服，以侑幣致之。執幣以將命。豆實實于甕，陳于楹外，

二以並，北陳。簋實實于筐，陳于楹內，兩楹間，二以並，南陳。陳甕，筐於楹間者，象授受於堂中也。南北相當，以食，饌同列耳。甕北陳者，變於食。

甕數如豆，醢、芥醬從焉，筐米四。今文「並」作「併」。

**疏**

「豆實」至「南陳」○注「陳甕」至「作併」○釋曰：云「南北相當，以食，饌同列耳」者，案上文正食之時，黍稷亦南陳，今於楹間陳筐米亦南陳，是正食及此饌陳是同列也。<sup>①</sup>云

「甕北陳者，變於食」者，上文正食之時，「宰夫自東房薦豆六，設於醬東，西上」陳之，今於楹間，二以併，北陳，故云

「變於食」也。云「甕數如豆」者，以菹、醢各異物，不可同甕，故甕數如豆，上大夫八豆則八甕，下大夫六豆則六甕。

云「醢芥醬從焉」者，以其三牲不殺生，列於門內，醢經百日乃成，不由不殺，<sup>②</sup>故有醢。庶羞之醢同是醬類，故使

之相從。但庶羞之醢更無別種，宜同一甕，芥醬宜亦一甕。知有芥醬者，以其有生魚，故知有也。云「筐米四」

者，上文上大夫八簋，今乃生致之，黍稷宜各一筐，稻粱又

二筐，故云「筐米四」。庶羞陳于碑內。生魚也，魚

腊從焉。上大夫加鮮魚、鮮腊、雉、兔、鶉、鴛。不陳于堂，辟正饌。**疏**「庶羞陳于碑內」○注「生魚」至「正饌」○釋

曰：云「生魚」者，上文「魚膾」是魚之中膾者，皆是生魚也。案鄭注《周禮》云「燕人膾魚方寸，切其腴以啗所貴」是也。

此則全生不膾，何者？本膾在豆，<sup>③</sup>與載炙俱設。今載炙在牲未殺，膾全不破可知。若然，庶羞之內衆羞俱有，

鄭獨云「生魚」者，以其載炙在牲不殺，於此無矣，雖有乾腊、雉、兔之等，以生魚爲主，故云「生魚」也。云「魚、腊從

焉」者，雖無三牲之肉，有乾魚、腊可知。云「上大夫加鮮魚、鮮腊、雉、兔、鶉、鴛」者，以其下大夫七鼎，無鮮魚、鮮

腊，上大夫九鼎，加鮮魚、鮮腊可知。雉、兔、鶉、鴛亦生致之矣。云「不陳于堂，辟正饌」者，以其庶羞本在堂上正饌

之西，今在「碑內」，故云「辟正饌」也。若然，不陳於碑南者，以其本合在堂，今宜近堂，故在碑北。庭實陳于碑

<sup>①</sup> 下「是」字，曹校云似衍。

<sup>②</sup> 下「不」字，曹校云當爲「于」。

<sup>③</sup> 「本」原作「十」，據重刊畢疏本改。孫校云「十」當作「上」。



外。執乘皮者也。不參分庭一在南者，以言歸，宜近內。

**疏**「庭實陳于碑外」○注「執乘」至「近內」○釋曰：「執乘皮者。不參分庭一在南者，以言歸，宜近內」者，庭實正法，皆參分庭一在南而陳之。故《昏禮·記》云納徵執皮者「參分庭一在南」，今云「碑外」，繼碑而言，近北矣。彼參分庭一在南陳之者，謂在主人之庭，參分庭陳之，<sup>①</sup>擬與賓向外，故近南，此陳於客館，擬與賓入內，故鄭云「以言歸，故在內」也。牛、羊、豕陳于門內西方，東上。爲其踐汙館庭，使近外。

**疏**「牛羊」至「東上」○注「爲其」至「近外」○釋曰：案上庶羞與庭實在碑之內，<sup>②</sup>近內陳之，此牛羊豕「陳於門內」，繼門言之，云「爲其踐汙館庭，使近外」也。若然，致饗饌牛、羊、豕亦在此，此云「使近外」者，以饗饌有腥有熟，故略其生者，近門是其常，此既不殺，牛、羊、豕宜近內，故決之也。賓朝服以受，

如受饗禮。朝服，食禮輕也。

**疏**「賓朝」至「饗禮」○注「朝服食禮輕也」<sup>③</sup>○釋曰：云「朝服，食禮輕」者，以其歸饗饌時卿韋弁，賓皮弁受，此食禮，賓朝服受，不皮弁，故云「食禮輕」。無擯。<sup>④</sup>以己本宜往。

**疏**「無擯」○

注「以己本宜往」○釋曰：云「以己本宜往」者，明主君無故速賓，在廟行食禮，而有侑幣，賓無償法，主君有故致食禮，并有侑幣，亦不合有償，故云「以己本宜往」。明日，

賓朝服以拜賜于朝，訝聽命。賜亦謂食侑幣。

**疏**注「賜亦謂食侑幣」○釋曰：云「亦」者，亦上速賓食時，拜食與侑幣，今亦然，故云「亦」。大夫相食，親戒、速。記異於君者也。速，召也。先就告之，歸具，既具，復自召之。

**疏**「大夫」至「戒速」○注「記異」至「召之」○釋曰：自此盡「大夫之禮」，論主國大夫食賓之禮，別於主君之事。云「記異於君者」，案下文「其他皆如公食大夫之禮」，故知自此已下，皆記異於君法，<sup>⑤</sup>是以此經大夫親戒、速，決君不親戒、速，此則異於君也。以其下諸文皆異，故云「記異於君者也」。云「先就告之，歸具，既具，復

①「庭」下，阮校云：毛本有「一」字。

②「內」下，曹校云脫「外」字。

③「輕」字原無，據重刊單疏本補。

④「擯」，阮校云：《通解》、楊氏、毛氏作「償」。

⑤「法」原作「注」，據重刊單疏本改。

自召之」者，以其戒具兩有，<sup>①</sup>皆親爲之，故爲此解。與《鄉飲酒》、《鄉射》同，故彼二文皆云戒賓，既歸布筵設尊，乃親速賓是也。迎賓于門外，拜至，皆如饗拜。

饗，大夫相饗之禮也，今亡。古文「饗」或作「鄉」。降盥，受醬、涪、侑幣束錦也，皆自阼階降堂受，授者升一等。皆者，謂受醬、受涪、受幣也。侑用束錦，大夫文也。降堂，謂止階上。今文無「束」。賓止也。主人三降，賓不從。

**疏**「賓止也」○注「主人三降賓不從」○釋曰：云「主人三降」者，案上文鄭注「皆者，謂受醬、受涪、受幣」，皆自阼階降，此鄭云「主人三降」，即上三者。不數主人降盥者，案《鄉飲酒》所言降盥者，皆爲洗爵，故賓從降，此降盥不爲洗爵，故鄭不數之。案《聘禮》致饗餼，「賓降堂，受老束錦。大夫止」，注云「止不降，使之餘尊」。此賓不降者，雖賓主敵，以主人降堂不至地，故賓止不降也。賓執梁與涪之西序端。不敢食於尊處。

**疏**「賓執」至「序端」○注「不敢食於尊處」○釋曰：此兩大夫敵，故之西序端。上公食大夫，大夫降階下，臣卑故也。主人辭。賓反之，卷加席。主人辭。

賓反之，辭幣，降一等，主人從。從，辭賓降。受侑幣，再拜稽首。主人送幣亦然。敵也。

**疏**「受侑」至「亦然」○注「敵也」○釋曰：案《郊特牲》云：

「大夫之臣不稽首，非尊家臣，以辟君也。」又案《左氏傳》哀十七年：「公會齊侯盟于蒙，孟武伯相。齊侯稽首，公拜。齊人怒，武伯曰：『非天子，寡君無所稽首。』」若然，臣於君乃稽首，平敵相於當頓首，<sup>②</sup>今言敵而稽首者，以食禮相尊敬，雖敵亦稽首，與臣拜君同故也。辭於主人，

降一等。主人從。辭謂辭其臨己食。卒食，徹于西序端。亦親徹。東面再拜，降，出。拜，亦拜卒食。其他皆如公食大夫之禮。

**疏**「其他」至「之禮」○釋曰：云「其他」，謂豆數、俎體、陳設皆不異上陳。但禮異者，謂「親戒、速」，君則不親迎賓，公不出，此大夫出大門。公受醬、涪、幣不降，此大夫則降也。公食大夫，大夫降食於階下，此言「西序端」。上公食「卷加

<sup>①</sup> 「具」，曹校云當爲「速」。

<sup>②</sup> 「於」，阮校云：毛本作「施」。

席」，公不辭，此則辭之。皆是異也。若不親食，則公作大夫朝服以侑幣致之。作，使也。大夫有故，君必使其同爵者爲之致禮。列國之賓來，榮辱之事君臣同。賓受于堂。無擯。與受君禮同。**疏**「賓受于堂無擯」○注「與受君禮同」○釋曰：云「與受君禮同」者，《聘禮》賓受致饗幣，云「堂中西，北面」，注「趨主君之命也。堂中西，中央之西」。此雖無擯，受幣亦與之同也。

記。不宿戒。食禮輕也。此所以不宿戒者，謂

前期三日之戒，申戒爲宿，謂前期一日。**疏**「記不宿戒」

○注「食禮」至「一日」○釋曰：祭祀散齊七日爲戒，致齊三日爲宿，此則與祭祀異。此不宿戒者，謂不爲三日之戒，又不爲一日之宿，故鄭云「此所以不宿戒者，謂前期三日之戒，申戒爲宿，謂前期一日」者。<sup>①</sup>若然，必知三日之戒，一日之宿者，《大射》前期三日，「宰夫戒宰及司馬」，又《少牢》辟人君，有前期一日之宿。此雖人君禮，以食禮輕，故知有三日之戒，<sup>②</sup>一日之宿。既無前日之事，宜與《鄉飲酒》、《鄉射禮》同，當日爲之，故皆不言日數。故下注云「食賓之朝，宿興戒之」。<sup>③</sup>賓則從戒而來，<sup>④</sup>不復召」是也。戒不速。食賓之朝，夙興戒之。賓則從戒者而

來，不復召。不授几。異於醴也。**疏**「不授几」○注

「異於醴也」○釋曰：決禮賓時，公親授几也。無阼席。

公不坐。亨于門外東方。必於門外者，大夫之事也。

東方者主陽。**疏**「亨于門外東方」○注「必於」至「主陽」

○釋曰：案上經甸人、亨人之等，亨人是士官，不得言「大夫之事」，言「大夫之事」者，解亨在門外之禮也。《燕禮》

注云「亨於門外，臣所掌也」，言臣亦是大夫事。《少牢》廩

饗饗饗皆在門外，亦大夫事。《特牲》云「主婦視饔饗于西

堂下」者，以其無廩人主之，故在內。若然，《鄉飲酒》雖是

大夫之事，以其取祖陽氣之始，故亦於門內。司宮具

几與蒲筵常，緇布純。加萑席尋，玄帛純。

皆卷自末。司宮，大宰之屬，掌宮廟者也。丈六尺曰

常，半常曰尋。純，緣也。萑，細葦也。未經所終，有以識

之。必長筵者，以有左右饌也。今文「萑」皆爲「莞」。**疏**

①「者」，曹校云此字衍。

②「有」，曹校云當爲「無」。

③「宿」，曹校云當爲「夙」。

④曹校云下注「戒」下有「者」字。

「司宮」至「自末」○注「司宮」至「爲莞」○釋曰：云「司宮，大宰之屬，掌宮廟」者，案《燕禮》云「司宮尊于東楹之西」，注「司宮，天子曰小宰，聽酒人之成要者也」，注雖不同，其義一也。但《燕禮》司宮云設尊，故以「小宰」解之，此司宮設几席，故以「大宰之屬」解之。案大宰之下有宮人，掌宮中除汙穢之事，即此司宮。彼不言設几席者，以天子具官，別有司几筵，又有小宰，諸侯兼官，故司宮兼司几筵及小宰也。云「丈六尺曰常，半常曰尋」者，此皆無正文。案《周禮·考工記》云「車有六等之數」，云「軫崇四尺，謂之一等」，又云「戈長六尺六寸，既建而弛之，崇於軾四尺，謂之二等。人長八尺，崇於戈四尺，謂之三等。爰長尋有四尺，崇於人四尺，謂之四等。車戟常，崇于爰四尺，謂之五等。酋矛常有四尺，崇于戟四尺，謂之六等」。自軾至矛皆以四尺爲差，以是約之，即知常是丈六尺，尋是八尺也。云「萑，細葦」者，以類言之，其實全別。是以《詩》云「葭莢」，注云「葭，蘆莢」，則葦一名蘆，一名葭，一名萑，一名莢。此萑又與莞席之莞不同，彼莞謂蒲也。云「有以識之」者，席無異物爲記，但織之自有首尾可爲記識耳。云「必以長筵者，以有左右饌」者，賓在戶牖之間，南面，上陳饌之時，正饌在左，庶羞在右。陳饌雖不在席上，皆陳於

席前，當席左右，其間容人，故謂長筵也。① 宰夫筵，

出自東房。筵本在房，宰夫敷之也。天子、諸侯左右

房。疏「宰夫」至「東房」○注「筵本」至「右房」○釋曰：上

云司宮具几筵，具之在房，宰夫敷之而已。「天子、諸侯左

右房」，以其言東房對西房，若大夫、士直有東房而已，故

直云「在房」也。賓之乘車在大門外西方，北面

立。賓車不入門，廣敬也。凡賓即朝，中道而往，將至下

行，而後車還，立于西方，賓及位而止，北面。卿大夫之位

當車前。凡朝位，賓主之間各以命數爲遠近之節也。疏

「賓之」至「面立」○注「賓車」至「節也」○釋曰：云「賓車不

入門，廣敬也」者，《曲禮》云「客車不入大門」，與此同。

《覲禮》云「偏駕不入王門」，偏駕謂同姓金路之等，乘墨車

以朝，墨車亦云「不入大門」，與此亦同。云「凡賓即朝，中

道而往」者，《內則》云「男子由右，女子由左」，車從中央，

故賓乘車中道。云「而後車還，立于西方」者，案《少儀》云

「僕於君子，始乘則式，君子下行，然後還立」，注云「還車

① 「謂」，阮校引浦鏜云：「必」誤「謂」。

而立，以俟其去」，是還立于西方，鄉外。<sup>①</sup>云「賓及位而止，北面」者，案《玉藻》云「賓立不當門」，彼亦謂聘使也。

云「卿大夫之位當車前」者，案《大行人》云「上公立當軾」，侯伯「立當前疾」，子男「立當衡」，又云大國之孤「朝位當車前」者，則卿大夫立亦與孤同一節。兼云「大夫」者，小聘曰問，使下大夫，立與孤卿同當車前，故連言也。云「凡朝位，賓主之間各以命數為遠近之節」者，案《大行人》云「上公朝位賓主之間九十步」，侯伯「七十步」，子男「五十步」，注云「朝位，謂大門外賓下車及王車出迎所立處」。

又云：「凡諸侯之卿，其禮各下其君二等，以下及大夫、士皆如之。」若然，如諸侯則依命數，臣下其君二等，則不得依命數矣。而云「依命數」者，依命數據君而言，其臣依君命數而降之，故鄭摠以命數言之也。鋼芼，牛藿、羊

苦、豕薇，皆有滑。藿，豆葉也。苦，苦茶也。滑，

藿、荳之屬。今文「苦」為「芴」。

**疏**「鋼芼」至「有滑」○注

「藿豆」至「為芴」○釋曰：云「滑，藿、荳之屬」者，案《士虞·記》云「鋼芼，用苦若薇，有滑，夏用葵，冬用荳」，鄭注云「荳，藿類也，乾則滑。夏秋用生葵，冬春用乾荳」。此經云「皆有滑」，不言所用之物，故取《士虞·記》解之。云

「之屬」者，其中兼有葵也。贊者盥，從俎升。俎，其

所有事。**疏**「贊者盥從俎升」○注「俎其所有事」○釋曰：

直言此者，豆亦從下降，不言從豆升者，贊者不佐祭豆，直佐祭俎，故云「俎，其所有事」，是以上經云「三牲之肺不離」，<sup>②</sup>贊者辯取之，壹以授賓」。若然，黍稷亦贊祭，不從黍稷升者，<sup>③</sup>黍稷設之在後故也。黍稷雖後升，先祭者，以其先食黍稷，後食肉故也。簠有蓋、幕。稻梁將食乃設，去會於房，蓋以幕。幕，巾也。今文或作「幕」。

**疏**

「簠有蓋幕」○注「稻梁」至「作幕」○釋曰：簠簠相將，簠既有會，明簠亦有會可知。但黍稷先設，故卻會於敦南，<sup>④</sup>簠盛稻梁，將食乃設，故鄭云「去會于房，蓋以幕。幕，巾也」。至於陳設，幕亦去之，經云「有蓋、幕」者，據出房未設而言。凡炙無醬。已有鹹和。

**疏**「凡炙無醬」○注

「已有鹹和」○釋曰：云「凡」者，欲解《儀禮》一部之內，牛、

①「外」，曹校云似當為「內」。

②「牲」原作「特」，據上經文改。

③「從」原作「彼」，據重刊單疏本改。

④「敦南」，曹校云當為「簠西」。

羊、豕炙皆無醬配之。云「已有鹹和」者，若今人食炙然。

上大夫蒲筵，加萑席，其純皆如下大夫純。

謂三命大夫也。孤爲賓則莞筵紛純，加纁席畫純也。

**疏**

「上大」至「夫純」○注「謂三」至「純也」○釋曰：經云「上大夫」，不辨命數，則子男之卿再命，其席亦同下大夫。鄭言

「謂三命大夫」者，欲見公侯伯之卿三命，亦與子男下大夫同，公之孤四命，其席則異，鄭據三命而言。云「孤爲賓則

莞筵紛純，加纁席畫純」者，案《周禮·司几筵》云「筵國賓

于牖前，莞筵紛純，加纁席畫純，云左彤几」，<sup>①</sup>與此記三命已下席不同，故知彼國賓謂筵孤也。無正文，故云「則」

也。卿擯由下。不升堂也。

**疏**「卿擯由下」○注「不

升堂也」○釋曰：此謂上擯，擯詔賓主升降周還之事，故云

「不升堂」。上贊，下大夫也。上謂堂上。擯贊者事

相近，以佐上下爲名。

**疏**「上贊下大夫也」○注「上謂」至

「爲名」○釋曰：案上經云「贊者告具於公」，而贊賓食，故

云「上贊」，使下大夫爲之。上大夫庶羞，酒飲、漿

飲，庶羞可也。於食庶羞，宰夫又設酒漿，以之食庶

羞可也，以優賓。

**疏**「上大夫」至「可也」○注「於食」至

「優賓」○釋曰：案上經云「上大夫庶羞二十豆」，此記人復

記之者，欲見上大夫食加飯之時，得兼食庶羞。又食會飯

及庶羞之時，宰夫更設酒飲、漿飲，故鄭云「於食庶羞，宰

夫又設酒漿，所以食庶羞可也」。<sup>②</sup>所以然者，優賓故也。

拜食與侑幣，皆再拜稽首。嫌上大夫不稽首。

儀禮卷第九經一千七百六十 注二千七百八十三

儀禮疏卷第二十六上元通後，今分，依《要義》。

①「云」，曹校云此字衍。

②「所以」，阮校云毛本作「以之」。

## 鳴謝

《儒藏》精華編惠蒙善助，共襄斯文；謹列如左，用伸謝忱。

本煥法師

壹佰萬元

智海企業集團董事長 馮建新先生

壹佰萬元

NE·TIGER 時裝有限公司董事長 張志峰先生

壹佰萬元

張貞書女士

壹佰萬元


本册审稿人

張文

本册責任編委

王豐先





[General Information]

书名=14190435

SS号=14190435